

Третій томъ Антоу, относящихся къ Исторіи Западной Россіи, при-
готовленъ къ изданію и напечатанъ подъ наблюденіемъ Члена и Глав-
наго Редактора Археографической Коммиссіи, Собственнаго Его Импе-
раторскаго Величества Дворца Протоіеря Іоанна Григоровича,

А К Т Ы ,

ОТНОСЯЩИЕСЯ КЪ ИСТОРИИ

ЗАПАДНОЙ РОССІИ.

VII. ГОСУДАРСТВОВАНИЕ СИГИЗМУНДА II-го АВГУСТА.

1. — 1544 Декабря 17. Королевская гра-
мота князю Андрею Соколинскому, о не-
присвоеніи людей; приписанныхъ братомъ его къ
отчинъ Кіевскаго Печерскаго монастыря.

Жикгимонтъ Августъ, Божю милостью ко-
роль Польскій, великій князь Литовскій, Рус-
кій, Прускій, Жомойтскій, Мазовецкій и
иныхъ, дворянину нашему князю Андрею Се-
меновичу Соколинскому. Тыхъ часовъ писалъ
и присылалъ до насъ архимандритъ Кіевскій
пречистовъ Богоматери Печерскій Василъ,
жалующи о томъ, штожь дей которые люди
братъ твой вымѣнявши у тебе на выслугу
свою, у Старыничи и на Грушцѣ, далъ и за-
писалъ на церковь Божью пречистовъ Богома-
терь; то пакъ дей ты тые люди отъ церкви
Божьи отнимаешь и дани отъ колька лѣтъ до
монастыря тымъ, людемъ давати не кажешь,
въ чомъ ся церкви Божьи отъ тебе кривда и
школа немалая дветъ. А про то, кдгыжъ то
небожчикъ братъ твой на церковь Божью от-
писалъ, приказуемъ тобъ, подъ зарукою на-
шою подъ стома копами грошей, ажъбы еси,
черезъ то, въ тые люди ничимъ ся не всту-
палъ, и дани на церковь Божью имъ давати не
заборонялъ, и заховалъ ся къ нимъ во всемъ
водлѣ листу брата своего; пакъ ли жъ бы еси
и о сее розказанье наше ничего не дбаючи,

предься тые люди отъ церкви Божьи отдаля- № 1-2
ти хотѣлъ, въдай певнѣ, инъ пошлемъ дво-
рянина нашего и кажемъ тые люди къ церкви
Божей привернути, а на тобъ тоъ заруки
нашое смотрѣти будемъ. Писанъ у Вильни,
подъ лѣты Божьего нароженъа 1544, мѣсяца
Декабря въ 17 день, индикта 3.

Подлинникъ писанъ на бумажномъ полулистѣ,
небрежною скорописью, безъ знаковъ препинанія.
Лѣтосчисленіе церковными буквами. Внизу гра-
моты приложена перстневая королевская пе-
чатъ, вытиснутая на красновосковой массѣ.
Тамъ же скрипка: Иванъ Горностай. На оборо-
тѣ современная надпись: Листъ господарскій до
князя Андрея Соколинскаго. Вѣтъа.

Хранится въ архивѣ бывшихъ Греко-Унит-
скихъ Митрополитовъ, при Святѣйшемъ Си-
нодѣ.

2. — 1445 Декабря 9. Королевская гра-
мота Кіевскому митрополиту Макарію,
о разсмотрѣніи жалобы боярыни Томилы Ги-
тововны, по поводу расторженія Полоцкимъ
владыкою Симеономъ брака ея съ митрополичь-
имъ сыномъ, которому затѣмъ дозволилъ онъ
вновь жениться на своей племянницѣ.

Жикгимонтъ Августъ, Божю милостью ко-
роль Польскій, великій князь Литовскій, Рус-

№ 2. кій, Прускій, Жомонтскій, Мазовецкій и иныхъ, архіепискупу Митрополиту Кіевскому и Галицкому и всея Руси Макарію. Тыхъ часовъ жаловала намъ боярыня наша Томила Кгитовтовна на архіепискупа владыку Полоцкого и Витебского и Мстиславьского Симиона, о томъ, штожь дей она первѣй сего была замужомъ за бояриномъ нашимъ Полоцкимъ, за Иваномъ митрополымъ сыномъ, и мѣшкала дей съ нимъ въ томъ малженствѣ болшѣ нижели осмнадцать годовъ, а потомъ дей тотъ мужъ еѣ Иванъ, невѣдомо съ чіи намовы, многократъ еѣ збивалъ и мордѣрства великіи кромъ еѣ винности надъ нею чинилъ; за которыми же мордѣрствомъ великимъ, она съ жалобою до владыки Полоцкого ся была втекла, и о томъ на того мужа своего ему жаловала и просила, абы онъ водлѣ права духовного того межи ними досмотрѣлъ и оного мужа еѣ отъ того повстѣгнулъ, ижьбы онъ такового окрутенства чинити ей пересталъ, и водлѣ обычая закону малженского зъ нею мѣшкалъ; и онъ дей позвы свои по того мужа еѣ далъ, которыми жъ дей позвы она его передъ него къ праву позвала; и гды дей рокъ позванный пришолъ, она дей будучи передъ нимъ очивисто съ тымъ мужемъ своимъ, ему ся о томъ на него жаловала: ино дей владыка Полоцкій, за еѣ жалобою и за еѣ припозваньемъ къ праву, съ тымъ мужемъ еѣ, нѣтъ вѣдома въ который обычай, не подлѣ обычаю хрестіанского и не подлѣ правилъ святыхъ отецъ закону вашего Греческого, еѣ розлучилъ, а тому дей Ивану другую жону, сестричю свою властную, поняти дозволить. Гдыжь дей она того права его листу судового у него просила, хотячи вѣдати причину, для котороѣ онъ съ тымъ мужемъ еѣ розлучилъ: онъ дей на то листу, а ни выпису суда своего дати ей не хотѣлъ; и скоро дей по томъ его розлученію, тотъ мужъ еѣ Иванъ, тогожь часу, отъ всего статку еѣ, што-козвекъ она идучи за того Ивана замужъ въ домъ его бы-

ла принесла, изъ дому прочъ отъ себе еѣ выгнавъ, какъ же дей вжо тому четвертый годъ идетъ, яко она за тымъ его розлученіемъ по люддемъ ся кормитъ. Для чогожь дей она въ немалыѣ шкоды и въ долги пришла, которыхъ же дей шкоды и утратъ ни отъ кого иного не маєтъ, одно отъ него, для того его неслухного розлученія: которыхъ жо статковъ и утратъ своихъ реистръ она у себе маєтъ, и на правъ его положить и о томъ о всемъ, яко о неслухное розлученіе его съ тымъ мужемъ еѣ Иваномъ, такъ тежъ и о тыхъ шкодахъ своихъ, хочеть она зъ нимъ передъ тобою очивисто мовити. — Про то, абы твоя милость зъ уряду а столца своего митропольного, того владыку Полоцкого обослалъ и передъ собою стати ему розсказалъ, и въ тую справу и въ судъ его вглянулъ, и о томъ розводъ малженства ихъ и о шкоды еѣ межи ними досмотрѣлъ, и справедливость и разознаніе водлѣ обычаю и права вашего духовного въ томъ ей съ нимъ вчинилъ; и, гды бы ся то оказало, ижь онъ неслухнѣ и не водлѣ права вашего духовного оный разводъ малженства ихъ вчинилъ, твоя бы милость водлѣ обычаю закону и права вашего духовного въ томъ еѣ заховалъ, и владыцъ Полоцкому оного неслухного розлученія малженства ихъ (што есть противку Богу и съ погоршеніемъ многихъ людей закону вашего) легцѣ не опушалъ, а такъ бы того зъ столца своего дозрѣлъ, яко ся на таковыхъ у правъ вашемъ духовномъ описуетъ, абы иншіе владыки на то смотрѣчи отъ того ся повстѣгали, и таковыхъ неслухныхъ разводовъ и блудовъ непотребныхъ, къ погоршенію иншихъ многихъ людей а къ легкости закону вашего, чинити не смѣли. Писанъ у Вильни, подъ лѣты Божьего нароченія 1545, мѣсяца Декабря въ 9 день, индикта 4. — «Валеріянъ писарь».

Современный список, писанный сплошною скорописью, безъ строчныхъ знаковъ, хранится въ архивъ бывшихъ Греко-Унитскихъ Митрополитовъ, при Святѣйшемъ Синодѣ.

3. — 1546 Февраля 13. Королевская грамота Кіевскому митрополиту Макарію, о созваніи на Соборъ православнаго Русско-Литовскаго духовенства, для изысканія и постановленія мѣръ къ прекращенію безпорядковъ между клиромъ и мірянами.

Жикгимонтъ Августъ, Божюю милостью король Польскій, великій князь Литовскій, Рускій, Прускій, Жомонтскій, Мазовецкій и иныхъ, архіепискупу митрополиту Кіевскому, Галицкому и всея Руси Макарію. Выrozumѣли есмо съ повѣсти многихъ нѣкоторыхъ князей и пановъ, и тыи слухи насъ доходятъ о нерядности и несправѣ, которая ся дѣетъ межи духовенства вашего Греческого закону, такожь межи князей и пановъ и простыхъ людей въ законѣ вашемъ, а зваща, ижь межи владыкъ всехъ, яко на Волыни ся дѣетъ, ижь не подлѣ правилъ святыхъ отецъ и ни подлѣ права, блуды и распущенства ся великіи дѣютъ; а твоя милость, яко старшій ихъ пастырь, того вѣдати, а чи вѣстѣгати не хочешъ. Для чогожь мы, маючи бачность первѣй на церкви Божьи и на вѣры хрестіанскіи, и тотъ блудъ хотячи повстѣгнати, и въ доброй справѣ, яко и костелы наши Римскіи, такъ и ваши церкви подлѣ вѣры ваше заховати, видѣлося намъ, абы твоя милость вчинилъ на то Соборъ духовный во всей митрополіи своей, и послалъ по всемъ епискупомъ и архимандритомъ и по всему духовенству вѣры ваше, которыхъ суть подъ справою твоей милости, и о томъ намову зъ ними вчинилъ, и винныхъ карати велѣлъ, подлѣ правилъ святыхъ отецъ, яко ся мають въ законѣ вашемъ справовати. — Про то, абы еси всехъ епискуповъ листы нашими господарьскими обослалъ, ижьбы они на рокъ отъ насъ назначонный, по Велицъ — дни нынѣшнемъ святѣ пришломъ, то есть, на Вознесенье Господне, здѣся до Вильни, къ твоей милости, яко къ старшому пастырю своему, на Соборъ ся зѣбхали, и тыхъ, кого бы вѣдали не въ законѣ мѣшкающихъ и блуды и нестроенія про-

тивъ Богу и правилъ святыхъ отецъ чинили, № 3. тыхъ бы всехъ передъ твою милость припозвали; и о всемъ томъ нестроенію закону вашего намовившихъ, подлѣ правилъ святыхъ отецъ постановеніе слухное и справу вчинили; а твоя бы милость самъ здѣся на тотъ рокъ у Вильни былъ. А мы, съ звирхности наше господарьское, хочемъ во всехъ тыхъ рѣчахъ твоей милости помогати, абы черезъ то нѣкоторого блуду и нестроенія межи хрестіанства въ панствѣ нашемъ не было, которое ся почало и тыхъ часовъ дѣетъ; за которыми прѣханьемъ вашимъ, на онъ часъ, вамъ то ознаямъ, што маєте межи собою справовати, и тыи распущенства вѣры и закону вашего неслухнѣ чиненны повѣстѣгати и слухное постановеніе учинити. Писанъ у Вильни, подъ лѣты Божьего нароченія 1546, мѣсяца Февраля въ 13 день, индикта 4.

Подлинникъ писанъ на бумажномъ листѣ, крупною скорописью, безъ знаковъ строчныхъ. Лѣтосчисленіе церковными буквами. Бывъ сложенъ пакетомъ и запечатанъ красновосковою печатью, имѣетъ надпись: Архіепискупу митрополиту Кіевскому, Галицкому и всея Руси. Ниже: въ рѣчахъ духовныхъ. Тутъ же и скрипа: Иванъ Горностай.

Хранится въ архивъ бывшихъ Греко-Унитскихъ Митрополитовъ, при Святѣйшемъ Синодѣ.

4. — 1547 въ Январѣ. Просьбы Литовскихъ чиновъ, дворянъ и рыцарей королю Сигизмунду Августу, на Виленскомъ сеймѣ, о подтвержденіи прежде данныхъ имъ правъ, о исправленіи Статута, выборѣ судей и «вижовъ», о устраненіи духовенства отъ святскихъ судовъ, а иноземцевъ отъ «урядовъ», о сборѣ и храненіи «серебицизны», сыскѣ бѣглыхъ людей, опредѣленіи границъ между Литвою и Польшею и проч. и Отвѣты королевскіе на оныя.

Отказъ отъ господара короля его милости и

№ 4. великого князя Жигимонта Августа всем княжатамъ и панятомъ и всему рыцерству, на тыгръчи, которыхъ они на писмъ королю его милости дали на томъ теперешнемъ вальномъ соймъ Виленскомъ, лѣта Божьего рожденья 1547, мѣсяца Генваря.. дня, индикта 5.

Артыкулъ 1. Прозьба. Напервѣй, што ваша милость вси сполнѣ, продкемъ, яко панове рада ихъ милость обоего стану, духовного и свѣтского, такъ и вси княжата, панята и все рыцерство, обыватели того паньства великого князства Литовского, мовили его королевской милости, чоломъ бьючи и жадаючи его милости въ томъ: кгдажь панъ Богъ рачилъ то зрадити, ижь его королевская милость осѣсти рачилъ на томъ панствѣ своемъ отчизномъ великомъ князствѣ Литовскомъ, и то теперь, за шастливого панованья его королевскоѣ милости есть первшый вальный съемъ, на который его милость рачилъ казати вашей милости паномъ радамъ, княжатамъ и панятомъ, и вамъ всему рыцерству, для пильныхъ и важныхъ справъ его милости господарьскихъ и земскихъ, тутъ до Вильни къ собѣ зѣхатися, абы его королевская милость, водлѣ звыкло- сти предковъ своихъ королей ихъ милости и великихъ князей, зѣ ласки и добротливости своеѣ паньскоѣ, рачилъ расказати, вамъ вси права вольности ваши, предкомъ вашимъ и вамъ отъ предковъ и отца его милости, за вѣрныи службы и за частыи кровопролитья предковъ вашихъ и васъ самихъ даныи, оказати, ижь бы есте то слышачи и видячи што предковѣ ваши выслужили, съ того ся веселили и тымъ охотнѣй его королевской милости пану своему и рѣчи посполитой служити могли, горла и статковъ и маетности своеѣ на послугахъ его милости не митуючи. А кгда тыи привилія листы вольностей вашихъ вамъ оказаны будутъ, абы его королевская милость рачилъ ихъ вамъ новымъ привиліемъ и листомъ своимъ господарьскимъ казати подтвер-

дити, жебы есте такую ласку его королевской милости бачучи, могли напотомъ къ послугамъ его милости господарьскимъ и земскимъ тымъ охотнѣйшыи и поспѣшнѣйшыи быти. *Отказъ.* Его королевская милость, яко панъ христіянской, бачучи въ томъ жадливость пановъ радъ ихъ милости и вашу быти слушную, тыи привилія и листы вольностей вашихъ вжо вамъ оказати и передъ вами ихъ вычести расказати рачилъ, съ которыхъ есте ласцѣ и обдаренью предковъ его милости и всимъ вольностямъ вашимъ добръ вырозумѣли. А што было жаданье ваше къ его королевской милости о подтверженье тыхъ привиліевъ вольностей вашихъ, его королевская милость, водлѣ захованья предковъ своихъ и водлѣ описанья и обвязанья отца его милости и своего, и въ томъ ласки своеѣ вамъ отмовляти не рачить, и тыи вольности ваши своимъ тежъ новымъ привиліемъ вашей милости паномъ радамъ, обоего стану, духовного и свѣтского, Римского и Греческого закону, и княжатамъ и панятомъ и всему рыцерству подтвердить и при нихъ васъ ховати обьцовати рачить; и вжо его милость тотъ привиліей свой новый пану канцлеру его милости справити вамъ расказати рачилъ.

2. Прозьба. Затымъ, што есте жадали его королевской милости, ижь кгда король его милость старшый, отецъ его милости, рачилъ васъ зѣ ласки своеѣ, за ваши службы, такимъ правомъ и вольностями обдаровати, и то въ статутъ права земского вписати, ижь «хто за короля Казимера спокойнѣ што держалъ, а за короля Александра никто ся о то не вспоминалъ, абы то вжо было вѣчнѣ держано,» — жебы его королевская милость вси выслуги, купли и иныи имѣнья, которымъ — кольвекъ обычаемъ отъ предковъ вашихъ набытыи, и чого предковѣ ваши и по нихъ вы сами въ спокойномъ держанью были, за предковъ его милости, короля Казимира и короля Александра, за отца и брата его королевскоѣ милости,

сти, и за его милости самого шастного панованья, ажъ до сего часу, рачилъ расказати все то особливимъ привиліемъ своимъ господарьскимъ на вѣчность вамъ подтвердить, жебы есте съ потомки своими на таковыхъ всихъ имѣньяхъ спокойнѣ были захованы. И который тежъ артыкулъ въ статутъ права земского есть описанъ, «ижь его королевская милость давности не маеть», вы за то его королевскоѣ милости просите, абы его милость рачилъ вамъ и въ томъ ласку свою господарскую оказати, а тотъ артыкулъ особливимъ привиліемъ своимъ зѣ статута казалъ выняти, ижьбы вжо черезъ то некотороѣ моцы не мѣлъ, жебы есте затымъ съ спокойного держанья имѣней вашихъ на вѣчныи часы не были рушены. *Отказъ.* Его королевская милость казалъ вамъ на то повѣдити, вжъ его милость съ тыхъ листовъ и привиліевъ вольностей вашихъ, отъ предковъ и отца его милости вамъ наданыхъ, которыхъ на томъ теперешнемъ соймѣ, за жадливостью вашою, рачилъ его милость казати вамъ оказати и передъ собою ихъ вычести, такъ тежъ и зѣ статуту земского, отъ отца его королевскоѣ милости, за ухвалою всеѣ земли вчиненоѣ и вамъ даноѣ, вырозумѣти рачилъ, же около тоѣ давности его милости господарьскоѣ, о которую есте теперь просили, яко въ оныхъ привиліяхъ предковъ его милости, такъ тежъ и въ статутѣ земскомъ, отъ отца его милости даномъ, вжо певное застановенье описано есть, черезъ которое не бачить его милость, абы потреба вказывала иного какого нового застановенья новымъ привиліемъ его милости чинити, а то зѣ статуту выймовати што ся вжо досыть слышнѣ и достаточнѣ постановило. Про то его королевская милость, намовивши въ томъ съ паны радами ихъ милостью, тую прозьбу вапну, о давность его милости господарскую и о имѣнья ваши выслужоныи и купленыи и икупитъ — кольвекъ обычаемъ набытыи, рачить водлѣ старыхъ привиліевъ земскихъ предковъ

его королевскоѣ милости и ухвалы первшохъ № 4. статutowoѣ, отъ отца его милости даноѣ, застановити; а иного ся его милости нового ничего въ томъ чинити не видить.

3. Прозьба. Къ тому што есте короля его милости просили, абы привилія и всякіи листы, отъ предковъ его милости предкомъ вашимъ на права и вольности ваши даныи, и тежъ тотъ привиліей, который его королевская милость за вашимъ чолобитьемъ рачить вамъ теперь, именемъ своимъ господарьскимъ, на таковыи жѣ вольности вашимъ дати, не въ скарбъ его милости земскомъ были хованы, але на inomъ которомъ певномъ особливомъ мѣстѣ, за печатыми пановъ радъ ихъ милости и тежъ вашими, а то для того, ижьбы къ тымъ привиліямъ латвѣйшый вамъ приступъ былъ, кгда бы того потреба вказывала. *Отказъ.* Его королевская милость казалъ вамъ на то повѣдити, ижь его милость звычаяючи вамъ въ томъ ласки своеѣ господарскоѣ, рачить къ той прозьбѣ вашей призволяти, и того вамъ допускати, абы тыи привилія правъ и вольностей вашихъ зѣ скарбу земского выняты и до рукъ вашихъ поданы, и съ тымъ его милости новымъ привиліемъ, который отъ его милости вамъ на тыи жѣ вольности данъ будетъ, захованы были, тамъ, гдѣ ваша воля будетъ: одножъ бы есте первѣй розмовили и зволили ся на то сполнѣ съ паны радами ихъ милостью, гдѣ бы и на которомъ безпечномъ мѣстѣ и за чьими печатыми мѣли быти хованы.

4. Прозьба. Далѣй, што есте короля его милости просили, абы водлѣ постановленья прошлого сойму Берестейского, которое король его милость старшый, отецъ его милости, восполкъ зѣ его милостью и съ паны радами ихъ милостью, около поправленья статуту права земского вчинити рачилъ, ижь мѣли быти обраны пять особъ закону Римского, а другіе пять закону Греческого, на то годныхъ, которое жѣ поправленья статуту ажъ и до сего часу

№ 4. еще ся не стало; а такъ и теперь абы на поправление того статута были обраны и вжо наменованы таковыи особы, которые бы не фольгуючи ни чимъ пожиткомъ, одно маючи Бога и справедливость святую предъ очима, все недостатки того статута подъ присягами своими поправили; а кгда вжо будетъ поправленъ, и на другомъ пришломъ соймъ отъ его королевской милости, и отъ пановъ радъ ихъ милости, и отъ всехъ васъ будетъ ухваленъ, — просите, абы былъ справленъ не писанымъ писмомъ, але выбиванымъ, и абы каждый одностайный и однословный статутъ мѣлъ.

Отказъ. Его королевская милость казалъ вамъ повѣдети, ижъ его милость, водлѣ жадности ваше и водлѣ ухвалы прошлое Берестейское, и теперь на томъ быти рачить, же его милость для лѣншое и пожиточнѣшое справедливости ваше посполито, того вамъ поправленъя статута допущати рачить; и вже бы есте межи собою тыхъ особъ обрали и меновали и на то способили, которые бы вамъ того статута поправили; а вѣдьже, кгда черезъ тыхъ особъ, на то отъ васъ обраныхъ, оный статутъ будетъ поправленъ, тогда потомъ, на первомъ соймѣ, на што вся земля ся зволить, мають оные артыкулы быти ухвалены и приняты, зъ его милости господарскимъ дозволеньемъ, што ся его милости слушного видѣти будѣтъ.

5. *Прозьба.* При томъ што есте его королевской милости просили, ижъ, яко есть въ статутѣ права посполитого описано, штожъ «жадный не маеть быти каранъ на заочное повѣданье, отнятемъ врьдовъ и держаней», — абы есте при томъ статутѣ были захованы, жебы тыи врьды и держанья, которые маете отъ короля его милости старшого и отъ его королевской милости за ваши вѣрныи службы, не были вамъ безъ жадныхъ слушныхъ причинъ отбираны. *Отказъ.* Его королевская милость казалъ вамъ повѣдети, ижъ его милость вѣдомости того мѣти не рачить, кому бы якій врьдъ

безъ слушнои причины былъ взятъ, якожъ и впередъ браны не будутъ, хто бы тому самъ на себе причины не далъ.

6. *Прозьба.* Надъ то, што есте короля его милости просили, абы его королевская милость рачилъ, водлѣ стародавного обычаю дворъ Литовскій на своемъ Дворѣ ховати, а дворяномъ оттолѣ платити, откомъ за предковъ его милости плачно было, а то для того, ижъбы братья и сынове ваши, на дворъ его милости служащи, цвичили ся рыцерскихъ учинковъ, и тымъ ся ласки его милости дослужовали, и напотомъ годными слугами господарю его милости и рѣчи посполитой были, яко и за предковъ его милости господарскихъ, таковыхъ дворянъ Литовскихъ особливый гуфъ часу войны бывалъ. *Отказъ.* Его королевская милость казалъ вамъ повѣдети, ижъ его милость, водлѣ жадности ваше и стародавного захованья, не рачить вамъ въ томъ ласки свое отмовляти; ижъ его милость дворянъ Литовскихъ, сыновъ и обывателей того панства великого князства, на Дворѣ своемъ ховати волю маеть. Одно жъ хочеть его милость въ томъ съ паны радами ихъ милостью обмовити и обычай тому найти, яко бы то snadнѣй быти могло, а съ чого бы ихъ ховати; бо што есте доложили того въ прозьбѣ своей, абы тотъ дворъ Литовскій хованъ былъ съ того, съ чого его и передъ тымъ ховано: ино его королевская милость такъ розумѣти рачить, ижъ, снатъ, оный дворъ за предковъ его милости ховыванъ былъ, частью съ того што неприятель посѣлъ, а частью тежъ съ того што еще и по сѣсь часъ замковъ и дворовъ по заставахъ есть, а иншое тежъ и межи васъ роздано.

7. *Прозьба.* Еще тежъ, што есте его королевской милости припоминули, ижъ, кгда недавныхъ часовъ король его милость, отецъ его королевской милости, мынцу Польскую мѣлъ волю пустити въ панство свое великое князство Литовское; на што ачъ — кольвекъ панове рада ихъ милость были зволити, а вѣдь-

же его милость безъ вѣдомости всехъ васъ подданныхъ своихъ тогозвчинити не рачилъ, але вчинилъ былъ его королевская милость съемъ, и васъ всехъ созвати и то вамъ оповѣдѣти рачилъ; а тепере его королевская милость рачилъ зачати мынцу великого князства, васъ подданныхъ своихъ къ тому не зываючи, за штожъ просите: естли бы ся то напотомъ трафило, абы его королевская милость не рачилъ васъ въ таковыхъ справахъ и потребахъ, которые всей земли долегають, употребляти. *Отказъ.* Господарь король его милость казалъ вамъ на то повѣдети, ижъ его милость добрую того вѣдомость мѣти рачить, же на то, коли мынцу въ томъ панствѣ его милости великомъ князствѣ бивано, а ни за отца, а ни за иныхъ предковъ его милости, за которыхъ мынцы бито, соймовъ на всю землю не збирано; такъ тежъ а ни въ тотъ часъ, коли мынца Польская до того панства его милости пушона была, жадное зыванье земли не было, але было то завжды въ моцы, владности и справованью самого господаря его милости и пановъ радъ ихъ милости. Про то, его королевская милость тотъ звычай битья мынцы и теперь, водлѣ стародавного обычая, при владности своей господарской составляти рачить: бо много того бывало, ижъ передъ тымъ господарь, водлѣ воли свое, и задерживалъ мынцу, и опять бити казалъ, и иншимъ ее бити позволялъ, водлѣ часу и потребности свое господарской и земской, а земля о томъ ничего не вѣдала.

8. *Прозьба.* Тежъ, што есте въ тойже прозьбѣ своей на писмѣ доложили, ижъ немалое вонтпѣнье межи вами есть: гдѣ ся тыи пѣнязи подѣли и на которую потребу земскую обернуты, которые есте передъ тымъ не однокротъ на оборону земскую давали? и для того его королевской милости просите, абы вже отъ сего часу и на потомныи часы, кгда бы ся кольвекъ пратрафило для обороны земской серебщизну складати, абы то вамъ было особ-

ливымъ листомъ его милости описано, ижъбы № 4. тыи пѣнязи не до скарбу его милости были даваны, але ижъбы есте сами зъ братьи свое обрали людей добрыхъ, вѣры годныхъ, а одного закону Римского, а другого закону Граччического, а при нихъ третьяго, писаря, которые бы тыи пѣнязи серебщизны отъ васъ отбирали и за своимъ ключомъ ховали, и тыхъ пѣнязей ни на жадные иншыи потребности и ни на чый росказъ не выдавали, одно на посполитую оборону земскую, на люди служебные, и съ того всего абы передъ вами личьбу чинили. *Отказъ.* Его королевская милость казалъ вамъ на то повѣдети, ижъ скарбъ и подскарбий земскій отъ первшихъ часовъ не безъ причины есть уставленъ, и пожиточнѣй то быти можетъ, кгда таковой платъ серебщизный въ скарбъ земской захованье свое мѣти будетъ, ижъли гдѣ индѣ: бо рачить его милость тую справу мѣти, што бы ся и реистры скарбными латвѣй показати могло, ижъ, коли первшими часы таковыи податки серебщизны къ потребѣ и оборонѣ земской выбираны бывали черезъ кого иншого, ижъли черезъ пана подскарбьяго земского; тогда таковыхъ серебщизнъ, за непослушенствомъ, великая часть до рукъ бирчихъ не доходила, многия ее имъ не выдавали, и въ томъ выкому не шкода, одно рѣчи посполитой земской, ижъ одинъ далъ, а другій не далъ; а коли — кольвекъ подскарбий земскій пѣнези вибиралъ, тогда завжды ее неровно большъ прихоживало. Про то его королевская милость, съ порады пановъ радъ ихъ милости, на томъ тую рѣчь составляти рачить, абы серебщизна, которая коли для обороны земской зложона будетъ, отдавана была, по давному, до рукъ пана подскарбьяго, до скарбу земского. А вѣдь же, естли бы ся вамъ што иншого въ той рѣчи видѣло, и вы бы на то межи собою бирчихъ вѣры годныхъ обирали; а тыи бирчыи ваши, выбравши тыи пѣнязи серебщизны, нехай ихъ предѣся до скарбу земского отдають, и личьбу съ

№ 4. того передъ паны радами ихъ милостью и подскарбимъ земскимъ чинять. Одно жъ обачили и рэзвасили бы есте сами собъ, ижъ коли бирчыѣ уставлены будутъ, тогда и на самыхъ тыхъ бирчыхъ немалая сума пѣязей, а безпотребиѣ, мусила бы выходить. А надъ то, его королевская милость мѣти рачить того справу, ижъ нѣкоторыи серебщизны недавныи, што бирчыѣ выбирали, и до скарбу не доходили, а подѣлися не вѣдати гдѣ. А што ся дотычетъ того, што есте доложили въ тойже прозьбѣ своей, ижъ не вѣдаете, гдѣ ся въ скарбѣ первыи пѣязи серебщизны подѣли: его королевская милость давати рачить вамъ тую справу, же панъ подскарбій слышнѣ, а раднѣ, и ни на што иншое, одно на тые потребы земскіѣ оныѣ первыѣ пѣязи серебщизны обернулъ, на што есте обычай ихъ выдавати; съ чого вжо и личьбу передъ его королевскою милостью и паны радами ихъ милостью вчинилъ, и оказалъ то, ижъ онъ тые пѣязи первыѣ, слышнѣ, на звывкыѣ потребы рѣчи посполитоѣ земскоѣ выдалъ.

9. *Прозьба.* Зася што есте его королевской милости мовили, ижъ въ статутъ права земского есте описано, «штожъ панове воеводы мають въ каждомъ повѣтѣ воеводства своего обрати судей, которыи мають судити шляхту на роки слышныи, ижъбы каждый въ повѣтѣ своемъ могъ завжды справедливости своеѣ за малымъ накладомъ дойти», и просите, абы его королевская милость рачилъ вамъ, водлѣ статуту, въ повѣтѣхъ вашихъ, людей добрыхъ, которыхъ бы есте сами межѣ собою обрали, судьями дати, которыи бы подѣ присягами своими васъ, братью свою, водлѣ боязни Божьѣѣ и справедливости святоѣ рсправовали; а писарь ижъбы также въ каждомъ повѣтѣ быль присяжный, и также отъ шляхты обраный. *Отказъ.* Король его милость казалъ вамъ на то повѣдѣти, ижъ его милость маєт то при памяти своей, же есте о таковыхъ судьяхъ повѣтовыхъ и на прошломъ вальномъ соймѣ,

въ Берестѣи, ихъ королевской милости просили: про то его королевская милость и теперъ тую прозьбу вашу водлѣ тогожъ заставляти рачить, яко есте въ Берестѣи, на соймѣ, отъ отца епо милости съ паны радами ихъ милостью намовлена и постановлена и вамъ оная мена, то есте, ижъ тая рѣчь о судьяхъ повѣтовыхъ маєт справована быти водлѣ первоу застановленъ и статуту земского, яко около того въ статутѣ есте описано.

10. *Прозьба.* Затымъ што есте мовили его королевской милости, ижъ немалая шкода и великая переказа у справедливости вамъ ся дѣетъ, ижъ панове старосты, державцы и ихъ намѣстники звыкли завжды давати вамъ вижами людей простыхъ, вѣры негодныхъ, то есте, мѣщанъ, мужиковъ тяглыхъ, а часто кротъ и холопью невольную; а вижованъ берутъ собъ вранники старостины и державцыны по дванадцати грошей; а таковыи вижы тымъ лѣпшѣ посвѣтчатъ, которыхъ дороже перекупятъ, за чымъ же многокротъ и справедливый чоловікъ, справедливости своеѣ доходячи, въ шкоду впадаетъ: за штожъ просите, абы въ каждомъ повѣтѣ, при судьяхъ повѣтовыхъ были обраны по три, по чотыри, альбо по пяти, колько будетъ потреба, бояре, люди добрыи и вѣры годныи, неподозрѣныи, въ томъже повѣтѣ осѣлыи, которые бы вижыи присяжными были и на всякіи ваши потребы готовыми, а за працу свою ижъбы большъ вижованъ не брали, одно на милу по грошу. А надъ то, ижъ што въ статутѣ описано, ижъ «вижомъ пановъ воеводъ и пановъ маршалковъ и старостъ вижованъ по полтинѣ грошей, а вижомъ намѣстниковъ ихъ по полукопѣю», што есте зъ немалою шкодою и обтяжливостью вашою; для которыхъ же непотребныхъ прикладовъ врановыхъ, многіи зъ васъ мусятъ и властныи истизны свои опускати, — и просите, абы таковыѣ вижованъ або выстановены были, або ижъбы его королевская милость восполкъ съ паны радами

ихъ милостью иншый который обычай тому знайти и постановити рачилъ. *Отказъ.* Его королевская милость казалъ вамъ повѣдѣти, ижъ и тую прозьбу вашу и тии вышей мененыи двѣ рѣчи, о вижохъ и о бранѣ вижового, рачить его милость подлѣ тожъ ухвалы прошлоѣ Берестейскоѣ вскладати на тыхъ, хто статутъ поправовати будутъ, а тии на онъ часъ нехай бы тому слышный посредокъ и постановенъ нашли, и его королевской милости при ономъ поправленю статуту то ознакомили; а его милость на онъ часъ на то призволити рачить, што ся его милости слышного и годного видѣти будетъ.

11. *Прозьба.* А што есте въ тойже прозьбѣ своей доложили, ижъ бы есте ради отъ его королевской милости то вѣдали: почому бы есте мѣли за листы вамъ потребныи платити, которые зъ канцлерыи его милости часу потребы брати будете? *Отказъ.* Его королевская милость казалъ вамъ на то повѣдѣти, ижъ его милость, водлѣ жадливости вашеѣ, съ паны радами ихъ милостью и съ паномъ канцлеромъ намовити и постановенъ тому вчинити рачить, што будете мѣти за листы вамъ потребныѣ въ канцлерыи его милости платити, яко то слышнѣ и безъ обтяжливости вашеѣ будетъ.

12. *Прозьба.* Што есте тежъ мовили, ижъ ачъ — кольвекъ на тотъ часъ, при бытности его королевской милости въ томъ панствѣ его милости великомъ князствѣ, каждый зъ васъ всякую справедливостъ свою, правъ, яко въ дому находить, съ чого за шастное панованъ а долгое здоровье его королевскоѣ милости пана Бога просите; а вѣдъ же для пришлоѣ рѣчи жедаете, ижъ кдѣ его королевская милость зъ великого князства на часъ до коруны для справъ оноу панства рачить выѣхати, абы есте тамъ до коруны Польскоѣ ни отъ кого не были вызываны, водлѣ ухвалы сойму прошлаго Берестейского, и абы то вамъ было особливимъ листомъ отъ его милости обва-

ровано. *Отказъ.* Господарь его милость казалъ вамъ на то повѣдѣти, ижъ его милость бачачи прозьбу вашу въ томъ быти слышную, къ той прозьбѣ вашей ласково призволити рачить, ижъ коли его королевская милость въ корунѣ Польскоѣ, а не тутъ у великомъ князствѣ Литовскомъ для справъ своихъ господарскихъ и земскихъ мѣшканъ свое мѣти будетъ, же его милость пановъ радъ своихъ, княжатъ, панятъ и всего рыцерства, обывателей того панства великого князства Литовского, тамъ до коруны Польскоѣ жадными позвы своими ни на чію жалобу въ кривдахъ вашихъ къ справъ не будетъ вызывати, а ни инюму никому допускати тамъ позывати не рачить: але каждый зъ васъ, въ небытности его королевской милости тутъ, въ томъ панствѣ его милости великомъ князствѣ Литовскомъ, маєт о справедливостъ свою до пановъ радъ ихъ милости и до пановъ воеводъ, старостъ, державецъ своихъ, хто въ чіемъ повѣтѣ будетъ, утекати и передъ ними ся межѣ собою судити и справовати, подлѣ намовы и постановенъ короля его милости старшого, отца его милости, которое его милость съ паны радами ихъ милостью въ Берестѣи вчинити рачилъ, якожъ его милость тоѣ постановенъ Берестейское отъ сего часу и въ статутѣ свой господарскій вписати казати рачилъ; и паномъ радамъ ихъ милости, и старостамъ и державцамъ, и всимъ княжатамъ и панятамъ въ статутѣхъ своихъ, для лѣпшоѣ вѣдомости ихъ, яко ся въ томъ справовати мають, мѣти допускаетъ; и въ привиліи своемъ господарскомъ, который вамъ на вольности ваши зъ ласки его королевской милости ново данъ будетъ, водлѣ жадливости вашеѣ вписати его милость велитъ. Нижли, гдѣ бы ся дотыкало отзыванъ вашего отъ суда пановъ радъ ихъ милости до зверхности господарскоѣ, то завжды вамъ вольно быти маєт отзыватися до господаря его милости отъ суда пановъ радъ ихъ милости, по сказаню, и до коруны Поль-

№ 4. скою и гдѣ — кольвекъ его милость на онѣ часть особую своею господарскою быти рачитъ; а ихъ милость панове рада повинни будутъ выписы тоѣ sprawy своею на обѣ стороны имъ давати, и роки, на которые бы они ся мѣли передъ королемъ его милостью становити, зѣ obu стороны имъ складывати.

13. *Прозьба.* Еще што есте тежѣ били чоломъ его королевской милости, ижѣ которые жалобы и обтяжливости многократъ приходятъ до его королевской милости отъ княжатъ и панятъ и отъ землянъ пограничныхъ о кривдахъ ихъ незносныхъ, которые мають отъ пановъ Поляковъ и отъ пановъ Мазовшанъ, што не есть его королевской милости тайно; а теперь по томъ нынѣшнемъ объездѣ, яко посланцы его милости на границы великого князства Литовского выѣзджали, тымъ большіе кривды той брати вашей, пограничной въ боѣхъ, въ ктвалѣхъ, въ головщинахъ, въ забирающю землѣ и въ иншихъ многихъ рѣчахъ дѣются, — и просите его королевской милости, абы его милость, зѣ ласки своею панскою, рачилъ ся къ тому милостиво приклонити, ижѣбы вжо тые границы межи панствами его милости певную вѣдомость свою взяли, и абы вжо черезъ то таковое кровопролитіе и окрутенство межи подданными его милости на обѣ стороны ся не дѣяло. *Отказъ.* Его королевская милость казалъ вамъ на то повѣдѣти, ижѣ не есть рѣчь тайная самымъ вамъ, же его милость на вывѣданье и пописанье всихъ тыхъ кривдъ пограничныхъ, о которыхъ до его королевской милости и перьво сего не однократъ жалобы приходили и теперь о нихъ зменку чините, псылати вжо рачилъ посланцовъ своихъ: по одной сторонѣ границъ, конюшого дворного пана Миколая Андросевича а Станислава Коморовского, а по другой сторонѣ пана Василья Тишкевича, маршалка, а Войтъха Ленартовича; и хотячи его милость тии кривды и заистья упокоити, намовити и постановити на томъ рачилъ съ королемъ его милостью, съ отцемъ

своимъ, ижѣ ихъ милость мають тамъ на тые границы, зѣ стороны обоихъ тыхъ панствъ, комисаровъ выслати, яко бы нарыхлѣй могло быти, а тамъ ся на онѣ часть все то, дали—Богъ, на коонецъ постановити и впокоитъ. А вѣдь же до того часу писати его милость рачитъ до короля его милости, отца своего, абы его милость зѣ стороны коруноу, къ тымъ, которые въ томъ панствѣ великомъ князствѣ Литовскомъ къ границамъ прилеглости своимъ мають, рачилъ казати спокойнѣ ся заховати, а тутощніе къ коруновымъ нехай бы ся потомужъ во всемъ въ покоѣ заховали.

14. *Прозьба.* Што есте тежѣ дали на писмѣ къ его королевской милости, ижѣ не меншии тяжести, кривды и жалъ терпите вы вси, слуги его королевской милости, отъ мѣщанъ Виленскихъ, ижѣ кгда — кольвекъ который чоловѣкъ вашъ непохожий, або поробокъ невольный, або роба утечетъ до мѣста Виленского; тогда они таковыхъ не выдаютъ, и кажутъ вамъ, абы есте правомъ ихъ Нѣмецкимъ, подъ которымъ вы не сѣдите, уживали; а сынове тежѣ ихъ и иншыи ремесленники братю вашу шляхту бьютъ, рубаютъ и до смерти забиваютъ, а о то жадная справедливость брати вашей отъ нихъ стати не можетъ: бо кажутъ имъ таковыхъ мордеровъ правомъ ихъ Нѣмецкимъ втягивати, што есть противъ вольностямъ и привиліямъ вашимъ; бо въ статутѣ описано, ижѣ «мѣщане всихъ мѣстъ мають о бои и о головщины шляхетскіе отказывати и судитися правомъ посполитымъ земскимъ, а не своимъ Нѣмецкимъ.» И просите его королевской милости, абы есте въ томъ были захованы особливимъ листомъ его милости, и водлѣ постановенья сойму Берестейского. *Отказъ.* Господарь его милость казалъ вамъ на то повѣдѣти, ижѣ его милость, водлѣ прозьбы вашею, на томъ тую рѣчь на тотъ часъ оставлять рачитъ, ижѣ мѣщане Виленскіе и всихъ иншихъ мѣстъ великого князства Литовского, права Нѣмецкого, боевъ и ранъ и

головщинъ шляхетскихъ, и слугъ и подданныхъ ихъ, не мають правомъ своимъ Майтборскимъ въ мѣстѣхъ своихъ судити, але сужены быти мають таковыи бои, раны и головщины шляхетскіе и слугъ и подданныхъ ихъ зѣ мѣщанъ правомъ земскимъ великого князства Литовского, подлѣ давнѣй уставы статуту земского и водлѣ ухвалы и постановенья сойму Берестейского, до другого первшого сойму. А што ся дотычетъ выдаванья людей вашихъ отчизныхъ и паробковъ и иноѣ челяди невольной, его королевская милость на томъ тую рѣчь съ паны радами ихъ милостью намовити и постановити рачилъ: которые будутъ люди ваши отчизныи зашли до мѣста Виленского, отъ того теперешнего валного сойму назадъ отъ трехъ лѣтъ, и засѣдали вжотии три лѣта во впокои; тии вжо при мѣстѣ зостати мають вѣчнѣ, а вы ихъ выводити оттолѣ не маєте: лечъ которые будутъ трехъ лѣтъ еще не засѣдали, тыхъ вамъ врядъ мѣстскій Виленскій будетъ повиненъ съ права, за слущнымъ доводомъ вашимъ, выдавати. А которые люди ваши отчизныи отъ теперешнего сойму впередъ до мѣста Виленского заходити будутъ, тогда таковымъ не маєтъ быти давность, ажѣ до десяти лѣтъ. А хто съ подданныхъ вашихъ отъ теперешнего сойму и на потомныи часы десять лѣтъ засѣдитъ, таковой тежѣ вжо при мѣстѣ Виленскомъ вѣчнѣ зостати маєтъ, а вы ихъ зѣ мѣста Виленского не маєте до себе выводити, але межи десятма лѣты, таковыхъ людей своихъ маєте въ мѣстѣ Виленскомъ находити, а они мають вамъ каждому съ права быти выдаваны: нижли холопу и робѣ давности быти не маєтъ.

15. *Прозьба.* Што есте тежѣ его королевской милости мовили, ижѣ не только вамъ, але и паномъ радамъ ихъ милости, и всимъ обывателямъ того панства великого князства отъ мѣщанъ Виленскихъ великая ся кривда дѣеть, ижѣ они мало не каждого году мѣры

торговоу, которою збожѣ продають, прибавляютъ, такъ, ижѣ вжо мало еѣ не половицу прибавили надъ оную первшую мѣру, которая съ стародавна была хована, въ чомъ вся земля шкоду немалую пріймуетъ, — и просите, абы вжо певная а неотмѣнная мѣра была уставлена и винами его королевской милости опатрона, абы черезъ то еѣ а ни прибавлено, а ни уменьшено. *Отказъ.* Его королевская милость казалъ вамъ на то повѣдѣти: кгдажѣ ся вамъ вѣдитъ быти къ обтяжливости вашей посполитой нынѣшня мѣра полубочковая Виленская, а ждете, абы была инѣшая певнѣйшая мѣра тутъ въ томъ мѣстѣ Виленскомъ уставлена; и его милость намовивши въ томъ съ паны радами ихъ милостью, установляти рачитъ, ижѣ отъ сего часу быти маєтъ мѣра полубочокъ Виленскій такъ великъ, который бы въ собѣ несъ двѣ бочки, въ которыхъ бы было въ объохъ осмь корцовъ ровныхъ, безъ верху и трясенья, мѣры короля его милости дворной нынѣшнее (которая будетъ вымѣрена отъ пана воеводы его милости Виленского и на ратушѣ подлѣ цехомъ дана); а другая мѣра, што бы было въ ней чотыри корцы, а третья два корца, а четвертая одинъ корецъ. А хто бы кольвекъ смѣлъ ся того важити, а мимо тую теперешнюю уставу иншыи мѣры собѣ большыи або меньшыи въ мѣстѣ Виленскомъ уставлялъ и ихъ уживалъ: таковой тымъ каранъ быти маєтъ, што на таковыхъ, которые фальшивыхъ мѣръ уживаютъ, въ правѣхъ описуетъ.

16. *Прозьба.* При томъ што есте его королевской милости просили, абы духовные на судѣхъ земскихъ и свѣтскихъ не сѣдали, але своихъ духовныхъ правъ смотрѣли (кгдажѣ жаденъ съ пановъ радѣ его милости въ духовные sprawy ся не вдають), а ижѣбы тежѣ о рѣчи свѣтскіе, духовные васъ до права духовного не позывали. *Отказъ.* Его королевская милость казалъ вамъ

№ 4. на то повѣдѣти, ижъ его милость того разумѣти не рачитъ, хто бы съ духовныхъ суды свѣтскіе отъ его милости завѣдалъ, а хто бы на нихъ сѣдалъ, абы есте то его милости повѣдали. А што ся ткнетъ вызыванья отъ духовныхъ о рѣчи свѣтскіи до права духовного: ино вѣдь же то на соймѣ Берестейскомъ было постановлено, ижъ духовные о рѣчи свѣтскіи не мають васъ до права духовного поволокати; а такъ и теперь его королевская милость на томъже водлѣ уставы Берестейскоѣ тую рѣчь составляти рачитъ, якожъ тые артыкулы, при поправованью статуту, меновито его милость выобразити вамъ кажетъ, о што маєте быти позываны до духовного права.

17. *Прозьба.* А што есте его королевской милости просили, абы мѣщане, которые имѣнья подъ собою держатъ, ровно зъ вами, водлѣ важности имѣней своихъ, оборону несли, а тежъ съ купли маетностей своихъ, водлѣ шапунку и воли и росказанья его милости установленнаго, ижъбы къ службѣ земской помогали: бо они тые маетности ни отколѣ не мають, одно зъ васъ шляхты и рыцерства его королевскоѣ милости. *Отказъ.* Господарь король его милость казалъ вамъ на то повѣдѣти, ижъ его милость тую рѣчь о мѣщанахъ водлѣ ухвалы и постановенья сойму прошлого Берестейского составляти рачитъ: ижъ мѣщане всихъ мѣстъ его милости съ тыхъ имѣней своихъ, которые будутъ у земянъ шляхты скупили, альбо у господара его милости выслужили, мають служити и заступовати службу земскую, такъ яко бояре шляхта; а мають ся они съ тыхъ имѣней своихъ передъ паны воеводами и старостами своими, въ которыхъ повѣтъхъ тые имѣнья мѣти будутъ, оказывати, такъ яко то тежъ на соймѣ вальномъ Берестейскомъ есть постановлено: лечъ, што ся дотычетъ фольварковъ мѣщанскихъ, которые они держатъ на мѣстскихъ кгрунтѣхъ и въ мѣстскихъ границахъ привиліи упривиле-

ванныхъ, съ тыхъ они теперь службы земскоѣ волини быти мають; одножъ, што ся ткнетъ маетностей ихъ мѣщанскихъ, то его королевская милость и теперь при воли своей составляти рачитъ, ижъ его милость водлѣ потребности земскоѣ и воли своеѣ, яко ся его королевской милости видѣти будетъ, на тые маетности ихъ къ службѣ земской рачитъ казати уставу вчинити.

18. *Прозьба.* Далѣй, што есте мовили его королевской милости, ижъ кравцы, шевцы, рымары, слѣсары и иньшыя ремесленники въ мѣстѣ Виленскомъ непомѣрныи заплаты отъ работъ своихъ берутъ, а што и часто, ихъ прибавляють водлѣ воли своеѣ, а съ того шляхта убожаетъ, — просячи его королевской милости, абы его милость рачилъ росказати войту, бурмистромъ, справцамъ мѣстскимъ, слушную уставу въ томъ имъ постановити, которая бы вжо на часы вѣчистыи трвала. *Отказъ.* Его королевская милость казалъ вамъ на то повѣдѣти, ижъ его милость водлѣ прозьбы вашеѣ рядъ и постановенье тому росказати вчинити рачитъ.

19. *Прозьба.* А што есте тежъ къ его королевской милости прозьбу чинили, абы уряды земскіи и дворныи, и тежъ держанья замковъ, дворовъ, мѣстъ и волостей его королевской милости не были даваны чужоземцомъ: бо и въ томъ вамъ и всей брати вашей есть не меньшее солженье становъ вашихъ, яко бы межи вами такъ годныхъ и вѣрныхъ и справныхъ на то не было; а и паньству тежъ его милости не меньшая въ томъ шкода, же тые чужоземцы немало скарбовъ до своеѣ земли съ паньства его милости выносятъ, а въ томъ ся паньство его милости и вы вси нищите, а и рѣчь тежъ посполитая шкоду немалую въ томъ маєтъ. *Отказъ.* Его королевская милость казалъ вамъ на то повѣдѣти, ижъ его милость зъ ласки своеѣ господарскоѣ, водлѣ жадливости вашеѣ, радъ васъ заховати хочеть, и тыхъ врьдовъ земскихъ и дворныхъ, а ни

держаней замковъ, мѣстъ, дворовъ и волостей давати чужоземцомъ не рачитъ, и водлѣ привилей и статуту земского, отъ предковъ его милости на то дамъ данныхъ, ласково и милостиво васъ заховати обѣцуетъ; а ижъ его королевская милость не рачитъ того вѣдомости мѣти, хто бы съ чужоземцовъ што держалъ, альбо зъ земли скарбы выносилъ, и вы бы тыхъ меновали.

20. *Прозьба.* За тымъ, што есте его королевской милости просили, абы объѣзжанье и попись замковъ, дворовъ и волостей его милости, и тежъ личбы съ доходовъ его милости не были справованы черезъ чужоземцы: бо въ томъ ся немалая трудность и тяжесть отъ нихъ старостамъ и державцамъ и ихъ врьдникомъ дѣетъ, въ небордзой отправъ и въ непомѣрной заплатѣ отъ квитовъ. *Отказъ.* Его королевская милость казалъ вамъ на то повѣдѣти, ижъ его милость догледанье пожитковъ своихъ господарскихъ по дворомъ его милости, и справованье скарбу своего и личбы скарбы рачитъ составляти при воли своей, и посылати тамъ догледати и вывѣдыватися, кого будетъ воля его милости господарская, и хто бы одно тому спросталъ и въ томъ добръ разумѣлъ, и пожитки его милости множити умѣлъ, якожъ ся то и паномъ радамъ ихъ милости видѣти: бо его королевская милость вѣдати рачитъ, яко маєтъ его милость съ паны радами своими пожитковъ своихъ господарскихъ и скарбу догледати; а вы до того ничего не маєте: одно бы вы, державцы и врьдники, смотрѣли повинностей своихъ, и рядногосправованья своего, и вѣрности, которая на васъ во врьдѣхъ вашихъ преложена. А о квитѣхъ абы есте дали знати, по чому отъ квитовъ берутъ, а хто беретъ, и его королевская ми-

лость рачитъ росказати то безъ обтяжливости. *№ 4.* ваше постановити (*).

21. *Прозьба.* Такъ же што есте мовили его королевской милости, ижъ былъ тотъ обычай завжды хованъ и съ стародавна, за шастного панованья предковъ его милости, ижъ кгда-кольвекъ ихъ королевская милость съ коруны Польскоѣ ваджали до великого князства Литовского, тогда на границы вси врьдники дворныи корунныи оставалися; а естли который до князства Литовского вжалъ, тогда бывалъ якобы гостемъ, а жадноѣ моцы и владности въ справованью врьду своего не мѣлъ, а ни ся въ то вступовалъ, але врьдники дворныи великого князства, поткавши (**), на границы, яко панове маршалкове, такъ тежъ и подскарбій, подчашый, крайчый, конюшый, кухмистръ, подстолий, подкоморый и иньшыи врьдники дворныи, тии вси врьды своими справовали и всякую владность въ нихъ мѣвали; а теперь тии вси врьдники его королевскоѣ милости дворныи великого князства одно титулы врьдовъ своихъ мають, а врьдники корунныи всякоѣ владности въ ихъ врьдѣхъ уживають, и доходы и оброки, которые на тии врьды прислухають, на себе берутъ, и, правъ, вжо ся во всемъ стародавний обычай около тыхъ врьдовъ змѣнилъ: чогожъ не только тые врьдники его милости, братья ваша, але и вы сами вси зъ великою жалостью того уживаете, ижъ ся той брати вашей въ ихъ врьдѣхъ таковой ушипокъ дѣетъ. За штожъ просите, абы его королевская милость рачилъ ласкою и бачностью своею паньскою такъ то осмотрѣти, якобы вже, черезъ то, панове врьдники корунныи въ тыхъ врьдѣхъ дворныхъ жадноѣ моцы а ни владности въ справованью не мѣли, одно тые братья ваши,

(*) Въ ориг. Метр. эта статья «о квитѣхъ» записана не на своемъ мѣстѣ, но по ошибкѣ переписчика, отнесена ниже, къ артик. 21-му.

(**) Здѣсь, кажется, пропущено слово «короля» или «господаря».

№ 4. которые то съ предковъ своихъ предкомъ и отцу его королевской милости, и тежъ его милости самому добръ и цнотливъ заслужовали. *Отказъ.* Его королевская милость казалъ вамъ на то повѣдѣти, ижъ, яко его милость бачити то рачитъ, тебѣ за его королевской милости инастливого пановавья, тая справа дворная вранниковъ его милости дворныхъ не инъшимъ кшталтомъ идеть, одно яко было и за отца его королевской милости; а ижъ и теперъ каждый вранникъ дворный на вранъ своимъ есть, и имъ владасть и справуетъ. А вѣдъ же его королевская милость около тыхъ старыхъ звычаевъ, яко ся будетъ што заховывало, рачитъ съ часомъ достаточнъ вывѣдати, и такъ все въ тыхъ вранъхъ дворныхъ заховати, яко въ томъ каждая рѣчь отъ его королевской милости водлѣ стародавнаго обычаю захована будетъ.

22. *Прѣзба.* При томъ што есте мовили его королевской милости, ижъ прокураторы, кнѣзи-кошвекъ рѣчи судовыи справуютъ, не-потребнымъ и широкимъ вымыслаи своими его королевской милости и паномъ радамъ ихъ милости працы и трудности задають, такъ, ижъ тежъ его милость многократъ, отложивши, часомъ, на сторону пилнѣйшии и потребнѣйшии справы свои господарскіе и земскіе, муситъ ся около таковыхъ вымысловъ прокураторскихъ съ паны радами працовати; якіе тежъ трудности и наклады сутяжныи, за таковыми ихъ вымыслаи и за продолженьемъ рѣчей и за отволоками, пріймуютъ, того многи зъ васъ сами на собѣ скоштовали: и просите, абы черѣзъ то, прокураторы жадныхъ рѣчей въ судахъ, такъ передъ его королевскою милостью, яко тежъ и передъ паны радами ихъ милостью не справовали; одно, жебы каждый свою рѣчь самъ справовалъ: хыба, естли бы который для хоробы своее, альбо для недостатку вымовы, не могъ къ тому снадѣй прійти, абы рѣчь свою такъ достаточну могъ на судъ предложити; таковой можетъ рѣчь

свою справовати черѣзъ пріятеля своего, а не черѣзъ прокуратора наемного. *Отказъ.* Его королевская милость казалъ вамъ на то повѣдѣти, ижъ его королевская милость до прокураторовъ вашихъ, кому суть межѣ вами потребны, альбо непотребны, ничего мѣти не рачитъ; и коли ихъ сами наймовати не будете, тогда тежъ они, подобно, ни отъ кого ничего справовати не будутъ.

23. При тыхъже и инъшихъ справахъ земскихъ, на томъже соймѣ, зъ росказанья господарского, мѣти рачили намову яко панове рада ихъ милость, такъ тежъ княжата и панята и все рыцерство великого князства, около даванья подводъ и стацей, и будованья замковъ, и робенья мостовъ, зъ имѣней и людей своихъ выслужонныхъ, водлѣ артикулу отъ господаря его милости имъ на то поданого. Напередъ княжата и панята и все рыцерство за то просили пановъ радъ ихъ милости о причину до господаря его милости, ижъ хто съ нихъ гдѣ по сѣсь часть замки будутъ, мосты мостятъ, стацей дають альбо станы справуютъ, же они то и теперъ полнити хотятъ, и съ тобъ ся повинности своее давнѣе не выламываютъ: ни жъли, которые съ нихъ выслуги свои отъ предковъ его королевской милости мають, и которые листы и привиліи ихъ милости вызволены суть отъ таковыхъ работъ замковыхъ, подводъ и стацей и робенья мостового, просятъ, абы тые права и вольности не были имъ нарушены и овшемъ при моцы зоставлены, водлѣ ласки и привиліевъ предковъ его королевской милости и вѣрныхъ служобъ ихъ, которыми то предки ихъ и они сами выслужили. — Ино паномъ радамъ ихъ милости то ся видѣло, и на томъ ихъ милость тую рѣчь восполкъ съ княжаты и панятаи и со всимъ рыцерствомъ намовили и зоставили, и короля его милости за то просили, абы его милость рачилъ первѣй зъ ихъ милостью паны радами на тыхъ ренстрѣхъ състи и имъ вырозумѣти, въ которыхъ вже вси таковыи

повинности земскіи по всимъ городомъ того панства, зъ росказанья его королевской милости, подписаны; и хто бы тамъ въ ренстрѣхъ былъ описанъ, тыхъ первѣй листы мандаты его королевской милости, о положенье листовъ твердостей ихъ, за чимъ хто што держитъ, на певные часы припозвати, и онымъ твердостемъ ихъ, на што хто зъ нихъ повиненъ, альбо неповиненъ, вырозумѣти, и водлѣ того ся на онъ часть заховати.

Изъ Литовской Метрики (Acta Magn. Ducat. Litv., рукоп. in fol. XVI в., Lib. transactionum publ. кн. IV, л. 20 — 35), хранящейся въ С. Петербургѣ, при 3-мъ Департаментѣ Правительствующаго Сената. На корешкѣ манускрипта вытиснуто: Anno 1544, regnante Sigismundo, N° 45.

3. — 1547 Февраля 21. Уставная подтвердительная грамота жителямъ Полоцкой области.

Во имя Божье станься! Ижъ всякіе учинки цнотливые, которые зъ обычаевъ людскихъ походятъ и бывають въ заховалостяхъ ихъ дѣланы, которые жъ на знаимость звычаю учиненого, часы своими, явнѣ ся черѣзъ до-свѣтченья оказываютъ и вѣрнѣ а стали доконають: годно есть, ижбы слушнѣ, тежъ въ чинности своей поживаны, абы были ознаймены и на письмѣ выложены и подтвержены для вѣдомости потомъ пришло людскоѣ, абы часу посполитого съ памяти не сходили. А про то мы Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, чинимъ знаменито симъ нашимъ листомъ, хто на него посмотритъ, або чтучи его услышитъ, нынѣшнимъ и напотомъ будущимъ, кому того потреба будетъ вѣдати. Били намъ чоломъ бояре Полоцкіе и мѣшане и весь городъ, и вся земля Полоцкая, клали передъ нами листы дѣда нашего Казимира, и дяди нашего Александра, и пана отца нашего,

королей и великихъ князей ихъ милости. № 5. штежъ ихъ милость перво сего монарха и дали имъ права вольные, добрые крестіанскіе, какъ въ корунѣ Польской, какъ же и перво того которые добровольства мѣли отъ предковъ нашихъ великихъ князей, отъ великого князя Витовта и Жикгимонта и Скиргайла; и просили насъ, абыхмо имъ вси тые права и добровольства нашимъ привиліемъ потвердили. Мы бачучи, ижъ яко предковѣ ихъ, такъ и они завжды у суполной вѣрности заховали ся ко предкомъ нашимъ и къ намъ, и хотѣчи имъ тую сталость ихъ вѣры и послугу щедробливостью нашою панскою отдасть, зъ особливѣе ласки нашее господарскоѣ, вси тые добровольства, листы предковъ нашихъ, дѣда и дяди и отца нашего, королей и великихъ князей ихъ милости, симъ нашимъ листомъ потверждаемъ и права вольныя крестіанскія, добрыя, справедливыя симъ нашимъ привиліемъ на вѣчныя часы даемъ. Напервѣй, въ церкви Божьи и въ имѣнья церковныя намъ не вступатися, въ домъ Божій святой Софій и въ домъ Божій святого Спаса и въ иные дома церковныя намъ не вступоватися. А хто кого обвадитъ явно, альбо ли таемно, ино намъ его не карати ни одною виною, а ни имѣньемъ, ни нятствомъ, ни серебромъ, ни горломъ, алижъ поставити его очи на очи, на явномъ судѣ хрестіанскомъ, и того хто вадилъ и того на кого вадилъ, и, досмотрѣвши межѣ ними справедливости, хто будетъ што заслужилъ, какъ право укажетъ, такъ его карати. А который которую вину заслужитъ, ино его самого карати, по его винѣ, а жоны и дѣтей не займати и имѣнья не рушити; ни жъли который будетъ въ томъ дѣлѣ, а то вѣдалъ, тыхъ карати: проступитъ ли отецъ, ино отца карати; проступитъ ли сынъ, ино сына карати, а отца за сыню вину не карати, а сына за отцову вину не карати, только того самого карати хто виноватъ будетъ. Такъже хто держитъ отчизныи имѣнья свои,

№ 5. а либо кому што будетъ великій князь Витовтъ далъ, и великій князь Швидрыгайло далъ, и дѣдъ и дядя и отецъ нашъ короли ихъ милость што кому дали, и мы што кому дали, то ему держати, какъ въ королевствѣ Польскомъ князи и панове и мѣщане держать: въсхочетъ ли хто свое имѣнье продати, или отдати, или замѣнити съ кимъ, ино намъ, або намѣстникомъ нашимъ явивши продати и замѣнити. А въ купленины намъ Полоцкіе не вступатися, такъ же и въ безадщины ихъ и въ отумерщины не вступоватися намъ. Такъ же который бояринъ, або мѣщанинъ сойдесть зъ сего свѣта, ино жона тая вдова, доколѣ на вдовѣемъ столыцѣ сѣдитъ, имѣньемъ мужнимъ володаеть; а коли въсхочетъ пойти за иного мужа, ино ее силою замужъ не давати; а пойти ей съ тымъ, што будетъ мужъ записалъ, а шобы то было звѣдомо племени, або инымъ добрымъ людямъ; а имѣнье оставити дѣтемъ, а не будетъ ли дѣтей, ино братья, а не будетъ ли братья, ино ближнимъ первого мужа. Тежъ на боярскіе люди и на мѣщанскіе сябры дѣцкихъ намъ и намѣстникомъ нашимъ не давати. А будетъ ли кому кривда, ино перво у господаря его искати правомъ; пакъ ли не въсхочетъ господарь его подобнымъ рокомъ права учинити, ино намъ и намѣстникомъ нашимъ дѣцкихъ давати; а вина которая будетъ осужена, ино господарю своему заплатити. А въ люди намъ боярскіе не вступатися. А воеводѣ нашему Полоцкому мѣщанъ одному не судити, судити ему зъ бояры и зъ мѣщаны; а черезъ поруку въ нятство не сажати, а по муцѣ вѣры не няти; а холопу и робѣ вѣры не няти жъ. А въ подводы намъ коней не брати въ Полочанъ, ни въ поселскихъ путниковъ, ни въ сябровъ городскихъ; такъ же зъ боярскихъ и зъ мѣщанскихъ сель людѣмъ ненадобъ ни на какую службу тягну-

ти къ нашимъ (*) дворомъ. А старыхъ судовъ намъ не посуживати, а ни своихъ судовъ судивши не посуживати. А въ заставу намъ бояръ и мѣщанъ Полоцкихъ и поселскихъ путниковъ не посылати, а заставъ намъ у Полтескѣ некоторыхъ Полочаномъ николи не давати, безъ ихъ воли. А съ нами имъ быти готовымъ на войну. А по волости нашей воеводѣ нашему не ѣздити; а побѣдетъ ли въ ловы, ино по станомъ его не даровати. А станетъ ли въ которого Полочанина татьба, а допнутлися татьбы, ино господарю отдати, а чего не достанетъ, ино татя выдати. А бобры гнати по старой пошлинѣ. Такъ же важницю въ замку, або въ мѣстѣ нашемъ Полоцкомъ, которую перво того держали бояре посполъ зъ мѣщаны, за предковъ нашихъ, за дѣда нашего Казимира короля его милости, а потомъ съ тою важницю дядя нашъ Александръ король его милость платъ былъ взялъ ко скарбу его милости, ино король его милость старшій, панъ а отецъ нашъ, зася тую вагу и платъ зъ нее бояромъ и мѣщаномъ дати рачилъ; а такъ и мы, зъ ласки наше, при той важницю ихъ заховываемъ: маюť они по давному на-полы, подлѣ уставы предковъ нашихъ, ее мѣти, то есть, маюť въ каждый годъ держати по два боярины а по два мѣщанины, и платъ зъ нее выбирать, и свою половину маюť обернути на свои потребности. Такъ же которые дома и мѣстца церквамъ Божьимъ наданы злавна отъ предковъ нашихъ, або владыка, и игуменья, и иные князи, и бояре, и мѣщане и люди добрые прикупили къ церквамъ Божьимъ, а тые дома и мѣстца суть въ замку, або середь мѣста Полоцкого: и будутъ ли за панованье шастливой памяти дѣда нашего Казимира короля его милости, владыка и игуменья на тыхъ звѣчныхъ мѣстцахъ церковныхъ за собою слуги и иные

(*) Въ старин. сп. слово это написано слѣтно и съ тѣломъ, такъ: «кнѣжимъ»; но, кажется, нельзя читать его «кнѣжимъ».

закладни мѣли, мы и теперь владыцѣ и игуменю дозволяемъ на тыхъ мѣстцахъ и въ тыхъ церковныхъ домѣхъ слуги и иные закладни за собою мѣти, и ихъ судити, а то тымъ обычаемъ: ижъ маюť имъ служити, а поземъ имъ господаремъ своимъ съ тыхъ мѣстецъ маюť давати; и будутъ ли ся которые зъ нихъ торгомъ обыходити, они маюť серебрящизну и ордынщины зъ мѣстомъ нашимъ платити; а которые за мѣстомъ фолварки, поля и сѣножати церковные владыка и игуменья маюť, на тыхъ полѣхъ и сѣножатехъ не маюť торговыхъ людей, а ни ремесленныхъ за собою садити, ни жъли маюť садити людей сельскихъ, которые бы тамъ хлѣбъ пахали. Такъ же бояре Полоцкіе, тымъ же обычаемъ, которые зъ нихъ отчизные свои дома и мѣстца внутри города маюť, або на мѣстѣ Полоцкомъ, и тежъ если будутъ еще за дѣда нашего Казимира, и за дѣда нашего Александра, и за отца нашего, королей ихъ милости, отцы ихъ и они сами слухнымъ, а врядовымъ обычаемъ которые дворища купили, або съ данины ихъ милости маюť: тымъ и теперь мы дозволяемъ на тыхъ дворищахъ слугъ и людей за собою садити, и ихъ судити. Потому жъ который бы зъ нихъ хотѣлъ купецствомъ або ремесломъ каковымъ ся обыходити, тые маюť зъ мѣщаны нашими серебрящизну и ордынщину платити и иные слухные податки, ко пожитку нашему земскому. А што ся тычетъ серебрящизны, которую войтъ и бурмистры и радцы на свои потребности кладутъ на мѣсто наше, церковнымъ того людѣмъ и боярскимъ помогати ненадобѣть. И тежъ которые бояре будутъ мѣти близко мѣста зъ стародавна свои лѣсы и боры и дубровы и гаи, въ тыхъ ихъ лѣсахъ и борѣхъ и дубровахъ и гаѣхъ не маюť мѣщане на свои потребности брати дерево около мѣста, въ нашихъ борѣхъ и лѣсахъ и дубровахъ и гаѣхъ, гдѣ злавна будутъ

бирали, а въ боярскихъ не маюť брати; а № 5. если бы который бояринъ, своею доброю волею, дозволилъ мѣщаномъ въ своемъ лѣсѣ и борѣхъ и дубровахъ и гаѣхъ дерево брати, ино то есть въ его воли. Такъ же у которого Полочанина загудятъ воскъ въ Ризѣ или индѣ, а прѣдетъ до Полоцка, ино Полочаномъ взяти тотъ воскъ до Полоцка, къ собѣ въ городъ; а карати его Полочаномъ по своему праву, а намъ въ тое не вступатися. А Полочаномъ нашихъ рѣкъ и озеръ не таити; а хто потаитъ, мы ихъ карати маемъ. А Полочаны намъ не даритися никому. Такъ же есмо и мыта имъ отпустили по всей нашей державѣ, и тежъ серебрящизну отпустили есмо вѣчнѣ. А которые Полочане побьются межи собою, а за дѣцкимъ поеднають ся, ино намъ куница шерстью зъ миршины; такъ же коли посварятся Полочане и выддутъ ся оба въ кольцо, ино то вина наша; а если одинъ выдасть ся, а другій не выдасть ся, то есмо имъ отпустили. А за закладную куницу брати по десяти грошей, а поборцу два грошы, такъ же дѣцкованья отъ рубля по чотыри грошы, а по мильного по грошу; а владычному слугѣ и боярскому потомужъ дѣцкованье. А воеводинымъ слугамъ тивунства городского не держати, и съ тивуномъ воеводинымъ слугамъ по волости Полоцкой не ѣздити; а тивуну городскому на нашъ дворъ давати по три грошы на день. А на Черсвати воеводинымъ слугамъ не судити, судити тивуну по старой пошлинѣ; такъ же на Невли судѣ не быти, и по всей волости Полоцкой, судити воеводѣ на городѣ. А такъ же владыцѣ на попѣхъ Полоцкихъ соборная куница шерстью, а въ пригонѣ попомъ и игуменомъ къ владыцѣ не ходити; а церковные дома присмотряти старостамъ городскимъ, а церковныхъ земель владычнымъ слугамъ не держати. А гривострыжцу по волости не ѣздити, а ни льву брати. Такъ же намъ господарю давати воеводу нашего Полочаномъ по ихъ воли. А прѣхавши воеводѣ

№ 6. нашому къ Полоцку, первого дня крестъ пѣловати Полочаномъ, на томъ, штобъ безъ ихъ sprawy Полочанина не карати ни въ чомъ; а воеводу городомъ не даровати. Тежъ Полочаномъ всимъ жити въ Полоцку добровольно, покуль хто хочеть; а будетъ ли которому Полочанину отъ насъ насильство, намъ его силою не дѣржати, ино ему путь чистъ, куды хто хочеть, безъ всякоѣ зацепки; а въ своемъ имѣньи во всемъ воленъ, пдучи прочъ прода-ти, або которому пріятелю своему приказати, въ то намъ не вступатися. А который Полочанинъ иметъ намъ о чомъ жаловатися, о насильи на Полочанина, пріѣхавши до Литвы одинъ, безъ истца: намъ зъ Литвы дѣцко не слати, писати намъ листъ свой къ воеводѣ нашему, хотя о смертной винѣ, ино ему судити по пѣлованью, а осудивши его, въ Полоцку жъ карати виноватого, по ихъ праву, съ Полочанъ по испросу; а воеводѣ нашему отъ пригоновъ городскихъ посуловъ не брати. А чоломбитъ намъ у Полочанъ пріймати. Такъ же воеводѣ нашему отъ варъ имати гостиньцы, по полукопѣ грошей со всякоѣ вары. А на твердость того всего, и печать нашу казали есмо привѣсити. А при томъ были панове рады наши великого князства Литовского: бискупъ Виленьскій князь Павелъ, княжа Ольшанское; воевода Виленьскій, канцлеръ великого князства Литовского, державца Бобруйскій и Борисовскій панъ Янъ Юрьевичъ Глѣбовичъ; панъ Виленьскій, державца Упвтскій панъ Григорей Григорьевичъ Остикъ; воевода Троцкій князь Янушъ Юрьевичъ, княжа Ольшанское; панъ Троцкій, староста Жомотьскій, державца Плотелскій и Телшовскій панъ Еронимъ Александровичъ Ходкевичъ; маршалокъ земскій, державца Шавленскій панъ Миколай Яновичъ Радивилъ; воевода Кіевскій князь Фридрихъ Глѣбовичъ Пронскій; воевода Полоцкій панъ Станиславъ Станиславовичъ Довойна, и иные панове рады наши. Писанъ и данъ у Вильни, лѣта Божьего

нaroжeнiя 1547, мѣсяца Феврала 21 дня, индикта 5. — У того листу привилея подписъ руки короля его милости тыми словы: «Sigismundus Augustus Rex,» а подпись руки писарекоѣ тыми словы: «Иванъ Горностаѣ, маршалокъ дворный, подскарбій земскій и писарь.»

Сія грамота подтверждена Королемъ Стефаномъ Баторіемъ 1580 г., Мая 7. Обѣ привилегиі вписаны, слово въ слово, въ Актову Книгу земскія воеводства Полоцкаго, того же года Октября 8. Выписка изъ сихъ книгъ (widymus) писана на двухъ вмѣстѣ сшитыхъ листахъ, современнымъ почеркомъ, безъ строчныхъ знаковъ. На ней скръпъ: Юрей Котовицкій, писарь земскій Полоцкій. Двѣ судейскія печати, приложенныя къ акту, отклеились. Ветхъ.

Изъ архива Полоцкой Духовной Консисторіи.

6. — 1547 Марта 6. Окружное посланіе Кіевского митрополита Макарія Литовско-Русскому православному духовенству и мирянамъ, о пожертвованіяхъ на возобновленіе Успенской церкви въ Львовѣ.

Благословеніе Макарія, Божіею милостию архіепископа митрополита Кіевского и Галицкаго и всея Руси, о Святомъ Дусѣ возлюбленнымъ еже о Христѣ сослужебникомъ, богомолцомъ и братіи нашего смиренія, освященнымъ и боголюбивымъ епископомъ, честнымъ архимандритомъ и игуменомъ, протопопомъ, священникомъ, діакonomъ и всимъ причетникомъ святыхъ Божіихъ церквей, туто жъ о Святомъ Дусѣ возлюбленнымъ, благовернымъ и христолюбивымъ сыномъ нашего смиренія, княземъ и паномъ, княгинямъ и панямъ и почестнымъ вдовамъ, воеводамъ и старостамъ и ихъ милости намѣстникомъ, паномъ земляномъ, бояромъ и дворяномъ, войтомъ, бурми-страмъ, радцамъ, мѣщаномъ и всимъ православнымъ христіянамъ нашего закону Греческаго, вѣрующимъ безъ порока во всесвятую Живоначалную Троицу, будучимъ въ панствѣ

господаря нашего у великомъ княжествѣ Литовскомъ и Рускомъ, и ихъ милости жопамъ, молитва наша къ милостивому Богу за всѣхъ вашей милости, дѣтей нашихъ, здравіе всегда. Даемъ вашей милости вѣдати, штожъ тыхъ часовъ присылали до насъ намѣстникъ нашъ Галицкій, Львовскій и Каменца Подольского, епископъ Макарій, и всѣ мѣщане Ильвовскіе богомолца городского и нашего, священника Михаила, а двухъ мѣщанъ Ильвовскихъ же Якова и Павла, повѣдаючи о томъ, штожъ церкви Успенія Пречистой Богородицы въ мѣстѣ Львовскомъ муръ распадался на полы, и, чого Боже вховай, абы въ короткомъ часѣ тотъ муръ на кгрунтъ не палъ и людемъ побитъ и школы накладу церковному не полѣдалъ; гдѣ жъ они хотячи на томъ же мѣстѣ церкви новую Успенія Пречистой Богородицы змуровати, просили насъ за то, абыхмо о томъ до вашей милости, за ними въ причинѣ, листъ нашъ писати казали. Про то мы вашу милость дѣтей нашихъ благословляемъ, и велико жадаемъ, абы ваша милость рачили того священника Михаила и тыхъ двухъ товаришовъ его, мѣщанъ Львовскихъ, латкомъ своимъ запомочъ, што кому Богъ милосердый на сердца положить, чимъ бы они тотъ храмъ Пречистой Богородицы знову змуровати мѣли; а то бы ваша милость рачили вчинити для своего богомолья и душевного спасенія, памятуячи святое писаніе, еже рече: «Господи, благослови и освяти любящихъ благолюбію дому твоего, и мѣсто великія славы твоея;» и паки: «хто коли ко хвалѣ Божіей строитъ земная, тому его святая милость уготоваетъ небесная». А мы въ томъ споручницы ся вашей милости даемъ, ижъ его святая милость воздастъ то вашей милости, стократнымъ возданіемъ въ царствіи своемъ небесномъ. При томъ милость Божія и пречистой его Матери, и нашего смиренія благословеніе и молитва да есть съ вашею милостию и на домѣхъ вашихъ всегда. Писанъ въ Новѣгородку, подъ лѣто

Божія naroжeнiя 1547, мѣсяца Марта 6 дне, № 7. индикта 5.

Подлинникъ, хранящійся въ Львовскомъ Старапропигіальномъ архивѣ, писанъ на бумажномъ листѣ, четкою современною скорописью. Лѣтосчисленіе церковными буквами. Въ концѣ грамоты своеручная митрополичья подпись, крупною вязью: Волею Божіею Макарій, архіепископъ митрополитъ Кіевскій, Галицкій и всея Руси. Тутъ же остался знакъ, что приложена была печать.

Доставленъ въ Археографическую Коммиссію, въ списокъ, заграничнымъ Корреспондентомъ Г. Зубрицкимъ.

7. — 1548 Феврала 22. Грамота Кіевского митрополита Макарія Луцкому православному епископу Θεοδοсію, о допущеніи священника Тимоея къ служенію въ Клеванской Троицкой церкви, по предоставленному ему на то праву владѣльцемъ.

..... ю милостию, архіепископъ митрополитъ и всея Дусъ возлюбленному еже о Христѣ сослуж молцу смиренія, честному епископу владыцѣ Луцкому и скому пу Θεοδοсію, молитва наша къ милостивому Богу О здоровьи твоей милости, богомолца нашего, ради слышимъ, и каждого часу, слышачи, съ того милостивого Бога хвалимъ и духовнѣ ся тому веселимъ. Тыхъ часовъ присылаѣ до насъ богомолецъ нашъ, священникъ бывшій Воскресенскій Луцкій Тимоей, повѣдаючи о томъ, штожъ дей онъ взялъ церковь въ имѣньи князя Ивана его милости Чорторыйского, старостича Луцкого, святоѣ Троицы, въ Клевани; и твоя дей милость, нѣтъ вѣдома въ который обычай, ему службы Божьи въ той церкви святоѣ Троицы служити забороняешъ, а не для иншоѣ жадноѣ причины, одно для той, ижъ бы онъ въ имѣньи князя его милости не былъ. А такъ

№ 8. мы твою милость, брата нашего, благословляемъ и напоминаемъ, абы твоя милость тому священнику Тимоою, въ имѣннѣ князя его милости, въ церкви святой Троицы службы Божьей служить не заборонялъ, и въ томъ ему жадной переказы не дѣлалъ, и заховалъ бы ся твоя милость ко князю Ивану его милости во всемъ. А милость Божья и пречистой его Матери, и нашего смиренія благословеніе и молитва да есть съ честнымъ епископствомъ твоей милости всегда. Писанъ въ Новгородку, мѣсяца Февраля въ 22 день, индикта 6.

Подлинникъ писанъ на бумажномъ полулистѣ, современною скорописью, безъ строчныхъ знаковъ. Литосчисленіе церковными буквами. Въ концѣ грамоты своеручная митрополичья подпись, крупною вязью: волю Божію Макарей, архіепископъ митрополитъ Кіевскій, Галицкій и всеа Руси. Бывъ сложенъ и запечатанъ желтовосковою печатью, импѣтъ на пакетъ надпись: О святѣмъ Душѣ возлюбленному еже о Христѣ сослужбнику и богомолцу и брату нашего смиренія, честному епископу владыцѣ Луцкому и Острозскому отцу Оеодосію. Ветхъ.

Хранится въ Императорской Публичной Библиотецѣ.

8. — 1548 Декабря 7. Окружная королевская грамота, о воспрещеніи женскому полу беззаконствовать и вступать въ сожитіе съ Жидами, Турками и Татарами, а купцамъ и ремесленникамъ торговать и работать въ воскресные и праздничные дни, съ предоставленіемъ Виленскому бискупу суда надъ виновными.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, княземъ, паномъ, и воеводамъ, старостамъ, державцамъ, намѣстникомъ, тивуномъ, кнегинямъ, панямъ вдовамъ, бояромъ и дворяномъ нашимъ, войтомъ, бурмистромъ, радцамъ и всемъ мѣщаномъ, и подданнымъ

нашимъ, и тежѣ князьскимъ и панскимъ духовныхъ и свѣтскихъ. Присылалъ до насъ князь Павелъ, бискупъ Виленскій, повѣдаючи о томъ, ижъ дей по мѣстѣхъ и дворѣхъ нашихъ и имѣннѣхъ вашихъ, промежи васъ подданныхъ нашихъ, многіи невѣсты мужовъ своихъ опускаючи свое воли вживають, и не въ законѣ мѣшкають, и, будучи хрестьянки, зъ Жиды, съ Турки, съ Татары живутъ, чужоложства и иншіи збытки чинятъ; которыхъ дей дѣти ихъ они зъ собою беручи у вѣру свою хрестятъ: которыхъ дей передъ тымъ завжды, за таковыи ихъ выступления и вчинки, черезъ служебника его милости было имано и до казни и каранья его давано. Къ тому дей многіи съ подданныхъ нашихъ мѣщанъ Виленскихъ, то есть, ремесленники, золотари, слѣсары, ковали, и тежѣ крамники, кравцы и шевцы, закону Римского, крамы свои раскладываютъ и продають, а иншіи ремесленники въ дни святые робять, недѣли и никоторого свята въ почтливости не мають; которыхъ дей передъ тымъ такъ же за то было имано и до казни его милости давано: и такъ абыхмо и теперь рассказали таковыхъ карати. — Про то, которыхъ бы были люди распутныи и своевольныи, и таковыи злыи вчинки и своеволенства пополняютъ, а водлугъ закону хрестьянского вѣры Римскоѣ мѣшкати и заховыватися не хочуть, мы рассказали и дали моцъ тому служебнику его милости князя бискупа Виленского, который отъ него уставленъ на то будетъ, таковыхъ выступныхъ, хто бы хотѣлъ то чинити, або чинитъ, гдѣ — козвекъ знашедши мощно имаги, и до казни и каранья его милости, гдѣ того обычай есть, давати; такъ тежѣ и тыхъ своевольныхъ людей, закону Римского, которыхъ дней святыхъ и святъ въ учтливости мѣти не хочуть, за таковыи своеволенства ихъ, такъ же, поймавши, до казни его милости давати, абы они потомъ того ся важить не смѣли, и недѣли и иншіе дни святые у — въ учтливости мѣли, и тыхъ своеволенствъ ся повста-

гали. — И вы бы о томъ вѣдали, и тому служебнику князя бискупа его милости Виленского, который то отъ него въ порученіи своемъ мѣти будетъ, противны въ томъ не были, и еще бы есте на таковыхъ помочь ему давали, конечно, абы то инакъ не было. Писанъ въ Петровъ, подъ лѣто Божьего нароженья 1548, мѣсяца Декабря въ 7 день, индикта 7.

Подлинникъ писанъ на тонкомъ пергаменномъ листкѣ, современною скорописью, почеркомъ четкимъ и твердымъ, но безъ строчныхъ знаковъ. Литосчисленіе церковными буквами. Королевской подписи нѣтъ. Внизу грамоты скръпъ: Валеріанъ писарь. Печать Литовскаго княжества небольшая, подъ кустодією.

Изъ архива Виленскаго Капитула. См. рукоп. Бѣлор. Арх. др. грамотъ, Ч. II, стр. 147 — 148, принадлежащую Археографической Комиссіи.

9. — 1549 Марта 15. Королевская грамота Гомельскимъ державцамъ, о неприкосновенности угодьевъ, пожалованныхъ Можайскимъ княземъ Симеономъ Ивановичемъ Николаской церкви въ Гомель, и несужденіи церковныхъ людей.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, державцу Гомейскому пану Яну Христовичу и инымъ державцомъ нашимъ, хто напотомъ будетъ отъ насъ Гомей держати. Тыхъ часовъ повѣдали передъ нами священники Рускіе церкви святого Николы, ижъ князь Семенъ Можайскій записалъ на церковь святого Николы, у Гомы, двѣ земли, Севостьяновщину а Богдановщину, съ пашнями и зъ деревомъ бортнымъ и со всемъ съ тымъ, яко ся тыи земли зъ давныхъ часовъ въ собѣ мають и што къ нимъ прислухаетъ; на штожъ они и листы князя Семеновы передъ нами оказывали, въ которыхъ описуетъ: ижъ бы люди на тыхъ земляхъ сѣдѣли, тогда священники

№ 9. мають ихъ судити и рядити, а державцы Гомейскіе тыхъ людей церковныхъ не мають судити, а ни рядити, а ни дѣцкихъ своихъ до нихъ всылать о кождую рѣчь, окромъ городского дѣла; а кликовщины они мають давати зъ земли по три грошы, а у — въ оступъ ходити, а черезъ то вжо ни во што вступатися не мають, а ни пожитковъ жадныхъ на нихъ не брати, а ни вымышляти. Которые жъ дей люди они держали съ упокоемъ немалый часть, и тепере держатъ: нижли будучи отъ насъ на Гомью державцою, небожчикъ панъ Янъ Дорошкѣвичъ почалъ былъ тымъ людямъ ихъ кривды и утиски великіи чинити, и повинны вводити, и дѣцкихъ своихъ до нихъ всылать; кгдажъ они на тотъ часъ о томъ королю его милости, пану и отцу нашему жаловали и били его королевской милости чоломъ, абы его милость рачилъ ласку свою вчинити и оборону свою имъ въ томъ вѣдати: и его королевская милость, за жалобою ихъ, до пана Яна Дорошкѣвича листъ свой писати казать рачилъ, приказуочи ему, абы онъ въ тыхъ земляхъ далъ имъ впокой, и въ нихъ ся ничимъ не вступовалъ, и заховалъ ихъ водлугъ листовъ князя Семена Можайского. Кгда жъ дей небожчикъ панъ Янъ Дорошкѣвичъ въ томъ имъ, за рассказаньемъ его королевскоѣ милости, впокой былъ далъ: нижли вжо ты, будучи отъ насъ на Гомью державцою; кривды и повинны имъ чинишь, и въ тые земли вѣзжати имъ забороняешь, и пожитки съ тыхъ земель на себе брати кажешь. — Кгдажъ они били намъ чоломъ, абыхмо листъ отъ себе, такожъ оборону въ томъ имъ дали: про то приказуемъ тобѣ, абы еси въ тые земли ихъ не вступалъ, и имъ добровольного вѣзду въ тыи земли и въ люди, которые на тыхъ земляхъ сѣдять, не заборонялъ, и пожитки съ нихъ брати имъ допускалъ, и во всемъ ся къ нимъ спокойнѣ водлугъ листовъ князя Можайского заховалъ, и тыхъ бы еси только повинностей съ тыхъ людей ихъ смотрѣлъ, ко-

№ 10. торые князь Можайскій въ листъ своемъ описалъ и къ замку Гомейскому полнити ихъ имъ казалъ. Нижли жъ бы тая рѣчь иначе ся въ собѣ мѣла, нижли они намъ справу дали: и ты бы о томъ до насъ листъ свой отписалъ и достаточнѣ справу около тоѣ рѣчи намъ далъ; а мы на онъ часть, вырозумѣвши съ писанья твоего, то съ тымъ вчинимъ, што будетъ слушного и справедливого. Писанъ у Вильни, подъ лѣто Божьего нарощенья 1549, мѣсяца Марта въ 15 день, индикта 7.

Подлинникъ писанъ на бумажномъ полулистѣ, современною скорописью, безъ строчныхъ знаковъ. Алфавитъ церковными буквами. Королевской подписи нѣтъ. Внизу грамоты скръпъ: Валеріанъ писарь. На оборотѣ ея находится слѣдующая приписка: Року 1621, мѣсяца Іюня 15 дня, въ Бозѣ велебный е. м. куръ Іоасафъ Кунцевичъ, архіепископъ Полоцкій, къ актикованью до книгъ земскихъ Полоцкихъ у суду покладалъ. — «Михаилъ Тишкевичъ, писарь земскій Полоцкій.» Она подтверждена вторично Сигизмундомъ Августомъ, 1568 г. Января 24, и потомъ королемъ Стефаномъ Баторіемъ, 1584 г. въ Мартѣ.

Хранится въ архивѣ Полоцкой Духовной Консисторіи.

10. — 1551 Августа 15. Жалованная подтвердительная грамота Кіевскому Печерскому монастырю, на возобновленіе въ немъ монастырской общины, съ изложеніемъ правилъ оной.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, чинимъ знаменито сямъ нашимъ листомъ, хто на него посмолитъ, або чтучи его услышитъ, нынѣшнимъ и напотомъ будущимъ, кому будетъ потреба того вѣдати. Били намъ чоломъ архимандритъ монастыря пречистоѣ

Богоматери Печерского Ларіонтъ и крылошане и застолпники и вся братья того монастыря, и повѣдили передъ нами, штожъ воевода Кіевскій князь Фредрихъ Глѣбовичъ Пронскій, съ дворяниномъ нашимъ Павломъ Оранскимъ, зъ волею и розказаньемъ нашимъ, въ томъ монастыри Печерскомъ, водѣ привилія и подтверженья короля его милости Жикгимонта, отца нашего, общину вчинилъ, и всю науку, яко ся мають справовати, на листъ своемъ имъ выписалъ; на што и листъ постановленья тоѣ общины передъ нами покладали и били намъ чоломъ, абыхмо на то дали имъ нашъ листъ и тую общину подтвердили имъ нашимъ листомъ. Ино мы того листу князя воеводы Кіевского оглѣдавши, для певности, казали есмы его слово отъ слова въ сѣхъ листъ нашъ вписати, который такъ ся въ собѣ маеть:

«Зъ розказанья господаря нашего, короля его милости Жикгимонта Августа, я Фредрихъ Глѣбовичъ Пронскій, воевода Кіевскій, державца Чорнобыльскій, а при немъ восполкъ былъ отъ господаря его милости посланный дворянинъ его милости Павелъ Григорьевичъ Оранскій. Ижъ што перво сего святоѣ и славноѣ памяти господарь нашъ, король его милости старый Жикгимонтъ, панъ отецъ его милости, хотѣчи, ижъбы въ монастыри Печерскомъ святоѣ Пречистоѣ, въ Кіевѣ, община вѣчными часы была, и хвала Божья ся розмножала, и врядъ и справа ся въ немъ заховала, на которую жъ общину король его милости старый и привилей (*) свой дати былъ рачилъ; гдыжъ за тымъ розказаньемъ его милости, тая община въ томъ монастыри первѣй сего за архимандрита Игнатя была: нижли по немъ архимандриты Печерскіе, не хотячи тоѣ общины мѣти, для своего пожитку, тую общину опустили и ее сказали; и тотъ привилей на тую общину даный, за незычливостью и недозрѣньемъ, въ невѣдомости отъ нихъ

былъ страчонъ: ино, коли тотъ привилей до рукъ короля его милости старого приполъ, и зася его милость къ тому монастырю тотъ привилей отдати рачилъ. Потомъ вси старцы монастыря Печерского жаловали и оповѣдали господарю нашему, королю его милости, ижъ архимандриты ихъ Печерскіе тоѣ общины мѣти не хотятъ, и, держачи тотъ монастырь, великое знищенье и шкоды ему чинятъ, беручи платы и доходы дѣтей и кровныхъ своихъ тымъ запомагають: за чимъ вже тотъ монастырь, за ихъ знищеньемъ, на конецъ зъубожалъ, и церковь Божья опала, и имѣнья и подданныхъ церковныхъ грабятъ, и винны великіе на нихъ берутъ. Гдыжъ они о томъ были чоломъ теперешнему господарю нашему, королю его милости, абы въ томъ монастыри община зася водѣ привилія короля его милости старого была установлена; и его милость господарь нашъ король, бачучи отъ архимандритовъ таковыя кривды и шкоды непобожныя, а хотячи мѣти, абы водѣ привилія пана отца его милости и его милости подтверженья, на вѣки вѣчныя община въ томъ монастыри вѣстановлена была, писалъ его милость до мене, абыхъ есми посполъ съ тымъ дворяниномъ его милости господарскимъ Павломъ Оранскимъ, общину въ томъ монастыри вчинилъ, и всякіе рѣчи списалъ, и на писемъ имъ далъ, которымъ обычаемъ архимандриты и старцы мають ся въ монастыри справовати. Я маючи розказанье и науку отъ господаря его милости, въ томъ монастыри Печерскомъ, водѣ привилія короля его милости старого, и тежъ водѣ привилія подтверженья короля его милости господаря нашего теперешнего, общину есми на вѣки вѣчныя вчинилъ, и всю науку, какъ ся они мають справовати, на томъ листъ моемъ выписалъ, и врядниковъ, иконома и полатника установилъ, и имъ у справу и въ моцъ яко монастырь и старцовъ, такожъ имѣнья и всѣхъ подданныхъ монастырскихъ отъ мала и до велика подаетъ. А што ся доты-

четъ общины и справы и вряду и постановленья, архимандриты и старцы завжды воеводчю службу по недѣлямъ и по праздникомъ мають мѣти, и во всемъ ся справовати водѣ правилъ Святыхъ Отецъ, и за господаря его милость Бога просити. А што ся ткнетъ сорокоустовъ, панафидъ, молебновъ и придѣловъ, то маеть быти архимандриту съ крылошанъ по половицы. А которые души у вѣчистыхъ синанихъ и въ суботникъ вписываются, тые пѣнязи мають быти до екарбу церковного на полату; и тежъ, коли хто кого привезетъ до того монастыря тѣло его ховати, и прикрыто будетъ чимъ тѣло его, тое покрывало маеть брано быти до полаты. А которого бы индѣя и пана и земнина, або и мѣшного стану привезено было тѣло его на похованье до монастыря, архимандриты и старцы жадного торгу чинити не мають, але мають то взяти, штожъ хто водѣ можности своее дастъ. А который чернецъ умретъ, и зостанетъ ли ся што по немъ пѣнязей и статку, то маеть во животъ его взято быти на полату, а его мають поховати и душею его печаловатися; а который бы не мѣлъ у себе ничего, тогда мають его поховати и душею его ся печаловати, такъ же яко и того, хто зоставитъ што по собѣ: проведъ надъ нимъ чинити, и сорокоустъ пѣти, и въ помянникъ душу его вписати. Архимандритъ и старцы завжды въ одномъ мѣстцы у трапезѣ мають ѣсти и пити, и при столѣ чтенье честей. Къ тому тежъ, што ся дотычетъ старцовъ, крылошанъ и застолпниковъ, они безъ дозволенья архимандричьего и иконома изъ монастыря нигдѣ ходити не мають; а которые бы изъ нихъ, своею волею, зъ монастыря безъ ихъ дозволенья ходити мѣли, або мѣшкаячи въ монастыри хто въ чимъ — келвекъ выступилъ, тогда таковыхъ архимандритъ зъ братьею, обмовивши, мають за то карати водѣ права ихъ духовного; а естли бы который не мѣлъ послушенъ быти, такового зъ монастыря мають выслати. А што ся дотычетъ

(*) См. Акт. Зап. Росс. Т. II, № 112.

№ 10. келій и садовъ ихъ братейскихъ, то все маеть въобщь быти. А который братъ своею волею хотѣлъ бы зъ монастыря прочь пойти, тому кельи свое не продавати, а ни съ полаты за то пѣнязей ему не откладывати: маеть тая келья обще быти, одножъ маеть маетность свою побрати. Архимандриту и крылошаномъ и всей братии одежда и дрова зъ скарбу церковного маеть имъ давана быти. А чернцы въ кельяхъ своихъ бѣлцовъ и робятъ держати и всякихъ живностей мѣти не мають: лечъ архимандритъ для послуги свое слугу и хлопца мѣти маеть. А къ тому, што ся ткнетъ печати церковноѣ, архимандриты у себе ее держати не мають, одножъ тая печать маеть быти въ скарбѣ церковномъ, за ключомъ архимандричимъ и икономовымъ; а коли печати будетъ потреба, тогда полатникъ маеть до нихъ тую скрынку приносити. А што ся дотычетъ платовъ и доходовъ, и даней грошовыхъ и медовыхъ, и въѣздовъ по имѣньямъ и иншихъ доходовъ, и роздаванья врьдовъ въ имѣньяхъ церковныхъ, и церквей подаванья, и всихъ пошлинъ, судовъ и присудовъ: архимандриты въ жадные sprawy, ни во што ся вступовати на вѣки вѣчные не мають, одножъ ему церковную справу вѣдати; але все икономъ съ полатникомъ и братьею у своей моцы мѣти мають, и платы и доходы выбирать, и до скарбу церковного брати, и на потребности церковные оборочати. А личбу какъ съ приходовъ, такъ и съ расходовъ, икономъ съ полатникомъ два кротъ на годъ архимандриту и всей братии со всего мають чинити; а естли бы тотъ икономъ, або полатникъ не мѣлъ добръ ся справовати, тогда архимандритъ посполъ съ братьею на то мають обрати годного и на его мѣсто установити, а того нерадного выстановити, абы для того церкви Божьей и всей братии шкоды не было. Архимандриты и старцы зъ Москвы и зъ Волохъ чернцовъ до монастыря пріймовати, и межи собою ихъ переховывати, и въ чернцы ихъ

оттолъ становити не мають. Которую жъ общину вси чернцы того монастыря Печерского, водлѣ привилія короля его милости старого, и тежъ водлѣ подтверженья и розказанья господарьского, на вѣки вѣчныи приняли и ухвалили, на штожъ есьмо, посполъ съ тымъ дворяниномъ господарскимъ Павломъ Оранскимъ, ихъ милости старцомъ Печерскимъ дали сесь нашъ листъ, зъ нашими печатями. А при томъ были земляне Кіевскіе: пацъ Василей Коташевичъ, а панъ Федоръ Тиша, а намѣстникъ митрополій и Софійскій панъ Василей Панковичъ. Писанъ въ Кіевѣ, подъ лѣты Божьего нароженья, тысяча пятьсотъ чотыридесятъ девятого, мѣсяца Іюля двадцать четвертого дня, индикта седмого.» И зъ ласки наше, на чоломбитѣ ихъ и тежъ для хвалы Божьей и богомолства нашего вѣчистого, то есьмо вчинили, и на то даемъ имъ сесь нашъ листъ, и тую общину въ томъ монастыри пречистое Богоматери Печерскомъ, отъ князя воеводы Кіевского, водлѣ привилія и подтверженья короля его милости Жикгимонта, славное памяти отца нашего, зъ волею и розказаньемъ нашимъ постановленую, подтверждаемъ симъ нашимъ листомъ, ижъ маеть быти держана по тому, яко въ томъ листѣ князя воеводы Кіевского есть выписано, ни въ чомъ непорухомо, нынѣ и потомъ, на часы вѣчны. А на твердость того, и печать нашу казали есьмо привѣсити къ сему нашему листу. Писанъ у Вильни, подъ лѣты Божьего нароженья, тысяча пятьсотъ пятьдесятъ первого, мѣсяца Августа въ пятыйнацать день, индиктъ девятый. — Въ томъ привиліи подпись руки короля его милости. «Иванъ Горностай, маршалокъ дворный, подскарбій земскій и писарь.»

Изъ Литовской Метрики (Acta Magn. Ducat. Litv., рукоп., in fol. пол. XVI в., Запис. кн. XXXV, л. 36—39), хранящейся при Правительствующемъ Сенатѣ, въ С. Петербургѣ. Въ заглавіи грамоты отмѣчено: Привилей архимандриту и всимъ чернцомъ монастыря Печерского,

на общину, або на учиненье порядку во всякихъ справахъ, яко ся рядити и справовати мають, водлѣ привилія короля Жикгимонта первого.

11. — 1551 Октября 18 и Ноября 20. Уставы данные Литвѣ и областямъ Жмудьской и Волынской, на второмъ Виленскомъ сеймѣ.

I. — Ухвала и постановенье съ сойму валного Виленского, на день святого Лукаша справовано, лѣта Божьего 1551, мѣсяца Октября 18 дня.

На великомъ валномъ соймѣ будучи господарю королю его милости и великому князю Жикгимонту Августу, со всеми паны радами своими, у Вильни, чинили прозьбы свои до его милости княжата, панята, шляхта и все рыцерство великого князства Литовского, которые и на писмѣ достаточнѣ доложивши господарю его милости подали: на которые жъ ихъ прозьбы отъ его милости господаря имъ суть въ тые слова вчинены отказы.

Артикулъ 1. Прозьба. Напервѣй, што есте просили господаря, абы его милость съ паны радами своими рачилъ углянути у привилія и вольности земскіе, и то, што бы ся въ нихъ нарушило, абы рачилъ казать поправити. *Отказъ.* На то господарь его милость казалъ вамъ повѣдити, ижъ то его милость зъ ласки и зъ добротливости свое паньскоѣ рачитъ вчинити, и въ тые привилія земскіе пану канцлеру его милости великого князства углянути роскажетъ, и то што ся слушного видѣти будетъ, его милость господарь подлѣ прозьбы ваше учинити кажетъ.

2. *Прозьба.* Што тежъ есте господаря его милости напомнимъ, абы чужоземцы имѣней не посѣдали, а урядовъ некоторыхъ правомъ абы не держали, але ижъбы сыномъ и обывателемъ великого князства врьды даваны были, со всеми пожитки давными; а што бы было отъ которого отышло, абы то было привернено; а службу земскую абы зъ урядовъ и

зъ достойности всихъ ухвалено, водлѣ можности урядовъ. *Отказъ.* На то господарь его милость казалъ вамъ повѣдити: што ся дотычетъ того впомянанья вашего, вѣдаете то сами, ижъ паньства его милости господарьскіе вси суть не замкнуты, и есть вольно каждому пріѣхати и отѣхати, купити и продати; а ижъ чужоземцы имѣнья посѣдають, въ томъ иныи никто не есть виненъ, одно тотъ самъ, который чужоземца на маетность свою пріймуетъ и имѣнья свои ему продаетъ: кгда бы есте ихъ на маетности свои не пріймовали и имѣней имъ не продавали, они бы тежъ тыхъ имѣней вашихъ не посѣдали. А што ся дотычетъ роздаванья врьдовъ тымъ чужоземцомъ, ино его милость господарь не маеть вжо воли имъ врьдовъ давати. А што просите, ижъбы то было зася къ тымъ врьдомъ привернено, што отъ которыхъ пожитковъ врьдничихъ отышло, штобы на томъ врьдники не шкодовали: ино господарь его милость утраты и шкоды никому не зычитъ; а такъ, хто бы кольвекъ въ тыхъ врьдахъ въ чомъ собѣ шкоду быти бачилъ, тотъ нехай врьдъ спуститъ, а шкоды не пріймуетъ.

3. *Прозьба.* За тымъ, што есте господаря его милости просили, абы его милость рачилъ ховати дворъ Литовскій на дворъ своемъ господарьскомъ, тубылцовъ тутошнего паньства своего великого князства Литовского. *Отказъ.* Его милость господарь тую прозьбу вашу отъ васъ рыцерства своего ласково пріймовати и въ бачности и въ памяти своей паньской мѣти рачитъ, и часу инышого о томъ съ паны радами своими мыслити будетъ, яко бы дворъ его милости господарьскій хованъ былъ.

4. *Прозьба.* Потомъ што есте написали и прозьбу вчинили, абы врьды, такъ дворные, яко тежъ и иныіе вси посполито были во властностяхъ своихъ и въ доходѣхъ и въ пожиткахъ по давному захованы. *Отказъ.* На то его милость господарь казалъ вамъ повѣдити, ижъ его милость рачитъ быти того добръ свѣ-

№ 11. домъ, яко ся предки его милости къ вашимъ предкомъ, около таковыхъ вѣдѣнь, водѣ за-слугъ ихъ заховывали : тымъ же тежъ обычаемъ и его милость къ вамъ подданнымъ своимъ заховати ся рачить, водѣ давного обычаю.

5. *Прозьба.* А што есте прозьбу вашу вчинили къ его милости господарю, абы вѣды безъ причины не были браны никому, але олижъ съ очевистого мовенья и съ поконанья правомъ. *Отказъ.* На то его милость господарь казалъ вамъ повѣдѣти, ижъ вѣды безъ причины и безъ очевистого мовенья и поконанья у правъ, яко первѣй не были браны, такъ и теперъ не мають быти браны, на которыхъ чти и достоинства суть положены и присѣгами утвержены : бо таковыя вѣды и достоинства не отходятъ безъ причинъ слышныхъ, и не только таковыхъ вѣдѣнь присяжныхъ, але и тыхъ иныхъ посполитыхъ ещо его королевская милость, яко панъ добротливый и хрестіанскій, никому не рачилъ брати, хита, ели бы ея кто въ державѣ, альбо въ намѣстничествѣ своемъ нерадѣ и неслушнѣ и шкодливѣ справовалъ и подданнымъ его королевской милости обтяжливимъ былъ; альбо, ели бы тежъ што скарбъ его королевской милости, для несправы оногъ вѣдника, школовати мѣлъ : таковымъ его королевская милость вѣды може брати, не яко вѣдникомъ, але яко тымъ, которые не водѣ воли его королевской милости противъ подданнымъ его милости заховывають ся.

6. *Прозьба.* Просили тежъ есте, абы вѣды пограничныя людемъ въ родности дознавшимъ и заслужонимъ были даваны; а кгда будетъ старъ и къ службѣ земской недужъ, ижъ бы на спокойный вѣдъ былъ отъбѣнъ, на чомъ бы мѣлъ живота доковати. *Отказъ.* На то его милость господарь казалъ вамъ повѣдѣти, ижъ его королевская милость добръ рачить вѣдати, безъ кождога таковогъ напомниманья вашо-го, яко маєтъ ласкою и вѣды своими шафо-

вати; и нерадѣ то его королевская милость слышитъ, ижъ вы годностями, альбо тежъ негодностями чинимъ бракуете : бо кгда бы его королевская милость кого на который вѣдъ негоднымъ быти бачилъ, истъ бы николи того на вѣдъ не прекладалъ; и не есть то рѣчь ваша, обачивати, хто на вѣдъ годенъ, а хто негоденъ : одно то есть рѣчь самого его королевской милости, яко пана зверхного; а про то, повторе, около тыхъ годностей, нехай бы таковыя прозьбы и напомниманья отъ васъ до его королевской милости не приходили, а вы были напомниманы.

7. *Прозьба.* А што есте прозьбу свою въ первомъ реистрѣ вашомъ доложили, абы замки пограничныя опатровано скарбомъ его королевской милости. *Отказъ.* На то его милость господарь казалъ вамъ повѣдѣти : нерадѣ то его королевская милость отъ васъ слышитъ, ижъ такъ подобно о собѣ розумѣе, жебы есте мѣли большую працу и пильность о рѣчи посполитой мѣти, ижъ его королевская милость самъ и съ паны радами своими; и такъ ся его королевской милости зла, и такъ есть, ижъ никому иному не пристонѣтъ большъ обмышливати вси потребности того панства, одно его королевской милости самому, яко пану дѣдичному, восполкъ зъ радами своими; и хочетъ то его королевская милость по васъ мѣти, абы напотомъ таковыя напомниманья незвыклыя до ушью его королевской милости не приходили : бо то не есть ваша рѣчь.

8. *Прозьба.* При томъ тежъ што просите господаря его милости, абы жадная рѣчь новая держана не была, одно то, што на соймѣ вальномъ зъ вѣдомостью пановъ радъ и всего рыцарства ухвалено будетъ; а ижъ бы простыхъ холоповъ надъ шляхту не повышано, а вѣдѣнь такъ простой холопъ, яко тежъ и подозрѣный шляхтичъ жебы не держали. *Отказъ.* Господарь его милости на то вамъ росказалъ повѣдѣти : не бачить его королевская

милость, абы ся которая рѣчь новая за шадливого панованья его милости мѣла вчинити; бо ся его королевская милость во всехъ рѣчахъ рачить такъ заховывати, яко ся предъ тымъ предки его королевской милости заховывали. И того тежъ его королевская милость при памяти своей мѣти не рачить, што бы ся безъ сойму вального постановити мѣло, то, што властнѣ къ вальному сойму належитъ; и хочетъ то его королевская милость мѣти, абы есте то его милости знати дали, што и которого часу безъ сойму ся постановило, окромъ справъ таковыхъ, которые водѣ потребы и давного посполитого захованья, въ рѣчахъ его милости и земскихъ, къ его милости господарю, яко пану зверхному, припадаютъ : таковыя справы его милость, яко передъ тымъ, такъ и теперъ потомужъ справовати зъ радами своими рачить. Хочетъ тежъ и то его королевская милость отъ васъ вѣдати : который холопъ простой, альбо шляхтичъ подозрѣный есть на вѣдъ отъ его королевской милости постановленъ? бо его королевская милость маєтъ за то, ижъ на дворѣ своемъ панскомъ и на вѣдѣхъ своихъ холоповъ простыхъ и людей подозрѣныхъ не рачить ховати.

9. *Прозьба.* Што тежъ есте прозьбы ваши до его королевской милости мѣли; што бы было кромъ вального сойму постановлено, абы то не держано. *Отказъ.* Господарь его милости на то вамъ росказалъ повѣдѣти, ижъ его королевская милость то мѣти хочетъ, абы есте то оказали, што ся коли ко шкодѣ рѣчи посполитой безъ сойму вального постановило : бо того его милость завжды звыкъ стеречи и боронити, яко — то панъ справедливый хрестіанскій, абы ся николи жадная рѣчь ко шкодѣ рѣчи посполитоѣ у панствахъ его милости не становила.

10. *Прозьба.* Къ тому пишете въ прозьбахъ своихъ къ его милости господарю, абы товарищамъ зъ обчихъ земль не одинъ куповалъ, и шкломъ абы также не одинъ шинковалъ,

але ижъ бы всимъ въ томъ вольность была. № 11. *Отказъ.* Его королевская милость рачилъ росказати на то вамъ повѣдѣти, ижъ ели же кто маєтъ вольность отъ его королевской милости даную и на писмѣ описаную, таковыя вольности и листы свои его королевская милость звыкъ есть кождому при моцы заховати, ласки и данины своее господарской ни въ чомъ не нарушиваючи, але, ижъ бы за таковою вольностью одноѣ которѣ особы, всимъ инымъ въ посполитости шкода ни въ чомъ не была; а вѣдъ жо его королевская милость рачить росказати, того съ пильностью дозрѣти, абы шинкованье тымъ шкломъ не иньшимъ обычаемъ шло, одно на уставомъ, которая на то особливо есть дана.

11. *Прозьба.* При томъ тежъ и то доложили есте у прозьбахъ своихъ къ его милости господарю, абы панове рады шляхту въ почтливости на судѣхъ и на иньшихъ мѣстцахъ мѣли, а о почтливость сами служебника своего шляхтича абы не судили, алижъ высадивши на то сторонныхъ людей, вѣры годныхъ. *Отказъ.* Его королевская милость росказалъ вамъ на то повѣдѣти, ижъ ачъ — кольвекъ его милость рачить быти добръ свѣдомъ захованья доброго и склонности пановъ радъ своихъ, которую ихъ милость, съ цнотѣ своихъ прирочонныхъ, не только къ вамъ брати своей молодой мають, але и къ инымъ всимъ таковую жъ склонность и баченье и учтивость показываютъ : але, ижъ то такъ обтяжливо передъ себе берете, его королевская милость того у вѣдомости своей господарской не маєтъ, хто бы съ пановъ радъ на судѣхъ и на иньхъ справахъ противъ которога зъ васъ не ласково ся заховалъ, къ зельживости его, альбо который бы панъ рада служебниковъ своихъ шляхту самъ одинъ о почтливость судилъ? который судъ никому иному властнѣ не належитъ, одно его королевской милости самому, яко пану зверхному : про то хочетъ его милость то по васъ мѣти, абы есте тутъ же дали

№ 11. его милости въдати, кому бы ся зъ вась, и отъ которого съ пановъ радъ таковая рѣчь стала.

12. *Прозьба.* Што есте прозьбу вашу къ его королевской милости вчинили, абы въ мѣстѣхъ головныхъ, у Вильни, у Тропехъ, у Бересты, у Луцку и въ иныхъ мѣстѣхъ, мѣщане князьскіе и паньскіе подъ однимъ правомъ были, кромѣ дворовъ князьскихъ и паньскихъ шляхетскихъ, для нихъ самыхъ будованныхъ. *Отказъ.* На то его королевская милость розказалъ вамъ повѣдѣти, ижъ тая прозьба ваша его милости господарю за слушно ся видѣтъ, и на то его милость призволяти рачитъ, ижъ вже мѣщане князьскіе и паньскіе подъ однимъ правомъ мѣстъ его милости головныхъ быти мають, кромѣ дворовъ князьскихъ и паньскихъ, въ которыхъ жаденъ шынкъ не маеть быти, одно только для ихъ властного стоянья мають оныя дома хованы быти. А што ся дотычетъ подданныхъ пановъ духовныхъ, тые такъ же мають быти подъ правомъ мѣстскимъ, въ тыхъ рѣчахъ, которые ся кровавыхъ справъ и иныхъ злочинствъ дотыкають: але доходы и платы свои, то они зъ нихъ мають добровольнѣ брати, и справу и владность надъ ними мѣти, и суды, кромѣ свѣтскихъ справъ, мають сами, альбо вряники ихъ справовати.

13. *Прозьба.* Просите тежъ его милости господаря, абы для сѣму збоецъ, въ мѣстѣхъ, въ ночи у корчмахъ не было шынквано и прихожимъ гостемъ питья не давано; а естли бы шынквано, нехай же бы гостей не выпущано, ажъ въ день. *Отказъ.* На то господарь его милость розказалъ вамъ повѣдѣти, ижъ то его королевская милость двору своему господарьскому розказати рачитъ, абы того не было: але тежъ то хочеть его королевская милость мѣти, абы каждый зъ вась служебникомъ своимъ то розказалъ, ижъбы въ ночи, въ домахъ шынквонныхъ воротъ, оконъ, дверей не выбивали; а естли жъ бы чый служебникъ

ворота, окна, двери выбилъ, а врьдъ бы его яко кгвалтовника поймати и взяти хотѣлъ, а панъ бы его слугу своего боронилъ: тогды таковой панъ маеть самъ то утерпѣти, што бы мѣлъ оный слуга его кгвалтовникъ терпѣти.

14. *Прозьба.* За тымъ што есте господаря его милости просили, абы шляхта была вызволена отъ сторожи замку и Москвичъ, отъ кошенья сѣна и отъ подводъ. *Отказъ.* Его королевская милость господарь нашъ розказалъ вамъ на то повѣдѣти, ижъ пакъ яко бы нерадъ новыхъ рѣчей на сее панство свое отчизное вносилъ, такъ же бы тежъ и старыхъ рѣчей не хотѣлъ ни въ чомъ опущати; а такъ рачитъ его королевская милость то все заховывати водлѣ давного обычаю: хто передъ тымъ сѣно кошивалъ, замковъ и Москвичъ стерегивалъ и подводы даивалъ, тотъ тое и теперъ и напотомъ полнити повиненъ; а хто передъ тымъ не былъ на то повиненъ, тотъ и теперъ отъ того воленъ: естли жъ ся то вамъ видѣтъ тяжко, и вы бы иные которые слушныя способы нашли, чимъ бы тые повинности ваши мѣли выполнены быти.

15. *Прозьба.* Притомъ што есте господаря его милости просили, абы коморы мытныя на имѣньяхъ шляхетскихъ, гдѣ передъ тымъ не бывали, и теперъ бы не были. *Отказъ.* На то его королевская милость рачилъ розказати вамъ повѣдѣти, ижъ на тыхъ имѣньяхъ шляхетскихъ, гдѣ коморы мытныя передъ тымъ были и сторожи мытъ головныхъ стерегучи промытъ мѣшкали, тамъ и теперъ коморы мытныя мають быти и сторожи мытныя для промытъ тамъ жо мѣшкати мають; а естли бы ся кому отъ тыхъ сторожовъ мытныхъ якіе шкоды дѣяти мѣли: тогды, хто кому вину въ чомъ дастъ, каждому съ таковыхъ обвиненныхъ справедливость неотвочная будетъ вчинена, и зостанетъ ли въ чомъ виненъ, тогды не только жъ то оправовати мущетъ, але ещо надъ то и каранъ будетъ. Абовѣмъ,

если бы сторожи на имѣньяхъ вашихъ стерегучи промыты не мѣшкали, тогды бы вси мыта его королевской милости вънивечъ ся обернули: бо каждый бы купецъ, уникаючи мыта, иными дорогами куды хотѣ възидѣлъ, и тымъ бы много пожитку отъ скарбу его королевской милости отошло; и для того хочеть то его королевская милость конечнѣ мѣти, абы коморы мытныя по имѣньяхъ вашихъ, на мѣстѣхъ потребныхъ были и сторожи бы тамъ для промыты мѣшкали.

16. *Прозьба.* Къ тому што чините прозьбы ваши къ его королевской милости, абы коморы мытныя шляхта тутощняя вѣры годная завѣдала, а не чужоземцы: бо много трудностей людемъ дѣлають. *Отказъ.* На то его милость господарь розказалъ вамъ повѣдѣти, ижъ въ той рѣчи его милость ничего новаго не рачитъ починати; одно такъ ся въ томъ заховывати рачитъ, яко было и передъ тымъ, за предковъ его милости, и теперъ подъ таковымъ же обычаемъ его милость справы мытъ своихъ рачитъ зоставити.

17. *Прозьба.* А што есте просили господаря его милости, абы товары лѣсные зъ имѣней шляхетскихъ вольно были пропусканы за границу, а отъ збожья съ гуменъ шляхетскихъ абы мытъ не брано. *Отказъ.* На то его королевская милость рачилъ розказати вамъ повѣдѣти, ижъ хто бы кольвекъ зъ вась товары лѣсные, въ своихъ властныхъ лѣсѣхъ, а не въ наемныхъ, и своимъ властнымъ накладомъ, одивъ самъ, а не съ половинники своими робилъ и за границу самъ, своимъ же властнымъ накладомъ, спускати хотѣлъ: тотъ, вчинивши присягу черезъ служебника своего, человека доброго, вѣры годного, на коморахъ складовыхъ, на томъ, яко есть вышей описано, и заплативши отъ того тое мыто, которое отъ таковыхъ товаровъ водлѣ давного обычаю было плачено, маеть ихъ добровольнѣ спускати. Але хто жъ бы кольвекъ таковыя товары лѣсные, складаючися съ купцами робилъ, альбо куп-

цомъ въ лѣсѣ продавалъ, альбо въ наемныхъ лѣсѣхъ робилъ, альбо оныя жъ товары отколъ кольвекъ на перекупъ скуповалъ: таковой каждый маеть тые товары лѣсные на коморахъ складовыхъ складати, и тамъ маеть ему за тии товары плачено быти, по тому яко ся стала устава и ухвала посполитая на прѣшломъ вальномъ соймѣ тутощнемъ Виленскомъ; яко жъ его королевская милость хочеть то мѣти, абы тымъ, а не инымъ обычаемъ тии товары были спусканы. А што ся дотычетъ безмытного продаванья и спусканья житъ съ гуменъ вашихъ властныхъ, о томъ его королевская милость часу инышого маеть ся достаточнѣ доведати, яко ся передъ тымъ тии рѣчи заховывали, и напотомъ вамъ на то отказъ его милость рачитъ вчинити.

18. *Прозьба.* Далѣй, што есте просили господаря его милости, абы панове духовные, бачучи то, ижъ ся рука поганьская на християнство поднесла, тежъ бы и они ратунокъ рѣчи посполитой чинили, а заровно съ шляхтою войну служили зъ имѣней костелныхъ. *Отказъ.* На тую прозьбу вашу его королевская милость будетъ рачилъ инышого часу слушный отказъ вчинити.

19. *Прозьба.* При томъ просите его королевской милости, абы каждая парсона стану духовного, такъ Римского яко и Греческого закону, двухъ альбо трехъ костеловъ, то есть, хлѣбовъ духовныхъ не держали. *Отказъ.* Господарь его милость на то розказалъ вамъ повѣдѣти, ижъ тая рѣчь принадлежитъ вѣдомости и опатренью пановъ бискуповъ Римского и Греческого послушеньства, и въ томъ они, за наминанемъ его королевской милости, добрый радъ въ тыхъ рѣчахъ межи духовенствомъ своимъ учинятъ и постановятъ, водлѣ правъ своихъ духовныхъ.

20. *Прозьба.* За тымъ што есте чинили прозьбы ваши ко господарю его милости, абы вдовы о рѣчь, которая дѣтемъ належитъ, мандатомъ не были позываны. *Отказъ.* Его коро-

№ 11. левская милость рассказал вамъ на то повѣ-
дти : ачь-кольвекъ той прозьбы вашей не до
конца рачитъ вырозумѣвати, кгдажъ такъ
скрытъ есть написана; а вѣдѣже, естли жъ
то идетъ о тые вдовы, которые вжо суть по-
званы, або ещо мають быти позваны о то,
ижъ немало земель, людей и иныхъ имѣней къ
своимъ рукамъ держать, къ шкодѣ его коро-
левской милости : таковыхъ вдовъ его коро-
левская милость будетъ рачилъ казати позы-
вати; и естли ся то окажетъ, ижъ што безъ
данины къ шкодѣ его королевскоѣ милости
держатъ, то его королевская милость будетъ
рачилъ зася къ столу своему паньскому казати
отъ нихъ отбирати и къ своимъ пожиткомъ
привлащати : абовѣмъ его королевская ми-
лость будучи паномъ зверхнимъ и подъ жад-
ное право не подданнымъ, неповиненъ есть на
своихъ властностяхъ, для чѣихъ дѣтей лѣтъ
недорослыхъ, шкодовати; окажетъ ли тежъ
которая вдова и зъ дѣтьми своими недорослы-
ми, што за чимъ слушнѣ держитъ, то и напо-
томъ держати будетъ.

21. *Прозьба.* Къ тому што просите господа-
ря его милости, абы до права духовного люди
свѣтскіе о рѣчь земскую, альбо о которую —
кольвекъ рѣчь свѣтскую не были позываны,
подъ виною. *Отказъ.* Его королевская ми-
лость на то рассказал вамъ повѣдти, ижъ его
милость хотячи то мѣти, абы каждый врьдъ,
такъ духовный, яко тежъ и свѣтскій, свое
владности безъ переказы вживалъ, рачитъ его
королевская милость розказати всимъ врьдни-
комъ права духовного, абы жаденъ съ нихъ
по чоловѣка свѣтского, о рѣчь свѣтскую, на
жалобу также чоловѣка свѣтского, не смѣлъ
позвовъ давати, а ни до права духовного при-
тягивати, окромъ только тыхъ члонковъ, ко-
торые слушнѣ, водлѣ правъ ихъ духовныхъ,
на розсудокъ права духовного належатъ. Ра-
читъ тежъ его королевская милость и то ро-
сказати всимъ въ посполитости стану свѣт-
ского людемъ, абы одинъ другого о рѣчь свѣт-

скую не смѣлъ черезъ то до права духовного
позывати; а естли бы хто, черезъ сесь заказъ
его королевскоѣ милости, будучи самъ свѣт-
скій, а смѣлъ бы другого также свѣтского чо-
ловѣка о рѣчь свѣтскую до права духовного
позвати : такого кождогъ мають панове воево-
дове и иные врьдники таковою виною ка-
рати, якая будетъ пристойна въ той рѣчи.

22. *Прозьба.* При томъ што просите его ко-
ролевской милости, абы чужоземцы къ спра-
вамъ скарбинымъ не были припушаны, и мож-
ности скарбу абы не вѣдали. *Отказъ.* На то
господарь его милость рассказал вамъ повѣ-
дти, ижъ то его милость на онъ часть не безъ
причины рачилъ былъ учинити, але зъ нѣко-
торыхъ потребъ; а вѣдѣже инымъ часомъ, о
той рѣчи его королевская милость будетъ ра-
чилъ слушное постановление вчинити.

23. *Прозьба.* А што есте прозьбы ваши чи-
нили господарю его милости, абы мѣщане и
купцы къ службѣ военной выправляли съ
пяи домовъ въ мѣстѣ шостого пѣшого; а съ
тыхъ фольварковъ што у шляхты покупили,
абы службу земскую служили по тому, яко и
передъ тымъ съ того служба была. *Отказъ.*
Его королевская милость на то рачилъ роска-
зати вамъ повѣдти, ижъ мѣщане и купцы
суть вжо на сесь часть иными платы къ обо-
ронѣ земской обложены; и для того тая уста-
ва на нихъ на тотъ часть ити не можетъ : ни-
жли, што ся дотычетъ тыхъ имѣней ихъ, кото-
рые у шляхты купили; ино они съ тыхъ
имѣней шляхетскихъ службу земскую воен-
ную по тому служити мають, яко и передъ
тымъ служба земская зъ оныхъ имѣней быва-
ла, водлѣ важности имѣней и водлѣ ухвалы
посполитогъ земскоѣ.

24. *Прозьба.* Просите тежъ его королевскоѣ
милости, абы жидове всихъ мѣстъ по черле-
ному золотому на оборону земскую давали.
Отказъ. На то его милость рассказал вамъ по-
вѣдти, ижъ вжо рачилъ его королевская ми-
лость послати и казати тыхъ жидовъ списати,

и, скоро будутъ списаны, тогда на онъ часть
платъ къ оборонѣ земской съ нихъ постанов-
ленъ будетъ.

25. *Прозьба.* Далѣй, чините прозьбы ваши
къ господарю его милости, абы шляхта ли-
стовъ на имѣнья и на земли передъ мѣрными
волочными не покладали : ижъ для тыхъ ли-
стовъ, немало земель шляхетскихъ у волоки
господарскіе помѣрено, а отмѣны не дано.
Отказъ. На то его королевская милость казалъ
вамъ повѣдти, ижъ его милость тую помѣру
волочную на своихъ земляхъ и на своихъ под-
данныхъ постановити рачилъ, для розмноженья
пожитковъ своихъ господарскихъ, што есть
вольно его милости учинити : бо тежъ и вы
сами на своихъ имѣньяхъ пожитки собѣ чини-
те, а его королевская милость вамъ того не
боронитъ. Нижли, што ся дотычетъ того (яко
есте то на прозьбѣ своей описали), ижъ отъ
тыхъ помѣрныхъ немалые шкоды пріймете,
за тымъ, што они земли ваши у волоки помѣ-
ривши, слушныхъ отмѣнъ вамъ давати не хо-
чутъ; ино его королевская милость тою помѣ-
рою волокъ своихъ никому шкоды чинити не
казалъ, але и овшемъ рассказал его королев-
ская милость всимъ помѣрнымъ своимъ : гдѣ
бы волоки его королевской милости къ зем-
лямъ вашимъ прилегли, а безъ нихъ бы ся
волоки его королевской милости выполнити
не могли; тогда абы тыи земли ваши бы-
ли мѣрены, але зъ mocy и владностей ва-
шихъ не выйнованы, а ни людемъ его
королевской милости роздаваны, потулъ, по-
куль бы алижъ достаточная отмѣна за ва-
ши земли вамъ была отдана. А такъ, еслижъ
помѣрчѣе што надъ таковой розказъ его коро-
левскоѣ милости вчинили и въ школу кого зъ
васъ привели : его королевская милость ра-
чилъ розказати, съ таковыми помѣрными сво-
ими справедливость чинити; а коли то на нихъ
прійдетъ и будетъ то на нихъ переведено, то-
гда они-все-шкоды платити будутъ повинни,
хиба, естли бы хто на которые земли данины

не мѣтъ, альбо ижбы ему до воли господаря М. И.
своѣ были даны, альбо естли бы у слугъ путе-
ныхъ, альбо у людей тяглыхъ, альбо у Тата-
ровъ безъ дозволенія господарского купца
таковыя земли справедливѣ мають быти у во-
локи его королевской милости помѣриваны
безъ жадновъ отмѣны.

26. *Прозьба.* Есть тежъ межи тыми прозь-
бами вашей милости, и тая прозьба описана
къ его королевской милости, тыми словами :
«которая братья наша шляхта мѣвали пожит-
ки у волостяхъ вашей королевской милости;
отъ предковъ вашей милости на даныхъ, и
теперь покортѣ просимъ, абы те было не
уймовано и по старому заховано, а зыаши те,
што ся на листяхъ онажетъ.» *Отказъ.* На то
его королевская милость некоторого отказу
вамъ чинити не рачитъ : бо той прозьбы, от-
куль ся починаетъ и къ которому ся концу
стегаецъ, вырозумѣти не можетъ, яко той
прозьбы, которая есть закрытыми словами опи-
сана.

27. *Прозьба.* Што тежъ есте просили, абы
тая шляхта, которая зъ имѣньи спадковыми
въ мочь его королевской милости пришла,
подъ однимъ правомъ зъ вами были, а ижбы
альбо хоружихъ своихъ особливыхъ мѣли,
альбо къ которымъ иными хоругвамъ повѣ-
товымъ привернены были. *Отказъ.* На то его
королевская милость велѣлъ вамъ повѣдти :
въ той рѣчи, яко въ своей властной, такъ ся
будетъ заховати, яко будетъ воля его коро-
левской милости.

28. *Прозьба.* Еще тежъ просите господаря
его милости, абы панове духовные, для свѣ-
дѣтства въ потребахъ своихъ, до права своего
духовного къ присягѣ васъ не прятягали. *От-
казъ.* Господарь король его милость рачилъ
вамъ на то повѣдти, ижъ его королевская
милость старыхъ обычаевъ не нарушаючи,
рачитъ тую рѣчь такъ заставляти, яко и пе-
редъ тымъ бывало.

II.—Лѣта Божьего 1551, мѣсяца Ноября 20

№ 11. дня, у пятницу, у вилюю офярованья Панны Маріи, на соймъ вальномъ Виленскомъ, на тые прозьбы, которые вся шляхта великого князства Литовского на другомъ рейстръ подала, Отказъ отъ его милости господара такъ есть учиненъ.

Артикуль 1. Прозьба. Што есте просили короля его милости, абы статутъ права посполитого земского былъ поправленъ и выдрукованъ, а то бы въ немъ меновить было описано: «гдѣ бы ся придало о землю зъ имѣньемъ господарьскимъ кому право вести, абы годнѣйшіе свѣтки и доводы къ праву и къ свѣдѣтельству были припусканы.» *Отказъ.* Его королевская милость, нашъ милостивый панъ, рачилъ розказати вамъ повѣдѣти, ижъ его королевская милость добръ то рачить памятовати, якое постановеніе на соймъ Берестейскомъ прошломъ отецъ его королевской милости, а потомъ зася его королевская милость самъ, тутъ же у Вильни, такъ же на соймъ вальномъ, въ таковой же прозьбѣ вашей, около поправленья статуту рачилъ былъ учинити, ижъ мѣло обрано быти нѣсколько особъ, людей добрыхъ, вѣры годныхъ, ростропныхъ и права посполитого и тежъ стародавнихъ звычайѣ тутешнего паньства добръ свѣдомыхъ, которые мѣли тутъ же у Вильни на певный часъ засѣсти и статутъ поправить: нижли, ижъ есте сами къ тому ся не мѣли, за тымъ тая рѣчь коньца ажъ до сего часу не приняла. А кгдажъ зася, и на сесь часъ, о томъ же прозьба къ его королевской милости отъ васъ есть, его королевская милость на тую прозьбу вашу призволяти рачить; и маєтъ его королевская милость, съ порою пановъ радъ своихъ, обрати и высадити на то пять особъ закону Римского, а другихъ пять особъ закону Греческого, которые мають весь статутъ добръ обачити, и розважити, и вырозумѣти то, чого бы потреба была прибавити, альбо убавити, альбо отмѣнити, и то все они мають достаточнѣ списати, и на другомъ пришломъ соймъ,

передъ его королевскою милостью и тежъ передъ ихъ милостью паны радами и передъ всими вами оказати; а на онъ часъ вжо его королевская милость того выслушавши, будетъ рачилъ розказати оный статутъ выдруковати и битымъ писмомъ выбити, абы вси вжо одностайное и неотмѣнное право свое посполитое вѣдали и вонтпеня никоторого въ немъ не мѣли. А такъ, ижъбы есте тежъ тому якій обычай слушныи нашли, отколь бы тые десять особъ, черезъ тотъ часъ на той справѣ тутъ у Вильни мѣшкаючи, мѣли мѣти живность. А што тежъ въ той прозьбѣ своей доложили есте, абы о рѣчь земленую межъ имѣньи его королевской милости и тежъ межъ имѣньи вашими, годнѣйшіе свѣтки къ свѣдѣтельству были припусканы, на то его королевская милость ласково призволяти рачить.

2. Прозьба. Што тежъ есте просили короля его милости, абы въ каждомъ повѣтъ были судья и писарь присяжныи. *Отказъ.* Его королевская милость рачить на то призволяти и на томъ то зостановити, ижъ судьи мають быти въ повѣтъхъ, такъ воеводскихъ, яко тежъ и въ старостиньскихъ, таковымъ обычаемъ отъ пановъ воеводъ и отъ пановъ старостъ повѣтовыхъ уставлены, яко есть въ статутѣ описано; и мають справы судити посполъ зъ намѣстникомъ воеводинымъ и съ подстаростомъ, на тыхъ мѣстцахъ, гдѣ имъ панове воеводы и старосты укажутъ; а мають на тые суды зъѣзджатися по чотыри кротъ до року, на каждую четверть году, то есть: на сему суботу, и на святой Крыжъ, и на святую Луцію, а вступивши въ постъ на первой недѣли; и за каждымъ зѣѣханьемъ, мають на тыхъ справахъ судовыхъ быти по чотыри недѣли; а позвы мають выдавати подъ печатями своими и подъ печатями намѣстниковъ воеводиныхъ и подстаростъ, и не маєтъ ся никто зъ нихъ до воеводъ и до старостъ повѣтовыхъ отзывать, олижъ по сказанью; а писарь маєтъ быти при нихъ воеводиныхъ присяжный. А панове

воеводы, для справованья таковыхъ апелаций, мають ся на каждый годъ до мѣстъ своихъ воеводскихъ столечныхъ два кротъ на годъ зѣѣзджати, то есть, на святого Михайла и на сему суботу, и за каждымъ прѣѣханьемъ, мають на тыхъ мѣстцахъ своихъ воеводскихъ мѣшкати по чотыри недѣли, абы шляхта за ними, для тыхъ апелаций, до ихъ имѣній ѣздячи, трудностей и накладовъ не прѣимовали, але ижъбы каждый на мѣстцу столечномъ воеводскомъ, въ тые часы назначоны, справедливости своею собѣ доводилъ. А кому бы ся отъ пановъ воеводъ, альбо отъ старостъ видѣло быти съ кривдою, тотъ можетъ, по сказанью, отозватися до господара его милости, альбо до пановъ радъ, на роки судовые великіе. А роки судовые великіе господарьскіе, для тыхъ справъ, которые ся дѣють межъ паны хоругвовными и тежъ межъ тыми, которые въ повѣтъхъ не сѣдять, мають быти одинъ разъ въ году сужоны, то есть, на день святого Мартина; на которыхъ же рокахъ самъ господарь его милость, при бытности своей въ тутешнемъ паньствѣ своемъ, будетъ рачилъ тые справы судовые справовати, которые ся на онъ часъ передъ его королевскую милость приточать; а въ небытности господарьской въ здѣшнемъ паньствѣ, тогда панове рада ихъ милость мають тые справы судовые, на тые роки судовые господарьскіе, о святомъ Мартинѣ, судити и отпраовати. А кому бы ся отъ пановъ радъ съ кривдою быти видѣло, тотъ можетъ ся отъ ихъ милости отозвати до короля его милости, на тые роки судовые великіе, о святомъ Мартинѣ, алежъ вжо по сказанью. А передъ сказаньемъ отъ пановъ радъ, яко тежъ и отъ воеводъ, такъ тежъ и отъ судей, не маєтъ ся никто отзывать, абы ся таковыми упорными отзывы справедливость людская не отволокала.

3. Прозьба. Што тежъ есте просили короля его милости, абы записы на вѣчность на имѣнья и на заставы, передъ тымижъ судьями

повѣтовыми въ повѣтъхъ были справованы и № 11. записываны. *Отказъ.* На то его королевская милость рачилъ розказати такъ вамъ повѣдѣти, ижъ около тыхъ записовъ на вѣчность, рачить его милость то такъ зоставити, яко есть въ статутѣ права посполитого описано: ижъ всякіе такіе записы, которые ся на вѣчность стегають, яко на имѣнья, на люди, на земли, на озера, на ставы, на млыны, на пушы, на сѣножати и на всякіе иные рѣчи лежачіе, мають справованы и чинены быти передъ урядомъ, то есть, альбо передъ самымъ господаремъ его милостью, альбо передъ паны радами, альбо передъ паны воеводами, альбо передъ старостами, альбо передъ судьями повѣтовыми, а не индѣ; и хто бы што хотѣлъ кому на вѣчность продати, даровати, альбо которымъ-кольвекъ обычаемъ спустити имѣнья, люди, земли, боры, лѣсы, пушы, озера, сѣножати, ставы, млыны и иные которые — кольвекъ рѣчи земленые лежачіе: тогды каждый таковой, хто продаетъ, альбо даруетъ, альбо што на имѣньи лежачомъ записуетъ, маєтъ прѣйти обличнѣ до того вышей мененого вряду и маєтъ то самъ сознати устнѣ, ижъ тое и тое тому и тому продалъ за тую и за тую сумму, альбо даровалъ, альбо сумму записалъ; и тое сознание его устное маєтъ быти въ книги того вряду записано. А хотя бы хто и листъ продажный, альбо записный, альбо даровный, на которую рѣчь вѣчностую лежачую, подъ печатью своею и подъ печатями людей добрыхъ далъ: тогды предѣся и тотъ, и съ тымъ листомъ своимъ продажнымъ, альбо даровнымъ, альбо записнымъ, маєтъ прѣйти до вряду, и маєтъ продажу, або даръ, або записъ свой, самъ устнѣ сознати, и оный листъ свой и сознание свое устное маєтъ дати въ книги записати. А выписы съ книгъ въ таковыхъ рѣчахъ, хто похочетъ, тому мають быти даваны подъ печатями врядовыми, окромъ тыхъ записовъ, которые будутъ даваны на долги и на иные рѣчи рухомые: бо

№ 11. таковыя записи могутъ, безъ оповѣданья вряду, и за листы записными быти держаны и справованы, водлѣ давного обычая. И вжотая теперешняя устава маєт початокъ свой взяти отъ пришлого свята Громницъ въ року пятьдесятъ второмъ. И хто бы кольвекъ, якогужъ кольвекъ стану будучи, якіежъ кольвекъ листы альбо записы на имѣнья и на иншіе рѣчи лежачіе въчистые, надъ сюю теперешнюю уставу и ухвалу посполитую, кому на себѣ давалъ, або отъ иншого бралъ: таковыя листы и записы не мають быти держаны отъ оноу року, отъ свята пришлоу Громницъ въ року пятьдесятъ второмъ, яко вышей есть описано. А до того часу, хоружые, взявши теперешней уставы выпишъ, мають каждый у своемъ хоружествѣ шляхтѣ то оповѣдати.

4. *Прозьба.* Што есте тежъ просили короля его милости о пересудѣ и о вины, абы отъ того были вызволены, окромъ тыхъ винъ: за головщину, за заруку, и тежъ которые вины будутъ на листѣхъ господарьскихъ, и на листѣхъ еднальныхъ, и на листѣхъ судовыхъ и на каждыхъ иныхъ записехъ описаны, а вѣдѣже абы и тые вины шли зъ очевистоу росправы и зъ судового поконанья. *Отказъ.* Его королевская милость на то казалъ вамъ повѣдити, ижъ ачѣ — кольвекъ около тыхъ пересудовъ, тотъ обычай, почавши отъ великого князя Витовта ажъ до нынѣшняго панованья его королевской милости, завжды такъ былъ заховыванъ, ижъ десятый грошъ пересуду отъ суммы презыскановъ былъ даванъ; а вѣдѣже его королевская милость, не хотячи тоу прозьбы ваше мимомо уши свои панские такъ даремнѣ пустити, въ томъ, вамъ слугамъ и подданнымъ своимъ, около тыхъ пересудовъ, ласку свою господарскую чинити рачитъ; и маючи тежъ баченіе и на тыхъ судей и вриадниковъ, которые межѣ вами справедливости доглядати и еѣ чинити будутъ, ижъбы тежъ за тые працы свои и для живности свое мѣли

за чимъ на роки зложоные на тые росправы ваши судовые ѣздити, — рачилъ его королевская милость, зъ ласки своеѣ, намовивши сѣ паны радами своими, около тыхъ-то пересудовъ таковое постановеніе учинити: ижъ тые пересуды не мають вжо быти браны водлѣ того, яко передъ тымъ ажъ до сего часу было бирано, отъ десяти грошей грошъ; але вжо мають быти браны по половицы, то есть: отъ десяти грошей полгроша, а отъ коны три грошы, а отъ рубля пять грошей, а отъ десяти копѣ полконы грошей, а отъ ста копѣ пять копѣ грошей. И маєт оный пересудъ давати тотъ, хто зышетъ, хибѣ, естли бы сѣ хто позвалъ сѣ кимъ о долгъ, або о сумму свою позычаную, ижъ на рокъ описаный не заплатилъ: тогды вжо тотъ, хто долгу альбо суммы своеѣ позычонѣ зышетъ, не маєт самъ отъ того пересуду давати, але маєт тотъ пересудъ заплатити, хто виненъ зостанетъ, такъ же по половинѣ, яко вышей есть описано, для того, ижъ запису своему досытъ не вчинилъ, але упоромъ своимъ до права себѣ позвати допустилъ. А хто бы сѣ яко отъ великоу, такъ и отъ малоу рѣчи оттягалъ: тотъ маєт дати памятного чотыри грошы. А што сѣ дотычетъ винъ, ино тые вины: хто бы кому квалтъ вчинилъ, альбо дорогу заступивши збилъ и зранилъ, або въ заруки впалъ, альбо естли бы на листѣ господарскомъ альбо на листѣ судовомъ якая вина была описана, альбо хто бы сѣ самъ добровольнѣ записалъ и подѣ якую вину себѣ поддалъ, а то бы правомъ на него было переведено; тогды таковыя вины мають быти плачоны по старому. Нижли, што сѣ дотычетъ вины господарскоу за головщину шляхетскую, естли бы хто шляхтича забилъ, а потомъ бы до права потягнуть былъ, и тоѣ бы забойство правомъ на него было переведено: тогды маєт головщину заплатити, водлѣ давного обычая; а за вину господарскую не маєт вжо пѣнезми платити, яко передъ тымъ было плачивано, але каждый

таковый забойца маєт, за тую вину господарскую, годъ цѣлый сѣдѣти въ замку столечномъ воеводства повѣтового, подѣ которымъ ослѣлость его; а маєт сѣдѣти у вежи, што найглубѣй въ земли, а не маєт быти на свѣтъ вынущанъ до того часу, алижъ сполна годъ высѣдѣти. А панове воеводы и старосты повѣтовые мають то грозно вриадникомъ своимъ рѣсказати, абы сѣ таковымъ, а не вышнимъ обычаемъ къ тымъ забойцамъ посажонымъ заховали, жадному зъ нихъ ни въ чомъ не фольгуючи, подѣ особливимъ караньемъ ихъ самыхъ. А повинного тотъ же забойца маєт заплатити воеводѣ новѣтовому дванадцать рублевъ грошей. А хотя бы сѣ забойца о голову забитую шляхетскую и зѣднанъ сѣ близкими або сѣ кровными оноу забитого, и хотя бы о то не былъ позванъ, и тая бы сѣ рѣчь до вриадѣ и до права не приточила: тогды предѣся маєт вриадъ довѣдавши сѣ того, пильную пильность около того казати вчинити, абы оный забойца былъ пойманъ; и маєт его за туюжъ вину господарскую казати посадити въ таковую жъ вежу, глубоко въ землю, и маєт также годъ цѣлый въ земли сѣдѣти, яко вышей описано; а предѣся маєт воеводѣ, або старостѣ повѣтовому дати повинного также дванадцать рублевъ грошей. И таковую виною за забойство маєт быти каранъ каждого стану забойца, такъ богатый, яко и убогий, жадного не выймуучи. А за головщину людей простыхъ вина по старому водлѣ статуту маєт быти плачона. А хто бы кого окромилъ, ногу альбо руку утѣлъ, тотъ маєт заплатити яко за полчоловѣка, а вины господарскоу прѣтивенъ, а воеводѣ або старостѣ повѣтовому повинного шесть рублевъ грошей. А который бы забойца тутъ же, при ономъ забитомъ, на горячѣй крови пойманъ былъ: таковой за головщину и за вину маєт быти каранъ водлѣ права Божьего, смертию: нехай идетъ голова за голову.

5. *Прозьба.* Што есте тежъ просили короля

его милости, абы въ повѣтѣхъ вижны были № 11. присяжные, шляхта ослѣлая, по тому уставленъ, яко возные на Подляшю, и на таковомъ же доходѣ ихъ. *Отказъ.* На то его королевская милость призволяти рачитъ, и мають вжо панове воеводы и старосты повѣтовые по всему паньству великого князства, въ Жомойти и на Волиню, въ повѣтѣхъ обрати и постановити вижовъ, только, колько потреба будетъ, людей добрыхъ, вѣры годныхъ, шляхту ослѣлыхъ, которые мають передъ ними присягу учинити, ижъ што — кольвекъ будутъ видѣти, альбо слышати, то все справедливѣ, никому не фольгуючи, мають передъ правомъ, альбо передъ книгами судовыми сознавати и свѣдѣти. И мають тые вижны при томъ вижованьи своемъ мѣвати при собѣ завжды сторону людей добрыхъ, водлѣ давного обычая; а за ихъ працу и за проѣздъ маєт имъ плачono быти на каждую милю по грошу; а дворянину господарскому за проѣздъ на мѣстцу дванадцать грошей; а служебнику воеводину тежъ за проѣздъ на мѣстцу шесть грошей, а слугѣ намѣстника воеводинѣ тежъ за проѣздъ на мѣстцу по три гроши маєт плачono быти.

6. *Прозьба.* Што есте тежъ просили короля его милости, абы книги судовыя воеводинские и судей повѣтовыхъ не были вывожены сѣ повѣтовъ; а писаромъ што за листы маєт плачono быти? а до канцелярии тежъ господарскоу по чому за который листъ маєт плачono быти? *Отказъ.* Его королевская милость на томъ зоставляти и вамъ то оповѣдити казати рачилъ: ижъ естли бы сѣ воевода, або староста, або судья сѣ которого повѣту обмѣнилъ, тогды книги судовыя не мають сѣ повѣту вывожены быти, але мають на мѣстцы въ повѣтѣ зостати, абы каждый, кому бы чого до тыхъ книгъ судовыхъ якая потреба была, тымъ латвѣй ихъ досягнути могъ. А што сѣ дотычетъ писаровъ господарскихъ и канцелярии его милости, около

№ 11. писанья и выдаванья листовъ, то ся маеть такъ заховати, яко передъ тымъ было. А отъ выписовъ великихъ и малыхъ писаромъ врьдовымъ дванадцать грошей; а въ книги записати два грошы, если бы заразомъ выпису взяти не хотѣлъ; а если бы и выписъ заразомъ бралъ, тогда за тотъ выписъ дванадцать грошей, а иныхъ дву грошей за вписанье въ книги неповиненъ вжо давати.

7. *Прозьба.* Што есте тежъ просили короля его милости, абы лицо злодѣйское великое зъ двора выкуповано было полтиною грошей, а малое лицо шацункомъ, чого бы стояло. *Отказъ.* Его королевская милость на то казалъ вамъ повѣдѣти, ижъ каждое лицо великое, которое бы стояло ста копъ грошей и большъ, маеть быти выкуповано полтиною грошей; а тое лицо, которое бы стояло менши десяти копъ грошей, маеть быти выкуповано дванадцатьми грошми. А если бы злодѣй не мѣлъ чимъ платити: тогда лицо зъ двора маеть дармо выдано быти, а злодѣй нехай виситъ.

8. *Прозьба.* А што есте тежъ просили короля его милости, ижъ имѣнья шляхетскіе, которые покупил панове духовные и мѣщане, абы ихъ вольно было шляхтъ у нихъ шацункомъ окуповати, хотя бы и не близкіе были. *Отказъ.* Его королевская милость рачитъ тую рѣчь такъ на томъ зостановляти, яко есть въ статутъ права посполитого описано.

9. *Прозьба.* Што есте тежъ просили короля его милости, ижъ позывъ если бы на одномъ которомъ артыкулъ былъ збитъ, тогда абы на другіе артыкулы въ томъ же позвѣ описаные было отказывано. *Отказъ.* Его королевская милость на то призволяти рачитъ, ижъ кгда бы одинъ, або два, або колько артыкуловъ въ позвѣ было збито, тогда абы на иншіе артыкулы въ томъ же позвѣ описаные было отказывано, абы ся тымъ непотребнымъ збиваньемъ позвовъ справедливость людская не проволокала. А хто бы о тотъ

збитый артыкулъ хотѣлъ зася сутяжного своего позвати: тогда за тымъ припозваньемъ, не маеть дальшого року сутяжному своему складати, только двѣ недѣли. А если бы которому чужоземцу, гостю прїѣзжчому, отъ кого — кольвекъ якая кривда ся стала тутъ на мѣстцу врьдовомъ: таковому каждому справедливость, безъ кождыхъ позвовъ, одно заказавши обвиненого посланцомъ врьдовымъ альбо дворяниномъ господарьскимъ, маеть учинена быти тогожъ часу, кромъ жалноу проволоки. А если бы обжалованый въ томъ часъ зѣхалъ, а на то бы пришло, ижъ бы мѣлъ сутяжного своего позывати: тогда за тыми позвы, дальшій рокъ не маеть быти ему складанъ, одно двѣ недѣли.

10. *Прозьба.* Што есте тежъ просили короля его милости: если бы тестаментъ въ одномъ которомъ члонку, або и въ двухъ и въ трехъ былъ скажонъ, тогда абы предъся вси иные рѣчи въ томъ же тестаментѣ описаные были при моцы захованы. *Отказъ.* Его королевская милость на то вамъ казалъ повѣдѣти, ижъ то его королевская милость рачитъ откладати до поправленья статуту; а до того часу тестаменты мають быти такъ захованы и держаны, яко есть въ статутъ описано.

11. *Прозьба.* Што есте тежъ просили короля его милости, абы тотъ артыкулъ въ статутѣ, о квалтовное наѣханье на домъ, былъ поправленъ и отмѣненъ. *Отказъ.* Его королевская милость на томъ тую рѣчь, ажъ до поправленья статуту, зостановляти рачитъ, ижъ кгда бы ся квалтъ въ дому сталъ, а знаку бы, ранъ а ни кровавыхъ а ни синихъ на томъ квалтъ не было: тогда за таковой квалтъ маеть быти плачно дванадцать рублевъ грошей, а на шкодахъ, на томъ слушный доводъ вчиненъ будетъ, то такожъ маеть плачно быти. Але гдѣ бы ся квалтъ въ дому сталъ, а знаки бы, раны кровавые альбо синіе были значные: тогда вжо таковой квалтъ маеть такъ сужонъ и каранъ быти, яко есть на сесь

часть въ статутъ описано. А тое теперешнее постановление маеть держано быти до поправленья статуту.

12. *Прозьба.* Што есте тежъ просили короля его милости, абы панове рада и вси преложные духовные зъ имѣній своихъ, которые подъ правомъ земскимъ держатъ, шляхтъ о ихъ кривды отказывали передъ судьями повѣтовыми. *Отказъ.* Господарь король его милость на то казалъ вамъ повѣдѣти, ижъ его королевская милость не звыкъ, а ни хочеть рѣчей новыхъ у сее паньство свое вводити; а такъ, ижъ того передъ тымъ не бывало, абы панове рады и панове преложные духовные мѣли передъ урядники повѣтовыми отказывати; ино того и теперъ быти не маеть: але мають панове рады и панове преложные духовные обо вси кривды шляхтъ отказывати передъ его королевскою милостью самымъ, а въ небытности его милости въ тутошнемъ паньствѣ, ино передъ паны радами, на рокахъ судовыхъ господарьскихъ великихъ, о святомъ Мартинѣ.

13. *Прозьба.* Што есте тежъ просили короля его милости, абы дѣвки и вдовы, которые бы за границы великого князства, до чужоу земли, безъ воли прїятелей своихъ кровныхъ замужъ шли, отъ права своего прирѣженного и отъ имѣній отпадали; а которые бы съ призволениемъ прїятелей своихъ прирѣженныхъ до чужоу земли замужъ шли, абы имѣнья зоставили близкимъ, а они бы имъ водѣ шацунку за тымъ имѣнья пѣязи откладали. *Отказъ.* На то его королевская милость казалъ вамъ повѣдѣти, ижъ тые прозьбы ваши его королевская милость рачитъ на томъ такъ зостановляти, яко есть около того въ статутъ права посполитого описано.

14. *Прозьба.* Што есте тежъ просили короля его милости, абы шляхтъ было вольно въ своихъ имѣньяхъ, на гостивцахъ, корчмы будовати и ихъ уживати. *Отказъ.* На то его королевская милость казалъ вамъ повѣдѣти, ижъ

то зъ многихъ слушныхъ и певныхъ причинъ № 11. быти не можетъ, хiba оlijъ за особливую ласкою и дозволениемъ его королевскоу милости самого.

15. *Прозьба.* Што есте тежъ просили короля его милости, абы мѣщане всихъ мѣстъ, водѣ статуту, отказывали шляхтъ за бой и за раны у правъ земскомъ; а хотя бы ся тежъ и передъ врьдомъ мѣстскимъ о то судили, тогда абы таковыя рѣчи не инымъ, але земскимъ правомъ были сужоны. *Отказъ.* На то господарь его милость казалъ вамъ повѣдѣти, ижъ его королевская милость рачитъ, съ добротливости своею паньскоу, вси станы подданныхъ своихъ, такъ шляхетскіе, яко тежъ имѣстскіе, при всихъ ихъ правѣхъ и при ихъ вольностяхъ ласково и милостиво заховывати. А такъ, ижъ которые мѣщане подъ правомъ Майдеборскимъ зъ ласки и наданья предковъ его королевской милости здавна засѣли, не видѣло ся его королевской милости тыхъ ихъ правъ и вольностей нарушати, и иные новые обычаи иныхъ правъ въ ихъ права вносити. И на томъ его королевская милость то зостановляти рачитъ: ижъ если бы ся шляхтичу отъ мѣщанина бой и раны стали, тогда маеть зъ вижомъ замковымъ врьдовымъ, отъ врьду мѣстского на того винного своего права просити; а врьдъ мѣстскій тогожъ часу, передъ тымъ же вижомъ, маеть шляхтичу зъ мѣщаниномъ обвиненымъ справедливость учинити правомъ своимъ Майдеборскимъ, жадныхъ откладовъ, которые ся въ правѣ ихъ Майдеборскомъ заховывають, тому обвиненому мѣщанину не допускаючи. Если жъ бы, пакъ, врьдъ мѣстскій, чинячи проволоку справедливости и фолькгуючи тому мѣщанину, откладовъ тыхъ водѣ права своего Майдеборского допускалъ, хотячи тымъ шляхтича къ волокитамъ и накладомъ приправовати и справедливости зникати: тогда панове воеводы и панове старосты повѣтовые мають того съ пильностью дозрѣти, абы ся таковыя прово-

№ 11. Локи за тими ихъ отклады шляхтъ не дѣлаи, и мають оный врьдъ мѣстскій къ тому приму-
сити, абы конечная справедливость шляхтъ
зъ мѣщанъ за первымъ обосланьемъ ихъ бы-
ла учинена.

III. — Прозьбы земли Жомойтскоѣ.

На тые прозьбы, которые панове тивунове
и вся шляхта земли Жомойтскоѣ, на тепереш-
немъ соймѣ Виленскомъ, къ господарю его
милости Жикгимонту Августу, королю и вели-
кому князю, чинили и на писмѣ подали, на то
на все имъ отъ его королевской милости тако-
вый отказъ есть учиненъ, мѣста Божьего тыся-
ча пятьсотъ пятьдесятъ первого, мѣсяца Нояб-
ря двадцатого дня, то есть, у вилю оярор-
ванья Панны Марии.

Артикулъ 1. Прозьба. Напервѣй, што есте
просили его королевской милости, абы черезъ
рѣку Невяжу позвы, дѣцкіе и уздчїе не были
по земли Жомойтскоѣ посылаемы, але ижьбы
всїхъ староста тамошній Жомойтскій судилъ
и справовалъ, водлѣ привилеѣвъ и вольностей
вашихъ. *Отказъ.* На то его королевская ми-
лость казалъ вамъ повѣдѣти, ижь его королев-
ская милость бояръ шляхты съ присуду и съ
справы старостъ Жомойтскихъ выймовати не
рачитъ; а вѣдѣже кому бы ся отъ нихъ въ
чомъ съ кривдою быти видѣло, таковой кож-
дый можетъ, по сказанью, до его королевской
милости, яко до пана зверхного, отзыватьсѣ.
А што ся дотычетъ тыхъ уздчихъ, которыхъ
его королевская милость, за жалобами подда-
ныхъ своихъ, тамъ до земли Жомойтскоѣ
всылати и справедливость съ тивуны и съ
урядники своими чинити розказывати рачитъ,
до того вамъ ничего: бо яко его королевская
милость, не пытаючисѣ васъ, тивунства и вря-
ды свои тамъ роздавати рачитъ, кому есть
воля и ласка его королевской милости; такъ
тежъ его королевская милость, безъ вашего
докладу, и справедливость зъ урядники свои-
ми подданымъ своимъ розказывати рачитъ

чинити тому, кому есть воля его королевской
милости, а вамъ до того ничего.

2. Прозьба. При томъ тежъ просили есте
его королевской милости, абы на заочное по-
вѣданье и обжалованье никому врьдовъ не от-
нимати, надъ привилеѣ. *Отказъ.* На то его
королевская милость казалъ вамъ повѣдѣти,
ижь такъ, яко есть моционъ и воленъ его коро-
левская милость тивунства и врьды давати,
такъ тежъ моционъ есть и брати, а звлаща
тымъ, которые ся нераднѣ и обтяжливѣ про-
тивъ подданымъ его королевской милости за-
ховывають; и не повиненъ есть его королев-
ская милость, ни для чїихъ привилеѣвъ, шко-
ды своеѣ и подданныхъ своихъ никому тер-
пѣти. А тежъ не его королевская милость
врьды отнимаетъ, але самъ собѣ каждый та-
ковой врьды отнимаетъ, хто ся на нихъ не-
раднѣ справуетъ; а естли бы хто такъ о собѣ
розумѣлъ, ижь бы невиннѣ былъ обжалованъ,
и за тымъ бы обжалованьемъ его врьдъ отъ
него отошолъ: нехай собѣ съ тымъ мовитъ,
хто его обжаловалъ.

3. Прозьба. За тымъ тежъ просили есте его
королевской милости, абы врьды въ земли
Жомойтскоѣ не были даваны а ни Литвѣ, а
ни Руси, и неосѣлымъ, одно Жомойти, кото-
рые зъ отцовъ и зъ родичовъ своихъ суть та-
мошніе родичы осѣлые, и то за причину ста-
росты и тивуновъ шляхты. *Отказъ.* На то его
королевская милость казалъ вамъ повѣдѣти,
ижь хочетъ его королевская милость вѣдати:
кому бы тамъ въ Жомойти неосѣлому врьдъ
который былъ данъ? абы есте то повѣдили.

4. Прозьба. Тежъ просили есте его королев-
ской милости и того есте въ той прозьбѣ своей
значнѣ доложили, ижь дей водлѣ привилеѣвъ,
не мѣли бы жадные новые рѣчи въ землю
Жомойтскую вношоны быти; а теперъ дей
волоки почато тамъ мѣрити, за чимъ дей
отъ помѣрчихъ волочныхъ великіе ся крив-
ды и утиски вамъ дѣють, зъ нарушенемъ при-
вилеѣвъ и вольностей вашихъ. *Отказъ.* На то

его королевская милость казалъ вамъ повѣди-
ти, ижь не бачитъ его королевская милость,
абы тою помѣрою волочною мѣли привилеѣ и
вольности ваши въ чомъ нарушоны быти;
кгдажъ его королевская милость не на ва-
шихъ земляхъ, а ни межи вашими поддаными
тую помѣру волочную постановити рачилъ:
але межи своими поддаными и на своихъ зем-
ляхъ, для розмноженья пожитковъ своихъ,
тую помѣру пустилъ. А кгда тежъ вамъ есть
вольнѣ на своихъ имѣньяхъ пожитки собѣ чи-
нити, тогда тоежъ его королевской милости
есть еще вольнѣй, а то васъ намытѣй ничимъ
не долегаеть. А естлижъ бы кому што его земли
въ волоки его королевскоѣ милости было умѣ-
рено, а отмыны бы за то не дано; альбо естли
бы якіе кривды и утиски отъ помѣрчихъ его
королевской милости кому ся дѣлаи: тымъ
всїмъ его королевская милость неомѣшканую
и конечную справедливость рачитъ розказати
учинити, такъ, ижь ни хто зъ васъ ни въ чомъ
шкодовати не будетъ.

5. Прозьба. И то тежъ есте въ тыхъ же
прозьбахъ своихъ значнѣ описали, ижь отъ
урядниковъ пановъ великихъ многіе ся крив-
ды и утиски шляхтъ дѣють, въ забираи
земль, людей и иныхъ рѣчей, а оныѣ панове
съ тими врьдники своими справедливости чи-
нити не хочутъ, и передъ паномъ старостою къ
праву стати имъ не кажутъ: а такъ, абы панъ
староста оныхъ пановъ обсылалъ, штобы съ
тыми врьдники и съ людьми своими справедли-
вость чинили; а естли бы справедливости чи-
нити не хотѣли, абы староста тыхъ врьдни-
ковъ и подданныхъ ихъ мощно судилъ, и водлѣ
суда своего отправу чинилъ. *Отказъ.* На то
его королевская милость рачитъ призвати,
и розказуетъ его милость пану старостѣ та-
мошнему Жомойтскому, абы таковымъ обы-
чаемъ, яко прозьба ваша есть учинена, спра-
ведливости шляхтъ и подданымъ ихъ дово-
дилъ и отправу чинилъ, абы черезъ то шляхта
и подданные его королевской милости, и тежъ

ваши, кривдъ и утисковъ отъ тыхъ пановъ № 11.
великихъ не прїимовали.

6. Прозьба. Была тежъ прозьба ваша къ его
королевской милости, абы панове духовные и
мѣщане съ тыхъ имѣній, которые у шляхты
покупили, службу военную служили, альбо
абы за нихъ отъ близкихъ пѣнъзи водлѣ ша-
пунку брали, а того абы панъ староста до-
сматрѣлъ. *Отказъ.* На то его королевская ми-
лость казалъ вамъ повѣдѣти, ижь рачилъ его
королевская милость поручити и розказати
пану старостѣ Жомойтскому, абы того съ
пильностью досматрѣлъ: естли бы што въ та-
ковыхъ имѣньяхъ отъ службы земскоѣ оты-
шло, нехай бы того не было; а што ся доты-
четъ откладанья пѣнъзей за тые имѣнья, и
того также маеть панъ староста досматрѣти.

7. Прозьба. И о то тежъ есте прозьбу къ его
королевской милости чинили, абы вольнѣ бы-
ло посылати до Нѣмецъ за границу свои вла-
стные збожья и быдла на продажу, и за то
засѣ также на свои властные потребности купо-
вати кони, зброи и иншіе потребности свои, на
пожитокъ свой и на службу земскую, а отъ
того мыта, яко и передъ тымъ бывало, абы не
давали. *Отказъ.* На то казалъ его королев-
ская милость вамъ повѣдѣти, ижь ся то маеть
такъ заховати, яко и передъ тымъ здавна ся
заховывало.

8. Прозьба. Была тежъ прозьба ваша, абы
въ мѣстѣхъ князьскихъ и паньскихъ мыто не
было брано. *Отказъ.* То его королевская ми-
лость рачитъ заховати водлѣ давного обычаю:
гдѣ передъ тымъ мыто и торговое было бирано,
тамъ и теперъ маеть брано быти; а гдѣ не би-
рано, тамъ и теперъ брано быти не маеть.

9. Прозьба. И та тежъ прозьба ваша была,
ижь люди и челядь невольная, зашкodikвши,
до Юрборку и до Новѣ Воли утекають, а
врьдники королевскеѣ милости а ни ихъ вы-
дати, а ни зъ ними справедливости чинити не
хотѣть. *Отказъ.* О томъ его королевская ми-
лость будетъ рачилъ писати до еѣ королевской

№ 11. милости, абы въ томъ никому зъ васъ никоторая кривда не была.

10. *Прозьба.* Тежъ просили есте, абы князь бискупъ Жомойтскій и со всимъ духовенствомъ своимъ, людей непохожихъ и челядь невольную, которые до нихъ утекають, выдавали, або справедливость зъ ними чинили. *Отказъ.* Его королевская милость казалъ вамъ повѣднѣти, ижъ то они конечнѣ чинити мають; а естли бы не хотѣли, тогда панъ староста вашъ Жомойтскій маеть того съ пыльностью досмотрѣти, абы въ томъ вамъ отъ князя бискупа и отъ всего духовенства его некотороѣ кривды не было.

11. *Прозьба.* Просили есте тежъ, абы бояромъ, шляхтѣ и посполитому чоловѣку, волаѣ давного обычая, волюно было въ пущахъ звѣрь бити, и дерево на будованье брати, и въ озерѣхъ рыбы ловити. *Отказъ.* Его королевская милость казалъ вамъ повѣднѣти, ижъ того всего маеть панъ староста достаточнѣ ся довѣдати, естли то передъ тымъ бывало, альбо ни.

12. *Прозьба.* И тая прозьба ваша къ его королевской милости была, абы печать земская дана была, а наибольшей для того, ижъ естли бы которые прозьбы за тою печатью къ его королевской милости были чинены, абы его королевская милость рачилъ вѣдати, ижъ тые прозьбы суть зъ волею всее земли. *Отказъ.* Его королевская милость казалъ вамъ повѣднѣти: кгдажъ того и передъ тымъ, за предковъ его королевской милости николи не бывало, тогда и теперь быти не можетъ.

13. *Прозьба.* Просили есте тежъ наконецъ его королевской милости, абы волаѣ давного обычая, тивунъ старшій хоруговъ земли Жомойтскоѣ у войску носилъ и у себе ее мѣлъ, и бояръ шляхту къ службѣ военной пописывалъ, и реистры того своего попису абы до пана старосты Жомойтского отдавалъ, а панъ староста засъ до пана гетмана великого тые реистры отсымалъ; а самъ панъ староста и

панъ гетманъ ижъбы войска Жомойтского не пописывали. *Отказъ.* Его королевская милость, нашъ милостивый панъ, тую прозьбу вашу ласково и милостиво къ собѣ припускати, и на томъ то на сесь часъ такъ зостановляти рачить: ижъ старшій тивунъ въ земли Жомойтской, часу потребы военнѣ, або которого — колвекъ иного рушенья, маеть войско земли Жомойтской, всю шляхту, которая службу военную служити повинна, достаточнѣ, каждого меновитъ, и почотъ его весь, и кони въ шерсть, и зброи и барву списати, и жадного утаивати, або отъ службы военнѣ отпускати, альбо которую фолькгу чинити не маеть, подъ цнотю и подъ вѣрою своею, которою его королевской милости и рѣчи посполитой естъ повиненъ; и тые реистры того попису своего маеть до пана старосты Жомойтского отдавати, а панъ староста засъ маеть тые реистры до пана гетмана великого отсылати; а панъ гетманъ, естли бы того потреба вказывала, можетъ оному войску Жомойтскому рсказати, абы ся передъ нимъ волаѣ оногo попису къ шихованью оказали; а повторнѣ вже, при томъ оказываньи, не мають быти пописываны. А тивуну своему старшому отъ попису не мають ничего давати.

А тые двѣ рѣчи, которые есте въ тыхъ же прозьбахъ своихъ написали, ачъ — колвекъ ся не стигають ни на чий иный пожитокъ, одно на властный пожитокъ его королевской милости самого, и для того на то отказу мала была потреба: однакъ же его королевская милость и на то рачилъ рсказать отказъ учинити.

14. *Прозьба.* Што есте повѣдили, ижъ панъ Станиславъ Скопъ, куничникъ Жомойтскій, выбираючи пѣязи куничные отъ приставовъ земли Жомойтской, великую обтяжливость приставомъ и людемъ чинитъ, беручи на нихъ великую стацею пѣнежную и поклоны непомярны; для чого и приставове и люди, земли покинувши, прочъ ся розошли. *Отказъ.* Не съ влячностью его королевская милость рачить

то слухати, ижъ ся таковыя обтяжливости подданнымъ его королевской милости отъ того куничника дѣяли; и, не хотѣчи того болшей мѣти, рачить его королевская милость тотъ врядъ куничный отъ Скопа за таковыми причинами отобрати. И рачить его королевская милость рсказати тивуномъ и врядникомъ своимъ, абы тотъ платъ куничный кождый зъ нихъ въ своемъ тивунствѣ и въ своемъ врядѣ съ приставовъ и съ людей выбиралъ, и посполъ зъ иншими платы до скарбу его королевской милости отдавалъ и личьбу чинилъ, але въ тыхъ стацяхъ и въ поклонѣхъ побожнѣ къ подданнымъ его королевскоѣ милости абы ся заховывали. А ижъбы напотомъ такожъ хто зъ васъ того куничства восполокъ съ тивунствомъ не позбылъ, стацей и поклоновъ за тыми куницами брати не можете.

15. *Прозьба.* А потомъ просили есте, абы то его королевская милость рачилъ рсказати: у скарбъ своемъ на личьбѣ пріймовати, што коли тутъ зъ людей убудеть; естли бы хто повѣтремъ вымеръ, або зъ домомъ згорѣлъ, або прочъ утекъ, або для убожства плату давати не могъ, абы то на личьбѣ было пріймовано. *Отказъ.* То его королевская милость рачилъ рсказати подскарбьему своему, пану воеводѣ, пану Ивану Горвостаю, ижъбы того съ пыльностью въ скарбъ при личьбѣ догладано, абы отъ таковыхъ гиблыхъ и немающихъ людей платъ на врядникахъ не былъ вытеганъ; а вѣдже и врядники, волаѣ вѣры и цноты своея, мають то правдиве, подъ сумнѣнемъ, при личьбѣ повѣднѣти, ижъ отъ тыхъ гиблыхъ ничего не могли платовъ его королевской милости взяти.

IV.—Прозьбы земли Волинскоѣ.

Арт. 1. *Прозьба.* Што есте на семъ теперешнемъ соймѣ вальномъ Виленскомъ его королевской милости пана нашого милостивого просили, и тые прозьбы свои на писмѣ подали, а напертѣй о томъ, абы на имѣньяхъ князьскихъ и паньскихъ и землянскихъ мытны-

ки его королевской милости и сторожы ко- № 11.
моръ мытныхъ не лежали. *Отказъ.* На тую прозьбу вашу его королевская милость, нашъ милостивый панъ, такъ вамъ повѣднѣти казалъ: ижъ его королевская милость взявши въ руки и въ моцъ свою панство свое дѣдичное, великое князьство, такъ тотъ обычай засталъ, ижъ за отца и за предковъ его королевской милости, сторожы мытныя, стерегучи промытъ, на имѣньяхъ вашихъ князьскихъ, паньскихъ и землянскихъ леживали; такъ же и теперь его королевская милость того отступати не рачить, и такъ то мѣти хочеть, абы сторожы мытныя, гдѣ передъ тымъ для промытъ леживали, и теперь бы тамъ на имѣньяхъ вашихъ мѣшкали и пожитковъ мытныхъ стерегли, якожъ тая сторожа не только тамъ на Волини, але и по всему панству великому князьству естъ установлена: бо естли бы тоѣ сторожы мытноѣ на имѣньяхъ вашихъ не было, тогда бѣ многіе купцы, оминаючи мыта головные, дорогами незвыклыми провѣзжали, а въ томъ бы его королевская милость много въ пожиткахъ своихъ мытныхъ шкодовати мусилъ. И не бачить его королевская милость, абы тая сторожа мытная на вашихъ имѣньяхъ мѣла вамъ якую шкоду, або переказу пожиткомъ вашимъ чинити: кгдажъ тые сторожы мытныя, мѣшкаючи на имѣньяхъ вашихъ, ничего иного не смотрятъ, только пожитковъ его королевскоѣ милости мытныхъ головныхъ, хто бы ся на мытѣхъ головныхъ не обмытилъ, и таковыхъ они пылнуютъ, а въ ваши пожитки ничимъ ся намѣтъ не вступаютъ. А который бы колвекъ сторожъ мытный вашимъ пожиткомъ якую шкоду учинилъ, або ся въ нихъ вступовалъ, а то бы на него слушнымъ доводомъ было переведено: тогда таковой не только ижъ повиненъ будетъ шкоду оправити, але, надъ то, и каранъ будетъ, такъ, ижъ иншіе на то смотрѣчи отъ того ся повстегати будутъ. А такъ, и повторнѣ, его королевская милость вамъ то рсказовати рачить,

№ 11. и такъ то мѣти конечнѣ хочеть, абы сторожы мытныя на имѣньяхъ вашихъ, гдѣ бы того потреба указывала, мѣшкали безъ каждой переказы ваше.

2. *Прозьба.* Просили тежъ его королевской милости, абы купцы съ куплями своими иными новыми дорогами не ходили, одно старыми звыклыми гостинцы. *Отказъ.* На то его королевская милость призолати рачить, и тыхъ новыхъ дорогъ кунцомъ боронити рскажетъ.

3. *Прозьба.* Просили тежъ есте его королевской милости, абы мытники жадныхъ мытъ зъ рѣчей властныхъ князьскихъ и паньскихъ и землянскихъ не брали. *Отказъ.* На то его королевская милость такъ вамъ рсказалъ повѣдити: ижъ его милость не рачить рсказывати, отъ таковыхъ рѣчей мыта брати, отъ которыхъ первѣй не брано; але отъ которыхъ передъ тымъ мыто было брано, того и теперь его королевская милость отпустить не хочеть. А если бы мытники, надъ обычай давный и надъ уставу, мыто отъ тыхъ рѣчей брали, отъ которыхъ передъ тымъ не брано, и то бы на нихъ было доводомъ слушнымъ переведено: тогда то и зъ навязкою оправовати будутъ повинни.

4. *Прозьба.* И то тежъ есте на прозьбъ своей его королевской милости подали, абы людемъ пѣняжнымъ пикоторая устава на живности имъ самымъ и конемъ ихъ не была, але ижъбы всякую рѣчь цѣною, яко ся хто сторгуеть, куповали. *Отказъ.* На то его королевская милость рсказалъ вамъ повѣдити: ижъ его королевская милость маючи на то особливую бачность, ижъ тые тамъ люди пѣняжные не для чыее иноѣ обороны суть положены, одно для ваше, абы неприятели вамъ самымъ и маествостямъ вашимъ безвѣстно шкодъ не чинилъ; маючи тежъ его королевская милость и на то бачность, ижъ если бы люди пѣняжные мѣли цѣною и торгомъ у вашихъ людей што куповати; тогда бы, по-

добно, такая купля большую шкоду людемъ вашимъ принесла, ижъ пожитокъ: и для того его королевская милость рачить рсказати справцу людей тамошнихъ пѣняжныхъ, абы уставу на всякіе живности тымъ людемъ пѣняжнымъ водлѣ часу теперешнего установилъ, абы каждый вѣдалъ, што за што маеть дати, а што тежъ за што взяти.

5. *Прозьба.* На остатку, и тую есте прозьбу къ его королевской милости чинили, абы тымъ ктвалтамъ, наѣздамъ, забойствамъ, и забиранию земель, и грабежомъ, которые ся отъ пановъ Поляковъ вамъ дѣють, была справедливость учинена и конецъ слушный тому постановленъ. *Отказъ.* Тую прозьбу вашу его королевская милость на доброй памяти своей мѣти рачить, и дастъ Богъ, будучи сими часы на соймѣ вальномъ корунномъ, хочеть его королевская милость съ паны корунными около таковыхъ рѣчей обмовити и конечное постановление учинити, и тотъ обычай тому найти, ижъбы ся таковыя рѣчи межи паньства его королевской милости черезъ то вже не дѣяли, абы каждый своего съ покоемъ уживалъ.

V. — На томъ же теперешнемъ соймѣ вальномъ Виленскомъ, въ року 1551, по тыхъ всихъ прозьбахъ своихъ вышей писанныхъ, которые княжата, панята, шляхта, и вси земли, и все рыцерство великого князства Литовского, къ его королевской милости пану своему милостивому чинили (на которые вжо и отказъ отъ его королевской милости водлѣ воли и ласки его милости взяли, што есть на писмѣ достаточнѣ описано); тогда, на сесь же часъ, будучи вси станове великого князства отъ его королевской милости напомянены, около того радили, мыслили и на конецъ постановили: которымъ бы обычаемъ, часу каждоѣ потребы и небезпечности отъ неприятели, оборона тому паньству и отпоръ тымъ неприятели мѣлъ чиненъ быти. За чимъ же вси земли, княжата, панята, шляхта и все

рыцерство великого князства, къ той оборонѣ своей и земской, таковое постановление до часу учинили:

1. Ижъ хто — кольвекъ маеть маестности своея девять служобъ тяглыхъ, таковой каждый повиненъ будетъ съ тыхъ девяти служобъ пахолка, на кони въ зброи, въ сукни свѣтлой, къ службѣ военной ставити, водлугъ оныхъ прошлыхъ первшихъ соймовъ ухвалъ и уставъ. А хто маеть девяностъ служобъ, тотъ повиненъ будетъ десять пахолковъ конныхъ, збройныхъ, къ службѣ военной ставити. Которое жъ постановление на сесь часъ тотъ-то обороны земскоѣ рачилъ его королевская милость отъ подданныхъ своихъ, княжатъ, панятъ и отъ всея шляхты ласково и милостиве принять.

2. Надъ то тежъ есте вси станове великого князства, княжата, панята, шляхта и все рыцерство, милуючи его королевскую милость, пана своего приржонного дѣдичного, и рѣчь посполитую того-то паньства его милости великого князства Литовского, поступили, для обороны тежъ земской, и для покою посполитого всея земли, и для певнѣйшое безпечности своея и статковъ и маестностей своихъ, платъ посполитый земскій, серебшизну съ людей своихъ тяглыхъ, отъ каждоѣ сохи оромъ по пяти грошей, а отъ земли, хто бы сохи не мѣлъ, а земли уживалъ, также по пяти грошей, до трехъ годовъ.

3. А при томъ же платъ посполитомъ земскомъ, поступили также отъ каждоѣ сохи оромъ по пѣнезю, на сграву тымъ, которые мають, водлѣ прозьбы всея земли, статутъ права посполитого за рсказаньемъ его королевской милости поправляти.

4. Бачучи вси станове великого князства тые такъ великіе а наглые потребы того паньства великого князства, ижъ со всихъ сторонъ у великой небезпечности отъ неприятели есть, зложили рокъ певный, тую серебшизну зъ людей своихъ выбравши, подъ при-

сягами своими отдати до скарбу посполитого № 11. земского, на день Громницъ свята Панны Маріи прійдучого въ томъ другомъ пришломъ году въ пятьдесятъ второмъ; а на отбирание тоѣ серебшизны обрали собѣ бирьчими, князя Венцлава бискупа Жомойтского, а маршалка господарьского пана Яна Юрьевича Комаевского, а при нихъ писаремъ або пана Глѣба Есмана, або пана Бенедикта, ключника Троцкого. Нижли господарь король его милость, намовивши около того съ паны радами ихъ милостью, и бачучи на то особливо, ижъ на сесь часъ, за караньемъ Божиимъ, на вси стороны есть великій неурожай и недостатокъ збожья и, правъ, голодъ; а такъ, если бы тая серебшизна мѣла на тотъ рокъ, на день Громницъ въ ономъ пришломъ году пятьдесятъ второмъ выбирана быти: тогда бы людемъ въ томъ великая тяжкость была, и тотъ бы платъ посполитый жаднымъ обычаемъ не могъ сполна избранъ быти, а въ томъ бы никому иному большая шкода не была, только рѣчи посполитой и оборонѣ земской; и для того рачилъ его королевская милость рокъ отданью тоѣ серебшизны далѣй помкнути, и зложилъ его королевская милость рокъ певный, остатный, правъ якобы завитый, тую серебшизну первую до пановъ бирьчихъ отдати на день Нароженья Панны Маріи въ року пришломъ пятьдесятъ второмъ. А хтожъ бы кольвекъ, якожъ кольвекъ стану, того плату посполитого на тотъ — тамъ рокъ завитый, на день Нароженья Панны Маріи до бирьчихъ не отдалъ: таковой каждый, жадного не выймуочи, повиненъ будетъ совито платити, и то на немъ маеть мощно справлено быти и до скарбу посполитого, до пановъ бирьчихъ отдано. А до того часу, поки ся тотъ платъ выбереть, абы ся оборона земская не омышкивала и рѣчь бы посполитая котороѣ шкоды отъ неприятели не пріймовала, его королевская милость, милуючи сее паньство свое отчизное великое князство и всихъ подданныхъ тутош-

№ 11. нихъ, зъ ласки и доброты своее паньскоѣ, рачилъ росказати, съ скарбу своего властного вси потреби теперешніе земскіе грошомъ своимъ властнымъ опатровати; а што — кольвекъ на то выдано будетъ, то зась съ того плату серебшизнаго маеть до скарбу его королевской милости отложено быти. А што ся дотычетъ другоѣ серебшизны, на другій годъ поступленой, тая также маеть быти отдана до скарбу посполитого, до пановъ бирьчихъ, на тотъ же день Громницъ свята Панны Маріи, которое будетъ алижъ въ року пятьдесятъ третьемъ. Што ся тежъ дотычетъ третье се-ребшизны, на третій годъ, тая вже маеть от-дана быти до скарбу посполитого на семую субботу въ томъ же году пятьдесятъ третьемъ, або яко господарь его милость рокъ водлѣ по-требы зложити рачитъ.

5. Хотячи тежъ его королевская милость и то у вѣдомости своей мѣти, колько хто почту своего, водлѣ теперешнее ухвалы, зъ девяти служобъ десятого выправуючи, къ службѣ военной ставити есть повиненъ, рачилъ его королевская милость росказати и такъ поста-новити, абы каждый выбираючи съ подданыхъ своихъ тую серебшизну, каждую служ-бу меновитъ въ рейстры написалъ, и посполъ съ серебшизною рейстръ тотъ людей своихъ до скарбу отдалъ, подъ присягою, ижъ ни-чего, а ни серебшизны, а ни людей своихъ не утаилъ.

6. Што ся тежъ дотычетъ того оказыванья, яко то на прошлыхъ соймѣхъ было постано-влено, ижъ мѣли вси съ почты своими передъ паны воеводами своими повѣстовыми оказы-ваться, яко хто службу военную служити есть повиненъ: ино около того оказыванья и около попису всее земли, на сесь часъ его королев-ская милость не рачилъ ещо ничего скончыть, а то для того, ижъ на сесь часъ, для голоду, многіе люди зъ домовъ своихъ прочъ розош-лися; а такъ, если бы теперъ тое оказыванье и попись быти мѣлъ, тогда бы немало почту

отъ службы военної убыло: и для того его королевская милость рачилъ тое оказыванье и попись помкнути далѣй ондѣй, ажъ по жни-вѣхъ, лѣтъ. А до того часу, маеть предься служба военная служона быти по тому, яко былъ ухвалилъ и постановилъ славной памяти отецъ его королевской милости, со всеми станы и со всеми землями, на остатнемъ соймѣ валь-номъ Берестейскомъ.

7. Были тежъ на томъ же теперешнемъ соймѣ напомнимъ отъ его королевской милости вси княжата, панята, шляхта великого князь-ства Литовского, абы и о томъ не меньшей мыслили и радили, ижъ ся рука непріятель-ская не по малу силитъ, а замки украинные вельми опали и пильноѣ оправы потребуютъ, и новыхъ тежъ замковъ на нѣкоторыхъ мѣст-цахъ есть не меньшая потреба. А его королев-ская милость рачитъ певную вѣдомость мѣти, не только отъ тыхъ своихъ посланцовъ, кото-рые послѣ остатнего сойму Берестейского вси замки, не только украинные, але и тутощ-ніе, за росказаньемъ его королевской милости объѣзжали и пописывали; але тежъ рачитъ его королевская милость еще лѣпшую вѣдо-мость мѣти зъ многихъ книгъ и рейстровъ, которые князи, панове, бояре повинни замки робити, мосты мостити, гати гатити, подводы и стацыи давати, сторожу при городахъ дер-жати; а такъ, абы тымъ всимъ потребамъ зем-скимъ слушный посролокъ находили, кото-рымъ бы обычаемъ тые повинности и потреби рѣчи посполитоѣ были опатрованы. За кото-рымъ же постановленьемъ и напомнимъ емъ господарскимъ, приходчи передъ его коро-левскую милость князи, панове, бояре и вся шляхта великого князьства, повѣдили то черезъ подчашаго господарского, старосту Тыкотиньского и Могилевского, черезъ пана Станислава Миколаевича Кгезкайла, ижъ они милуючи рѣчь посполитую, и добрый радъ и справу, и пожитокъ того паньства великого князьства, тыхъ всихъ работъ замковыхъ и

мостовыхъ, и сторожи городовъ съ тыхъ людей своихъ поступили, которые къ тымъ работамъ и пошлинамъ городovýmъ и мосто-вымъ здавна были повинни, и подъ то ся под-дали, ижъ вжо отъ сего часу и на потомные вѣчные часы, люди ихъ, и тежъ костелные и церковные пановъ духовныхъ Римского и Гре-ческого закону, которые на то передъ тымъ были повинни, мають города новые робити, старые оправовати, мосты мостити, гати га-тити, тамъ, гдѣ того потреба и пожитокъ рѣчи посполитоѣ указовати будетъ; тежъ сторожу городовую, и станы, и стацыи, хто передъ тымъ полнивалъ, тотъ и теперъ на то пови-ненъ. А хтожъ бы кольвекъ, якогжъ бы кольвекъ стану былъ, тоѣ теперешнѣе уставы и ухвалы посполитоѣ, къ шкодѣ земской, полнити не хотѣлъ: таковой каждый, жадного не выймучи, маеть къ тому моцою госпо-дарскою моцно приворочиванъ быти. И маеть вжо, отъ сего часу, его королевская милость обрати и напомнимъ колько особъ, людей зац-ныхъ, вѣры годныхъ и пожитокъ рѣчи поспо-литой милуючихъ, которые мають въ каждый годъ замки пограничные и тутощніе объѣз-жати, и всихъ потребъ и недостатковъ оныхъ замковъ доглядати, и господарю его милости и паномъ радамъ о томъ всемъ давати знати. Па-нове тежъ воеводы и панове старосты всихъ замковъ мають, водлѣ повинностей своихъ, съ пильностью того доглядывати, абы каждый, хто гдѣ што въ тыхъ замкахъ робити пови-ненъ, тое заробилъ; а въ тыхъ работахъ жад-ному нѣкоторый отпускъ, а ни фольгованье быти не маеть. А чого бы гдѣ не доставало водлѣ повинностей кимъ робити, то вже о томъ самъ господарь его милость съ паны ра-дами своими обмышляти будетъ рачилъ.

8. О подводы тежъ таковое постановление есть учинено: ижъ хто — кольвекъ, якогжъ кольвекъ стану, духовный або свѣтскій, князь, панъ; бояринъ, дворянинъ, вдова, маеть и держитъ тые люди зъ ласки предковъ госпо-

дарскихъ и зъ ласки тежъ его королевской № 11. милости самого, и которые передъ тымъ, по-сполъ съ подданными господарскими, подводы и стацыи давали и станы ставили, тые и те-перь повинни будутъ вже отъ сего часу под-воды давати, и тыхъ подводъ они сами съ подданныхъ своихъ добровольно поступили.

Была тежъ около того обмова: если бы ся видѣло кому то съ трудностью, абы люди его тыхъ подводъ пильновати мѣли, або который слушный платъ на рокъ зъ людей ихъ шолъ, штобы за то подводы наймовати, ижъбы гонцы и послы въ справахъ господарскихъ и земскихъ нѣкоторого омѣшканья не пріймо-вали; и такъ ся многіе зъ нихъ къ тому прі-мовляли, хотѣчи на рокъ съ каждой службы своею подводой по шести грошей до вряду, куды подвода бѣжитъ, давати, три грошы на семую субботу, а другіе три грошы о святомъ Михайлѣ, або о святомъ Мартинѣ давати, а врядъ абы вжо за тые пѣнязи самъ подводы подъ послы годъ отъ году опатроваль: нижли иншіе нѣкоторые, не хотячи, подобно, на тотъ податокъ подводный зволити, и не кон-чавши тоѣ рѣчи, прочъ ся розѣхали. А такъ господарь его милость бачачи на то, ижъ боль-шая половина и преднѣйшая всихъ становъ великого князьства на таковой поборъ под-водный зволела ся и поступила, на томъ его милость то зоставити рачилъ: ижъ хто бы кольвекъ, якогжъ кольвекъ стану, духовного або свѣтского, мѣлъ и держалъ, зъ ласки предковъ его королевской милости, люди под-водные, тотъ каждый маеть отъ каждой служ-бы подводной давати до вряду, куды подвода бѣжитъ, по шести грошей на годъ, три на семую субботу, а три о святомъ Мартинѣ; а врядъ вже за тые пѣнязи подводы подъ гон-цы и подъ послы опатровати и давати пови-ненъ будетъ, абы ся справы господарскіе и земскіе не омѣшкивали.

9. Была тежъ обмова, ижъбы подводъ Ва-силишской и Волковийской была отмѣна въ

№ 12. Мостѣхъ, а подводъ зась Волковѣйской и Каменецкой абы была отмѣна въ Шерешовѣ; и о томъ его королевская милость маеть писати до королевое еѣ милости.

10. За чоломбѣемъ и за прозьбами княжатъ, пацятъ и шляхты, будетъ рачилъ его королевская милость мовити и на конецъ постановленѣе вчинити съ паны радами корунными, на теперешнемъ соймѣ Петриковскомъ, около вчиненя певныхъ вѣчныхъ границъ и около всихъ тыхъ кривдъ и шкодъ, которые имъ отъ пановъ Поляковъ дѣются: и естли бы такъ скоро границы вѣчны быти не могли, тогда будетъ рачилъ его королевская милость хотя до часу то застановити, абы до туль таковыя квалты, забойства, набѣды, пожоги, грабежи, забиранья земель не были, кгдажъ зъ ласки Божье, его королевская милость объма тыми паньствы самъ одинъ на сесь часть справуетъ и ими владѣть. И для того его королевской милости мають даны быти прозьбы обывателей великого князства, которые въ тыхъ же рѣчахъ къ отцу его королевской милости славноѣ памяти на остатнемъ соймѣ Берестейскомъ чинили; мають тежъ даны быти и тые отказы, которые на онъ часть на тые прозьбы имъ были учинены, абы его королевская милость, водлѣ тыхъ первыхъ и теперешнихъ прозьбъ, намову и постановленѣе о тыхъ рѣчахъ на томъ теперешнемъ соймѣ Петриковскомъ съ паны корунными учинити рачилъ.

11. И то тежъ на томъ же теперешнемъ вальномъ соймѣ Виленскомъ рачилъ его королевская милость съ паны радами своими установити и ухвалити, около выдаванья замужъ дѣвокъ, по смерти отцовъ ихъ осиротѣлыхъ: ижъ каждая вдова, оставши на вдовьемъ столыцы по мужу своемъ, не маеть дочокъ своихъ сама одна, своею волею, замужъ выдавати, алежъ съ волею и зъ вѣдомостью братьи роженной оныхъ дочокъ своихъ, лѣтъ до-рослыхъ. А естли бы оныя дѣвки братьи ро-

женой не мѣли, тогда вжо замужъ мають выдаваны быти зъ вѣдомостью и съ волею и съ порою братьи своею стрыечной, або иныхъ которыхъ близкихъ кровныхъ, прѣтелей отца ихъ по мечу. А естли бы, пакъ, близкихъ кровныхъ, прѣтелей отца ихъ по мечу не было: тогда мають быти выдаваны съ волею и съ порою вужъ роженныхъ и иныхъ близкихъ кровныхъ своихъ по матцѣ. А естли бы ся прѣтели кровные тоѣ дѣвки около того выдаванья зъ маткою еѣ не згожали, тогда мають объ-дѣе сторонѣ, то есть, и matka и близкіе оной дѣвки очивисто стати передъ самымъ господаремъ его милостью, а въ небытности его милости въ тутошнемъ паньствѣ, ино передъ паны радами, або передъ воеводами своими повѣтовыми, и мають повѣдѣти зъ obu сторонѣ слушныя причины, для чого тую дѣвку замужъ дать, або не дать не хочуть; а господарь его милость, або панове рада, або панове воеводы повѣтовые на онъ часть мають розузнати, хто зъ нихъ, естли matka, або тые близкіе прѣтели тоѣ дѣвки слушнѣйшіе причины къ выданью еѣ замужъ повѣдѣть: тогда, за слушнѣйшою порою оныхъ прѣтелей або матки своею, тая дѣвка маеть замужъ выдана быти.

Сии пять статей выписаны изъ Литовской Метрики (Публ. дѣлъ кв. IV, л. 36 — 71), хранящейся при Правительствующемъ Сенатѣ, въ С. Петербургѣ.

12. — 1553 Февраля 28. Судная грамота Полоцкаго архіепископа Германа, о предоставленіи Витебской игуменьи Маріамнѣ имущества, по духовной ея мужа.

Милостью Божьею и пречистой его Матере, мы Германъ Хребтовичъ, архіепископъ владыка Полоцкій, Витебскій и Мстиславскій, а при насъ въ тотъ часъ были духовныи наши: архимандритъ Петровскій Іона, игумень Пятницкій Кондратій, игумень Вознесенскій Оерапонтъ, и крымошане соборной

церкви Премудрости Божьей святой Софіи, и священники, Стрътенскій Ларіонъ, Козмодемьянскій Григорей, Рождественскій Семіонъ, Троецкій Петръ, Благовѣщенскій Семіонъ, Дмитровскій Андрей, и бояре господарскіи земли Полоцкой, князь Михайло Соколенскій, и панъ Иванъ Володковичъ, и панъ Иванъ Стрижевскій, и панъ Матеей Николаевичъ дворянинъ господарскій, смотрѣли есмо того дѣла. Стояли передъ нами очивисто, жаловала намъ игуменья монастыря Пречистенского Витебского, именемъ Мариміана, на священника Пятницкого Витебского Іосифа Жижчика, тымъ обычаемъ: «ижъ кгда дей мужъ мой, братъ его роженный Левонъ Жижчикъ, будучи немочонъ и ожидаючи смертного часу на себе, а хотѣчи мнѣ по животъ своемъ отписати, яко на имѣнни, и въ поляхъ оромыхъ, и въ сѣножатехъ, и въ селѣ Кудриничахъ, яко въ отчизнѣ, такъ въ купли, и въ шатахъ, и въ статку домовомъ, и во всякой рухомой рѣчи третью часть, — просилъ до себе священника Духовского Витебского Іосифа и при немъ иныхъ людей добрыхъ; якожъ тотъ священникъ зъ людьми добрыми, за желаньемъ небожника мужа моего, къ нему пришли, а такъ небожикъ мужъ мой просилъ того священника Духовского о написаньи духовниці. И тотъ священникъ, за прозбою небожника мужа моего, духовницу предъ людьми добрыми справилъ, въ которой духовниці мужъ мой небожикъ третью часть, яко на имѣнни, такъ въ земляхъ отчизныхъ и купленныхъ, и въ сѣножатехъ, и въ селѣ Кудриничахъ, и въ статку домовомъ, и въ рѣчахъ рухомыхъ, мнѣ былъ на вѣчность отписалъ: то, пакъ, дей тотъ священникъ Пятницкій Іосифъ, братъ мужа моего роженный, дѣверъ мой, пришедши, нѣтъ вѣдома въ который способъ, взявши зъ рукъ у того священника Духовского Іосифа духовницу изодралъ. Якожъ дей небожикъ мужъ мой Левонъ, предъся хотѣчи мене по смерти своей при той третьей части земли и статковъ

домовыхъ оставить еще за доброй памяти № 12. своею, просилъ тогожъ священника Духовского Іосифа, ижбы онъ водлугъ первой жъ духовниці другую духовницу справилъ. И тотъ дей священникъ Пятницкій, дѣверъ мой, заручилъ ему подъ десятма рублями грошей на его милость отца владыку Полоцкого, шобы другой духовниці не писалъ (и тотъ дей священникъ Духовскій, за зарученьемъ его, другой духовниці не писалъ); а то дей все, што было въ первой духовниці ознаймено, яко на имѣнни, такъ и въ поляхъ отчизныхъ и купленныхъ, и въ селѣ Кудриничахъ, и въ шатахъ, и въ рухомыхъ рѣчахъ третью часть отнялъ, и теперь то на себе держитъ, а мнѣ того дати и поступити не хочеть.» — Онъ напротивку жалобы еѣ отпоръ чинилъ, тымъ обычаемъ: «што дей мужъ еѣ, а братъ мой небожикъ, сходячи съ сего свѣта отписалъ, и што ей на духовниці своей ознаймилъ, тую дей духовницу она у себе и теперь маеть.» Она повѣдила: «ачъ-колекъ дей я духовницу маю, а ты дей тую духовницу яко хотѣлъ, такъ и писалъ, а въ тотъ дей часть уже мужъ мой не говорилъ.» — «А што ся дей дотычетъ на имѣнни и въ поляхъ третью часть, то дей сынъ мой Тарасъ, за записомъ еѣ и за листомъ судовымъ его милости пана Станислава Кишки, воеводы Витебского, держитъ.» Она къ тому повѣдила: «я дей своею третью часть не продавала, а нижъ запису ему никоторого на себе не давала; и кгда дей я мѣла о томъ право съ сыномъ твоимъ Тарасомъ предъ его милостью паномъ воеводою Витебскимъ паномъ Станиславомъ Кишкою, и ты дей по сыну своему свѣтчилъ, якобы я мѣла сыну твоему свою третью часть продать и листомъ моимъ записать, въ которомъ же дей листъ въ купчомъ твоя печать была приложена; и его дей милость панъ воевода, за несправедливымъ свѣдѣтельствомъ твоимъ, сына твоего Тараса при той моей третьей части оставилъ; а я дей тоѣ заручила была на его милость ар-

№ 12. хієпископа владыку Полоцкого, подъ десятма рублями грошей, предъ вридикомъ его милости Витебскимъ Богданомъ Романовичомъ, штобы дей ты безъ благословенья и вѣдомости его милости, а зваща по своемъ сынъ предъ его милостью паномъ воеводою не свѣтчилъ: и ты дей, не дбаючи о заруку его милости, предъся свѣдѣтельство чинилъ.» И кгдажъ тотъ попъ Пятницкій Іосифъ, за жалобою тоѣ старицы, за дѣцкимъ нашимъ передъ нами былъ поставленъ, и на онъ часть тотъ сынъ его Тарасъ при отцы своемъ у насъ былъ, и листъ купчій и тежъ листъ судовый его милости пана воеводы Витебского передъ нами вказывалъ, якожъ въ листъ купчомъ печать того священника Пятницкого есть. — Мы тежъ, не нарушиваючи ничимъ суда его милости пана Станислава Кишки, воеводы Витебского, сына его при той земли, купчанинъ его, zostавили. А ижъ его милость панъ воевода Витебскій на листъ судовомъ той старицѣ право съ тыми свѣтками заховати рачилъ, она тежъ съ нимъ, яко съ свѣткомъ своимъ, о свѣдѣство и о содранье духовниці и о рухомые рѣчи передъ нами мовила, и тую духовницу, которую уже дей по преставленьи мужа еѣ справовано, передъ нами поклала: мы тежъ обачивши неслухное справленье оноѣ духовниці, и въ томъ порозумѣнье взявши и обмову съ духовными нашими вчинивши, пытали есмо того попа Пятницкого Іосифа: для котороѣ причины онъ духовницу вырвавши зъ рукъ попа Духовского Іосифа содралъ? онъ ся къ тому не зналъ, ижбы духовницу у того попа вырвати и содрати мѣлъ. Она доводячи того, ставила шапку до того попа Духовского Витебского Іосифа, который дей за прозбою небожчика мужа еѣ тую духовницу писалъ, которую онъ вырвавши изодралъ; онъ до того священника шапку приставилъ. Мы до того священника Духовского, на опытанье, послали коморника нашего Ивана Войсецкого; и тотъ коморникъ нашъ, будучи тамъ и опытавши того

священника передъ людьми добрыми, свѣдѣство оноѣ попа передъ нами отказалъ, тымъ обычаемъ: «ижъ кгда дей мужъ еѣ небожчикъ Левонъ Жижчикъ, будучи въ великой хворобѣ, просилъ дей мене до себе, и я дей, за прозбою его, къ нему пришолъ (и на онъ же дей часть немало при немъ людей добрыхъ было); и жедалъ дей онъ мене, ижбыхъ я ему духовницу написалъ; и я дей за жедаьемъ его написалъ былъ духовницу, въ которой третью часть земли своей, къ тому шаты и иншія рѣчи жонѣ своей отписалъ: то пакъ дей тотъ священникъ Пятницкій Іосифъ, дѣверъ еѣ, пришедши до мене, тую духовницу зъ рукъ моихъ вырвалъ и содралъ; а такъ дей онъ повторнѣ просилъ мене, абыхъ я духовницу въ тосжъ слово написалъ; и я дей хотѣлъ былъ и другую духовницу писать, ино тотъ же дей попъ Пятницкій Іосифъ заручилъ мнѣ на его милость архієпископа владыку Полоцкого подъ десятма рублями грошей, штобы я другой духовницы не писалъ; и я дей за онымъ зарученьемъ его, другой духовницы не писалъ.» — Мы тежъ, водлугъ сознанья того священника Духовского Іосифа, до которого ся самъ тотъ священникъ Пятницкій добровольнѣ слалъ, знашли есмо священника Пятницкого Іосифа, дѣверя еѣ, въ томъ винного, и пытали есмо ее: чи много она за содраньемъ той духовницы собѣ отъ него шкодуетъ? она реистръ шкодъ своихъ списавши передъ нами положила, въ которомъ реистрѣ такъ стоитъ: «напервѣй, въ имѣньи небожчика мужа моего въ Кудриничахъ, и въ поляхъ отчизныхъ и купленыхъ, въ сѣножатехъ, въ крамахъ, третью часть мнѣ отписалъ, къ тому статковъ домовыхъ: котелъ великій пивный, за который дано рубль грошей; кожухъ лисей, ножковый, лунскимъ зеленымъ сукномъ крытъ, который стоялъ двухъ копъ грошей; рукомыя мѣденая, за которую дано полкопы грошей; на жонцѣ Агренницы, которая дей жонка и теперь у него есть, полторы копы грошей ши-

рокихъ; на Тарасъ, который дей мѣшкаетъ на Слободѣ, пятьдесятъ грошей широкихъ; семеро коней, за одного дей дано шесть копъ грошей широкихъ, а за другого полтора рубля грошей широкихъ же, а тыи пятеро коней постановили есмо по полтинѣ грошей; а быдла рогатого десятеро, то есмо постановили по полкопы грошей; котловъ малыхъ пять, то есмо осумовали по пяти грошей; крама, которая дей стоитъ напротивку храму святоѣ Пятницы, а въ той дей крамѣ такъ было много рѣчей, якобы за десять копъ грошей товару; панцырь, который дей стоялъ копы грошей; а моихъ дей властныхъ приносныхъ пѣнязей десять копъ грошей широкихъ, того всего на суммѣ оказалось яко сорокъ и шесть копъ и пять грошей.» И на томъ тая старица бралася къ присязѣ, хотячи того сумнѣьемъ своимъ доправити, ижъ такъ мнѣго ей на томъ тестаментѣ было отписано, яко она на списку передъ нами оказала. Священникъ тежъ Пятницкій Іосифъ самъ ее къ присязѣ пустилъ. Мы ей рокъ присязѣ зложили, третій день, въ пятницу. Кгда рокъ присязѣ зложонъ пятница припалъ, тая игуменья Витебская Мариміяна стала и на томъ на всемъ присягу вчинити была готова: нижи священникъ Пятницкій, не ведучи ее къ присязѣ, самъ добровольнѣ тую исчую игуменью передналъ, и на ономъ еднанью такъ съ нею постановилъ, ижъ онъ маеть, освободивши самъ, своимъ грошомъ, у сына своего Тараса третью часть земли и сѣножатей отчизныхъ и купленыхъ небожчика мужа еѣ, и тежъ часть третью въ селѣ Кудриничахъ, и въ томъ дому што въ мѣстѣ Витебскомъ маеть, и въ крамѣхъ и во всякихъ иныхъ рѣчахъ, и въ земляхъ оромыхъ и неоромыхъ, што ей небожчикъ мужъ еѣ отписалъ, отъ сего дня пятницы, мѣсяца Февраля 24 дня, у пятницу жъ, у вилю Благовѣщенія Пречистоѣ, за чотыри недѣли, ей поступити, на вѣчное держанье, ей самой и еѣ потомкамъ; а за шкоды и на-

клады вси передналъ ее трема копами грошей, личбы и монеты широкой, которые пѣнези на тотъ же рокъ ей заплатити маеть; а естлибы готовыхъ пѣнезей не могъ мѣти, тогды на тотъ же рокъ и тые двѣ части дому того, который есть въ мѣстѣ Витебскомъ, до заплаты тыхъ пѣнезей, маеть ей въ держанье подати. А кгда бы онъ на тотъ рокъ тоѣ третьей части землѣ и сѣножатей и въ иншихъ рѣчахъ, яко есть выше описано, отъ сына своего не освободилъ и ей не поступилъ, або въ тыхъ трехъ копахъ грошей тыхъ двухъ частей дому Витебского держати ей не давалъ: тогды, вжо тое еднанье не маеть еднаньемъ быти, але повиненъ будетъ, окромѣ жадного права и присяги, тую прежреченую сумму пѣнезей, што ся съ права ознаймилъ, сорокъ и шесть копъ и пять грошей ей заплатити, къ чому самъ тотъ священникъ Пятницкій призволилъ, и мають вѣчпѣ тые угоды свои на обѣ сторонѣ держати. И то есмо въ книги записати велѣли, и выпишь съ книгъ, подъ печатью нашою, той старицѣ игуменѣ монастыря Пречистенского Витебского Мареміянѣ дали. Писанъ у Полоцку, подъ лѣто Божьего нароженья 1553, мѣсяца Февраля 28 дня.

Подлинникъ писанъ на двухъ вѣпстѣхъ сшитыхъ листахъ, въ тетради, современной скорописью, безъ строчныхъ знаковъ. Внизу акта подписано крупнымъ уставнымъ почеркомъ, вязью: Волею Божьєю Германъ, архієпископъ владыка Полоцкій, Витебскій и Мстиславскій. Печать подъ кустодією, съ изображеніемъ фамильнаго его герба и архієрейскихъ регалій, и съ круговою надписью, заключающею въ себѣ вышеозначенный титулъ. На оберткѣ, позднѣйшимъ почеркомъ надписано: Dekret X. Germana, archiepiscopa Połockiego, w sprawie ihumeniey Przeczyszczeńskiej Witebskiej. Ветхъ.

Изъ архива Полоцкой Духовной Консistorii.

№ 13. 13. — 1554. Уставы данные Литве и областям Жмудьской и Волынской, на третьемъ Виленскомъ сеймѣ.

Ухвала и постановление съ сойму вального Виленского, на день святого Мартина справовано, лѣта Божьего нароженя 1554.

I.—*Артикулы 1. Прозьба.* Што просили есте господаря короля его милости, абы привилыя и вольности земскіе, отъ предковъ его королевской милости и отъ самого господаря его милости вамъ наданные, у статутъ слово отъ слова вписаны были, на што смотрѣчи ижбы есте охотнѣйшими слугами господарю его милости и смѣлѣйшого сердца противъ непріятеля могли быти: кгдажъ кождый съ прироженя виненъ есть вольности своее боронити.

Отказъ. На то его королевская милость казалъ вамъ повѣдѣти, ижъ того, што коли подданнымъ своимъ зъ ласки и зъ доброты своее господарскоу рачитъ его милость удѣляти и давати, не звыкъ его милость никому зменьшати и уймовати: бо то добръ памятовати можете, ижъ его милость, на початку панования своего въ томъ отчизномъ панствѣ великомъ князствѣ, на первомъ соймѣ вальномъ, вси привилыя и вольности, отъ предковъ его королевской милости вашимъ предкомъ наданные, привилемъ своимъ господарскимъ подтвердити рачилъ; и опослѣ того, на другомъ соймѣ также вальномъ, причинивши нѣкоторые артикулы вамъ пожиточные, рачилъ его милость вси таковыя вольности ваши другимъ привилемъ своимъ господарскимъ знову подтвердити; и вси тые вольности ваши даны въ захованье до пановъ радъ ихъ милости, которые заровно тыхъ вольностей зъ вами уживають, и потребують сами и на потомство свое. И кгдажъ то зъ самое добротливости и зъ ласки его милости господарской вамъ учинено, слушнѣ маєте быти охотни къ службамъ его королевской милости. А вѣдѣже и той прозьбы вашей не рачилъ бы его королевская милость въ рѣчи слушной дарем-

нѣ онустити, кгда бы статутъ вже доконанъ былъ: нижли жъ статутъ до конца еще не справленъ (яко есте и сами далѣй въ прозбахъ своихъ около того статуту доложили), который кгда достаточнѣ справится, на онъ часть его королевская милость и тую нынѣшнюю вашу прозбу на ласкавомъ баченью мѣти, и што слушного видѣти ся его милости будетъ, учинити рачитъ; а въ томъ частъ, завжды, коли слушная потреба будетъ къ оказанью вамъ тыхъ вольностей вашихъ, отъ ихъ милости пановъ радъ будутъ вамъ оказаны.

2. *Прозьба.* Припоминаете тежъ его королевской милости, што перво сего, зъ ласки его милости господарской, показываны вамъ были вольности ваши, на которыхъ обачили есте вызволенье васъ самыхъ и подданныхъ вашихъ, отъ предковъ его королевской милости славной памяти господарей, отъ даваня серебшизнъ, и отъ всякихъ службъ, и подачокъ, и подводъ; надъ которые вольности, мѣните собѣ обтяженье въ бранью частомъ серебшизнѣ, ачъ съ позволеньемъ вашимъ, на потребности рѣчи посполитовъ, але ижъ пожитку въ рѣчи посполитой съ того не бачите; а особливо не занѣхали есте доложити въ прозбахъ вашихъ о постановенье копъ, не на вальномъ соймѣ, зланиа зъ васъ самыхъ, а не съ подданныхъ вашихъ, которые якимъ обычаемъ браны отъ дѣцкихъ або отъ правчихъ, припомянувши, бѣете чоломъ его королевской милости о опатренье листомъ его милости господарскимъ, якобы впередъ того не было, а што взято, абы на потребности рѣчи посполитовъ было обернуто. *Отказъ.* Его королевская милость казалъ вамъ на то повѣдѣти, ижъ то маєтъ его милость на доброй бачности своей господарской, яко привилыя отъ предковъ его милости славной памяти господарей и вже отъ самого его королевской милости наданные опѣввають вольности ваши: ино не бачитъ его королевская милость, ижбы ся што вамъ надъ тые вольности

ваши дѣяло альбо уближило: бо которые податки давали есте за шастливого панования его королевской милости, то есте чинили и сами жъ устанавливали для потребности рѣчи посполитовъ, якожъ и постановенье копъ на потребу земскую не зъ васъ самыхъ, але съ подданныхъ вашихъ ухвалено, а то такъ маєте розумѣти: хто виненъ зъ имѣнья и подданныхъ своихъ ставити конь, за то мѣлъ дати копу грошей, абы самъ не вѣхалъ на службу. А тежъ къ таковому постановенью и ухвалъ вси тые вриадники, которые къ сойму належать, вызваны были, и при панахъ радахъ ихъ милости сами есте постановили. А не на жадную потребу господарскую то учинено: бо не только абы его королевская милость тые податки къ скарбу своему привлащати мѣлъ, але еще и съ подданныхъ имѣній своихъ господарскихъ рачилъ его милость таковой же податокъ и платъ, яко и зъ вашихъ подданныхъ, уставити, и также на служебныхъ обернути, чого не бывало въ обычаи николи: одно то зъ самое ласки своее господарской учинити его милость рачилъ, сфолькгованье чинячи вамъ, абы есте не обтяжали вашихъ подданныхъ большими податки на потребности земскіе. И то можете сами обачити, есть ли которого зъ васъ серебшизна такій платъ вынесла, яко съ подданныхъ дворовъ господарскихъ и пановъ радъ? чого его милость господарь и панове рады не литовали, для обороны панства того и васъ всихъ подданныхъ его милости, которыми яко милостиве пануетъ, такъ бы тежъ радъ завжды ихъ во упокои видѣти и заховати, и, Боже дай, абы есте николи на таковыя податки не складалися, зычитъ того его королевская милость вамъ и тому панству отчизному своему. А ижъ не принужены есте къ даванью податковъ на потребности его королевской милости самого: про то не бачитъ его милость причины, для чого бы то надъ привилей земскій поновлено быти мѣло другимъ листомъ, што ся привилемъ достаточнѣ обва-

ровано и николи не рушено. А ижъ припоминаете отправу зъ дѣцкованьемъ таковыхъ податковъ, въ томъ каждый зъ васъ нехай себе доткнетъ: яко дбалъ въ томъ заховалъ ся, и естли на часъ назначонный до бирчихъ отдавалъ таковыя податки? якожъ многіе еще и до сего часу ихъ не отдали, за чимъ олижъ зъ властного скарбу его королевской милости опатроно потребу рѣчи посполитовъ, платячи людемъ служебнымъ за службу ихъ, которые служили на Подольи, братья и сынове ваши. За которою небалостью въ отдаваньи, и бирчье, о которыхъ есте господаря просили, на томъ трвати не хотѣли и то съ себе зложили. А вѣдѣже, гдѣ ся тые податки обернули, лачно то вамъ показано быти можетъ.

3. *Прозьба.* Далѣй просите его королевской милости, абы судьи въ каждомъ хоружствѣ уставлены были и писарь присяглый, обираючи ихъ водѣ звычайю Подляшской земли, которые ижбы судили каждого стану особу одинако, хто бы въ которомъ хоружствѣ имѣнья мѣлъ, прекладаючи въ томъ обтяженье шляхтъ, ижъ пановъ радъ олижъ на роки судовые позывати на прошлыхъ соймѣхъ ухвалено, мимо статутъ перводанный, въ которомъ то описано, штожъ вси у великомъ князствѣ однимъ правомъ сужоны мають быти; а особно просите о вижы присяжные, абы на каждомъ урядѣ уставлены были для справъ вашихъ. *Отказъ.* На то его королевская милость казалъ вамъ повѣдѣти, ижъ отъ выданя статуту черезъ отца его милости, славной памяти Жикгимонта короля и великого князя, на каждомъ соймѣ о таковыхъ правныхъ потребахъ змѣнки чините; а што коли на соймѣ постановлено около справедливости, то зъ ухвалы и прозьбъ васъ всихъ, якожъ вже и на поправленье статуту высажоны суть особы менованые: которые кгда то постановятъ, на што суть обраны, его королевская милость съ ихъ милостью паны рада-ми въ тую справу ихъ вглянути, и што ся

№ 13. слушного къ ладнѣйшой отправѣ справедливости вашей видѣти будетъ, то его милость ухвалити рачитъ; а до того часу будете ся справовати по тому, яко на прошломъ соймѣ ухвалено и постановлено около судей и вижовъ присяжныхъ. И маеть за то его королевская милость, ижъ бы есте могли перестати на той ухвалѣ прошлого сойму, кгда бы есте въ то пыльнѣ вглянули, и таковыя ухвалы соймовые съ канцелярии пристойнѣ абы есте брали и до братьи вашею относили. Якожъ маеть его королевская милость того справу отъ пановъ воеводъ, ижъ на которыхъ мѣстцахъ ново суды (*) засадили, тамъ ся не справуютъ, снать, о такихъ ухвалахъ отъ васъ братья ваша не вѣдаютъ. А вѣдѣже естли бы водлѣ потребы, въ которыхъ повѣтъхъ, на мѣстцахъ меновитыхъ, таковымъ судомъ мѣстца не засажоны: его королевская милость хочеть розказати паномъ воеводамъ, абы то осмотрѣли, и вряду судового, также и вижовъ каждый у своемъ повѣтъ причинили; до чого маете сами дбалѣ причинитися, и, обравши вижовъ, вѣры годныхъ, паномъ воеводамъ оповѣдити, а ихъ милость таковыхъ на то уставятъ. А што ся дотычетъ судей, которые вже черезъ пановъ воеводъ уставлены, и напередъ гдѣ потреба будетъ уставити судей, хочеть его королевская милость листомъ своимъ господарскимъ подтвердить на таковыя судьи. Пакъ ли бы есте тежъ иное постановление около таковыхъ судей мѣти хотѣли, нижли на прошломъ соймѣ ухвалено, и о томъ будете припоминать его королевской милости: кгда ся статутъ водлѣ потребы справитъ, его королевская милость въ рѣчахъ слушныхъ прозьбамъ вашимъ мѣстцо дати рачитъ, якожъ завжды звикъ отъ подданныхъ своихъ прозьбы милостиве пріймовати. А вѣдѣже и на тотъ часъ, опатруючи то, ижъбы шляхтъ съ паномъ радою не дѣялося предлуженье въ

справедливости, и сами ихъ милость панове рады, того стерегучи, въ то ся поддали (не хотячи отволоки чинити въ справѣ), абы при бытности господарьской, за комисею его королевской милости, всихъ становъ, хто не есть повѣтникомъ, позывалъ шляхтичъ передъ двухъ особъ пановъ радъ ихъ милость, на чотыри недѣли; а въ небытности господаря, ино передъ пановъ радъ ихъ милость позвы позыватися на таковой же рокъ, на чотыри недѣли; а не будетъ ли всихъ ихъ милости на одномъ мѣстцы судовомъ: ино также двѣ особы зъ ихъ милости пановъ радъ, которые на одно мѣстцо судовое зъѣдутся, мають судити и позвы давати, яко и вси ихъ милость, и одинакимъ правомъ каждому съ подданныхъ господарьскихъ стану шляхетского будутъ справедливость чинити. А съ такового позванья и зъ року не мають ся выдмывати и панове рады и вси станы, которые повѣту не прислухають. А къ тому еще рачитъ его королевская милость складати двои роки судовые, то есть, на семую субботу и на день святого Мартина; и на тые роки передъ господаря его милость, а въ небытности господаря передъ пановъ радъ ихъ милость позывати и судитися будутъ, доводячи права и справедливости своею: вѣдѣже и тое постановление до поправленья статуту и до другого сойму маеть трвати.

4. *Прозьба.* Далѣй били есте чоломъ господарю его милости, абы на листы привилья, которые съ канцелярии его королевской милости выходятъ, также и на листы врядовыя устава была дана. *Отказъ.* Его королевская милость казалъ вамъ повѣдити, ижъ на прошломъ соймѣ и около того вжо есть немало постановлено, водлѣ которого постановленья будете ся справовати, до того часу, покуль достаточнѣ статутомъ то ся осмотритъ и водлѣ потребы постановитъ.

5. *Прозьба.* За тымъ просите и чоломъ бѣте

(*) Въ подл. по ошибкѣ, «суть.»

господарю его милости, абы на Подляшѣ и на Волинѣ имѣній не куповали чужоземцы, а ни жадными причинами не посядали имѣній, кгдажъ тымъ немало панства великого князства убываетъ, яко есте припоманули нѣкоторые повѣты; и просите, абы въ томъ привильямъ земскимъ нарушенья не дѣялося, кгдажъ только родичомъ и обывателямъ того панства вольности привильевъ оныхъ служать. *Отказъ.* Тую прозбу вашу его королевская милость за слушную принявши, рачитъ такъ застановляти, ижъ вже отъ того часу, во всемъ великомъ князствѣ Литовскомъ, ни хто иный не маеть и не можетъ куповати, а некоторымъ инымъ обычаемъ посядати имѣнья шляхетского и всякого кгрунту лежащего на вѣчность, кромѣ заставы: одно родичъ и обыватель великого князства тую вольность маеть мѣти, купити и инымъ обычаемъ, побожнѣ, вѣчности имѣнья лежащего добыти, водлѣ права заховаячися; а вѣдѣже, при границахъ, и заставою граничный чоловѣкъ не маеть, а ни можетъ имѣнья и всякого кгрунту земельного держати и набывати, кромѣ родичовъ и обывателей великого князства, абы ся не нарушили ничимъ привилья земскіе, присягою его милости господарскою утвержонные.

6. *Прозьба.* Въ тыхъ же прозьбахъ вашихъ пишете, ижъ познали есте немалый упадъ того панства, и то въ томъ, ижъ нѣкоторые паньи вдовы, зоставши по мужохъ своихъ на имѣньяхъ у вѣнъ записанныхъ, замужъ за чужоземцовъ людей заграничныхъ идуть, имѣнья утрачаючи, и отдаляютъ отъ близкихъ и отъ дѣтей своихъ, записуючи подъ обычаемъ заставы: за чимъ близкіе, або дѣти ихъ, окупуючи таковыя имѣнья къ убожеству и знищенню приходять, — и просите его королевской милости, абы таковая каждая вдова, которая за чоловѣка заграничного пошла, або пойдетъ, половицы внесеня своего отпадывала, а до вѣна своего ничего не мѣла; а естлибы кото-

рая имѣнья свое отчизное и материзное мѣла № 13. и записала такому мужу своему, обычаемъ заставнымъ, въ суммѣ, альбо яко-когда-векъ: ижъбы таковыя записы не шли, а ни жаднои моцы не мѣли, але ижъбы близкіе каждую службу людей ихъ по пяти копъ грошей скуповали, лѣсовъ, боровъ, водъ и лововъ не шацуючи. А дѣвки которые суть и будутъ черезъ отцовъ и братью и стрывѣвъ за границу зъ великого князства замужъ выдаваны, абы имѣнья ихъ тымъ же обычаемъ черезъ близкихъ были скупованы; а вѣдѣже не тые близкіе, которые тое малженство имѣднати и выдавати за границу замужъ ихъ будутъ для пожитовъ своихъ, але иные близкіе кровные, безъ которыхъ бы воли то ся стало; а пакъ ли бы близкіе такъ можные не были, тогды сусѣди при тыхъ имѣньяхъ не далекіе; а трафитъ ли ся имѣнье великое, ижъбы за короткій часъ пѣнезей такъ близкіе яко и сусѣди не могли заплатити: просите, абы вольно было имъ по части имѣнья и по рокомъ скуповати. *Отказъ.* Тую прозбу вашу его королевская милость на томъ застановляти рачитъ, яко въ статутъ есть описано, около выкупованья имѣній у дѣвокъ, за границу съ великого князства выдаваемыхъ. Такъ же и вдовы которые замужъ за границу съ великого князства пойдуть, имѣнья ихъ мають быти отъ близкихъ скупованы шацункомъ, за отчизные и материзные службы людей по десять копъ грошей платячи, тежъ лѣсы, земли и воды, съ чого пожитокъ есть, также слушнымъ шацункомъ шацуючи зъ урядомъ. А вѣдѣже съ права альбо съ уряду мають быти роки складаны тымъ, хто не будетъ възмочи заразомъ суммы отдати за все имѣнье, абы по року пѣнязи платилъ и по части скуповалъ, што възможеть: але вѣно и оправа вдовъ въ таковыя роки не маеть быти вкладана.

7. *Прозьба.* При томъ докладаете въ прозьбахъ своихъ отъ все шляхты и рыцества,

№ 13. ижъ есте убачили и въ томъ нѣкоторый упадъ, штожъ многіе пани вдовы, розными обычаими, отъ дѣтей, братьи, близкихъ кровныхъ своихъ, духовнымъ имѣнья занисують; за чимъ близкихъ ихъ дома пустуютъ таковыя имѣнья окупуючи, и тымъ ся неможность дѣетъ къ службамъ его королевской милости: для того просите, абы таковыя листы хотя бы и вышли, нѣкоторой моцы у права не мѣли. *Отказъ.* На то его королевская милость казалъ вамъ повѣдѣти, ижъ вольности отъ предковъ его королевскоѣ милости наданой и отъ его милости самого упривылеваной, не звыкъ и не рачить его милость уймвати никому, але каждый вольностью своею воленъ шафовати, подлѣ воли своеѣ; а вѣдьже есть на то статутъ, хто маєть моцъ чимъ шафовати, а хто тежъ не маєть; водлѣ которого и будете ся заховати въ той рѣчи и прозьбѣ вашей.

8. *Прозьба.* Просите тежъ его королевской милости, абы для судовъ Подляшскихъ референдары при дворѣ его милости господарьскомъ были тутошнего панства родичи и добръ ослѣые. *Отказъ.* На то его королевская милость казалъ вамъ повѣдѣти, ижъ двухъ особъ, родичовъ того панства, къ таковымъ судомъ Подляшскимъ присадити его милость рачилъ розказати.

9. *Прозьба.* Еще просите его королевской милости, абы товары лѣсные зъ имѣній вашихъ, и тежъ збожья вольно и безмытнѣ были пропущаны, для споможенья шляхты къ службѣ военной и оборонѣ земской, такъ же и на гребляхъ подужное и на мостѣхъ мостовое абы не было брано. *Отказъ.* Што ся дотычетъ мытъ отъ збожья и отъ товаровъ лѣсныхъ, то его королевская милость заховывать рачить водлѣ давного обычая. Штожъ есте указали о то до вольностей своихъ, которые панове рады оглѣдали, ино не есте съ того вызволены; а вѣдьже его королевская милость хочетъ вамъ узычити, товары лѣсные пропускати черезъ коморы свои господарскіе

(а те по маломъ часѣ будетъ ознаймѣно листы господарьскими): которые спущаючи и заплативши мыто звычайное, будутъ повинны служебники ваши присягу учинити, ижъ не въ наемной, але въ своей пуши, и самъ своимъ накладомъ панъ тые товары робилъ. А около гребельного и мостового мають ся заховати по давному; и кому тая вольность не дана, тотъ не маєть тымъ людей перезажихъ утискати.

10. *Прозьба.* Тежъ чоломъ бѣете господарю его милости, абы рачилъ вызволити шляхту отъ стацій и подводъ, докладаючи, ижъ то было у стародавнемъ обычаи и въ привиліи вольностей земскихъ описано: кгда кому зъ ласки предковъ его королевской милости и зъ ласки его милости самого, имѣнья бывають даваны, тогды ничего его королевская милость на себе зоставляти не рачить. *Отказъ.* То его королевская милость съ паны радами ихъ милостью розважати рачить, ижъ подводы и стацей не естъ пожитокъ скарбу его королевской милости, але особливый пожитокъ и потреба рѣчи посполитовъ, што никому не можетъ быти отдано: и для того его королевская милость тую прозьбу вашу рачить застановляти водлѣ постановенья и ухвалы прошлаго сойму; а то маєте такъ розумѣти, и вже отъ того часу ничимъ ся не вымываячи полнити: хто-кольвекъ и якимъ же правомъ держитъ люди и земли, съ которыхъ подводы и стацей передъ тымъ даваны, мають вже отъ того часу той повинности досыть чинити, або пѣнезми по шести грошей съ службы до вряду давати на подводы, на тые роки, то есть, на семую суботу три грошы, а о святомъ Мартинѣ другую три грошы. А вѣдьже которые кому люди отъ столу его королевской милости даны, а передъ тымъ, кгда на господаря его милость были держаны, тою повинностью не были обовязаны: съ таковыхъ людей тотъ и теперь не повиненъ подводъ носити и стацей давати.

11. *Прозьба.* Еще просите его королевской

милости о уходъ старолавныя въ пушахъ его милости, абы вамъ самымъ и подданнымъ вашимъ не были заборонены, до дерева бортого, и озеръ, и ѣзовъ на рѣкахъ, и сѣножатей, чого, мѣните, нѣкоторые державцы и лѣсничіе для своихъ пожитковъ не допускають. *Отказъ.* На то его королевская милость казалъ вамъ повѣдѣти, ижъ не естъ воля его королевской милости, абы не мѣли есте властности своеѣ уживати въ пушахъ его милости господарьскихъ; а вѣдьже хто здавна чого уживалъ, не за подарки альбо за поклонны отъ врядниковъ, одно за слушнымъ правомъ своимъ дѣдичнымъ альбо зъ выслуги... которымъ не можетъ служити таковое право... (*) только безъ шкоды пуши и ловомъ: але посредку оступовъ никто сѣножатеи мѣти не могъ, яко и теперъ мѣти не могутъ, кромѣ водъ и дерева бортого. Але на иныхъ мѣстцахъ въ пушахъ и до сѣножатеи роскажетъ его королевская милость не забороняти вамъ уходовъ звѣчныхъ: вѣдьже на часы слушные маєте уходити и всылати до пущъ господарьскихъ, до водъ, до бортей и до сѣножатеи, што и листы его милости будетъ ознаймѣно врядникомъ пущъ его милости господарьскихъ.

12. *Прозьба.* Докладаете тежъ въ прозьбахъ своихъ, съ похваленьемъ то у себе маючи, ижъ его королевская милость о розмноженью скарбу своего господарьского обмысляючи, рачилъ въ замкахъ и дворѣхъ своихъ помѣру волокъ постановити, и черезъ мѣрчихъ, потомъ черезъ ревизоровъ то справовати: которые ижъ ся не водлѣ росказанья и листовъ его королевской милости заховавши, многіе кривды и утисненья шляхтѣ чинили, и, беручи земли ваши въ помѣру, отъ каждого моркгу брали отъ васъ по грошу (што чинитъ зъ одной волоки по полуконю грошей), а отъ каждого копца по дванадцати грошей; и надъ то еще, поки отмѣну дали, добръ то есте имъ

оплачивали, а инымъ еще и до того часу № 13. отмѣна не дана; и въ томъ шкodu и немалое знищенье отъ таковыхъ ревизоровъ собѣ были мѣните, зважа, хто не мѣлъ чого дати, тыхъ имѣнья они у волоки помѣрили, — и о томъ его королевской милости бѣетъ чоломъ, штобы повстягнены были таковыя ревизоры; а инѣбы напередъ чужоземцы не были въ таковыя справы укладаны, для выношенья реистровъ съ панства. *Отказъ.* На то его королевская милость казалъ вамъ повѣдѣти, ижъ въ томъ тотъ, хто ся черезъ подарки докуповалъ и отъ моркговъ и отъ копцовъ на отмѣну даныкъ платилъ мѣрчимъ и ревизоромъ, не можетъ никого виновать, только самъ себе: кгдажъ того не было въ листѣхъ его королевской милости описано и мѣрчимъ таковая моцъ не дана, абы земли шляхетскіе помѣряли; одпо, гдѣ бы волоки земель господарьскихъ безъ кгрунтовъ вашихъ выполнитися не могли, за то отмѣну слушную, первый, нижли у кого взято будетъ, его королевская милость отдавати росказати рачилъ, и то на листѣ его королевской милости было значнѣ описано; а кгдажъ таковое росказанье господарское мѣли, могли бы ся своеѣ властности не докуповати. А вѣдьже такъ и на прошломъ соймѣ его королевская милость на таковыя прозьбы ваши отказать рачилъ, хотѣчи каждому справедливость чинити: съ таковыхъ мѣрчихъ и ревизоровъ кому будетъ вина дана, такъ и скарати, яко того, который ся смѣлъ важити надъ росказанье господарское; а можетъ ся тежъ въ томъ оказати и ушкоженье въ кгрунтѣхъ его королевской милости, для таковыхъ подарковъ. А гдѣ бы тежъ шляхетскіе имѣнья помѣрены, того у вѣдомости его королевская милость не маєть: але абы есте ознаймили, гдѣ и на которыхъ мѣстцахъ; въ томъ его королевская милость не хочетъ имъ обтяженья чинити. А вѣдьже такъ то маєте его королевской ми-

(*) Здѣсь недостаетъ полноты смысла.

№ 13. лости ознаямити, яко бы не-шляхты, слугъ путныхъ и панцерныхъ подъ одинакое право зъ собою есте не пріймовали. А ревизоры не всего великого князства могутъ вѣдомость мѣти: бо только господарскіе дворы мѣрены, и то не вси. А тежъ умѣтныхъ въ томъ обывателей великого князства его королевская милость минути не рачилъ, предложивши тую послугу на нихъ; и не только на таковую службу, але и на каждую послугу его милости господарскую, въ потребахъ того панства, зычилъ бы того его королевская милость, абы за умѣтностью тубылцовъ, чужоземцовъ не потребовано.

13. *Прозьба.* Еще пишете, ижъ мѣщане и люди тяглые нѣкоторые у шляхты земли и дворцы и люди позакуповали, а ижъ мѣрчіе тые земли у волоки помѣрили: за што пѣнязи хотячи отдати, просите, абы пѣнязи пріймовати, а тые земли тымъ, хто заставилъ, поступовати казано; и къ тому просите, абы привилевъ и листовъ вашихъ на имѣнья передъ чужоземцы не покладали есте. *Отказъ.* На то его королевская милость казалъ вамъ повѣдѣти: хто покажетъ слухное право на заставы, мѣщаномъ и волостнымъ альбо тяглымъ и путнымъ людямъ заведеные въ пѣнязехъ до часу, его королевская милость расскажетъ, за доводомъ слухнымъ, пѣнязи взявши, таковыя кгрунты заставные поступовати тымъ, чіи есть. А листы и права на выслуги ваши не безъ причины его королевская милость казалъ оглѣдати ревизоромъ, але вашихъ трудностей не хотячи видѣти около правныхъ поступковъ съ поддаными имѣній его милости, жебы ревизоры права оглѣдавши, тамъ же границы певные клали кгрунтомъ его королевской милости отъ вашихъ имѣній, ижбы подданные господарскіе не могли вашихъ земель заходити; а такъ не маєте ничего взбраняти оказы-

вати листовъ передъ ревизоры, для своего лѣпшого и спокойнѣйшого. А вѣдѣже ревизоры не мають листовъ и правъ вашихъ выкладати и задерживати: одно копѣю каждого такового листу взявши, господарю его милости донести повинни, а господарь его милость слухное право цѣло заховывати и границами упевняти розказати рачилъ. А о шляхетствѣ вашомъ не дана есть отъ его милости господаря моцъ никому справовати; и тымъ васъ затрудняти не могли мѣрники.

14. *Прозьба.* Докладаете тежъ въ прозьбахъ вашихъ о духовныхъ, абы водлѣ того, яко кунторове у Лифлянтѣхъ, маегности своею за границу не отсылали и никому не записывали, ижбы то приходило на рѣчь посполитую, для обороны земской, по смерти всихъ таковыхъ духовныхъ. Тежъ докладаете въ прозьбѣ вашей о предложенье справедливости и о нечиненье отправки на рѣчи присужонье; въ которой прозьбѣ вашей припоминаете, ижъ яко ся трафило сестрѣ вашей, пани Олбрихтовою Немировнѣ, которой сына капланъ забили, о што и до сихъ часовъ справедливость не сталася; а хоружому Лепунскому Ивану Савичу, судивши отъ трехъ годъ, отправки нѣкоторою не дають и до сихъ часовъ, — и просите, абы то было осмотрѣно, ижбы справедливости чиненье и отправки не предлагалися. *Отказъ.* На то его королевская милость казалъ вамъ повѣдѣти, абы есте указали, хто бы таковой съ пановъ духовныхъ скарбы вывозилъ (*) альбо высылалъ; и потомъ, гдѣ бы хто съ таковыхъ становъ хотѣлъ высылати скарбы, абы есте заговаривши, давали знать господарю его милости; а господарь его милость хочетъ розказати то осмотрѣть водлѣ воли своею господарской, яко ся будетъ годити. А справедливость расскажетъ его королевская милость паномъ духовнымъ чинити,

(*) Въ подл. по ошибкѣ, «вывозилъ.»

якожъ и розказуетъ его милость, абы ся каждому справедливость дѣяла.

15. *Прозьба.* Еще просите господаря его милости, штобы мѣщане всихъ мѣстъ вамъ и подданнымъ вашимъ справедливость чинили, кдѣ ся трафитъ, правомъ земскимъ, а не своимъ Майтборскимъ, кдѣжъ за обороною земскою сѣдять; докладаючи, ижъ король его милость, славной памяти панъ отецъ господаря его милости, статутъ вамъ даючи, то тымъ обычаемъ постановити рачилъ: нижлижъ они предѣся отъ того повстягнути ся не хочутъ. *Отказъ.* Тую прозьбу вашу на томъ зостановляти его королевская милость рачитъ, яко на прошломъ соймѣ ухвалено и постановлено, а вѣдѣже и то маєтъ трвати до поправленья и выволанья статуту.

16. *Прозьба.* Тежъ просите его королевской милости, абы воеводы и старосты, во врьдѣхъ своихъ, того сами або черезъ врьдниковъ своихъ досмотрѣли, штобы была ровность въ мѣстѣхъ въ торгахъ, въ мѣрахъ и вагахъ, и тежъ абы у продаванью живности и всякихъ рѣчей отъ людей ремесленныхъ шапунокъ былъ установленъ. *Отказъ.* На тую прозьбу вашу его королевская милость таковое постановление чинити рачитъ: хотячи то мѣти, абы во всихъ панствахъ его милости великого князства Литовского однакѣ мѣры на живности и на трунки, и мѣры и ваги на товары купецкіе установлены и выволаны были, такъ въ мѣстѣхъ его милости господарскихъ, яко тежъ и во всихъ иныхъ мѣстѣхъ обывателей великого князства; около того хочетъ его королевская милость съ паны радами ихъ милостью намовивши, вже тому обычай найти, и вездѣ и всимъ посполито ознаямити и выволати розказати рачитъ.

17. *Прозьба.* Просите тежъ и чоломъ бѣте шляхта хоружства Ейшишского, Сомилишского, Высокодворского, Жижморского и Стоклишского, около сторожи Москвичовъ въ замку Троцкомъ, ижъ на каждый годъ по чо-

тыри кротъ, по двадцати и по пяти человекъ № 13. тыхъ трехъ вязневъ Москвичовъ стережи ходите, и просите, абы съ того были вызволены, або ижбы на каждую особу по человекъ къ сторожи приставлявано, а не такъ много, и повѣдаете въ томъ собѣ обтяжливость, ижъ откупаючися отъ того, по полукопѣю давати мусите. *Отказъ.* На тую прозьбу вашу, на тотъ часъ, его королевская милость таковое постановление чинити рачитъ: ижъ до тыхъ трехъ вязней не-маете большъ давати сторожовъ, только по чотыри человекъ на тыждень, dorosлыхъ, а не робятъ; и не маєте ся откуповати, але чинити тому досытъ, што повинны: вѣдѣже, естли бы за часомъ была большая потреба, тогды за листомъ господарскимъ маєте сторожовъ давати, сколько потреба того укажетъ.

18. *Прозьба.* Тежъ просите и чоломъ бѣте господарю его милости о вчиненье справедливости съ городничимъ Виленскимъ зъ Юпомъ, о збитье и змордованье на добровольной дорожѣ брата вашего Миколая хоружича Курклеводского. *Отказъ.* Тою прозьбою вашою непотребнѣ ся забавляете, гдѣ не идеть о рѣчь посполитую: бо гдѣ бы ся утекъ съ жалобою до господаря его милости, вже давно бы справедливость мѣлъ, яко съ служебникомъ его королевской милости: вѣдѣже и на тотъ часъ расскажетъ его королевская милость справедливость ему зъ Юпомъ учинити.

19. *Прозьба.* Докладаете тежъ въ прозьбахъ своихъ, ижбы врьды земскіе и дворные по старому у своихъ важностехъ и пожиткахъ были захованы. *Отказъ.* Хочетъ его королевская милость вѣдати: кому бы съ таковыхъ врьдниковъ што ся уменьшило и въ чомъ? бо яко зъ ласки а зъ доброты его милости уряды бывають даваны, такъ и приступъ къ его королевской милости никому, зваша урядникомъ его милости забороненъ не есть: могли бы сами таковыя врьдники и повѣдати его милости, естли бы ся кому въ чомъ уменьшило, альбо што ублизилось и черезъ кого.

№ 13. 20. Прозьба. Просите тежъ его королевской милости о томъ (што на прошломъ валномъ соймѣ ухвалено), ижьбы matka або опекуны, кому бы была опека злѣцона, дѣвокъ безъ воли братьи альбо дядьковъ ихъ замужъ не выдавали; въ томъ мѣните немалый упадъ рѣчи посполитой того панства, што есте обачили въ маломъ часѣ великіе утиски таковыхъ дѣтей осиротѣлыхъ и знищеніе на многихъ мѣстцахъ отъ братьи и отъ стрывѣвъ, ижь они не зычачи для имѣній ихъ, таковымъ дѣвкамъ малженства забороняють, альбо мощнымъ браньемъ паненъ у малженство квалтовное принужають, — и просите, абы тотъ артыкулъ былъ поправленъ тымъ, штобъ matka, або опекуны въ томъ владность мѣли, кому то звѣрено отъ отца ихъ будетъ, не пытаючися приржонныхъ. **Отказъ.** На тую прозбу вашу его королевская милость казалъ вамъ повѣдѣти, ижь и въ томъ, яко въ рѣчи слушной, чивячи досыть прозбъ вашей, оный артыкулъ на прошломъ соймѣ ухваленыи касовати рачить; и, заховываючи при моцы старый звычай, владность маткамъ и опекуномъ, уставленнымъ черезъ тестаментъ або черезъ запись слушный, умоцнати его милость господарь рачить, о таковыхъ дѣвкахъ осиротѣлыхъ обышляти и малженство имъ еднати, водлѣ порученья и моцы дановъ отъ отца таковыхъ сиротъ; а вѣдѣже мають ся справовати водлѣ статуту и записовъ на то имъ даныхъ.

21. Прозьба. Еще просите господаря его милости о статутѣ: кгдажъ вже зъ ласки его королевской милости того узычено, абы былъ поправленъ; на што и податокъ есте зложили, и вѣдомость того маєте, ижь на томъ за рѣсказаньемъ его милости, тые особы съдѣли, кому то было поручено, — просите, абы его королевская милость въ то вглянути и, естли бы ся што поправило, ухвалити и къ досконалости привести рачилъ. **Отказъ.** На то казалъ его милость господарь вамъ повѣдѣти: кгда

вже оные особы, обраные на то, всему статуту первому поправу учинять, хочетъ его королевская милость въ то вглянути съ паны радами и зъ вами всеми, которые того требуютъ, и што будетъ слушного, ухвалити и выволати росказать его милость рачить.

22. Прозьба. Докладаете тежъ въ прозбахъ своихъ, ижьбы господарь его милость вамъ всемъ, которые въ повѣтахъ пограничныхъ имѣнья свои поблизу границы Польской и Мазовецкой маєте, оборону и справедливость въ кривдахъ вамъ подѣланныхъ учинити рачилъ безъ проволоки. **Отказъ.** Его королевская милость росказалъ вамъ на то повѣдѣти, ижь кромъ напомниманья и прозбъ вашихъ, то рачить на ласкавомъ баченью своемъ мѣти и обышляти о томъ, абы тое панство, отчизна его королевской милости, въ границахъ своихъ успокоенье приняти могла, и абы межи тыми обоими панствами его милости господарскими, коруною Польскою и великимъ князьствомъ Литовскимъ, границы постановитися могли: за чимъ и справедливость въ кривдахъ продлуженья мѣти не будетъ.

23. То тежъ его королевская милость вамъ повѣдѣти росказать рачилъ: што есте ухвалили оборону противъ непріятеля панствамъ его королевской милости, зъ девяти человекъ десятого пахолка на кони въ зброи ставити къ службѣ земской; то его королевская милость ласкаво отъ васъ на тотъ часъ пріймуетъ: ино маєтъ на бачности постановленіе и ухвалу соймовъ прошлыхъ (почонши отъ Берестейского сойму ажъ до нынѣшняго), ижь завжды то припоминаю, абы было оказанье, яко повиненъ хто служити. А кгдажъ есте вже близкій часъ выистью перемирья, а оказыванье и пописъ еще ни одинъ разъ не дошолъ: про то потреба зъ многихъ причинъ, змаша, для готовности противъ тому непріятелю, абы есте вже къ тому ся способляли и поготову были на осень пришлую къ оказанью и понисыванью въ повѣтахъ, каждый

съ почтомъ своимъ, яко хто повиненъ службу земскую служити; а гдѣ ся хто пописати и оказывати маєтъ, часъ и мѣсто черезъ ласты его милости господарскіе ознаймены будутъ.

24. А што есте оповѣдали его королевской милости, ижь милуючи его милость господаря своего и пана приржонного, а бачачи на таковую потребу рѣчи посполитой, для прибылыхъ людей пѣняжныхъ поступили есте податокъ съ подданныхъ вашихъ людей тяглыхъ, по три годы отъ сохъ, и то черезъ ихъ милость пановъ радъ его королевской милости оповѣдали. На што и ихъ милость панове рада одностайнѣ зъ вами зволнися, то къ его королевской милости донесли и оповѣдали, докладаючи того, абы шляхта, которые людей не мають, а своими дворными сохами орутъ, такъ тежъ и слуги путные (для того, ижь на службу земскую при васъ панахъ своихъ вхати мусять) ничего не давали. Его королевская милость тое постановление ваше, которое чините для обороны васъ самыхъ и рѣчи посполитой, складаючися на таковой податокъ, отъ всехъ становъ вдячнѣ и ласкаво пріймовати рачить, позволяючи того, абы шляхта отъ своихъ дворныхъ сохъ ничего не не давали и слуги путные, кромъ людей тяглыхъ, которые мають давати отъ сохи воловой десять грошей, а отъ коньской сохи также по десяти грошей, а отъ полсохи, то есть, отъ одного вола пять грошей; а отъ пустошской земли, которой не вживають и не пахуть, ничего не мають давати; а вѣдѣже съ той земли пустошской, которая бы зъ найму пахана, также и съ человека, который не маючи воловъ землю держитъ, мають платити таковой же податокъ, яко отъ полсохи, пять грошей. А тотъ податокъ со всехъ людей вашихъ по давному будете давати, яко ширѣй на листѣхъ его королевской милости тое постановление податку описано будетъ, и, выбравши, отдавати маєте въ повѣтахъ до хоружихъ, а при хоружомъ одинъ шляхтичъ маєтъ

быти. А тые бирьчые не мають болейшей брати. **№ 13.** у васъ бирьчого и писчего и за жвѣтъ, только чотыри пѣнези отъ сохи; передъ которыми бирьчими будетъ повиненъ присягу учинити тотъ, черезъ кого выбрано, ижь справедливо выбиралъ, а не фолькговалъ. А тые бирьчые мають тотъ платъ отнести, на певный рокъ, на день святого Михайла прійдучого святаго року пятьдесятъ пятомъ, тутъ до Вильни, и будутъ отдавати до рукъ князя Венцлава бискупа его милости Жмойтского; а при его милости уставити его королевская милость рачилъ писаремъ ключника Троцкого пана Бенедыкта. А вѣдѣже, естли бы кто передъ рокомъ до бирьчихъ повѣтовыхъ того плату не отдавалъ, а въ томъ яко въ рѣчи земской сполниль ся: таковой и зъ советомъ повиненъ будетъ платити, то есть, по двадцати грошей отъ сохи, и то будетъ доправовано зъ дважованьемъ; а хоружые мають каждого такового недбалого оповѣдати при отдаванью серебщизны. А того податку никто не маєтъ задерживати, и не будетъ отъ господаря его милости жадной особы отпущено: кгдажъ вси одинако обороны потребуєте, про то ничимъ ся не вымовляючи, повиненъ будетъ каждый, якогжъ кольвекъ стану парсуна, тотъ платъ зъ имѣній и зъ людей передъ святымъ Михайломъ до бирьчихъ отдавати; а бирьчые отъ того року и дня святого Михайла ажъ до святого Мартина, завжды, до трехъ годовъ, мають тотъ платъ на мѣсто имъ назначеное отвозити и отдавати. А кромъ пановъ радъ, и вси, хто къ повѣту не належатъ, мають черезъ вридниковъ своихъ тотъ платъ отдавати, тамъ же, гдѣ и хоружые, на мѣсто назначеное, и не мають отъ квитовъ давати болейшей, только по два грошы.

25. То тежъ его королевская милость казалъ вамъ повѣдѣти, ижь на тую потребу обороны земской, рачить его королевская милость на всехъ подданныхъ мѣстъ и дворовъ своихъ господарскихъ, и тежъ мѣстъ и дворовъ

№ 13. старшой королевое съ милости пани матки своее, таковой же податокъ, яко и зъ вашихъ людей есть ухваленъ, вскладати, кромъ преднѣйшихъ мѣстъ его милости господарьскихъ, которые постановленья волочного не ужи-ваютъ, але за особливимъ привилеяваньемъ права Майтборского съдять: съ таковыхъ мѣстъ будутъ повинны платъ давати подлѣ постановленья давного.

26. А што ся дотычетъ пановъ духовныхъ обоого стану, закону Римского и Греческого, таковой же податокъ ухваленый зъ людей имѣній своихъ на тыежъ роки и на мѣсто назначоное отдавати мають.

27. Нижли, яко есте припоминали и прозьбу къ его королевской милости чинили, штобы сами панове духовные, зъ имѣній костельныхъ, также и съ тыхъ имѣній, которые зъ набытья подлѣ правомъ земскимъ держать, сами службу земскую посполъ зъ вами заступовали и служили; тежъ и мѣщане, которые имѣнья шляхетскіе держать, абы зъ вами зравно службу земскую служили. — Ино панове духовные, о службу зъ имѣній костельныхъ, взяли то у его королевской милости на обмову, хотячи на тую прозьбу вашу отказъ его королевской милости учинити попригожу: вѣдѣжъ хто имѣнья таковыя, съ которыхъ служба земская заступована была, держитъ, якогжъ кольвекъ будъ стану, таковыхъ всехъ его королевская милость отъ службы земской вызволяти не рачитъ; але мають всимъ повинностямъ досыть чинити, што передъ тымъ ко потребъ рѣчи посполитовъ съ тыхъ имѣній бывало:

28. Били тежъ есте чоломъ господарю его милости, припоминаючи о службу земскую зъ имѣній къ столу его королевской милости припалыхъ, съ которыхъ передъ тымъ служба земская заступована была. Въ томъ мала есть потреба его королевскую милость напоминати: бо естли чого иного, потребнѣйшого и добръ большого къ той потребъ рѣчи посполитовъ не

литуеть его милость, зъ ласки своее господарской къ паньству своему отчизному; съ тымъ, пакъ, яко зъ рѣчью меньшою, учинитъ его милость подлѣ стародавнего обычая: бо яко отъ столу господарьского бывають даваны имѣнья, тые тежъ, а не иншіи имѣнья зася спадывають и приходять къ столу его милости господарьскому.

II. — Прозьбы земли Жомойтское.

1. *Прозьба.* Што есте били чоломъ господарю его милости, мѣнячи мѣти нарушение правъ и вольностей вашихъ, наданныхъ вамъ отъ предковъ его королевской милости и отъ его милости самого упривилеяванныхъ и потвержонныхъ, ижъбы его королевская милость нарушоныя права и вольности ваши направити, и водлѣ стародавнего обычая и тежъ водлѣ привилеявъ вашихъ, при тыхъ вольностяхъ васъ заховати рачилъ. *Отказъ.* На то его королевская милость казалъ вамъ повѣдѣти, ижъ въ той прозьбѣ вашей не есть ничего значѣ описано: въ чомъ бы ся стало нарушение привилеявъ вашихъ? бо естли его королевская милость съ щедробливости своее господарьской, давати и утверждати права рачитъ; то тежъ никому ихъ не звыкъ ломати: хто кгда оказуеть причины, чимъ ся права его нарушають, то зъ ласки его королевской милости бываетъ поправлено.

2. *Прозьба.* Къ тому просили есте короля его милости, абы его королевская милость пѣязи поконевскіе, што есте по копѣ грошей водлѣ ухвалы соймововъ давали, вамъ поворочати розказати рачилъ, для той причины, ижъ панове тивуны земли Жомойтской безъ васъ шляхты на прошломъ соймѣ то поступили, докладаючи того, ижъ бы есте такового плату николи давати не были повинны, и просите, абы того напередъ не было. *Отказъ.* На то его милость господарь казалъ вамъ повѣдѣти, ижъ то не на жадную потребу господарьскую, а ни до скарбу его милости, але на земскую оборону, вызваны будучи къ тому вси станы,

которые належатъ къ сойму, ухвалили и постановили, за што бы люди служебные на украинѣ были хованы; которымъ олижъ зъ властного скарбу его королевской милости за службы ихъ плачено, для неотданья тыхъ податковъ земскихъ на часть назначоный, про то на непослушныхъ и дѣцкіе отправованы. Вѣдѣже зычилъ бы его королевская милость вамъ и всему паньству его милости отчизному, великому князьству, ижъбы на таковыя податки ся не сложили, а безъ того обойтись могли.

3. *Прозьба.* Тежъ припоминаете господарю его милости: яко въ привилея въшемъ описано, ижъ васъ въ почтивостяхъ и въ имѣніяхъ непоручно отъ предковъ его королевской милости ховати обещано, о томъ бѣте чоломъ господарю его милости, докладаючи о утисненія черезъ помѣру волочную имѣній вашихъ, и о допытыванье привилеявъ на шляхетство, и тежъ о побранье земель и людей въ помѣру волочную, за што, мѣните, отмѣны не дано; а особливо то собѣ зъ обтяженьемъ мѣните, ижъ Москвитинъ Иванъ Дьяковъ въ Росѣньской волости, яко бы за листомъ господарьскимъ, мѣлъ пѣякую владность собѣ привлащати надъ шляхтою. *Отказъ.* На то его королевская милость казалъ вамъ повѣдѣти, ижъ помѣрою волочною не могли вашихъ имѣній шляхетскихъ утиснути, а ни привилеявъ у шляхты на шляхетство домогатися, а ни тежъ кгрунту земель вашихъ безъ отмѣны брати: бо того на листѣхъ короля его милости до васъ писанныхъ не мѣли. А естли припытывались мѣрники... отъ путныхъ бояръ, которые недавно вкупили ся на боярство, и за поклоны съ тяглыя службы выпущены на боярство (не дописано).

4. *Прозьба.* Докладаете тежъ въ прозьбахъ вашихъ, жадуючи на помѣрчихъ, которые тамъ въ земли Жомойтской, и мѣнуочи отъ нихъ

кривды и шкоды великіе быти, за неотданьемъ № 13. отмѣны за земли ваши, а иньшимъ хотя и отдано, ино за великими подарками, яко бы тежъ знову тые земли свои куповати мѣли. *Отказъ.* Въ томъ его королевская милость каждому таковому, который бы отъ помѣрчихъ и отъ ревизоровъ кривду собѣ быти мѣнилъ, справедливость учинити розказати рачитъ, кгда ознаимитъ меновитъ, отъ кого кривда ся ему дѣетъ.

5. *Прозьба.* Просили тежъ есте его королевской милости, абы черезъ рѣку Невяжу позвы и мандаты, дѣцкіе и увязчіе не были до земли Жомойтской всыланы, але ижъбы всехъ васъ староста тамошній Жомойтскій судилъ и справовалъ, водлѣ привилеявъ и вольностей вашихъ. *Отказъ.* Тую прозьбу вашу, около позвовъ, дѣцкихъ и увязчихъ, его королевская милость зостановляти рачитъ водлѣ давного обычая, ижъ тамъ вже позвы и дѣцкіе и увязчіе посыланы не будутъ. А хочете ли, абы мандаты его королевской милости съ поступку правного до тоѣ земли не были всыланы, причиняйте жъ ся о то, абы причина не была дана къ посыланью таковыхъ мандатовъ: бо то вѣдаете, зъ якоѣ причины мандаты выходять.

6. *Прозьба.* За тымъ тежъ просили есте его королевской милости, ижъбы его милость възрѣвши у права и вольности ваши, которые вамъ отъ предковъ его королевской милости даны суть, тамъ до земли Жомойтской, на помѣренье волокъ и на ревизию, чужоземцовъ не посылати розказати рачилъ. *Отказъ.* На то его королевская милость розказалъ вамъ повѣдѣти, ижъ ревизоры и помѣрчіе не суть врядникі жадные: але што-кольвекъ черезъ нихъ справлено, то все зъ вами тивуны оноѣ земли, и не выймуочи врядовъ зъ рукъ вашихъ, постановлено; пожитки скарбу его королевской милости... (*). А тежъ не на шляхту постановленье чинено, але на тяглыхъ людей.

(*) Здѣсь недостаетъ какой-то рѣчи, для полноты предложенія.

№ 13. 7. *Прозьба*. Просили есте тежъ, абы бояромъ, шляхтѣ и посполитому чловѣку, водлѣ давного обычаю, вольно было въ пущахъ звѣрь бити, и дерево на будованье брати, и въ озе-рахъ и въ рѣкахъ рыбы ловити. *Отказъ*. То его королевская милость постановити рачитъ, вземши вѣдомость таковыхъ пущъ и лововъ и водлѣ, подлѣ воли своее господарьской и по давному.

8. *Прозьба*. И о то тежъ есте прозьбу къ его королевской милости чинили, абы было вольно посылати, до Нѣмецъ, за границу, свои властные збожья и быдла на продажу, и за то зась, также на свои властные потребности, куповати кони, зброн и ивышіе потребности свои, на пожитокъ свой и на службу земскую, а отъ того мыта, яко передъ тымъ не было, абы не давали. *Отказъ*. То его королевская милость зостановляти рачитъ водлѣ давного обычаю и постановленья своего господарьского, которое на купецкихъ людей, а не на шляхту уставлено: вѣдѣже не хочеть ли шляхтичъ отъ товаровъ своихъ мыта давати, за границу провадячи, нехай онъ пожитковъ купецкихъ не уживаесть.

9. *Прозьба*. Просили тежъ есте его королевской милости, абы въ Ковнѣ, на Вельи, мыта на перевозъ отъ васъ шляхты не брати его милость казати рачилъ, мѣнячи, ижъ передъ тымъ мыта николи есте не давали. *Отказъ*. Въ томъ его королевская милость и теперь рачилъ розказати, заховатися по давному обычаю; а вѣдѣже, гдѣ мосту нѣтъ на рѣцѣ, муситъ собѣ кождый, для переѣзду, еднати и платити за працу перевозникомъ: нижли, кгда платы господарскіе бывають превожены, отъ того ничего не мають брати на перевозѣхъ и мостѣхъ, также и отъ тыхъ, которые на службу земскую, то есть, на войну повдугъ.

10. *Прозьба*. И о то тежъ прозьба ваша была, ижъ люди ваши и челядь невольная, зашкочивши, до Юрборку и до Новои Воли утекають, а вриадники старшой королевое еѣ милости,

пани матки его королевской милости, таковыхъ збѣговъ вамъ выдавати, а ни зъ ними никотороу справедливости чинити не хочуть, — и просите о листъ до королевое еѣ милости. *Отказъ*. Его королевская милость, въ таковой прозьбѣ вашей, листъ до еѣ королевской милости писати и вамъ дати розказати рачилъ.

11. *Прозьба*. Докладаете тежъ въ прозьбахъ вашихъ, жалуючи на Юрчыньского, ижъ онъ, будучи не тутешнего паньства чловѣкомъ, и беручи личьбы отъ васъ и слугъ вашихъ съ дворовъ и съ тивунствъ, державъ вашихъ, васъ самыхъ и слугъ вашихъ соромотитъ и никотороу бачности на васъ вриадниковъ его королевской милости не маеъ, а безъ подарку не отправуетъ и личьбы слухати не хочеть: и просите, абы его королевская милость кого инышого, обывателя того паньства великого князьства, на то установити розказати рачилъ. *Отказъ*. На то его королевская милость казалъ вамъ повѣдити, ижъ то не естъ рѣчь посполитая земская: але хто бы отъ Юрчыньского былъ утисненъ, лацно бы собѣ справедливости у его королевской милости довести могъ, а и теперь можетъ не молчати о то, кому кривда, и лацно къ справедливости прійти можетъ.

12. *Прозьба*. Затымъ тежъ просили есте его королевской милости, абы врияды въ земли Жомойтской не были даваны, ни Литвѣ, а ни Руси, и неосѣлымъ, одно Жомойти, которые зъ отцовъ и зъ родичовъ своихъ суть тамошніе обыватели осѣлые, и то за причину старосты, тивуновъ и шляхты. *Отказъ*. То господарь его милость хочеть опатровати по тому, яко за отца его милости славноу памяти, и вже за шастливого панованья его королевской милости бывало.

13. *Прозьба*. Просили тежъ есте его королевской милости, абы судей и писаровъ присяжныхъ въ повѣтѣхъ вашихъ его милость вамъ дати рачилъ, которыхъ ижъбы вы сами межи собою обирали. *Отказъ*. На то его королевская милость казалъ вамъ повѣдити, ижъ то

его милость розкажетъ пану старостѣ Жомойтскому. постановити водлѣ ухвалы сойму прошлого.

14. *Прозьба*. Докладали тежъ есте въ прозьбахъ вашихъ, ижъ панове воеводы и старосты зъ урядники и подданными своими, въ кривдахъ, въ забираяню землѣ и людей вашихъ, никотороу справедливости чинити не хочуть, и просите, абы была справедливость учинена. *Отказъ*. О томъ его милость далъ науку пану старостѣ Жомойтскому, абы ся шляхтѣ безъ продлуженья справедливость дѣяла.

15. *Прозьба*. Была тежъ прозьба ваша къ его королевской милости, абы панове духовные и мѣщане съ тыхъ имѣній, которые у шляхты покупили, службу военную служили, альбо абы за нихъ отъ близкихъ пѣнязи водлѣ шацунку брали, а того абы панъ староста до-смотрѣлъ; и просите тежъ о листъ его королевской милости до пана старосты, абы съ тыми мѣщанами о таковыя имѣнія шляхетскіе справедливость чинилъ. *Отказъ*. И въ томъ его королевская милость далъ науку пану старостѣ Жомойтскому, абы ся заховалъ водлѣ обычаю права и ухвалы земскоу.

16. *Прозьба*. Тежъ просили есте о пожитки на врияды ваши прислухаючіе, ижъбы ничимъ, водлѣ давного обычаю, ихъ не уймовано; а ижъ панъ Фальчевскій немало того вамъ ущербилъ, и войтомъ и людемъ приказалъ, ижъбы васъ ни въ чомъ непослушны были, подводъ и сторожовъ не давали, и вамъ самымъ, а ни слугамъ вашимъ въ дома до подданныхъ въѣзжати не казалъ, грозно вамъ именемъ его королевской милости заказуючи, — и просите, абы тые пожитки, на врияды ваши прислухаючіе, водлѣ давного обычаю были привернены. *Отказъ*. Его королевская милость на то казалъ вамъ повѣдити, ижъ побожитѣйшій и певнѣйшій платъ на тотъ часъ зъ розказанья и за волю господарскою естъ вамъ установлень, съ десятоу волоки, а нижли первѣй зъ обтяженьемъ подданныхъ его королевской милости

№ 13. бывалъ, и не певный: бо яко вы не мѣли уста- вы, што на подданныхъ господарьскихъ брати, такъ тежъ и подданные не вѣдали, што мѣли давати. А вѣдѣже и теперъ тыхъ пожитковъ вашихъ ничимъ ся не уменьшило, а снать, инышому зъ васъ и прибавитися платовъ можетъ, звлаща, кгда вси волоки осядутъ. А о послушенство войтовъ и подданныхъ господарьскихъ естъ на уставъ господарьской описа- но, яко ся вы, тивунове, къ подданнымъ захо- вати маете, а подданные въ послушенствѣ къ вамъ: подлѣ тоу уставу и заховати ся будете.

17. *Прозьба*. Докладаете тежъ въ прозьбахъ вашихъ, ижъ водлѣ привилейъ предковъ его королевской милости, славноу памяти королей ихъ милости и великихъ князей, ништо вамъ примовляти не маеъ, ижъбы есте черезъ мечъ або зброю были добыты и къ послушенству, предкомъ его королевской милости привер- нены: але предкове ваши сами добровольно предкомъ его королевской милости поддали ся. *Отказъ*. На то его королевская милость казалъ вамъ повѣдити: хто бы таковыя примовы вамъ чинилъ, хочеть его королевская милость справедливость учинити, и, дознавши, заста- новити то, абы напотомъ таковыхъ примовъ вамъ не чинено.

18. *Прозьба*. Докладаете тежъ въ прозьбахъ вашихъ вѣрныя службы и добровольное под- данье предковъ вашихъ къ предкомъ его ко- ролевской милости и тежъ къ его милости; а ижъ маете то на привилѣяхъ отъ предковъ его королевской милости вамъ даныхъ описа- но, ижъ мѣли и ихъ милость вамъ то ласкою своею господарскою нагрожати: нижли те- перъ мѣните, ижъ и то, што вамъ отъ пред- ковъ его королевской милости надано, все ото- брано отъ васъ; и наконецъ и вѣрность по- слугъ вашихъ якобы вамъ была отнята, ижъ не только особамъ обчымъ, але и простымъ холопомъ большая естъ вѣрность дана, нижли вамъ, добрымъ и вѣрнымъ слугамъ и вриад- никомъ его милости: и просите его королев-

№ 13. ской милости, абы его милость, зъ ласки своее господарскоѣ, при тыхъ правахъ и вольностяхъ вашихъ заховати васъ рачилъ; а што ся тыхъ вольностей вашихъ зменьшило, абы то его королевская милость зася вамъ направити росказати рачилъ. *Отказъ.* Тоѣ прозбы ваше достаточнѣ его королевская милость вырозумѣти не можетъ: въ чомъ бы ся правамъ и вольностямъ вашимъ што зменьшило, и на кого бы тежъ съ холоповъ простыхъ справа надъ вами прекладана была? ижьбы то есте господарю его милости ознакомили.

19. *Прозьба.* Просили тежъ есте, абы его королевская милость науку вамъ дати рачилъ, ижь его милости помѣрчѣ нѣкоторые болота и лѣсы никчемные у волоки помѣрили, для властныхъ доходовъ своихъ (которые господарю его милости никоторого пожитку вчинити не могутъ), и просятъ отъ васъ, абы есте за то имъ платили отъ каждоѣ волоки по десяти грошей: потребуеете въ томъ науки господарскоѣ, естли бы есте имъ мѣли за то по тому платити, альбо ни? *Отказъ.* На то его королевская милость казалъ вамъ повѣдити, ижь тую заплату мѣрчимъ чините съ платовъ его милости; а ижь то есть рѣчь властная, до скарбу его королевской милости належащая, въ томъ вамъ наука отъ его милости черезъ пана подскарбія земского дана будетъ.

III. — Прозьбы земли Волыньское.

Арт. 1. Прозьба. Што есте просили и чомъ били господарю его милости, абы кгвалтомъ, наѣздакамъ, забойствамъ, забирањю землѣ и грабежомъ, которые ся отъ обывателей коруны Польскоѣ дѣють, была справедливость учинена и конецъ слушнѣй тому постановленъ. *Отказъ.* На то его королевская милость казалъ вамъ повѣдити, ижь кромъ напоминанья и прозбы ваше, маеть его милость то на ласкавой памяти своей господарской, абы панѣства его милости, каждое у своихъ границахъ певныхъ, спокойнѣ были захованы, якожъ вже немалые початки тому

его королевская милость за щастливого панованья своего учинити рачилъ, што всимъ вамъ вѣдомо есть; а и напередъ хочеть его королевская милость къ тому ся причинити, ижьбы покой въ границахъ и справедливость безъ продлуженья на обѣ стороны чинена была.

2. *Прозьба.* Тежъ просили есте его королевской милости, абы его милость господарь судей повѣтовыхъ и писаря присяжного, для справъ вашихъ, придати вамъ рачилъ. *Отказъ.* Его королевская милость тую прозбу вашу на томъ зостановляти рачитъ, яко всимъ обывателемъ того панѣства великого князьства есть оповѣдано; а вѣдьже таковое постановление всимъ вамъ только до поправленья статуту маеть трывати. А штобы и на тотъ часъ у справедливости продлуженье не дѣялося, роскажетъ его королевская милость черезъ листы свои господарскіе старостамъ повѣтовымъ, абы они на врьдѣхъ его милости господарскихъ, въ небытности своей, таковыя мѣстца засажали особами на то годными, съ посродку васъ обравши; а при томъ судью и писаря присяжного, также братью вашу, обывателей того краю, годныхъ и учтивыхъ людей, мають избрати, згожаючи ся зъ волею вашею, на кого вы позволите, и такимъ обычаемъ мають осажати мѣстцо судовное въ небытности своей: которые мають зъ намѣстникомъ старостинымъ, а коли самъ староста есть, тогды и съ самымъ старостою судити; а отъ такового суду не маеть ся никто отзывати до пановъ радъ, а ни до господаря, олижъ по всказанью.

3. *Прозьба.* Докладаете тежъ въ прозбахъ вашихъ, ижь которые панове рада наша, княжата и панята, мають имѣнья свои въ земли Волыньской, а не хотятъ правомъ вашимъ Волыньскимъ зъ вами правоватися, и просите, абы вси таковыя у повѣтѣ тамошнемъ росправу зъ вами пріймывали. *Отказъ.* На то его королевская милость казалъ вамъ повѣдити, ижь ачъ панъ воевода Виденьскій, маючи имѣнья

свои тамъ въ земли Волыньской, подъ таковыи судъ повѣтовый поддавалъ тые имѣнья свои, але ижь княжата и панята, которымъ то належитъ, на тотъ съемъ къ его королевской милости вхати не могли: для того его милость господарь въ той рѣчи такое постановление чинити рачитъ, ижь таковыхъ становъ всихъ, которые къ повѣту не прислухаютъ, маете позывати за комисіями господарскими, покулъ статутомъ то будетъ обваровано и постановлено.

4. *Прозьба.* Тежъ просили есте его королевской милости о люди ваши отчизные и непохожые, которые въ имѣнїяхъ ихъ милости пановъ радъ нашихъ, княжатъ и панятъ мѣшкають, зъ имѣнїй вашихъ поутекавши, абы вамъ были за доводомъ вашимъ выданы. *Отказъ.* Его королевская милость хотѣчи покой межѣ вами и имѣнїями вашими учинити, тую прозбу вашу такъ застановляти рачитъ, ижь отъ того часу не маете збѣговъ одинъ отъ другого подданныхъ пріймывати, кромъ такого человека, который учтивши пана своего, добровольнѣ зъ имѣнья его выпущонъ будетъ: тыми вольно мѣстечко и волю осаживати. А хто вѣдомо збѣга на имѣнье свое приметъ, таковой вси шкоды тому чіею збѣга возметъ, што бы шкодовалъ черезъ того збѣга, также и накладъ его, што доходячи на то наложить, маеть платити. А ижьбы тымъ никто ся не вымывлялъ, ижь не вѣдомо такового збѣга прїнялъ: про то уставляеть его королевская милость, абы князь и панъ, и каждый справца або намѣстникъ того имѣнья, до которого збѣгъ прїйдетъ, за первымъ обжалованьемъ и обосланьемъ справедливостю учинилъ и не боронилъ ее, а съ права збѣга и шкодника маеть выдати со всимъ, съ чимъ до того имѣнья зайдетъ; а не учинитъ ли справедливости и збѣга не выдастъ: тогды зъ того имѣнья, на которомъ збѣгъ будетъ найденъ, маеть быти уквивжоному шкода и накладъ оправованъ.

5. *Прозьба.* Просили есте тежъ его королевской милости, абы также къ службѣ земской выправовали есте съ девяти человекъ десятого, а не съ дымѣ, яко и вся шляхта въ великомъ князьствѣ Литовскомъ. *Отказъ.* Ино, ижь есте передъ его королевскою милостью сами то оповѣдали, штожъ въ Волыньскомъ краю два дымы, съ которыхъ идетъ дванадцать грошей и колода овса, то служба, а гдѣхотя одинъ дымъ, а такъ много податку выходитъ, то тежъ служба, — его королевская милость зостановляеть на томъ тую прозбу вашу, абы есте съ таковыхъ девяти службъ десятого выправовали къ службѣ земской, яко-то сами есте службы людей вашихъ ознакомили и мѣновали.

6. *Прозьба.* Докладаете тежъ въ прозбахъ вашихъ, ижь староста Луцкій и Володимерскій, и маршалокъ земли Волыньскоѣ, завжды мѣстца свои въ радъ, межѣ инышими паны радами его королевской милости мѣвали, и просите, абы и теперъ тымъ тое панѣство, землю Волыньскую его королевская милость обдаровати и тыхъ врьдниковъ къ радъ своей господарской припустити рачилъ. *Отказъ.* Его королевская милость казалъ вамъ на то повѣдити, ижь то рачитъ осмотрѣти, водлугъ воли своее господарскоѣ и по первому обычаю.

7. *Прозьба.* Просили тежъ есте его королевской милости о врьды замку тамошнего Луцкого, а меновитъ о тые: городничое, ключъ и мостовничое, ижь николи къ старосту не прислухали, але земяне тамошніе, братья ваша, то завѣдывали, и просите, абы его королевская милость отъ того васъ и теперъ отдаляти не рачилъ. *Отказъ.* На то его королевская милость казалъ вамъ повѣдити, ижь то не есть рѣчь ваша: але всякіе врьды, за годностю и службами, рачитъ его милость давати, кому есть воля его милости господарская.

8. *Прозьба.* Докладаете тежъ въ прозбахъ своихъ, ижь владыка нынѣшній Володимер-

№ 14. ский немало имѣній церковныхъ, отъ предковъ его королевской милости и тежъ отъ вашихъ предковъ на церковь Божью наданныхъ, роздалъ Борзобогатымъ, князю Ивану Четвертинскому и тежъ Станиславу Недвѣдю, и просите, абы тые имѣнья церковные его королевская милость зася къ церкви Божьей привернути розказати рачилъ. *Отказъ.* Его королевская милость тую прозьбу вашу на томъ zostавляти рачить, ижъ за листомъ господарскимъ, таковыя вси имѣнья церковные, кому жъ колько черезъ владыку суть отданы, зася привернены быти мають къ владычеству Володимирскому; а шкоды въ тыхъ имѣньяхъ подданнымъ подѣланы, черезъ посланца его королевской милости, за тымъ же листы, мають быти списаны; а тамъ найдетъ его милость, хто то нагрожати маеть. Нижли Борзобогатые дають того справу, ижъ они не за жаднымъ дарованьемъ тые имѣнья отъ владыки Володимирского держать, але арендою, што ему заборонено и арендовати заказано быти не можетъ, поки есть владыкою; а вѣдьже въ чомъ бы ся онъ неслушны справовалъ, о то припозвавши его мовити можете.

9. Прозьба. Просили тежъ его королевской милости, ижъ нѣкоторые панове Поляцы вдовы и дѣвки въ земли Волинской въ малженство понявши и, мѣшкаючи тамъ, кривды и трудности великіе вамъ дѣлають, и бѣте чоломъ господарю его милости, абы близкіе къ тымъ имѣньямъ ихъ скуповали. *Отказъ.* То его королевская милость на томъ zostавляти рачить, яко и всимъ обывателямъ того панства великого князства въ таковой же прозьбѣ ихъ есть отказъ учиненъ.

10. Прозьба. Што тежъ есте просили и чоломъ били господарю его милости, абы его королевская милость рачилъ вамъ дозволити, жита, ярины, попелы и иншіе работы лѣсные добровольнѣ и безмытнѣ до Кгданьска спускати. *Отказъ.* На тую прозьбу вашу господарь его милость казалъ вамъ повѣдити,

ижъ то водлугъ давного обычаю zostавляти рачить.

11. Прозьба. Докладаете тежъ въ прозьбахъ вашихъ о квалтахъ и наѣздахъ на дома ваши отъ нѣкоторыхъ людей тамошнихъ, и просите, абы таковое своеволенство караньемъ его королевской милости было заставлено, а особливо, около дворянина его милости Львовчика, который былъ побережникомъ за листы господарскими уставленъ, дано его повѣсити. *Отказъ.* Его королевская милость казалъ вамъ на то повѣдити, ижъ хочеть его милость розказати, около того пильное вывѣданье учинити, и, зыскавши, винныхъ скарати: для чого будутъ и къ урядомъ тоѣ земли приданы отъ его королевской милости комисары, которые того мають зыскивати, яко властнѣ рѣчи его милости.

12. Прозьба. Тежъ просите и чоломъ бѣте господарю его милости, абы его королевская милость отъ подданныхъ вашихъ, которые съ збожьемъ своимъ по земли Волинской, а не за границу ѣздить, никоторого мыта на коморахъ не брати розказати рачилъ. *Отказъ.* То его королевская милость рачилъ розказати пану воеводѣ Новгородскому, яко подскарбьему земскому, ижъбы того досмотрѣлъ, яко бы ся въ томъ подданнымъ вашимъ некоторое обтяженіе не дѣяло; и которые подданные ваши збожья свои, для продажи, до мѣстъ его королевской милости, то есть, до Луцка, до Володимера и до Торчина, а не за границу провадять, ижъбы отъ таковыхъ никоторого мыта не брано.

Изъ Литовской Метрики (Публ. дѣлъ кн. IV, л. 72 — 99), хранящейся при Правительствующемъ Сенатѣ, въ С. Петербургѣ.

14.—1555 Іюля 20. Позывная грамота Кіевского митрополита Макарія Львовскому епископу Арсенію, о явкѣ на судъ, для расправы, по жалобѣ на него Уневскаго

архимандрита Анастасія, о присвоеніи того монастыря и его имуществъ.

Благословеніе Макарія, Божьею милостию архіепископа митрополита Кіевского и... и всея Руси, о святомъ Дусѣ возлюбленому и о Христѣ сослужебнику нашего смиренія, честному епископу владыцѣ митрополѣи нашею Галицкое, Львовское и Каменца Подольского отцу Арсенію. Штожъ не однокротъ жалуетъ намъ ся архимандритъ пречистое Богородици монастыря Унева Анастасей Радилевскій со всею еже о Христѣ братьею того честного монастыря, ижъ дей ты пріѣзжаючи до монастыря, великіе обтяжливости имъ чинишь и монастырь пустошишь, статки и живности монастырскіе разбираешь, и архимандрита до господаря короля его милости и передъ ихъ милости пановъ радъ коруны Польское къ праву позываешь, приводячи къ знищеню и великимъ шкодамъ тотъ монастырь, хотячи его подъ мощъ свою подбити и въ послушенство привернути. А тотъ монастырь, зъ вѣчистыхъ часовъ, за предковъ нашихъ отъ колѣкадесять лѣтъ, и за насъ самихъ, подъ благословеніемъ нашимъ и послушенствомъ митрополѣи Кіевское есть; гдѣжъ до того монастыря никоторый владыка николи не вступовалъ и въ мощы своей его не мѣвалъ, одно есть подаванья господарьского: воленъ господарь его милость, кому хочеть, тому тотъ монастырь дати, а благословенія нашего есть, а не твоего. Якожъ дей еси и сихъ часовъ позывалъ того архимандрита передъ господаря его милость, до Петрикова, о три тысячи золотыхъ, ни для чого иншого, одно знищаючи монастырь и къ шкодѣ архимандрита приводячи; а такъ господарь король его милость рачилъ казати до насъ листъ свой господарскій писати, розказуючи вамъ обѣимъ сторонамъ, яко тобѣ владыцѣ, такъ и архимандриту, абыхмо мы, водлугъ права нашего духовного, справедливости промежду вами досмотрѣли и сказанье на конецъ учинили, и тобѣ розказали, абы еси

тому монастырю и архимандриту и чернцемъ **№ 15.** во всемъ покой далъ и ничимъ ся не вступовалъ. А такъ архимандритъ о всехъ шкодахъ и кривдахъ монастырскихъ, которые ся имъ отъ тебе дѣють, реистръ до права положить... омъ съ тобою очивисто мовити хочеть. Прото мы зъ столечности нашею пастырскою, за листомъ господарскимъ писаннымъ до насъ, приказуемъ тобѣ, подъ клятвою святыхъ Отецъ и подъ неблагословеніемъ нашимъ, абы еси на рокъ отъ насъ адожонный... на Воздвиженіе честнаго Креста, свята прійдучого року теперешнего пядесять пятаго, въ начало индикта мѣсяца Сентеврія четвертогонадесять дня, къ праву передъ нами сталъ, и со архимандритомъ Уневскимъ Анастасіемъ водлугъ жалобы его росправилъ, не выговляючися никакими причинами, конечно, абы еси того иначе не вчинилъ. Естли жъ бы еси передъ нами на тотъ рокъ стати и со архимандритомъ росправити не хотѣлъ о томъ, вѣдай, ижъ мы съ тымъ такъ вчинимъ водлугъ розказанья господарьского и права нашего духовного. Писанъ въ Новогородку, року Божьего нароченья 1555, мѣсяца Іюля 20 дня.

Подлинникъ, хранящійся въ Львовскомъ Ставропигиальномъ архивѣ, писанъ на листѣ, современною скорописью, съ титлами, безъ строчныхъ знаковъ. Лѣтосчисленіе церковными буквами. Въ концѣ грамоты собственноручная митрополитъ подпись: волею Божьею Макарій архіепископъ митрополитъ Кіевскіи и Галицкіи и всея Руси. Ниже скрипка дѣлка: Мартинъ. Печать подъ кустодією, съ неявственнымъ оттискомъ. Ветха.

Доставлена въ Археографическую Коммисію, въ списокъ, корреспондентомъ г. Зубрицкимъ.

15.—1555 Октября 11. Позывная грамота Кіевскому митрополиту Макарію, о явкѣ на королевскій судъ, для расправы, по

№ 16. жалобъ на него Львовскаго епископа Арсенія, о присвоеніи Уневскаго монастыря.

Жигимонтъ Августъ, Божію милостію король Польскій, великій князь Литовскій, Русскій, Прускій, Жомойтскій, Мазовецкій и иныхъ, архіепископу митрополиту Киевскому и Галицкому и всея Руси Макарію. Жаловалъ намъ владыка митрополи Галицкоу Львовскій и Каменца Подольскаго Арсеній, о томъ, ижъ который монастырь Унівскій первый сего отъ короля его милости славной памяти Жигимонта, пана отца нашего, къ епископии его есть приданъ и привилеямъ его королевскоу милости уфундованъ: ино дей черницы монастыря тамошняго немалые противности ему чинячи, ни въ чомъ послушни его быти не хотятъ, о чомъ онъ первый сего, хотячи съ ними росправу принять, позвы нашими ихъ передъ насъ къ праву позывалъ; гдыжъ мы не беручи того на розсудокъ нашъ, до тебе, яко до старшого пастыря, ихъ съ тымъ отослали; и гды дей за тымъ отосланьемъ нашимъ, за позвы твоими, имъ обьемъ сторонамъ рокъ передъ тобою къ той справѣ стати припалъ, онъ дей на рокъ припалый, самъ (для иныхъ справъ тоу епископии своее) быти не могучи, умопованого своего сына Василя на оный рокъ къ росправѣ съ тыми черницами до твоей милости присылалъ, а отъ черниковъ дей того монастыря архимандритъ Анастасій отъ всее братьи самъ передъ тобою ся становилъ; и кды дей умопованный сынъ его Василей, зъ архимандритомъ въ право вступаючи, привилей его королевскоу милости пана отца нашего, которымъ тотъ монастырь къ епископии его есть уфундованъ, передъ тобою покладалъ, ты дей того привилія и фундату пана отца нашего слухати не хотѣлъ, и, касуючи его, а выймуючи оный монастырь Унівскій отъ епископии его подъ владность и послушенство свое, листъ свой судебный на то имъ далъ, къ немалой кривдѣ и ущипку тоу епископии его и надъ привилей нашъ: о чомъ

онъ съ тобою очивисто мовити хочеть. — Прото, абы твоя милость передъ нами къ праву сталъ, и листы право свое, што бы еси къ тому мѣлъ, передъ нами положилъ и на томъ ся съ нимъ росправилъ, на роки пришлые судовые, на семую субботу въ року пятдесять шостомъ отъ насъ зложонные. Писанъ у Вилни, лѣта Божьего нароженья 1555, мѣсяца Октября 11 дня.

Подлинникъ писанъ на бумажномъ листѣ, сплошною скорописью, безъ знаковъ препинанія. Внизу грамоты приложена печать Литовскаго княжества, подъ кустодією. Тамъ же скръпа: Остаеи, маршалокъ и писарь. На оборотѣ отпѣчено позднѣйшимъ почеркомъ: Мандатъ по митрополита Макаря о монастырь Уневскій.

Хранится въ архивѣ бывшихъ Греко-Унитскихъ Митрополитовъ, при Святѣйшемъ Синодѣ.

16. — 1555 въ Ноябрь. Дополнительная статья къ Статуту, о доходахъ земскимъ судьямъ, писарямъ и вознымъ отъ судебныхъ дѣлъ.

Што ся дотычетъ доходу судьямъ, писарю и вознымъ, то ся такъ заховывати маеть. Судьямъ пересуду, отъ звычайу давного, по половинѣ, то есть, отъ копы грошей три грошы, а отъ презыску десяти грошей, полгроша. Писарю: отъ позвовъ двухъ на рѣчь одну два грошы; отъ записанья до книгъ по грошу; отъ выпису съ книгъ по шести грошей; за листъ заручный о здоровьѣ и опослѣ права чотыри грошы; за листъ упоминальный два грошы. Вознымъ устава маеть быти: въ какой-кольве справѣ судебной земской, буде возный съ права посланъ, або отъ кого будетъ взятъ, на каждую милю маеть данъ быти ему одинъ грошъ; отъ огляданья равъ шляхетскихъ кровавыхъ и синихъ два грошы, отъ хлопскихъ и мѣщанскихъ, акін-кольве раны, по грошу; а естли мѣщанинъ радоу мѣстскимъ былъ, гдѣ права мають мѣстскіи свои, яко отъ шляхты маеть быти брано. Отъ присяги каждоу,

гдѣ будетъ возный доглядати, маеть ему быти дано два грошы. Отъ шляхтича забитого по шести грошей.

Изъ Актовыхъ книгъ Слонимскаго Уезднаго Суда. На переплетѣ манускрипта вытиснуто: księgi ssądu ziemsskiego powiatu Słonimsskiego, roku 1555.

17. — 1556 Марта 25. Перемирная грамота Царя и великаго князя Московскаго Іоанна Васильевича съ Польскимъ королемъ Сигизмундомъ Августомъ, на шесть лѣтъ.

Мы великій государь Иванъ, Божіею милостію царь и великій князь всеа Руси, Владимирскій, Московскій, Новгородскій, Казанскій, Астараханскій, Псковскій, Рязанскій, Тверскій, Югорскій, Пермскій, Вятскій, Богарьскій и иныхъ, и всеа Сибирскіе земли повелитель. Что присылалъ до насъ ты братъ нашъ, великій государь Жигимонтъ Августъ, Божіею милостію король Польскій и великій князь Литовскій, Русскій, Прускій, и Жомойтскій, и Мазовецкій и иныхъ, пословъ своихъ великихъ, князя Стефана Андрѣевича Збаражского, воеводу Витебского, да пана Яна Шимковича, маршалка и писаря, старосту Тыкочинского, да писаря Венцлава Николаева, секретаря и державца Скерстомонского, о миру и о доброй смолѣ, и то межъ насъ съ тобою братомъ нашимъ, съ великимъ государемъ Жигимонтомъ Августомъ, королемъ и великимъ княземъ, нынѣ не ссталоса; и наши бояре намъ били челомъ и просили насъ, чтобы намъ съ тобою братомъ нашимъ взяти перемирье на шесть лѣтъ, на то, чтобы межъ насъ кровь христьянская не проливалася, и что намъ въ тѣ перемирные лѣта межъ себя рати и войны не замышляти, а слати бы намъ въ тѣ лѣта межъ себя, на обѣ стороны, своихъ великихъ пословъ, которые бѣ межъ насъ могли тѣ дѣла дѣлати. И мы съ тобою братомъ своимъ, съ великимъ государемъ Жи-

гимонтомъ Августомъ, королемъ и великимъ княземъ, перемирье взяли на шесть лѣтъ, отъ Благовѣщеньева дни лѣта семь тысячъ шестьдесятъ четвертаго до Благовѣщеньева же дни лѣта семь тысячъ семьдесятнаго, на то, что тебѣ брату нашему, великому государю Жигимонту Августу королю и великому князю Литовскому и Русскому, въ тѣ перемирные лѣта, въ шесть лѣтъ, нашихъ земель не воевати, ни зацѣпляти ничѣмъ: Московскіе земли, и Новгорода Великаго, и волостей Ноугородцкихъ и Ноугородцкіе земли всее, и Пскова и Псковскіе земли всее, и города Себѣжа и волости Сѣбежскіе, и Тверскіе земли всее, и Переславля Рязанского и Рязанскіе земли всее, и Пронска и Пронскіе земли всее, не воевати, ни зацѣпляти ничѣмъ. Также тебѣ брату нашему, великому государю Жигимонту Августу, королю и великому князю Литовскому и Русскому, и тѣхъ нашихъ городовъ и волостей и земель не воевати и ни зацѣпляти ничѣмъ въ тѣ перемирные лѣта, въ шесть лѣтъ: города Рыска съ волостми, города Путивля съ волостми, города Новогородка Сѣверского съ волостми, города Радогоща съ волостми, города Чернигова съ волостми, города Стародуба съ волостми, города Почепа съ волостми, города Поповы Горы съ волостми, и волостей, Залѣсья, Бабичъ, Свѣтиловичъ, Голодна, Скарбовичъ, Лапичъ; города Карачева съ волостми, и волостей, Хотимля, Сновска, Хоробора, Мглина, Дрокова, города Трубческа съ волостми, города Мосалска съ волостми, города Серпѣйска съ волостми, и волостей, Замошья, Тухачева, Дечны, Ооминичъ, Погостища, Мошины, Дѣмены, Городечны, Ужеперети, Снопота, Ковылы, Шуи, Лазорева городища, Ближевичъ, Любуни, Даниловичъ; города Брянска съ волостми, и волостей, Соловьевичъ, Прикладней, Пацыни, Оедоровского, Осовика, Покиничъ, Сухоря, Всеславля, Вороничъ, Жерыни; города Рославля съ волостми, а рубежъ городу Росла-

№ 17. влю со Мстиславемъ: промежъ Словнева да Шибнева къ Гнѣвкову, Доброю рѣчкою на Водонось, а отъ Водоноса Доброю же рѣчкою въ Острѣ, черезъ великій боръ въ рѣку въ Шумячю, къ Стрѣкулѣ, къ рубежу Кричевскому; а отъ Кричева городу Рославлю рубежъ рѣка Шумяча, а Шумячею въ рѣку въ Немелицу, а изъ Немелицы старымъ рубежемъ къ Заборю, въ Ипутъ рѣку, да внизъ Ипутю къ Хмѣлю; города Смоленска съ путми и съ волостми что къ нему тянетъ, и волостей, Еловца, Болваничъ, Лазоревщины, Пустоселья, Романовского, Копотковичъ, Молохвы все что къ ней потягло, и Петровского держанія, Кутева, Звѣровичъ, Дубровенского пути, Катыни, Каспли, Порѣчья, Руды, Шучь; а рубежъ Смоленску и волостемъ Смоленскимъ съ Дубровною, и съ Романовымъ, и съ Горами и со Мстиславемъ: отъ Днѣпра ниже города Смоленска, рѣкою Мереею вверхъ, межи Пречистые, Взруба и Звѣровичъ, въ Иваку рѣку, а изъ Иваки на Елинскій рубежъ да въ Городню, а Городнею въ Вехру въ Черной Мохъ, а изъ Вехры въ Прудилну, а изъ Прудилны въ Желѣзницу, а Желѣзницею подъ Дуденки въ Вехру, а изъ Вехры въ Лютую воду, и изъ Лютые воды въ Выпино, а изъ Выпина въ Сожъ, а Сожемъ на низъ въ Березыню, а Березынею вверхъ сухомъ промежъ селъ Почина и Гладковичъ по холмю, а оттолъ къ Кулневу; а за рѣкою за Днѣпромъ рубежъ Смоленску, внизъ по Днѣпру по рѣкѣ, ниже Клементя святого пять верстъ; города Мценска съ волостми, и городища Дмитровца, города Мещеска съ волостми, города Опакова съ волостми, и волостей, Залидова, Недоходова, Бышковичъ, Лычина; города Вязмы и волостей Вяземскихъ всѣхъ, что къ Вязмѣ потягло; города Дорогобужа и волостей Дорогобужскихъ всѣхъ, что къ нему потягло изъ старины; города Бѣлые съ волостми, и волостей, Верховья, и Болшевы, и Шептова, и Моневидовы слободы; и города Торопца и всѣхъ Торопет-

скихъ волостей, и города Велижа и Велижскихъ волостей; а рубежъ Торопцу и Торопетскимъ волостемъ и Велижскимъ волостемъ, Данкову, Любутъ, Дубнѣ, Рожнѣ, Турѣ, Бибереви, Старцовѣ, Нежелской, Плавѣтцкой, Жишетцкой, Озерской, Казариновской, и Новгородскимъ волостемъ, Лукамъ Великимъ, и Пуповичомъ, и Ржевѣ, и городу Острю, и городу Заволочю, и волостемъ Долысь и Березаю, Невлю, Усваю, Ловцу, Веснѣ, Бологу, и Холмскому погосту, и Велижѣ, и Лопастямъ, и Буйцу и инымъ волостемъ, всей землѣ Новгородской, съ вашею землею съ Литовскою и съ Полочаны и съ Видбляны, земли и водѣ, по старымъ рубежемъ. А мнѣ великому государю Ивану, Божіею милостию царю и великому князю всеа Русіи, твоихъ великого государя Жигимонта Августа, короля Польского и великого князя Литовского и Русского, земель не воевати, ни зацѣпляти ничѣмъ въ тѣ перемирные лѣта, въ шесть лѣтъ: города Кіева съ волостми, города Канева съ волостми, города Черкасъ съ волостми, города Житомеря съ волостми, города Вручѣ съ волостми, города Любеча съ волостми, города Гомѣ съ волостми, и селѣ, Уваровичѣ, Телешевичѣ, Тереничѣ, Кошелева Лѣсу, Морозовичѣ, Липиничѣ, Полѣшанѣ; города Турова съ волостми, города Мозыри съ волостми, да волостей, Бича, Брягина, Рѣчицы, Горволя, Стрѣшина, Чичерска, Пропойска, Могилева, города Мстиславля съ волостми и волости Хотславичъ; города Кричева съ волостми, города Дубровны съ волостми, и волостей, Горѣ и Романова, и города Орши съ волостми, и волостей, Любавичъ и Микулина; города Витебска и волостей, Бруса, Дречихъ Лукъ, Свята, Озерищъ; города Полотцка и волостей, Мошниковъ, Дрисы, Освія, Нешерды, Непоротовичъ, Вербиловы слободы, Кубка, Вязма, Клина, Ситнянъ, Листны, Замошья, Истца, Неведрея, не воевати, ни зацѣпляти ничѣмъ въ тѣ перемирные лѣта. А кого ты братъ нашъ,

великій государь Жигимонтъ Августъ, Божьею милостию король и великій князь, пошлешь къ намъ своихъ пословъ, и тѣмъ твоимъ посломъ приѣхати къ намъ и отъѣхати добровольно, безо всякіе зацѣпки; также кого мы пошлемъ къ тебѣ своихъ пословъ, и нашимъ посломъ по вашимъ землямъ къ вамъ добровольно приѣхати и отъѣхати, безо всякихъ зацѣпокъ. А вашимъ купцомъ изо всѣхъ вашихъ земель во всѣ наши земли приѣхати со всякимъ товаромъ и торговати на всякой товаръ, а приѣхати имъ и отъѣхати добровольно, безо всякихъ зацѣпокъ; а нашимъ купцомъ изо всѣхъ нашихъ земель во всѣ ваши земли приѣхати со всякимъ товаромъ и торговати на всякой товаръ, а приѣхати имъ и отъѣхати добровольно, безо всякихъ зацѣпокъ. Также которые твои послы пойдутъ къ тебѣ черезъ наши земли, и гости съ ними, или опричь пословъ гости пойдутъ къ тебѣ черезъ наши земли съ какимъ товаромъ ни буди: и намъ у тѣхъ пословъ и гостей товару не отнимати, а пропускати намъ къ тебѣ пословъ и гостей со всякимъ товаромъ черезъ свои земли безо всякіе зацѣпки; также наши послы и гости куды ни пойдутъ, отъ насъ или къ намъ, черезъ твои земли съ какимъ товаромъ ни буди: и тебѣ у тѣхъ нашихъ пословъ и гостей товару не отнимати, а пропускати тебѣ къ намъ нашихъ пословъ и гостей со всякимъ товаромъ черезъ свои земли безо всякихъ зацѣпокъ. А которые послы отъ иныхъ государей, откуда ни буди, пойдутъ къ намъ черезъ твои земли, и гости съ ними съ какимъ товаромъ ни буди, или опричь пословъ гости пойдутъ къ намъ съ какимъ товаромъ ни буди: и вамъ у тѣхъ пословъ и гостей товару не отнимати, а пропускати вамъ къ намъ тѣхъ пословъ и гостей со всякимъ товаромъ черезъ свои земли безо всякихъ зацѣпокъ; также которые послы отъ иныхъ государей, откуда ни буди, пойдутъ къ вамъ черезъ наши земли, и гости съ ними съ какимъ товаромъ ни буди: и намъ у тѣхъ

пословъ и гостей товару не отнимати, а пропускати намъ къ тебѣ тѣхъ пословъ, и гостей со всякимъ товаромъ, черезъ свои земли безо всякихъ зацѣпокъ. А въ тѣ перемирные лѣта какова учинитца обида межъ нашихъ князей и людей, въ земляхъ и въ водахъ и въ иныхъ въ какихъ въ обидныхъ дѣлѣхъ, и наши князи и намѣстники и волостели украинные, сослався, да тѣмъ обиднымъ дѣломъ всякимъ управу учинятъ на обѣ стороны; а въ какихъ обидныхъ дѣлѣхъ наши князи и намѣстники и волостели не учинятъ управы: и намъ о томъ сослати судей, и они, съхався, да тѣмъ обиднымъ дѣломъ всѣмъ управу учинятъ на обѣ стороны, безъ хитрости. А татя, бѣглеца, холопа, робу, должника, по исправъ выдати, а даное, положевое, заемное, поручное отдати. А отойдутъ по сѣмъ перемирнымъ грамотамъ межъ насъ урочные лѣта и розмирица межъ насъ учинитца, а въ ту пору которые твоей земли купцы или послы прилучатца въ нашихъ земляхъ: и намъ тѣхъ вашихъ купцовъ и пословъ не порубати, ни статковъ у нихъ не отнимати, а отпустить намъ ихъ всѣхъ добровольно со всѣми ихъ ссатки; а которые наши послы, или купцы прилучатца въ ту пору въ твоихъ земляхъ, и тебѣ нашихъ пословъ и купцовъ также не порубати и не имати, ни животовъ ихъ у нихъ не отнимати, а отпустить ихъ всѣхъ добровольно со всѣми ихъ животы. А на томъ на всемъ, какъ въ сей перемирной грамотѣ писано, мы великій государь Иванъ, Божіею милостию царь и великій князь всеа Русіи, Володимирскій, Московскій, Новгородскій, Казанскій, Астраханскій, Псковскій, Резанскій, Тверскій, Югорскій, Пермскій, Вятскій, Болгарскій и иныхъ, и всея Сибирскіе земли повелитель, цѣловали есмя крестъ тебѣ брату нашему, великому государю Жигимонту Августу, Божіею милостию королю Польскому и великому князю Литовскому, Русскому, и Прусскому, и Жемойтскому, и Мазовецкому и иныхъ, на

№ 17.

№ 18 томъ, что намъ по сей перемирной грамотѣ
— 19. до тѣхъ урочныхъ шти лѣтъ тотъ миръ держати крѣпко, по тому какъ въ сей перемирной грамотѣ писано. Писана на Москвѣ, лѣта 7000 шестьдесятъ четвертаго.

Подлинникъ писанъ на пергаминамъ листъ, длиною 15, шириною 13½ вершковъ, скорописью.

На оборотѣ, внизу, современнымъ Западно-Русскимъ почеркомъ отмѣчено: Листъ перемирный, черезъ князя Збарзского, воеводу Витебского и товаришковъ его, посла... отъ князя Московского, на... лѣтъ, отъ лѣта 7064, и тоже по Польски. Внизу грамоты, на шелковомъ малиновомъ шнуркѣ привѣшена большая государственная печать изъ красной мастики. На лицевой сторонѣ, внизу же, написано: ex musaeo Petri Dubrowsky.

Хранится въ Императорской Публичной Библиотецѣ.

18. — 1556 или позже Августа 28. Письмо Новгородскаго воеводы Павла Сопѣги Кіевскому митрополиту Силвестру, съ изъясненіемъ готовности ходатайствовать за него предъ королевемъ.

Велебный, велможный господине, отче митрополите! Што ваша милость рачилъ послать служебника своего Еска въ справахъ своихъ къ его королевской милости, а такъ я што-мъ дали-богъ могъ, тамъ въ тыхъ потребахъ вашей милости помогаль, якожъ и служебнику вашей милости пану Еску то свѣдомо, што дали-богъ, и до конца вашей милости помогати буду: нижли, ижъ служебникъ вашей милости мѣлъ справу пилную до Новагородка, для того ѣхалъ, а вѣдѣже я, яко-мъ ся вашей милости обѣщалъ, такъ и до конца вашей милости помогати буду, такъ, яко ваша милость при справедливости своей, дали-богъ, оставленъ быти рачишъ. О томъ ваша милость рачи вѣдать. Притомъ дай пане Боже вашей милости доброе здоровье и шастливое панование на много лѣтъ фортунныхъ, того я вашей милости вѣрнѣ отъ пана Бога мѣтъ зычу,

яко отцу моему, мнѣ милостиве ласкавому. За тымъ ся милостивою ласцѣй вашей милости за-лецамъ, съ котороѣ, прошу, абыхъ не былъ опущонъ. Писанъ у Вильни, мѣсяца Августа 28 дня. — «Павелъ Ивановичъ Сопѣга, воевода Новгородскій, вашей милости низко чоломъ бьетъ.»

Подлинникъ писанъ на бумажномъ полулистѣ, скорописью, съ титлами, безъ знаковъ строчныхъ. Бывъ сложенъ и запечатанъ перстневою печатью, имѣетъ на пакетѣ надпись: Велебному, велможному преосвященному архіепископу митрополиту Кіевскому и Галицкому и всея Руси, киръ Селивестру.

Хранится въ архивѣ бывшихъ Греко-Уни-тскихъ Митрополитовъ, при Святѣйшемъ Синодѣ.

19. — 1557 Апрѣля 1 и Октября 20, и 1558 Мая и Іюня 20. Уставы о управленіи королевскихъ волостей, съ дополнительными къ нимъ статьями.

I. — Устава на волоки господара короля его милости во всемъ великомъ князествѣ Литовскомъ, лѣта Божого нароженя 1557, Апрѣля 1 дня.

1. О боярахъ путныхъ и о служкахъ. Бояре путные, стародавние, а не вѣкупные хочемъ мѣти, абы были на двухъ волокахъ постановлены, съ которыхъ бы за вси повинности, пѣнязми ошачовавши водлѣ кгрунту, яко люди осадные платили, а на службу тяглую и въ подводы ходити повинни; а коли зъ розказанья нашего на дорогу поѣдутъ, того году ничего платити не мають, а безъ воли и розказанья нашего, вряду нашему ихъ на дорогу и пигдѣ не посылати; а будучи на дорожѣ, служити имъ по старому: навязка имъ, яко и передъ тымъ, водлѣ статуту. Служокъ съ такихъ же бояръ ревизоры обирати, и не болшъ, только съ потребу, при каждомъ замку и дворѣ нашемъ оставити мають; которыхъ служба будетъ ѣздити зъ листы нашими

до дворовъ тому вряду прилеглыхъ, и съ пѣнязми платовъ нашихъ до Вильни, до скарбу, и за кривдами подданныхъ колеею зъ розказанья вядового ѣздити; а за то имъ на одинъ конь двѣ волоки вольныхъ отъ всихъ платовъ мѣти, и на потребу вряду ѣздити не повинни.

2. О бортяхъ. Ижъ первѣй бортеве розность въ роботахъ отъ иныхъ подданныхъ нашихъ мѣли, и теперъ ихъ заставляемъ, абы водлѣ шацунку кгрунтовъ, за вси повинности, цыншы, овсы и сѣна пѣнязми зъ волокъ до скарбу нашего платили, яко и осадники; а коли имъ на войну ити кажемъ, мають мѣти тотъ рокъ вольный ото всихъ платовъ; а мосты имъ повинные зарабатывать, и тежъ за розказаньемъ и листомъ нашимъ, мосты имъ и неповинные мостити мають, а за то имъ фолькгу въ цыншахъ нашихъ дѣлати кажемъ, водлѣ воли наше.

3. О конюхахъ сѣделныхъ и иныхъ. Конюхи сѣделные альбо дворные мають мѣти по двѣ волоки вольныхъ на службу конюшескую, на которой коли будутъ, маеть быти дано имъ на страву и на вси потребы грошей копъ чотыри на рокъ; а которые на службѣ не будутъ, мають платити съ каждоѣ волоки по томужъ, яко и бортеве.

4. О стрѣльцахъ. Стрѣльцомъ нашимъ по двѣ волоки вольные маеть быти дано, а третюю на цыншу, хто похочетъ; а служба ихъ зъ розказаньемъ нашимъ въ ловы и на войну.

5. О слугахъ дворныхъ. Одверные и иные слуги дворные, мѣшкаючи на послугахъ нашихъ, мають мѣти по двѣ волоки вольныхъ отъ всихъ платовъ и повинностей; а которые на службахъ нашихъ не будутъ, абы платили съ каждоѣ волоки пѣнязми водлѣ кгрунту, ошачовавши вси повинности; а естли бы зѣстарѣвшися на службахъ нашихъ, дома мѣшкали, таковымъ обѣ — двѣ волоки вольныхъ мѣти, вѣдѣже олийжъ за листомъ нашимъ господарскимъ.

Акт. Зап. Росс. Томъ III.

6. О осочникахъ. Ревизоръ зъ лѣсничимъ № 19. маеть осочниковъ обирати, а не болшъ, одно съ потребу при пушахъ и ловѣхъ нашихъ становити, и то намъ господарю ознати, а на службу имъ по двѣ волоки давати вольныхъ отъ цыншу и всякихъ потяглей.

7. О войтахъ. На селахъ войтове мають мѣти по одной волоцѣ вольной; а похочетъ ли, маеть ему и другая быти придана на цыншу, ошачовавши вси повинности и доходы водлѣ кгрунту. А служба ихъ то: зъ розказанья вядового, людей на роботу, тежъ съ цыншы и съ платы нашими выгоняти, и при отдаванью платовъ быти; подданныхъ нашихъ къ праву вмѣсто дѣцкаго передъ урядомъ ставити; при роботахъ всякихъ вмѣсто пристава надъ людьми войтовства своего стояти; при отвоженью овсовъ и сѣнъ до Вильни и индѣ, зъ людьми войтовства своего ѣздити и ихъ отдавати; переоры волокъ пустыхъ и нанятыхъ, стѣны границы и копцы на каждый рокъ межи подданными нашими поправовати и поновляти, подъ виною, копою грошей; а гдѣ бы отъ которого сусѣда видѣлъ копцы альбо границы показоны, маеть то вряду оповѣдати, подъ тоюжъ виною. А судити вряду подданныхъ о всемъ дня торгового, кромѣ причины кровавоѣ и кгвалтовноѣ: о такой винѣ коли жъ кольвекъ повелитъ урядъ ставити къ праву подданого, войтъ повиненъ; а который бы съ подданныхъ войта послушенъ не былъ, а за позваньемъ его передъ урядомъ не сталъ: по такового своевольного вряду дѣцкаго послати маеть, и отъ непослушнаго дѣцкованья на мило въ обѣ стороны грошъ. А при судѣ войту быти, и справедливости подданому допوماتи. Винѣ нашихъ вѣдомость мѣти и ревизоромъ оповѣдати, и того стеречи, абы вряду винѣ и пересудовъ надъ уставу не бралъ; а естли бы за мовеньемъ его, вряду того не пересталъ, маеть то войтъ ревизору оповѣдати. А войта вряду о всякую вину судити, только войтовства у него не отнимати, ажъ посполу

19. зъ ревизоромъ дознавши вину и неслучную справу его, и, того скинувши войта, иньшого уставити, мужа тобжъ волости, неподозрѣного, на которого подданные звать. Которые войтове и тежъ лавники по селамъ судовъ жадныхъ судити, поклоновъ вымогати и вымысловъ надъ подданными чинити не мають, подъ виною до скарбу нашего, рублемъ грошей: одно, обачивши гдѣ — кольве шкodu нашу господарскую, урядови або ревизору оповѣдати, ничего не закрываючи, подъ тоужъ виною. А коли войтовство кому дають, присьгати ему ненадобъ, кгдажъ вже вина на войта описана. А откуповъ урядъ съ подданныхъ за роботу брати не маеть, а гдѣ жъ бы бралъ, войтъ маеть то ревизору оповѣдати, подъ виною, коною грошей. А естли бы войтъ волоку пустую кому нанялъ, альбо отъ уряду нанятую передъ ревизоромъ утаилъ, тогда за то скарати его, яко злодѣя, горломъ. А у войтовство каждому маеть бити придано волокъ сто, альбо большъ, водлѣ прилеглости, хотя два и три сѣла и большъ злучити. А для резо-знанья межъ подданныхъ, войтъ маеть мѣти шнуръ однаковъ мѣры, справленый и досвѣ-ченный, и часу мокрого, альбо сухого, завжды его лихтовати и досвѣтчати; и, естли подданный одинъ другому межъ переорѣтъ и сказать, ино вридану на кону не вѣдити и проѣзду не брати, але войтъ межъ направить и возметъ на томъ, хто ее сказалъ, на вридъ дванадцать грошей, а собѣ за працу чотыри грошы. А вина битая, правомъ переведеная, дванадцать грошей, а хотябъ не переведена и за обжа-лованьемъ поеднана, таковая жъ вина. А естли бой станеться, а не жалуючи вриду поеднаются: тая вина шесть грошей, хто еднаеть, и объявити того вридови войтъ и лавники повинни, подъ виною, коною грошей.

8. Лавники въ селахъ по два и по три, альбо и большъ, подлѣ великости села, мають бити становлены, люди неподозрѣные, вѣры год-

ные, которыхъ повинность шкодъ межъ подданныхъ въ испасехъ и въ иньшихъ рѣчехъ оглѣдати, а за працу лавнику оглядного отъ шкoды грѣшъ; за тымъ же грошомъ, то што ему оказывано, справедливъ, подъ присьгою передъ урядомъ сознавати повиненъ; а посвѣтчати ли несправедливъ, ино карати его, за слухнымъ доводомъ, яко кривоприсяжца, горломъ. А безчестья лавнику рубль грошей. Нижли отъ потяглей и всякихъ повинностей съ подданными зъ волокъ своихъ вызволены бити не мають.

9. О мѣстѣхъ и ихъ повинностяхъ. Мѣста упривилъеванные привилъевъ своихъ уживати будутъ; а которые не вызволены отъ платовъ, мають платити: зъ волоки грунту преднего цыншу 50 грошей, а зъ среднего кгрунту 40 грошей, а зъ подлого 30 грошей, а со всякого кгрунту за толоки по 12 грошей; а зъ домовъ въ рынку, отъ прута по пол — 8 пѣнязи, а въ улицахъ отъ прута 5 пѣнязей, зъ огородовъ въ мѣстѣ отъ прута пол — 3 пѣнязя, а зъ гуменныхъ пляцовъ на предмѣстью отъ прута одинъ пенязъ, а отъ моркгу 3 грошы, а иньшихъ повинностей полнити, и стацыи давати, и зъ листы нашими и вриданковъ нашихъ вѣдити неповинни. А войту мѣстскому при болшомъ мѣстѣ по волокъ, а при меншомъ по полволоки ревизорове наши давати мають, за што они повинни будутъ порядку въ мѣстѣхъ и пожитковъ нашихъ примножати и доглѣдати, на подводы складатися и платити всимъ по тому, яко въ особливой уставъ нашей описано.

10. Капцизна однакова по всему великому князѣству Литовскому маеть бити брана, то есть: отъ меду копа грошей, отъ пива копа грошей, отъ горѣлки 30 грошей; а при отбиранью капцизны и вписыванью въ реистръ, хто ново врииметь вридъ, не большъ брати маеть, только отъ меду и отъ пива по чотыри пѣнязи, отъ горѣлки 2 пѣнязи, отъ волоки 12 пѣнязей; а хто шинку и волоки не маеть,

тотъ отъ воротъ маеть дати 2 пѣнязи; а обачивши лѣпшый пожитокъ зъ наймованья шинку, вольно будетъ кому хотя наняти, або тымъ же мѣщаномъ, за вѣдомостью подскарбїа нашего.

11. Рѣзники вси въ мѣстѣхъ нашихъ абы ся вписывали въ реистръ ревизора, а въ небытности его, на вридъ; съ которыхъ на насъ маеть бити брано въ каждый годъ: за камень лоу по 15 грошей, а особно на вридъ, за лопатку отъ каждого быдлати пѣнязми дня торгового, то есть, за воловую и яловичью грошъ 1, а за вепровую 5 пѣнязей, а за баранью, козью, телячью по три пѣнязи, а писчого отъ камня лоу, то есть, отъ пятнадцати грошей на вридъ по 2 пѣнязи. Даемъ тежъ вольность всимъ подданнымъ нашимъ, и чым-колькобъ будъ, абы дня торгового возили до мѣстъ, на торгъ, мясо всякого быдлати бигого, почавши отъ дня святого Балтромаея ажъ до мясонушту, а торговое на вридъ также мають давати пѣнязми, а большъ ничего. А хто бы мясо здохлого, шаленого и уродоватого быдла на пролажу привозилъ, а то на него слушныя переведено будетъ, водлѣ права, того скарати горломъ, яко фалшера; для чогожъ подданные наши, быючи быдла въ селѣхъ, мають оказывати лавникомъ, а хто-колькобъ мясо на торгъ везетъ, тотъ и шкуру быдла того забитого зъ собою взяти маеть, для подозрѣнья въ злодѣйствѣ.

12. Коморники въ мѣстѣхъ бити мають, которые жадныхъ работъ на насъ, ани на вридъ нашъ дѣлати не мають, одно, ижъ торговъ и вольностей мѣстскихъ уживають, и доглѣдати, абы тежъ ни хто поблуднѣ и безъ вѣдомости вриду на кгрунтѣхъ нашихъ немѣшкалъ; а мають давати въ каждый годъ до скарбу нашего по 2 грошы: и про то вридови мають господарскіе коморники, приимуючи, оповѣдати, для того,

ижбы межъ такими збрoднѣ въ мѣстѣхъ не *м* 10. была (*).

13. Корчмы покутные конечи по селамъ абы не были, для злодѣйства и иньшихъ збытковъ, што вридъ заборонати маеть водлѣ статуту; также пива абы ни хто съ подданными нашихъ на селахъ варити не смѣлъ, подъ виною копы грошей на насъ: бо съ того многіе зъ нихъ въ распустность и въ убожество приходятъ. Вѣдьже въ каждомъ войтовствѣ, въ слушномъ селѣ, зваща при гостинцу, можетъ бити корчма за вѣдомостью вриду альбо ревизора постановлена, одно такъ, яко бы капцизна наша не гинула, съ которою подданнымъ нашимъ кгрунтовъ щичковныхъ уживати незаборонно.

14. Торги нигдѣ новыя подлѣ мѣстъ нашихъ ближе трехъ миль, къ переказъ мѣстомъ и торгомъ нашимъ абы не были, окромъ торговъ старыхъ: тыи по давному бити мають.

15. Цыншу зъ волоки сельскоу кгрунту доброго 24 грошъ, зъ середнего 12 грошей, съ подлого 8 грошей, а зъ вельми подлого песковатого альбо болотистого 6 грошей; овса зъ волоки доброго и середнего кгрунту по двѣ бочки, а съ подлого одна бочка; а естли пѣнязми за овесъ казано будетъ давати, ино за каждую бочку 5 грошей, а за отвозъ бочки кождоу 5 же грошей; съ тыхъ же менованныхъ кгрунтовъ, съ кождоу волоки сѣна возъ одинъ, альбо 3 грошы за сѣно и за отвозъ 2 грошы; а зъ вельми подлого кгрунту сѣна и овса давати неповинни, нижли съ кождоу волоки всякого кгрунту мають давати: гусь, альбо полтора гроша, куръ двое, або пѣнязей 16, яиць двадцать, або пѣнязей 4, на неводы грошей два, за стацыю грошей полтретя; а коли стацыю кажемъ брати, ино одинъ разъ въ годъ, за тые пѣнязи, мають давати съ тридцати волокъ яловицу одну, бараны два, и съ кождоу волоки

(*) Видно, что въ этой статьѣ смыслъ испорченъ отъ ошибокъ или пропусковъ переписчика.

№ 19. по куряти и по десяти яицъ, а пѣнязей вже того году за стацію не мають давати.

16. *Робота тяглымъ людямъ* съ каждоѣ во- локи по два дни на недѣлю, а толоки чотыри лѣтъ, съ чимъ скажутъ, за што маєтъ быти отпушена имъ работа о Божьемъ Нароженъи тыждень, о мясопустѣхъ тыждень, о Вели- ко-дни тыждень. А которыхъ на роботу не надобъ, ино ихъ на осадъ посадити, и будутъ давати съ каждого кгрунту осады грошей 30, толокъ 12, або за толоки грошей 12, а за кгвал- ты первоустановленные жыта бочка, альбо гро- шей 10; и вже такіе осадники робити ничего неповинни, кромъ сѣна, роздѣливши на вой- товства тяглые и осадные сѣножати ровно, и то имъ зробити и въ часть спрятати. А зъ за- стѣнковъ тая повинность: гдѣ волока полная быти не можетъ, ино отъ моркгу кгрунту доброго грошей 3 и пѣнязи 4, а зъ среднего моркгу грошей 3, а зъ подлого грошей 2, а зъ велми подлого пол-2 гроша; а зъ волоки сѣ- ножатноѣ, гдѣ могутъ быти дрова и проробки, зъ сѣножати добрые 50 грошей, а зъ середніе 30 грошей, а съ подлые 20 грошей, а зъ велми подлые болотливые або песковатые 15 грошей. А ижъ вже подданные наши на тыхъ платѣхъ и повинностехъ волочныхъ суть осажены и постановлены, про то жадныхъ стацій да- вати, а ни подниманья чинити на послы наши и чужоземскіе неповинни.

17. *Огородники* при дворѣхъ нашихъ мають быти, даючи каждому по три моркги земли, а имъ съ того служити по одному дню въ тыждень пѣшо, а жоны ихъ, лѣтъ, не болшъ, одно шесть дней до жнива, альбо до полотья будутъ повинни.

18. Овсы *дяколные* подданные наши воло- стные зъ волокъ мають отвозити до Вильни, до лововъ, до портовъ и до иныхъ дворовъ нашихъ, гдѣ кажемъ, за 20 миль, а сѣно за 15 миль; а къ тому еще сѣна дворного съ каж- доѣ волоки по возу одному отвезти повинни, гдѣ имъ будетъ розказано; а коли дворныхъ сѣнъ и

овсовъ съ потребу на наши кони быти можетъ, тогды пѣнязми за сѣно и овесъ заплатити. А отдаючи овсы дяколные, не мають въ иншую мѣру, только въ бочку отдавати, въ которой чотыри корцы Краковскихъ, подъ стрыхъ, безъ верху и топтанья, а большъ имъ не на- добъ платити, только вписного въ реистръ отъ бочки овса пѣнязь; и колько хто откуль сѣнъ и овсовъ прійметъ, маєтъ съ того квити- вати, не беручи за квити ничего. А коли по- треба наша укажетъ сѣна и овсы гдѣ-колле провадити въ таковыя далекіе мѣста, яко вы- шей описано, до портовъ и индѣ до дворовъ и до лововъ, о томъ за-часъ о святомъ Бал- тромею, отънастъ, альбо съ скарбу черезъ листъ вѣдомо учинити вриадникомъ нашимъ, а съ того не вымовлятися всимъ подданнымъ на- шимъ, и въ Жомойти и въ Подляской земли. А ижъ за отвозъ овса платятъ подданные отъ двухъ бочокъ по 10 грошей за 20 миль, то за каждую милю прійдетъ по полгрошку: тогды таковымъ, хто до Вильни, альбо гдѣ-колле уставичнѣ овсовъ не возятъ, а будетъ на то имъ розказанье наше; ино, колько миль до пор- ту, альбо гдѣ индѣ тотъ овесъ провадити бу- дутъ, такъ много имъ зъ отвозныхъ пѣнязей отпустить, за милю отъ каждоѣ бочки по пол- третья пѣнязя, а остаткомъ тыхъ пѣнязей от- возныхъ наймовати судины, на отправажене водою тыхъ овсовъ до Вильни, альбо гдѣ по- треба наша укажетъ; а которые уставичнѣ овсы возятъ, ино и того остатку отвозовъ на нихъ не брати.

19. *Серебщизна* на подданныхъ нашихъ абы николи отъ воловъ и клячъ не брана, одно зъ волокъ, ино съ каждоѣ волоки, не ужи- ваючи розности кгрунту, доброго и подлого; а зъ Рускихъ волостей серебщизна по старому, и тамъ, гдѣ помѣры пѣтъ.

20. *Робота* подданнымъ черезъ войта маєтъ быти заказана дня недѣльного, съ чимъ и на который день люди до работы прійти мають, и войтъ тогожъ дня людямъ закажетъ роботу:

и который человекъ не выйдетъ на работу, ино за первый день огурного заплатитъ грошъ, а за другій день барана; а коли и въ третій разъ огурится, або за пьянствомъ не выйдетъ, ино бичемъ на лавцѣ скарати, а дни повин- ные велѣти заробити. А вѣдѣже, гдѣ бы зъ якоѣ пригоды не могъ подданный выйти на работу, онъ маєтъ черезъ сусѣда, альбо лав- ника вриадю оповѣдати, а вриадъ порозумѣвши слухную причину, не маєтъ его никоторою съ тыхъ виною казнити, а иншого дня заро- бити ему повинное, што змѣшкаль; а не отку- патися отъ работы никому.

21. Пустыхъ волокъ подданнымъ не пахати, а который не вписавшись въ реистръ смѣетъ то чинити, збожѣ до гумна нашего тратитъ и вины рубль грошей до скарбу нашего за- платитъ.

22. А становитися къ работѣ подданнымъ якъ слонце всходитъ, а сойти зъ работы якъ слонцу заходити. А отпочивку тымъ што съ быдломъ рѣбятъ, передъ ѣбдомъ година, въ полудню година, надъ вечеромъ година; а ко- торые пѣшо рѣбятъ, тымъ отпочивку въ тые- жъ часы, одно по полгодинины маєтъ быти, а то лѣтъ на великомъ дни отпочиненье. А хто рано на работу не выйдетъ за огурствомъ, таковой другого дня только часовъ, колько омѣшкаль, заробити маєтъ.

23. *Фолварки* хочемъ мѣти, абы вездѣ ста- новлены были, а наболши быти могутъ при кождыхъ замкахъ и дворѣхъ нашихъ, окромъ, гдѣ бы кгрунты злые и непожиточные были; и таковыя казати людьми осажати, оставивши на вриадъ въ каждомъ поли по одной волоцѣ, а то вриадъ огородники и своимъ быдломъ за- робити маєтъ, а къ тому моргъ земли на ого- родъ, съ чого личьбы чинити и платити не- повиннѣтъ.

24. Урядъ нашъ *гумно* въ пильной опатро- сти мѣти маєтъ, яко бы въ немъ ни въ чомъ шкоды намъ не было; а отъ збожѣ ужатья вся- кого маєтъ мѣти на себе третій снопъ, отдав-

ши первый десятину и засѣявши пашню нашу; № 19. а умолоту всякого збожѣ ревизорове наши у-во всехъ гумнахъ при дворахъ нашихъ про- бовати мають, и того доглядати и научати, абы вездѣ зъ выбоемъ и безъ опилку збожѣ молочены были. А продаванье збожѣ гумен- ного маєтъ быти на личьбѣ принято, по чомъ вриадникъ положить, яко продавати: для того для всехъ подданныхъ мають быти бочки тор- говые въ мѣстѣхъ, въ дворѣхъ и гумнахъ на- шихъ, въ селахъ и на всехъ гостинцахъ, од- наковъ мѣры, по чотыри корцы Краковскихъ, которыхъ корцовъ на тотъ часъ десять въ полубочку Виленьскомъ, и тою жъ мѣрою про- давати и засѣвати пашню зъ гумна, и такіе бочки держати подъ клейномъ однакимъ. А въ гумнѣхъ нашихъ маєтъ быти гуменникъ, подданный нашъ въ тойже волости осѣлый, человекъ добрый, справный, неподозрѣный, который на тую службу гуменную маєтъ мѣти волоку, отъ цыншовъ и всякихъ иныхъ пла- товъ, работъ и повинностей вольную. А около засѣванья пашни урядъ маєтъ пильность чи- нити, абы вси были засѣваны; а гдѣ бы кото- рый за небалостью не засѣялъ, а либо тежъ пашню кому наймоваль, а то бы ся слушитъ передъ ревизоромъ оказало: таковой маєтъ дати съ каждого моргу незасѣяного, або кому нанятого по десяти копъ збожѣ, о чомъ съ пильностью ревизорове мають ся доведывати отъ войтовъ, лавниковъ и иныхъ подла- ныхъ нашихъ. Вѣдѣже, гдѣ бы въ которомъ году неврожай былъ, а такъ много, чимъ бы пашню засѣяти, не нажалъ, маєтъ о то по науку послати до подскарбьего нашего за-часу, и подскарбій маєтъ ему казати старымъ збо- жьемъ засѣвати; а гдѣ бы не было, ино за пѣ- нязи цыншовые куповати, альбо зъ иншого двора прибавляти, абы ся тымъ николи паш- ни наши не зменьшивали. А зъ гумна нашего жита въ отсопъ не давати, одно въ лѣты го- лодные, и то алижъ за нашимъ альбо под- скарбьего нашего листомъ; а дати то на волю

№ 19. подданныхъ, всхотятъ ли у копахъ, альбо молочнымъ житомъ брати. Евви тежъ, гдѣ бы врядъ розумѣлъ быти не потребные, маеть зъ гумна нашего выкинути, кгдажъ на было и на стадо солома отъ збожя не зъ евы молочного пожиточнѣйшая естъ; а гдѣ бы евы мѣти была потреба, тамъ поодаь отъ стодолъ и скиртъ, у гумнѣхъ нашихъ и подданныхъ, для небезпечности отъ огня, мають быти дѣланы. А на зароблене пашни, на каждую волоку, абы было оставлено по семи волокъ ослыхъ подданныхъ нашихъ, зъ волю и зъ клячами, поблизъ двора и пашни, которые по два дни въ тыждень служити мають, съ чимъ урядъ роскажетъ.

25. О оборъ быдла всякого и о рыкуняхъ. При каждомъ фольварку нашомъ хотимъ мѣти дворнички, то естъ, рыкуни порадные, которыми на рокъ, за працу ихъ, зъ нашихъ пѣнязей по двѣ копѣ грошей маеть быти давано отъ уряду, а три бочки жыта зъ гумна нашего и четвертая съ третьего снопа вранничого, на выхованье: для чого при каждомъ фольварку нашомъ мають ховати принамѣтъ до двадцати коровъ; а если бы такъ много не было, ино зъ гуменныхъ пѣнезей купити, колько можетъ который дворъ выховати, и то передъ ревизоромъ оказати; и маеть врядъ въ дозрѣнью и доброй опатрности было дворное мѣти, а до скарбу нашего отъ коровы дойные не большъ платити, только двадцать грошей, а отъ овцы староѣ за волну на рокъ одинъ грошъ, а отъ молодое по полугрошку, а приплодки въ реистръ писати и вѣдомости при личьбѣ чинити; а гдѣ дойные овцы и козы быти могутъ, маеть съ таковыхъ ревизоръ платъ становити, и урядъ дворничокъ къ тому принуждати маеть, абы и съ того пожитокъ былъ, кгдажъ то на многихъ мѣстцахъ за добрымъ дозрѣнемъ быти можетъ. А гдѣ бы колько у рыкуни невѣсть альбо дѣвокъ была потреба, то ревизоръ постановити маеть во дѣ великости быдла; которымъ урядъ съ пѣнязей

нашихъ наемъ платити маеть. А старое было, овцы и козы продаючи, пѣнязи до скарбу нашего отдавати, а згожое, звлаща поблизу, до кухни наше отсылати; а которое быдла здохнетъ, ино за шкуру воловую 5 грошей, за коровью 3 гроши, а съ иншого дробного быдла здохлого за шкуру не платити до скарбу: ни жли съ свирѣпъ стадныхъ шкуръ не продаючи оказывати конюшному нашему дворному. А то все ревизорове мають въ бачности мѣти, и на мѣстцу при пописыванью обороу, въ реистры писати, для того, абы не было забавенѣ при личьбѣ.

26. Огороды дворные абы были вездѣ розмѣрены, съ которыхъ врядъ маеть давати до скарбу съ каждого моргу по 12 грошей; а съ коновель дворныхъ вже не повинно неводовъ робити; а если бы огородныхъ рѣчей до кухни наше потреба была, тогда то врядъ маеть отсылати, гдѣ будетъ росказанье наше, а пѣнязи вже не будетъ повиненъ платити.

27. Урядники наши отробившися отъ пашни, въ осень и на веснѣ, ставы и сажавки подданными будовати мають, а пѣнязей гуменныхъ, и за рыбы и съ продаванья старого быдла брачныхъ могутъ выдати до двадцати копѣ на наемники и на грабары до такоѣ работы, а коли ревизоръ приѣдетъ, тую роботу и накладъ ему окажутъ; а гдѣ бы мѣстцо на ставъ большого накладу потребовало, то ревизоръ оглядѣвши, маеть намъ повѣдѣти, и зъ нашего росказанья будетъ справовати таковыя sprawy; а за працу враннику съ каждого ставу при спустѣ десятая рыба, ни жли не спущати ставовъ безъ нашего вѣданья; а въ спустныхъ ставѣхъ врядъ и ни кто иный никакою сътью рыбы ловити не мають, подѣ карностью строгою. А гдѣ при ставѣхъ могутъ быти млыны и фольюши, альбо млыны на руду, маеть врядъ казати будовати, звычаемъ тымъ яко ся заховываетъ, намовившися зъ ревизоромъ. А млынаромъ третья мѣрка зъ млива, и волоку одну имъ давати, а двѣ мѣрки на пожитокъ скарбу нашего; и съ тоѣ третіе мѣрки повиненъ млы-

нарь до работы млына и спустовъ мистромъ быти, и оправовати, и квалтовъ стеречи и съ помощью подданныхъ гамовати, желѣзо и вси потребы до млына своимъ накладомъ маеть справовати; а съ волоки до замку альбо двора, которому послушенъ, одинъ день въ тыждень теседьскою работою служити. А который млынарь въ злодѣйствѣ будетъ досвѣтченъ, таковой маеть отпадати права млынарьского и отъ млына, а вѣдѣже олижъ зъ явного суда поконанный; а гдѣ бы что вонтпливого въ таковомъ судѣ около справы млынарьской было, маеть врядъ иныхъ млынаровъ къ тому вѣзвати, и, взявши порозумѣнье отъ нихъ, такъ млынаря осудити.

28. Съна зъ дворныхъ сѣножатей на врядъ нашъ даемъ пятый возъ, также пятую стирту, альбо оборогъ, ровно кладучи нашъ и врандовый; але врядъ маеть съ нильностью причинятися, абы сѣножати дворные не залегали, и зарослыя выправованы и въ часъ покошены были; а гдѣ бы иначе, и намъ бы въ томъ шкода ся дѣяла, тогда врядъ маеть то намъ нагородити зъ своего пятого веза, чого ревизоръ пильнѣ дозрѣти маеть.

29. Гдѣ кони въ дворѣхъ нашихъ стоятъ, ино што на тые кони и машталеры при нихъ выдано будетъ, яко въ нашомъ, альбо конюшого нашего листѣ оброкъ имъ на тыждень описанъ будетъ, за квитомъ машталерскимъ, подѣ печатью шляхтича, чоловіка доброго, одного альбо двухъ, и то на личьбѣ приняти: вѣдѣже вранники наши мають въ дозрѣнни своемъ мѣти, абы овсы и сѣна на сторону не шли, и при нашихъ конѣхъ машталеры своихъ коней не ховали бы; а гдѣ посланецъ нашъ при конѣхъ будетъ, тогда отъ того за его печатью, а не отъ машталера квитъ взяти, и што бы тежъ врядъ на уздѣнницы, попонки и на иншыя потребы коней нашихъ пѣнязей выдалъ, а то ся на квитъ посланца або машталерскомъ оказетъ, и то также на личьбѣ ему приняти.

30. О листѣхъ на данину. Абы и тымъ, № 19. кому што зъ ласки наше бываетъ дано, трудности при чиненью личьбы не было: про то, кому што отъ которого двора нашего даемъ, державца або тивунъ оный листъ нашъ, за которымъ поступити даное маеть, въ реистръ свой вписати повиненъ, и кгда при личьбѣ оказетъ, то маеть быти принято; а вѣдѣже подскарбій о таковыхъ данинахъ маеть въ канцлярии нашей вѣдомость брати, и, если не згодитъ ся копѣя того листу съ метрикою канцлярійскою, повиненъ будетъ вранничъ шкоду намъ оправити, або оный листъ, за которымъ поступилъ, оказати.

31. Платы, цыншы, серебншны, и вси иншыя деходы съ подданныхъ нашихъ, отъ уряду и ихъ намѣстниковъ ни гдѣ видѣ не мають быти браны, только въ дворѣхъ нашихъ, а гдѣ дворовъ нашихъ нѣтъ, ино въ мѣстѣхъ, або на селѣ, на одномъ мѣстцу, въ господѣ, не поѣздаючи и не посылаючи на села а ни въ дома войтовъ, подѣ ласкою нашою, чого ревизорове съ нильностью довѣдыватися мають. Которые цыншы и всякіе платы подданные во всихъ замкахъ и волостяхъ нашихъ мають почати давати до врану своего на день святого Михаила, и такъ будутъ отдавати, за наоминаньемъ войта своего, ажъ до святого Мартина, каждый при своемъ войтѣ; а хто не отдастъ до менованого дня, войтъ, за росказаньемъ вранничимъ, маеть такого ставити передъ урядомъ, а врядъ довѣдавшися, ижъ онъ могучи заплатити податокъ, за недбалостью не платитъ, маеть его до вязенья осадити, поколь заплатитъ, а дѣцкованья не брати на немъ, только одинъ грошъ поколодного. А воловъ и коней за цыншъ и ни за што иное не грабити николи. А который чоловікъ не можетъ податокъ заплатити за тыми причинами, то естъ, за пожогою, за вымеретьемъ або за хворобою всего дому, за голодомъ, за побитьемъ граду и за убожествомъ: такового кгда войтъ поставитъ, урядъ отъ войта и

№ 19. лавниковъ и сусѣдовъ его того вѣдомость взявши, маеть еще послати до его дому довѣдаться достаточнѣ, и будетъ справедливо то, такового маеть въ реистрѣ вписати, и, при личбѣ въ скарбѣ, оповѣдати, за которою причиною не могъ отдати; а подскарбій нашъ, при личбѣ, маеть то отложить на вывѣданье ревизора, который ревизоръ тогожъ году, которого личбы починаются, маеть быти посланъ, и вывѣданье чинити отъ войтовъ и подданныхъ сусѣдовъ того, хто не отдалъ; а довѣдавшись такъ неотданныхъ платовъ (яко и волокъ пустыхъ, и всихъ рѣчей, што бы зъ личбы на квитѣхъ до вывѣданья описано, и тежъ ужатъ гумна въ томъ лѣтѣ), маеть свой листъ дати на то, чого ся довѣдаетъ около рѣчей зъ личбы описанныхъ; а тотъ листъ его будетъ мощный, яко и скарбный квитъ въ той рѣчи, и на другой личбѣ, въ скарбѣ, за оказаньемъ того листа ревизорского, маеть быти принято все, што въ немъ описано.

32. А часу выбиранья доходовъ нашихъ, долговъ своихъ никто на подданныхъ нашихъ справовати не маеть.

33. О дняхъ личбамъ назначеныхъ, и о писарѣхъ скарбныхъ, и абы врядъ пѣнязей при собѣ не задерживалъ. Къ тому хотимъ мѣти, абы врядники въ пожиткахъ нашихъ такъ заховали ся, а платы и доходы, што-кольвекъ можетъ быти выбрано, отдавали въ скарбъ нашъ первѣй свята Божьего Нароженья; а отдавши пѣнязи, врядникъ маеть взяти квитъ отъ подскарбьего въ личбѣ, альбо отъ писаря скарбного, за который квитъ не мають большъ брати въ скарбѣ, только два грошы; а можетъ ли и личбу учинити на тотъ же часъ, маеть быти слуханъ, и по личбѣ чого справятся, квитовати такового. А пѣнязи и личбу отбрати на замку нашомъ (гдѣ домъ зъ ро-сказанья нашего указанъ будетъ), а брати личбу по реистромъ и уставъ ревизорской, а тамъ гдѣ ревизоръ не былъ, ино по первой уставъ. А певные часы врядникомъ

всѣмъ чинити личбу складаемъ отъ нового лѣта.

Напервѣй, личба починается Генваря первого дня съ земли Жомойтской, съ тивунствъ и съ державъ тамошнихъ, то есть: съ Плотель, съ Телшъ, зъ Биржанъ, зъ Бирженянь, съ Тверы, зъ Кгондинки, зъ Дирванъ обѣюхъ половицъ, зъ Ужвенты, зъ Ретова, зъ Шовдовъ, съ Поюрѣ обѣюхъ половицъ, зъ Вешвани, зъ Ойраколы, съ Коршова, а доконаются дня 15 тогожъ мѣсяца. 16-го дня Генваря почнутъ личбы зъ Велены, съ Керстомони, зъ Росіены, зъ Ясвойни, зъ Вилькен, съ Крожъ, съ Ботокъ и со всея волости Упитской, кгдажъ тамъ фолварковъ нѣтъ, а доконаются дня 1 Февраля. 2-го дня Февраля почнутъ личбы зъ восковничого Виленского, съ ключа Луцкого и со всихъ мытъ Волинскихъ и Подляскихъ и Рускихъ съ корчмами, съ Ковенскихъ мытъ и Жомойтскихъ, а доконаются личбы 23 дня, у вилю святого Матѣя. А потомъ, Февраля 24 дня почнутъ личбы зъ замковъ и дворовъ Троцкого повѣту: съ Берестѣя, зъ Милейчи, зъ Мелника, зъ Лосичъ, зъ Дорогичина, и съ подымного съ Каменца, съ городка Высокого, съ Тыкочина, съ Кнышина, зъ Забѣля, а доконаются 6 дня Марта. 7-го дня тогожъ мѣсяца Марта почнутъ личбы: со Мстибогова, зъ Зелвы, зъ Вольны, зъ Волковыска, и зъ войтовства тамошняго зъ Лыскова, зъ Межирѣча, зъ Слонимского старства, зъ Лососиные, зъ Байковичъ, а доконаются Марта 17 дня. Тогожъ мѣсяца 18 дня почнутъ личбы съ Бѣлицы, съ Ожы, съ Перелома и зъ неводничества, съ Перевалки, зъ Василишокъ, зъ Острыни, зъ Мереча и съ фолварковъ тамошнихъ, съ Коневы, съ Дубичъ, зъ Радуні, зъ Ейшишокъ, зъ Воронъ, зъ Волкиникъ и Лепунъ, а доконаются Марта 28 дня. Тогожъ дня почнутъ личбы зъ Олиты съ фолварковъ и неводничества тамошняго, зъ Ситна, съ Берштанъ, съ Дорсунишокъ, съ Ковна, зъ

Румшишокъ, съ Кормялова, зъ Сомилишокъ, зъ Жижморъ, зъ Жослей, съ тивунства, съ городничества и съ ключа Троцкого, съ капцизны мѣста тамошняго и съ капцизны мѣста Городенского, а доконаются личбы съ Троцкого повѣту до дня 7 Апріля. 8-го дня мѣсяца Апріля почнутъ личбы съ замковъ и съ дворовъ повѣту Виленского, зъ Бряславля, съ Друи, и съ неводничества тамошнихъ, зъ Дисны, зъ Довкглялишокъ зъ неводничествомъ, зъ Ляховичъ, зъ Айны, съ Красного села, зъ Маркова, зъ Мядела, зъ Лебедева, зъ Дуниловичъ, съ Ушьполь, съ Пенянь, зъ Абелы, съ Утены, зъ Оникштъ, зъ Вилкомира, зъ Воложина, зъ Болникъ, а доконаются тогожъ мѣсяца 21 дня. Апріля 22 дня почнутъ личбы зъ Лиды, съ Трабъ, зъ Кгеранонинъ и съ фолварковъ, съ тивунства, съ неводничества, съ городничества, съ ключа и съ капцизны Виленскоѣ, съ капцизны Новгородскоѣ и отъ права Майтборского тамошняго, съ капцизны Цериньскоѣ и зъ мѣста Менского, съ Крева, зъ Ошмяны, зъ Медникъ, зъ Любова, зъ Рокантишокъ, зъ Виршунъ и зъ млына Виленского, а доконаются личбы повѣту Виленского Мая 5 дня. 6-го дня мѣсяца Мая почнутъ личбы зъ волостей Русскихъ, напервѣй зъ Рѣчицы, зъ Мозыря, съ Бобруйска, съ Чичерска, съ Пропойска, зо Мстислава, зо Ршы, зъ Любеча, а доконаются 18 дня тогожъ мѣсяца. 19-го дня Мая почнутъ личбы зъ Гомѣя, зъ Глуска, зъ Могилева, зъ Свислочи, съ Борисова, зъ Любошанъ отъ права Майтборского, и зъ бобровичества Полоцкого, а доконаются личбы зъ волостей Рускихъ остатнего дня тогожъ мѣсяца Мая. А иные дворы, которые кгда будутъ влучоны въ тую справу, мають ити въ личбѣ тыхъ дней и въ тыежъ повѣты, каждый къ которому належитъ, и въ тыхъ часѣхъ назначеныхъ каждый урядникъ маеть личбы отдавати первого дня, яко котрымъ державамъ писано къ личбѣ становити и оказати ся подскарбію нашому, а подскарбій

маеть розказати писаромъ скарбнымъ ихъ отъ правовати и личбу брати, ничимъ не задерживаючи.

34. Про то хотимъ мѣти двухъ писаровъ скарбныхъ на пріймованье личбы, которые ижбы одностайнѣ, однакою мощью и згодливо брали личбу, кому подскарбій отпраовати розкажетъ, пыльнѣ доглядючи пожитковъ нашихъ, а маючи реистры прошлой личбы; и въ чомъ бы вонтпливость альбо шкоду бачили, не мають того никому замолчивати, але подскарбію оповѣдати, а подскарбій намъ, и во всемъ послушенство абы чинили къ подскарбію и всякіе sprawy нигдѣ индѣ, одно къ нему доносили, также и реистры личбы съ-одного складаючи, къ подскарбію приносяти мають. А безъ вѣдома подскарбія, писари скарбные яко личбы, такъ и пѣнязей пріймовати не мають. А за квиты абы большъ не брали дѣяки скарбные, только по 12 грошей, и не давали бы розныхъ квитовъ, ино вси доходы и пожитки одного двора съ фолварки, а потомъ гумна со всѣмъ господарствомъ на одномъ листѣ выписавши, и въ чомъ бы ся урядникъ усправедливилъ прошлой личбы (што на ревизора оставлено было), со всего одинъ квитъ дати; и въ томъ же квитѣ описывати, гдѣ въ которомъ урядѣ што прибавлено, а што зменьшило пожитковъ, и за писанье квитовъ тыхъ дѣяки не мають большъ брати, только 12 грошей, хотя бы на аркушу цѣломъ и болшей писано было, то всего за одинъ квитъ грошей 14. А надъ то, таковымъ писаромъ скарбнымъ, зъ ласки нашея, зъ скарбу давати на годъ, за ихъ службу и на страву, каждому зъ нихъ по 160 копъ грошей и по 15 локотъ одомашки, а на ихъ слуги и дѣякомъ обоемъ по поставу сукна колтрышоваго. Тыежъ писари скарбные не мають ся забавляти своими потребами въ тые часы личбамъ назначеные, абы ничимъ продолженье и омѣшканье не было въ отправѣ личбы; а естли бы писари скарбные, за которыми своими потре-

№ 19. бами, альбо вымыслами, въ который день личбы не брали, альбо личбу и скарбные пѣязи безъ воли и вѣдома подскарбія пріймовали, и послушенства къ старшему своему не чинили, а намъ бы отъ того забавенье въ скарбныхъ дѣлѣхъ належало: ино о томъ маеть подскарбіи доносить до насъ, хто въ чомъ коли будетъ дознавъ, ижъ вымышляючи, пожитокъ съ того собѣ учинилъ и продолжилъ личбы, и то намъ объявити подскарбіи вѣнень, а мы, вину его дознавши, съ тымъ учинимъ што будетъ воля наша. Вѣдъже, кгда тые писари все то, што бы они видѣли и разумѣли шкоднаго въ пожиткахъ нашихъ и потребнаго къ вѣдомости нашей подскарбію объявлять, подскарбіи намъ объявити вѣнень: и што будетъ воля наша, то имъ ознанить, а они по тому, яко имъ подскарбіи именемъ нашимъ скажетъ, мають справовати ся. А кгда бы подскарбіи того занѣхалъ и намъ не оновѣдалъ, тогда тые писари наши мають то намъ доносить и оповѣдати, водлѣ присяги свое и повинности къ намъ нану своему.

35. Тежъ опатруючи, абы никто платовъ нашихъ при собѣ не задерживалъ и личбу чинилъ на часы назначоны, про то такъ постановляемъ: съ котораго бы вряду пѣязи до Божьего Нароженья въ скарбъ нашъ были не отданы, о таковомъ врядику, якого стану будъ, по Божьему Нароженью подскарбіи оповѣдавши намъ, а зъ волею и за листомъ нашимъ, маеть вослати дворянина въ имѣнье его, што бы за оную сумму стояло; и естли тое имѣнье ему заставить въ суммѣ, альбо къ которому двору прилучить, маеть ся въ томъ водлѣ розказанья нашего заховати; и вже таковымъ вымова не будетъ пушона на спустошенье, згорѣнье, вымеретье и убожество на волокахъ подданныхъ, але всю сумму сполна олижъ заплатитъ, тогда тое свое имѣнье зъ рукъ у заставника возметъ. А кгда бы маетность его за то не стояла, а будетъ безъ быт-

ности наше, ино подскарбіи его заговати маеть до науки наше, альбо поколѣ оную сумму всю сполна заплатитъ, а то для того, ижъ въ недбалость рѣчь нашу господарскую и земского скарбу положилъ, и не отдалъ того, што—кольве выбрати могъ; ино, на комъ не могъ взяти (яко на уставѣ описано, ижъ «неможнымъ, кто бы не мѣлъ чимъ заплатити, абы обтяженье не было»), про то, маючи такъ много часу замѣреного, мѣлъ его въ реистръ вписати, а што выбралъ, то было отдавати передъ рокомъ и дбати въ рѣчи скарбу нашего; а далѣй то будетъ на воли нашей, што съ такимъ недбалымъ врядиномъ чинити. Гдѣ бы тежъ который урядникъ личбы на часъ назначонный не пылцовалъ, хотя пѣязи въ скарбъ отдавши, ино постерегаючи своевольной недбалости, ижъ великое затрудненье въ скарбѣ дѣется, коли рокъ въ рокъ личбами входить: для того, по выистью менованого часу личбъ того повѣту, въ которомъ оный врьдъ лежитъ, маеть подскарбіи, также за вѣдомостью и листомъ нашимъ, въ имѣнье недбалого вослати и увязати ся за всю сумму зъ уряду его до скарбу належачую, и такъ долго держати тое имѣнье и пожитки зъ него до скарбу чинити, олижъ личбу вчинить и справитъ ся всего зъ уряду своего. А то чинити и всылати въ таковыи имѣнья, не продолживаючи часу, але бордзо послѣ року и часу менованого; а кгда увязанье дойдетъ, оный недбалый не можетъ личбу чинити, олижъ вси иньи личбы того року доконаются, тогда вжо его слухати въ личбѣ будутъ, и, што зъ личбы при немъ найдется, заплативши, имѣнье возметъ. Вѣдъже, хто бы зъ якой пригоды, згубы альбо згорѣнья реистровъ, або смерти или хоробы служебника, который платы отбиралъ, альбо самъ врядику умретъ ѣ жона або дѣти зостануть, и за иными квалтовными пригодами, не могъ пѣязей первѣй дня назначонного въ скарбъ дати, альбо личбу чинити: таковой каждый предѣся маеть стати

на часъ назначонный, альбо черезъ листъ оповѣдати приходу подскарбію, также змерлого жона, або дѣти; а подскарбіи порозумѣвши причинъ именованой, и естли будетъ слушна, маеть ознанити и зложити ему часть къ отдаванью пѣязей, альбо къ личбѣ, не даючи увязанья, а того вже часу не отмышкати, подъ обовязкомъ вверху помѣненнымъ.

36. О ревизорѣхъ, мѣрникахъ и о помѣрѣ волочной, и о селидбахъ подданныхъ. Ревизоры мають быти присяжные, люди добрые, сумѣнья побожного, ослыые, а не голоты, въ помѣрѣ волочной и въ господарствѣ добрѣ умѣлые, абы умѣли всего достаточнѣ и справедливо вывѣдати и указати пожитокъ нашъ врядови, въ чомъ ся можетъ причинити. Тежъ ревизоръ маеть доглядати и съ пыльностью доведыватися, абы никто зъ шаяхты и подданныхъ нашихъ въ руцахъ, на властныхъ грунтьхъ нашихъ проробковъ не чинили и никакъ къ собѣ не привлащали, и оповѣдати намъ того недбалого врядика, въ чьемъ бы ся то урядъ дѣяло. Тежъ ревизоры мають доглядати, абы отъ мѣрниковъ селидбы назначиваны были въ трезьемъ середнемъ поли; а гдѣ бы мѣрникъ того не вчинилъ, тогда самъ ревизоръ маеть назначити селидбы, а врьдъ маеть съ пыльностью примусити подданныхъ селитися на мѣстахъ назначонныхъ, чого тотъ же ревизоръ маеть доглядати, и всихъ справъ господарства врядового, естли слушнѣ а раднѣ справуются; а нераднаго и такового, который бы ся не водлѣ уставы и розказанья нашего справовалъ, маеть ревизоръ, подъ тоюжъ присягою, которою обязанъ, винного не закрывати, але намъ оповѣдати и довести того на него, а мы учинимъ съ тымъ, што ся слушнаго намъ повидитъ. Ревизоръ, гдѣ бы въ ревизии его помѣра еще не дошла, або непорадная была, маеть мѣти до каждого двора одного слугу мѣрника, черезъ которыхъ помѣру справовати будетъ; а плату такому слугѣ на годъ по де-

сати конъ грошей зъ скарбу нашего; а отъ № 19. помѣры знову, альбо перемеренья браги мають по десяти грошей съ кождою волоки, а гдѣ бы только ихъ поправляли, 2 грошы отъ волоки. А таковыи мѣрники естли бы ся неслушнѣ справовали и лѣнливо для своего пожитку мѣрили, за то ревизоръ самъ маеть отповѣдати. Естли бы тежъ до колька дворовъ нашихъ потреба мѣрниковъ была, ино одного уставити и дати три волоки ему вольныхъ ото всихъ повинностей, и зъ тому войтовство одно, а то учинити за нашимъ вѣдомомъ. А не иный хто обирати маеть таковыхъ мѣрниковъ, одно ревизоръ. А гдѣ помѣра поидеть, мають мѣрити всякій кгрунтъ, купленый и заставный, кгдажъ кметъ и вся его маетность наша есть; а писати кгрунтъ, яко велики волоки вдолжъ и поперекъ и на которыхъ мѣстахъ, и, естли бы съ причины лихого грунту наддатки чинили, то мають при томъ же описывати. А гдѣ могутъ быти волоки прогоняные, ино тамъ мѣрити въ три поля, въ каждое поле 11 моркговъ, то есть, у волоку 33 моркги зъ наддаткомъ; а не могутъ ли быти прогоняные волоки съ причинъ розныхъ, ино моркговати. А гдѣ безъ землянскихъ кгрунтовъ не выпростуются, таковыи земли беручи, нашими кгрунты мають отдавати, гдѣ бы земляномъ споручъ къ ихъ имѣньямъ, и равно, якимъ кгрунтомъ возмутъ и колько, такимъ и также много отдати; а гдѣ бы ся ровный кгрунтъ на отмѣну не трафилъ, ино за волоку кгрунту преднего среднимъ кгрунтомъ полторы волоки дати, а за волоку среднего кгрунту подлымъ двѣ дати, какъ ся то учинить, а за волоку кгрунту преднего дати подлого кгрунту три волоки. А гдѣ наддатокъ подлымъ, болотливый, або песковатымъ кгрунтомъ прійдетъ въ отмѣну дати, и то даемъ на пыльное уваженье уряду нашего, и ревизора и мѣрниковъ, абы намъ и тому, у кого берутъ, шкода не была; для чого отмѣна абы не была давана безъ уряду. Але хто бы таковой отмѣны,

№ 19. за упоромъ, пріймовати не хотѣлъ, мають зоставити такову отмѣну, уписавши до книгъ тогожъ уряду нашего, а врьдъ маєть напоянати его о бранѣ отмѣны; на чомъ естли бы не пересталъ и, намъ не обжаловавши, упоритъ стѣны волокамъ и границы казилъ, и въ оный кгрунтъ въ помѣру взятый вступовался: того врьдъ нашъ маєть моцно боронити, альбо правомъ кгвалту на таковомъ поискивати. Ревизоръ и мѣрники мають и на то бачность мѣти, абы къ прилеглимъ замкомъ и дворомъ села и всякіе кгрунты наши прилучали, яко къ которому двору ближе и споручъ, а вѣдѣже такъ, ижбы ся можности и широкости тыхъ врьдовъ таковымъ перемѣненіемъ въ подданныхъ и въ кгрунтѣхъ не зменшивало. Тыжежъ ревизоры и мѣрники мають ся довѣдывати, посполу зъ урядомъ, отъ войтовъ и отъ лавниковъ и подданныхъ, о земляхъ и всякихъ кгрунтѣхъ нашихъ затаеныхъ, або отъ когось забраныхъ, и то намъ господарю доносити и оповѣдати, водѣ присяги и повинности свое.

37. *О урядникахъ и ихъ намѣстникахъ.* Все урядники наши сами особами своими мають быти на врьдѣхъ своихъ, въ часъ пріѣхання ревизора, кромѣ пановъ радъ нашихъ, альбо тыхъ, которые поселствы и иньшими послугами нашими альбо потребами рѣчи посполитомъ обовязаны: вѣдѣже таковыя врьдникомъ альбо намѣстникомъ своимъ розказати повинны, абы всякое послушенство въ нашихъ пожиткахъ къ ревизоромъ и посланцомъ нашимъ мѣли, обо всемъ вѣдомость имъ давали, и въ чомъ бы ся яка шкода намъ, альбо кривда подданнымъ дѣяла, абы врьдникъ або намѣстникъ на врьдѣ во всемъ передъ ревизоромъ отказывалъ. А врьдники и намѣстники мають быти люди добрыя, вѣры годныя. А естли бы нашъ врьдникъ зъ своимъ намѣстникомъ, або зъ слугою, за прошеніемъ отъ войта або подданого, справедливости укривжоному подданому не учинилъ: ино, хотя бѣ того слуги не

было, повиненъ самъ панъ передъ ревизоромъ о тую кривду ему отказывати и съ права всказаное нагородити, а собѣ на томъ слугѣ шкоды доходити; а который бы врьдникъ о такую кривду не отповѣдалъ, альбо нагороджати кривды и шкоды подданнымъ не хотѣлъ: то маєть ревизоръ намъ господарю, а въ небытности насъ, подскарбію ознанити, не зѣзджаючи зъ оного врьду, и возметъ науку, яко ся въ томъ заховати.

38. *О доходахъ на урядѣ и о лежневѣхъ.* Во всехъ замкахъ и дворѣхъ нашихъ, гдѣ земли на волокы вже розмѣрены, даемъ зъ ласки наше господарское на врьдъ нашъ: платъ весь съ десятокъ волоки; кромѣ овса и сѣна третій снопъ зъ гуменъ нашихъ всякого, збожѣя; торговое и помѣрное все, и за лопатки пѣнязми дня торгового; десятая рыба при спущанью ставовъ; вина, коли который подданный на роботу не выйдеть, грошъ 1 за день, а за другій день барана; записного отъ волоки пѣнезей 14, а гдѣ на насъ овесъ отбирають, ино отъ бочки по пѣнезю; вижованья грошъ, отъ присяги 2 грошы, пересуду отъ копы грошей 3, дѣцкованье и помилное слугамъ; куница за дѣвкою и вдовою, коли до другою волости замужъ идетъ, грошей 12; по коллодного грошъ, зъ нивъ нашихъ третій грошъ, за скаженье межы 12 грошей. Нижли врьдъ нашъ за вины подданныхъ, заруки, и ни за што иное, лежневѣ въ дома, а ни тежъ по коледы великодныя, и пожитки вымышленныя, и о скаженье межъ, вѣзджати, а ни всылати на суды не маєть, чого ревизоръ пильнѣ стеречи и боронити повиненъ.

39. *О судеревныхъ лѣсахъ и пуцахъ, и о бобровыхъ гонѣхъ, и о бортехъ, сѣножатехъ и оступѣхъ, и о лѣсахъ розмѣренныхъ.* Есть нѣкоторые лѣсы, пушы и дубровы наши, до которыхъ зъ стародавна шляхта и подданные ихъ уступы и входы мають, восполокъ съ подданными нашими; о таковыхъ пуцахъ и лѣсахъ вси врьдники наши и ихъ намѣстники

мають ревизоромъ вѣдомость чинити, и сполнѣ а пильнѣ ся о томъ довѣдывати: хто, за якою справедливостію и яко много служобъ людей входы свои мають; и, вывѣдавши певнѣ, яко много того кгрунту мають, о томъ справу давати намъ: водѣ котороу вѣдомости, по великости и малости кгрунту нашего, комисаровъ зослати маемъ. А поколь комисары наши на то выѣдутъ, маєть урядъ подданнымъ розказати, уживати тыхъ кгрунтовъ по первому, абы съ держанья не были выпушоны, а пожитокъ до скарбу съ того множити: вѣдѣже, гдѣ бы споръ шолъ о рѣчь ровную, меньшую, альбо мало болшую, нижли о волоку, тогды таковыя рѣчи можетъ врьдъ съ ревизоромъ альбо съ помѣрчимъ кончати и становити, не ждучи зосланья комисаровъ отъ насъ, абы ся для такъ ровной рѣчи въ замкненью помѣры волокъ омѣшканье не сдѣяло; а врьдъ, яко повиненъ, съ пильностію маєть дозрѣти, ижбыхмо шкоды въ справедливости кгрунту нашего не мѣли. А лѣсы на волокы розмѣренныя, гдѣ годно, на пашню людми осажати и вольности маєть давати урядъ на пять, альбо на шесть лѣтъ, ажъ и до десяти, и то маєть быти тамъ гдѣ чорныя лѣсы и тяжкіе къ выробленью; и то даемъ на баченье врьдвое, а ревизоръ, пріѣхавши, вольность тую уважитъ и цыншъ постановитъ, по высѣденью воли платити, водѣ уставы. Вѣдѣже таковыя лѣсы, гдѣ бы на пашню згодитися не могли, помѣряючи, не мають прогоняти и прорубывати волокъ, одно въ-около обмѣривши и границы положивши пописати довгость и широкость шнуровъ, и сколько волокъ и моркговъ, яко ся вымѣритъ, и зморкговавши на реистры пописати; а вѣдѣже отъ таковоу помѣры меньши брати, то есть, отъ десяти моркговъ грошъ 1.

А гдѣ сѣножати въ пуцахъ нашихъ суть, ино врьдъ и лѣсничій мають давати вѣдомость ревизору, а ревизоръ маєть, гдѣ бы потреба была, до двора нашего таковыя сѣножати привернути, альбо межы подданныхъ на

платъ роздати; а подданные на косьбу вси, № 19. сколько ихъ поймутъ, однимъ разомъ мають ходити, оповѣдавшись лѣсничому. А ручницы, пса, рогатины и ничего, чимъ бы звѣря забилъ, не брати ему зъ собою. А гдѣ бы межы пушою болота и лѣсы, кгрунту на пашню годного меньши трехъ волокъ было, тамъ людей не садити, для злодѣйства и прокрадыванья мытъ, але на платы роздавати. А въ оступѣхъ и ловѣхъ нашихъ проробковъ и сѣножатей никому не мѣти, водѣ уставы.

Ловы и оступы въ пуцахъ нашихъ ревизоры зъ лѣсничими и тежъ съ осочниками, почавши отъ Бѣловезѣ ажъ до Ковна, порядкомъ слушнымъ росправити и росписати казати мають на розныя часы, для воляйшого перебуванья и вѣдомости о звѣру, и яко много до котороу оступу людей потреба, и о далекости оступовъ, мають съ пильностію межы собою то постановивши въ реистръ вписати и на врьдѣ зоставити, абы за вѣдомостію потребы певноу личбы людей, зъ далекыхъ волостей ихъ не гнано, кдыжъ и безъ того обойтися можно. А подданные наши тяглыя и осадные каждый зъ волокъ своихъ повинны будуть до оступовъ нашихъ пѣшо ходити и зъ возами ѣздити, а поколь въ ловѣхъ нашихъ мѣшкати будутъ, потолокъ на иньшыя работы ходити неповинны: але хлопята и старыя абы въ ловы не ходили. Къ тому тежъ врьдъ безъ вѣдомости листу и розказанья нашего, подданныхъ въ ловы выгоняти не маєть, подѣ ласкою нашою.

Бортное дерево наше все абы врьдъ въ своей вѣдомости мѣлъ, чого ревизорове доглядати мають. Дани тежъ медовыя водѣ старыхъ звычайевъ ити мають съ пушъ, а зъ ульевъ домовыхъ и зъ бортей на волокахъ жадець съ подданныхъ плату давати неповиненъ. А за борть шляхецкую, которая бы ся подданому у волокъ достала, такъ съ пчолами яко пустая, маєть быти заплаата водѣ статуту, то есть, за борть пустую 15 грошей, со пчолами 30 грошей; а хто бы заплааты при-

№ 19. няти не хотѣлъ, тому вольно борть свою зопня спустити и взяти.

А во всихъ нашихъ и обчихъ пушахъ, гдѣ передъ тымъ подданные наши бобры на насъ гонили, и теперь по первому гонити мають; а гдѣ бы ся въ рѣкахъ и въ озерахъ нашихъ ново бобры показали, и тамъ ловити мають, а за працу ихъ брати имъ бобра пятого, альбо почеревье отъ каждого бобра. А гдѣ подданные въ пусахъ нашихъ лазни для входовъ мають, при таковыхъ лазняхъ абы конечно быдла и собакъ не ховали, чого имъ врядникъ и лѣсничій боронити мають.

Вольность подданные до пуши наше, хотя жъ и головное, вѣдѣже не глубоко мають мѣти, по дрова, по хворостъ на гороженье, по дерево на будованье, по лыка на свою только потребу, а не на продажу; а гдѣ для оступовъ закажутъ имъ, ино поколь заграничатъ ревизорове, того уживати, и то такъ, абы на одномъ мѣстцѣ брали. А робатамъ малымъ и невѣстамъ губъ, овощу лѣсного всякого, ягодъ, и хмѣлю во всихъ пусахъ нашихъ не боронити. А на своихъ волокахъ подданнымъ вольно забити волка, лисицу, рыся, росомаху, зайца, бѣлку и иньшій звѣрь малый, также птахи всякіе, и продавати кому хочаи и не оповѣдаючи вряду, але серны и иньшого болшого звѣру не бити и на своихъ волокахъ; а особливо въ пусахъ и подъ пушами нашими ручницъ ховати и жадного звѣру ловити не мають, подъ горломъ.

40. Вольность подданнымъ до рѣкъ и озеръ нашихъ, рыбъ ловити крыгою, удою, броднемъ, тригубицею, оборомъ и иньшими малыми сѣтками, урядъ и неводничій не мають заборонити, нижли взовъ забивати не могутъ; а мѣсяца Апрѣля, Мая, Іюня ничимъ рыбъ не ловити въ озерахъ только, для множенья ихъ въ тыхъ мѣсяцахъ, чого урядъ и неводничій заборонити мають: вѣдѣже въ рѣкахъ волентъ завжды подданнымъ уловъ на рыбы.

41. Подданный убогій и недостаточный, ча-

совѣ голодныхъ, засѣявши пашню на зиму, кгда отходить кормитися, маеть оповѣдатися врядови при войтѣ, и указати убожество и недостатокъ свой, для чого то учинити муситъ; и у такового подданого домовство и засѣвокъ не маеть бити бранѣ, ажъ до святого Яна, а не вернетъ ли ся до того часу, тратитъ засѣвокъ и будетъ то все отдано иньшому, безъ поклону врядничаго. А который бы человекъ не оповѣдавшися вряднику при войтѣ утекъ зъ волоки, тую землю зо всимъ домовствомъ, што ся останеть, иньшому дати, а збѣглого самъ врядъ и черезъ войта искати мають; а гдѣ его найдутъ, а выдати не схотятъ, ино правомъ доходити. Пакъ ли самъ отходень послѣ часу назначеного, альбо збѣгъ, правомъ зысканный, любо и безъ права, вернется, таковыхъ на пустыхъ волокахъ осажати. А если за кривою отъ врядника и войта выйдетъ подданный, а потомъ прійдетъ назадъ, ревизоръ винности его маеть ся довѣдати и уважити причину, если припустити его къ засѣву и будованью, альбо ни.

42. Продати на волокъ будованье и домовство подданому вольно, передъ урядомъ, при войтѣ и лавникахъ; а тотъ хто купитъ, осадивши волоку свою, который бы дужъ потягли тягнути, можетъ умѣсть або на пустой волокъ сѣсти; и тотъ, хто купитъ, не маеть большъ дати врядникови, только 2 грошы и записного въ реистръ грошъ. А если въ томъ урядѣ нѣтъ мѣста и волоки пусто, ино ему до иньшого имѣнья нашего вольно ити, взявши листъ отъ уряду до того, куды ся переноситъ, ижъ добровольнѣ вышолъ, волоку осадивши, и въ томъ ему передъ урядомъ або войтомъ уиститися, што бы видѣ не шолъ, только до волости наше.

43. Вездѣ при сѣлахъ нашихъ волоки пустые, альбо не принятые и роздробленные врядъ и ревизоръ при бытности своей людьми добрыми осажати маеть, и нести въ реистръ, которого дня и часу ихъ пріймутъ; съ которыхъ

волокъ, поколь ся збудуетъ и волоку направитъ, до лѣтъ двухъ, альбо трехъ, не маеть большъ дати за вси повинности, только грошей 42, снявши жыто и ярину, а работы и подводъ и некоторыхъ потяглей не тягнути, поколь ся побудуетъ; а то на узнань врядовомъ и ревизорскомъ, если близко и лацно будованья досягнути можетъ; а приѣмного не брати большъ, только 2 грошы на державцу, а дѣяку грошъ. А никому пустыхъ волокъ, а ни сѣножатей на нихъ не наймовати, и за поклоны, а ни за скарбные доходы не давати пахати, никакимъ обычаемъ.

44. У подводы далекіе, альбо для будованья замковъ и дворовъ, подданные наши ходити повинны, и, водлѣ великости часу помѣшканья тамъ и далекости дороги, мають ся складати съ трехъ альбо съ чотырехъ волокъ на одинъ возъ, альбо на работника одного (а не маеть никто такихъ подводъ и работъ замышляти, олижъ за нашимъ листомъ); и за то будетъ отпушено подданнымъ съ платовъ, за волю нашу, водлѣ замѣшканья ихъ тамъ на той послужѣ нашей. А будованье, и воженье дерева, и подводы до дворовъ близкихъ и прилеглыхъ, то маеть бити на бачности вряду и ревизоровъ нашихъ: вѣдѣже, кгда бы што поважного робити мѣли, мають ся пытати у насъ, а въ небытности нашей у подскарбія нашего. А старостове и тивунове подводъ жадныхъ отъ подданныхъ нашихъ на свою потребу, а ни пріятелей своихъ брати не мають, подъ утратою вряду, а врядникъ гды бы ихъ бралъ на свою альбо чью иньшую потребу, горло тратитъ. А кгда врядъ ѣдетъ съ пѣязми до скарбу, до Вильни, тогда войтове, колеею, по року, каждый зъ войтовства своего подъ пѣязи подводу мають давати, то есть, подъ пятьсотъ копъ подводы двѣ, а подъ тысячу копъ подводъ чотыри; и которые съ подданныхъ съ пѣязми поѣдутъ, тымъ со всего войтовства того маеть бити складано, за кож-

дую милію отъ одного коня грошъ 1. Тымъ № 19. обычаемъ, не прійдетъ то въ другой волости на войтовство разъ въ кольку лѣтъхъ; што маеть бити въ Жомойти и во всемъ великомъ князствѣ Литовскомъ. А гдѣ бы тежъ за листомъ и росказаньемъ нашимъ, люди осадные збожья альбо товары лѣсные до портовъ возили, тогда имъ въ цыншахъ также фолкта маеть бити удѣлана.

45. Если бы подданные, за росказаньемъ нашимъ листовнымъ, камень возили, тогда имъ за то въ цыншахъ такожъ фолкта маеть бити удѣлана, водлѣ замѣшканья ихъ на той послужѣ нашей. А на спущенье дерева съ пуши Марковско, вси подданные наши волости тамоникѣ мають бити на тяглую службу поставлены, такъ яко Волкиницкіе, которые за дни имъ повиноватые дерево и дрова спущати до Вильни будутъ повинны; а гды бы тая волость водлѣ потребы наше тому досыть учинити не могла, мають бити на то отлучены люди отъ одного альбо двухъ дворовъ нашихъ, которыхъ также на тяглую службу постановити и къ той службѣ съ потребу ихъ привернути.

46. Мосты на мѣстахъ звыклыхъ подданные мають робити, какъ бы безпечный перѣздъ былъ, каждый за своимъ войтомъ; а коли войтъ недбало ся заховываетъ, ино врядъ его маеть напомянути, и если непослушны подданные войта, ино ихъ врядъ кажетъ выгнати къ той работѣ, за войтомъ. А на гостинцахъ и дорогахъ, гдѣ мы господарь съ дворомъ нашимъ ѣдемъ, тамъ за дозрѣньемъ врядовымъ звыклии мосты робити, а за то ничого на подданныхъ врядникъ и мостовничій его брати не мають. А мостовничій отъ насъ посланный маеть только людей боярскихихъ у мощенью мостовъ доглядати, абы были добръ зароблены. А если бы подданные наши осадные, за росказаньемъ и листомъ нашимъ, мосты мостили пезвыкые и имъ пе-

№ 19. повинные, за то имъ будетъ отпущено съ платовъ нашихъ. А подданными тяглыми мосты робити за дни имъ повиноватые.

47. На сторожу замковъ и дворовъ нашихъ чергою подданные ходити повинни, але не болшъ ихъ врядъ брати маєтъ, одно яко ревизоръ уставитъ; а ревизоръ не маєтъ уставляти сторожы, только водлѣ потребы, великости и важности дворовъ нашихъ; и съ тыхъ же сторожовъ, до коней нашихъ, гдѣ будутъ стояти, до каждоѣ стайни одинъ сторожъ, а до двадцати воловъ кормныхъ также одного сторожа ставити.

48. Ремесленники всякого ремесла мають быти на одной вольной волоцѣ ставлены отъ ревизора, при всихъ замкахъ и дворѣхъ нашихъ, водлѣ потребы, а звлаща, при гостинцахъ и тыхъ дворѣхъ, въ которыхъ частѣй бываемъ, то есть, тесли, ковали, слѣсары, колодѣи, бондары, рыболове, кграбары, и тыхъ ремесленниковъ не маєтъ урядъ до домовъ своихъ посылати, а ни роботами своими забавляти.

49. Позвы жадные и дѣткіе отъ пановъ воеводъ, также и въ земли Жомойтской отъ старосты абы не были даваны на подданныхъ нашихъ, але врядъ, подъ которымъ есть подданный, маєтъ съ нимъ справедливость неомѣшканую водлѣ справа дѣлати. Такъ тежъ естли подданный пановъ радъ нашихъ, зъ особна, стану вшеякого, вчинитъ бой якій, кривду, або грабежъ подданнымъ нашимъ, старостове, державцы, тивуны и ихъ врядники мають подданнымъ нашимъ во всемъ справедливости доводити, такъ, якобы ся подданнымъ нашимъ на всемъ кривда и шкода нагородила. А посылати вряду своего слугу зъ войтомъ за кривдами подданныхъ безъ вымовы; которому служъ вряду своему помилного, отъ каждоѣ мили по грошу: ино, коли что презыщеть, а не зыщеть ли, на томъ ничего не брати. А хто бы справедливости дѣлати и шкодъ нагороджати подданнымъ нашимъ за

обосланьемъ врядувымъ не хотѣлъ, къ такому врядъ маєтъ ся заховати водлѣ статуту. А которые осялости и людей не мають, тогды вземши листъ отъ уряду, къ справѣ рокъ положить; а не станетъ ли, альбо на позовъ не отзовется, маєтъ урядъ зослати, и съ права грабежъ вчинивши шкодному лати, што бы за его шкоду стояло.

50. Многие зъ шляхты и подданныхъ, уживаючи мысливства, збожѣя и ярины подданныхъ нашихъ топчутъ и шкоду имъ чинятъ; таковое шкодливое мысливство маєтъ быти отъ уряду заказано и боронено, а хто ся не уйметъ, правомъ его о то умовляти и шкоды позыскивати.

51. Старостове, державцы и тивунове абы злодѣевъ и иныхъ злочинцовъ карати казали, водлѣ статуту, безъ вины злодѣйскоѣ, которая передъ тымъ бывала; а маестности злодѣйскоѣ и каждого злочинца абы конечно на врядъ и никого иного не брано: одно, при земли жону и дѣтей зоставити; а не будетъ ли жоны и дѣтей, ино иншого на томъ осадити. Такъ тежъ отумершинъ и отбѣгшинъ абы конечно брати не смѣли, але на той маестности и томъ кгрунтѣ иншихъ годныхъ подданныхъ нашихъ осажали, абы тымъ не множилися пустоши.

52. Повинность замку Виленского панъ воевода Виленскій зъ волостей воеводства своего Виленского поднялся опатровати, по тому яко зъ стародавна бывало, и Набольшъ, а иншое все и тежъ повинность замку Троцкого зъ скарбу нашего опатрована быти маєтъ, кгдажъ вже люди на волочныхъ платѣхъ и повинностяхъ суть осажоны и поставлены.

53. Въ земли Жомойтской, въ дворѣхъ и волостехъ нашихъ шляхта, которые были за староства пана Станислава Яновича, рекомого Кезкайла, и за сына его пана Станислава Станиславовича, тые мають быти вси захованы при тыхъ же вольностяхъ шляхетскихъ: лечъ которые бы по зеистью ихъ и за вкупы

своими zostали бояры, таковые вси абы ровного права зъ шляхтою не вживали, и въ повинности волочные тыхъ и ихъ земли обернены мѣти хочемъ, и въ томъ обовязуемъ повинность урядниковъ нашихъ, водлѣ ихъ сумнѣнья, абы сами и зъ ревизоры и мѣрники зъ великою пильностью того постерегали. А кому бы листы наши къ листомъ старостинымъ на шляхетство приданы были, то маєтъ быти отложено на вырокъ нашъ, а такожъ и о тыхъ всихъ, которыхъ бы становилъ ревизоръ на платы повиноватые, а они показали бы листы пановъ старостъ Жомойтскихъ: тогды тые листы маєтъ ревизоръ передъ нами оказати, для вѣдомости певноѣ, съ которыхъ причинъ того права и вольности шляхетскоѣ альбо боярскоѣ хто доступилъ.

54. Зъ волостей Рускихъ меды и иншые доходы мають быти по старому браны и по тому, яко на сесь часть, до иншого науки и постановленья нашего.

55. Кгдажъ вже черезъ ревизоровъ и помѣрчихъ о всихъ кгрунтѣхъ и подданныхъ нашихъ вшеякая вѣдомость до скарбу нашего дошла, хочемъ мѣти, абы по смерти старостъ, державецъ и тивуновъ, знову увлячѣе подданныхъ нашихъ не пописывали, и списного и стацей никоторыхъ на нихъ не брали, подъ ласкою нашою и нагороженьемъ совито шкодъ подданнымъ: одно мають реистръ ревизорскій зъ скарбу нашего взяти, або зъ реистровъ войтовскихъ во всемъ ся справити, што въ томъ урядѣ прибыло, або тежъ спустошало, и зъ якоѣ причины; которая вѣдомость и до свѣтченъя при врядѣ, войтъ и лавникахъ маєтъ быти. А по смерти старостъ, державецъ и тивуновъ нашихъ, естли бы была потреба всыланья на врядъ отъ пановъ радъ, альбо отъ пана подскарбія, тогды тогожъ ревизора послати, который тамъ на ревизіи будетъ. А што съ третього снопа врядуичого тамъ ~~зостанеть~~, маєтъ ревизоръ на зошлого половицу дати, а другую наставауюму вряду-

Акт. Зап. Росс. Томъ III.

нику и собѣ на выхованье взяти. А што ся до № 19. тычетъ замковъ нашихъ украинныхъ, тамъ по смерти врядуника нашего, маєтъ быти послано отъ насъ, або отъ пановъ радъ нашихъ, которыхъ вряду то належитъ, для осторожности отъ непріятеля.

56. Хочемъ мѣти, абы вси уходы до пушъ и лѣсовъ, озеръ и рѣкъ нашихъ, и забиванье ѣзовъ, и дерево бортное, и сѣножати и иншыя всякіе пожитки на кгрунтѣхъ властныхъ нашихъ никому иному, одно подданнымъ мѣстъ и волостей нашихъ отъ уряду, на цыншахъ и платѣхъ даваны были, для припможенья пожитковъ скарбу нашего: чого ревизорове пильнѣ вывѣдывати и стеречи мають, ижьбы то было безъ шкоды наше, абы тежъ такими вступы и уходы, за вкупы и поклоны, ни хто властности наше забирати не могъ.

57. Хочемъ тежъ мѣти, абы въ пуцахъ нашихъ лѣсничіе никому дерева стоячего на будованье, а ни на жадную рѣчь для пожитковъ своихъ давати не смѣли, подъ строгою карностью нашою: вѣдѣже лежачое дерево могутъ давати, але не иншому кому, одно нашимъ подданнымъ, которые бы на волокахъ своихъ къ ихъ потребамъ лѣсу не мѣли.

А во всихъ тыхъ справахъ, около розмноженья пожитковъ нашихъ и порадности господарства въ помѣрѣ кгрунтовъ нашихъ, обравши на то первѣй сего справцою, поручили есмо державцу Кнышинскому пану Петру Фалчевскому, гдыжъ и на сесь часть, подлѣ оногo первшого злѣценья и сѣъ уставы наше, хочемъ мѣти: гдѣ бы въ которомъ имѣнии нашемъ потреба указывала, абы онъ зъ нашего росказанья догдѣдалъ и доѣзджалъ, яко около помѣры, такъ и въ иныхъ рѣчахъ господарству належачихъ, становячи все то къ пожитку скарбному, подлѣ воли наше господарскоѣ.

II. — Тогожъ року 1557, мѣсяца Октября 20 дня, господарь король его милость и вели-

№ 19. кій князь Жикгимонтъ Августъ рачилъ по-правовати нѣкоторые артыкулы, въ той уставѣ вышей описаные, съ причинъ певныхъ, отъ пана Петра Фалчевскаго пода-ныхъ, и розказуетъ его милость господарь, абы на всемъ тые артыкулы ниже описаные при уставѣ ревизоры оновѣдали и стано-вили:

1. До артыкула 3-го, о конюхахъ съдел-ныхъ и иныхъ. То его королевская милость рачилъ розказати доложити: конюхи, также и вси слуги дворные садити однимъ селомъ въ каждомъ урядѣ, и такожъ волоки мѣрити въ три поля, и въ среднемъ поли ихъ садити, какъ и волостныхъ людей.

2. До артыкула 4-го, о стрѣльцахъ. То его королевская милость рачилъ розказати до-ложити: стрѣльцы садити межи тяглыхъ людей, пересажаячи иными людьми, ижбы не по-полу сѣдѣли.

3. До артыкула 6-го, о осочникахъ. Роска-залъ его милость господарь то доложити: осоч-ники на границы Прускіе перенести съ поля, гдѣ колько потреба, двухъ або трехъ, а и-ныхъ обирати съ тыхъ, которые тамъ пере-мѣниваютъ альбо осаконы будутъ.

4. До артыкула 7-го, о войтахъ. Росказалъ его милость господарь доложити: войты тя-глые абы мѣли на войтовскую службу по двѣ волоки вольныхъ отъ всихъ потяглей и подат-ковъ. А гдѣ села кгрунтами и поселенемъ при-легли собѣ, тамъ триста и чотыриста волокъ можетъ одинъ войтъ справовати, зваща, гдѣ осадные люди, а не тяглые; а большей то въ земли Жомойтской маеть быти, кгдажъ ро-ботъ, а ни отвозовъ тамъ не встановлено. А при обиранию на войтовства, войтове и лав-ники присѣгати мають, водлѣ первоѣ ustawy.

5. До артыкула 9-го, о мѣстѣхъ. То его королевская милость мѣти хочеть, абы при большихъ мѣстѣхъ войтомъ по двѣ волоки даваны, а въ меньшихъ, зваща, гдѣ не на го-стинцу, войтомъ по одной волоцѣ давати на

ихъ службу войтовскую, отъ платовъ и повин-ностей вольные, абы тымъ хтившими къ по-рядку были.

6. До артыкула 13-го, о корчмахъ. Доло-жити его королевская милость розказати ра-чилъ: корчмы покутные, князскіе и панскіе, зваща, гдѣ не на гостинцу, абы были гамо-ваны и забирапы отъ уряду егѣ королевской милости, хотяжъ бы и листы его милости госпдарскіе мѣли: бо таковыми покутными корчмами не одно шкода его милости госпо-дарю, але и рѣчи посполитой, дороговъ въ живности и знищенъе убогихъ людей.

7. До артыкула 18-го, около отдаванъя сѣна и овсовъ. Рачилъ его королевская ми-лость розказати доложити, абы при отдаванъи овсовъ и сѣнъ не давано большъ, одно яко въ уставѣ описано, а войтъ за квитъ не маеть большъ дати, только одинъ грошъ служебни-кови конюшого; а конюшій квитъ до каждоѣ державы одинъ маеть дати, за который 12 грошей брати ему.

8. До артыкула 24-го, о заробленъи пашни. По тому его королевская милость заховы-ваетъ, яко вышей описано, ижъ маеть быти на каждую волоку фолварковую зоставлено по семи волокъ осѣлыхъ, съ воли и съ клячами, на заробленъе пашни. А къ тому, естли бы врядъ розумѣлъ, ижъ тыми людьми пашни заробити не можетъ, и будетъ ли того потреба, маеть толоки збирати на хлѣбъ дворный (на што зѣ гумна его королевской милости збожъе взяти маеть), а подданные будутъ вицны на та-кіе толоки ити; и кгда ревизоръ прїѣдетъ, обачивши, што слушнѣ врядникъ учинилъ, маеть въ ревизіи описати, абы то было ему на личбѣ принято.

9. До артыкула 27-го, о млынарѣхъ. Роска-залъ его милость господарь доложити, абы млынары зѣ волоки, которая имъ будетъ дана на млынарство, по два дни тесельскою робо-тою служили до замку, альбо до двора, а не по одному дню, яко въ уставѣ выше описано.

10. До артыкула 29-го, о коняхъ. То его королевская милость доложити розказати ра-чилъ: кони врядникъ каждый у своемъ до-зрѣнью маеть мѣти, и самъ отповѣдати, естли злѣ будутъ хованы: бо то его королевская милость на врядника, а не на машталера зда-вати рачитъ; для чого при таковыхъ коняхъ маеть врядникъ своего служебника слати до господаря.

11. До артыкула 36-го о ревизорахъ. По-правуючи его королевская милость, рачилъ розказати доложити: ревизоры со всею спра-вою своею мають ся зѣзжати до Вильни, на певный часъ, который имъ будетъ ознай-менъ; ижбы тежъ и панъ Фалчевскій на тотъ часъ вызванъ былъ, и при немъ справу реви-зіи своей отдавати и справовати ся повинни въ скарбѣ, або кому то его королевская ми-лость поручити рачитъ, и во всемъ ся съ па-номъ Фалчевскимъ порозумѣвати мають, абы вездѣ одинако справа волочная шла, по тому яко у него у Кнышинѣ.

12. То тежъ особливо его королевская ми-лость хочеть мѣти, абы на пустыхъ волокахъ вольно было подданнымъ паствити быдло, и жадепъ врядникъ абы не смѣлъ грабити быдла подданныхъ на пустомъ, хотя бы и на сѣножати, кромѣ збожъя засѣяного на пусто-щизнѣ, съ чого бы платъ мѣлъ быти.

13. О ревизорахъ до земли Жомойтскоѣ хочеть его королевская милость мѣти, абы ѣхали и водлѣ первой науки справовалися: вѣдѣже гдѣ покажется въ реистрахъ помѣр-чихъ, што будутъ наддатки давали на кгрун-ты подлые, таковыхъ волокъ знову шнуромъ не пробовати, кгдажъ то панъ Фалчевскій повѣдилъ, ижъ у всихъ мѣрниковъ есть въ реистрахъ описано, што на звышъ на которую волоку дано, и зѣ якоѣ причины; а про то та-ковые реистры мають быти даны до скарбу, абы вѣдомость была всякого кгрунту въ зем-ли Жомойтской въ скарбѣ.

14. Есть тежъ воля его королевской мило-

сти, абы съ пѣнязей съ гуменъ браныхъ за № 19. збожъе быдло до фолварковъ панове врядни-ки куповали, зваща коровы, а съ того пожи-токъ до скарбу его королевской милости при-множали, чимъ тежъ и ролю фолварковъ на-правоватися могутъ; а што такихъ пѣнязей гуменныхъ на быдло выдавати будутъ, то на личбѣ маеть быти прїимовано.

III. — Устава на товары, на шинкѣ и на ре-месленики. Кто едвабными рѣчьми торгуетъ, маеть дати чотыри грошы, а хто только сук-ны и иными крапными товары торгуетъ, маеть дати два грошы, а отъ золотаря также два грошы. Кто шинкѣ корчму держитъ, тотъ даеть отъ меду одинъ грошъ, а отъ пива одинъ грошъ, а отъ горѣлки два грошы. Рѣз-ники каждый того ремесла уживаячи одинъ грошъ виненъ дати; кравцы, кушнеры, шев-цы, ковали, слѣсары, столяры, бондары, ко-лесники, стельмахи, рымары, сыромятники, дуботолки, сѣдлары, гончары, токары, шкля-ры, пекары, и каждого ремесла хто — колве уживати будетъ и обходитися ремесломъ, въ мѣстѣ сѣдѣчи, маеть зѣ ремесла такового дати одинъ грошъ, але отъ товаришовъ не повиненъ платити; а отдаючи тые доходы, бирчого и писчого неповиненъ дати большъ одного пѣнязя, хотя мало, альбо много дасть.

Вѣдѣже хто бы съ таковыхъ купцовъ, альбо зѣ ремесленниковъ хотя однимъ товаромъ съ тыхъ рѣчей менованныхъ и на одинъ разъ въ мѣстѣ торговалъ, альбо ремесла уживалъ; тогды тоежъ отъ товаровъ своихъ и ремесла маеть дати и заплатити, яко и тые обечнѣ въ мѣстѣ перемѣшкиваючіе, платячи то на раты уставленные, и вольно ему будетъ на цѣлый годъ такового торгу уживати. А для того вси купцы и купчики, во всихъ мѣстѣхъ, мають ся вписати въ реистръ урядовый, чимъ хто зѣ нихъ торгуетъ; естли жъ того не всхочеть, а трафятся едвабные або якіе иные незвычайные въ его купецствѣ това-ры, тогды маеть заплатити отъ того по сей

№ 19. уставъ, и вольность мѣти тымъ купчити, отъ чего заплатитъ.

А отдавати тые пѣязи до вряду замковъ и дворовъ его королевской милости, на двѣ раты разложивши, на Новое лѣто половицу, а другую половицу на день святого Якуба; а послѣ року у двухъ недѣляхъ, каждый вряникъ маеть ихъ до скарбу отдати. А землянскіе люди, хто повиненъ носити подводу, подлѣ ухвалы земской на соймѣ вчиненой, мають платити зъ службы по шести грошей, и на тыежъ роки повинны вряники господарскіе отсылати тые пѣязи до скарбу его королевской милости. А за тые пѣязи кони на подводы наймованы быти мають.

IV. — Устава о подводахъ. Во всихъ мѣстѣхъ и селѣхъ, гдѣ потреба, а вызволены мѣста отъ подводъ, на предмѣстѣи, хотя гдѣ до сего часу подвода не давана, мають ховати кони на наемъ подводы.

А гдѣ волоки суть, тые мѣщане, которые волоки держатъ, будутъ повинны ховати кони, и стеречи подводы перемѣною, по недѣлямъ, у ровности, а мѣти кони каждому по два; а хто всхоцетъ большъ мѣти коней, ино таковой маеть ховати то на свою властность.

А войтъ каждого такового мѣстечка и села маеть два кони ховати, а отъ даванья подводъ будетъ воленъ, для того, абы порядку даванья подводъ доглядѣлъ; а станетъ ли омѣшканье гонцу, то войтова вина, и строгая карность на него отъ господара короля его милости вложена будетъ.

До всихъ замковъ и мѣстъ немногіе дороги и гостинцы росписати отъ столечного мѣста Вильни, абы чужоземцомъ, збѣгомъ и шпегомъ, лихимъ людемъ, вольный проѣздъ, а мыту господарьскому шкода въ прокрадыванью купцовъ не была. А класти гостинцы, яко на простѣй можетъ быти, и такъ по всей земли разложить гостинцы и станы певные, на которыхъ подводамъ отмѣна маеть быти. А не становити подводы нигдѣ большъ семи

миль и меньше трехъ, и то алижбы инакъ не могло быти, ино въ чотырехъ, въ пяти, въ шести-миляхъ отмѣну становити, хотя въ князьскихъ и панскихъ мѣстѣхъ и селѣхъ, гдѣ подводу носити повинно.

А коли прійдетъ посолъ великій, альбо будетъ отвозъ рѣчей господарьскихъ, на што бы таковыхъ коней большъ потреба была; ино тое мѣсто альбо село мають ся способляти, яко бы тыхъ коней водлѣ потребы зготовали: бо о таковой потребѣ могутъ передъ часомъ вѣдати. А которые то повезутъ, такъ мѣщане яко и волощане, абы имъ также плачоно было помилное, яко ниже описано. Въ чомъ хотячи порядокъ учинити, постановили есмо, абы въ дому войтовомъ, бурмистровомъ, альбо лавниковомъ подводѣ отмѣна была.

А маеть быти плачоно отъ коня, по грошу на милю, также одинъ грошъ отъ подводного коня, яко и отъ того, на которомъ проводникъ ѣдетъ; а отъ возовъ подводы однимъ конемъ полтора гроша на милю, а отъ двухъ коней до одного воза полтретѣя гроша на милю; а если бы своимъ возомъ двумя конями повезъ, тогда отъ воза зъ двумя коньми три грошы маеть быти дано на милю. А если бы тежъ тотъ подводникъ мусилъ и, назадъ на той же подводѣ нести гонца, ино ему платити потомужъ; а не понесетъ ли гонца, тогда и платити ненадобъ. А маеть гонецъ и каждый посланецъ наемнику пѣязи вси заразъ дати, а то для того, абы ратовати могъ, если конь рознеможеться, або здохнетъ, штобы мѣлъ за што иного коня наняти, а не омѣшкати гонца.

Гонецъ маеть ѣхати до уряду господарьского, за листомъ господарьскимъ подводнымъ; а урядъ войту, альбо бурмистру и лавнику, тому хто на то уставленъ старшимъ, кажетъ ему подводы дати, колько на листъ его милости господарьскомъ, либо на листъ пановъ радъ, также и на листъ старостъ и державецъ украинныхъ описано, и напишетъ на

листъ подводномъ, которого дня бралъ подводу, абы за однимъ листомъ, если не описано въ листъ, не брали подводъ по двакротъ, яко то многократъ чинили до сего часу.

А будутъ ознаймены особы певные при дворѣ и скарбъ его милости господарьскомъ, хто тые пѣязи на подводы раздавати маеть, зъ скарбу беручи, и которые, отправуючи гонца, давати мають на наймованье подводъ, яко далеко ѣдетъ, на каждую милю по одному грошу, а на страву ему толькожъ, на особу его, и слугамъ его, колько съ нимъ будетъ, также по одному грошу; и назадъ на страву мають ему платити, а онъ вже будетъ наймовати и платити тымъ, которые обраны ховати тые наемные кони. Нижли хто возомъ ѣдетъ, тотъ не такъ ся борзо поспѣшитъ; для того и на страву маеть ему дано быти на милю полгрошкомъ большъ, а вѣдѣже мають розумѣти, на таковыхъ гонцовъ, который самъ одинъ съ слугою або съ двумя посланъ бываетъ; а хто съ большимъ почтомъ ѣдетъ, такому маеть быти большъ и дано, водлѣ особы и потребы: на што тотъ, хто въ справѣ своей то мѣти будетъ, маеть бачнымъ быти, и зъ волю его королевской милости такимъ посланцомъ отправу чинити.

А дворянинъ на подводѣ ѣдучи, не маеть черезъ перемѣну далѣй на той подводѣ ѣхати, и у переѣздчихъ тежъ людей коней не маеть брати; а если бы то учинилъ, тогда совито повиненъ будетъ шкоду нагородити, а за такъ неповсяжливый выступокъ двѣ недѣли у вѣзенью съдѣти, а на тую послугу николи посланъ не будетъ, абы тымъ ся и иные карали. Нижли, если бѣ подводный конь усталъ, альбо здохъ, тогда маеть онъ гонецъ у переѣздного чоловѣка, альбо гдѣ на селѣ при гостинцу коня наняти; а проводникъ тому, чій конь будетъ, заплатити маеть, такъ же яко ему плачоно (кдѣжъ пѣязи за наемъ отъ гонца взять), для того, абы посланцомъ

его королевской милости и пановъ радъ и № 19. съ украинъ потребамъ земскимъ нигдѣ ся омѣшканья не было.

А съ украинъ мають панове воеводове, старостове и всякіе вряники посылати посланцовъ, даючи свои пѣязи на подводу; и кдѣ прійдетъ таковой посланецъ, ино взявши вѣдомость въ канцелярии, съ якою справою посланъ и хто посылалъ въ земской справѣ, таковому каждому черезъ посланца его маеть быти заплачоно за наемъ подводъ. А хто для своея потребы шлетъ, тотъ своимъ накладомъ и отправляй, а господарьскихъ подводъ не пращуй: для чего, о земскомъ дѣлѣ шлючи, своихъ потребъ на таковыхъ посланцовъ не вскладати, ижбы тымъ не омѣшкивали въ справахъ земскихъ, ожидаючи дѣламъ пана своего отправки; але гонецъ съ дѣломъ его милости господарьскимъ и земскимъ отправо- ватися спѣшитъ маеть, ничимъ инымъ не забавляючися.

V. — Тогожъ року 1557, мѣсяца Октября 20 дня, его королевская милость рачилъ розсказати, до тоѣ устави на подводы приписати: купцы чужоземскіе, которые - кольвекъ до панства его королевской милости пріѣзжаютъ съ торговлями, и домовъ своихъ не мають нигдѣ въ границахъ панства его милости, на таковой податокъ для наймованья подводъ повинны складатися, кдѣжъ мыто платятъ.

Што тежъ описано вышей въ той уставѣ, «абы на двѣ раты разложивши тотъ податокъ на подводы отдавали», его королевская милость хочеть мѣти, ижбы завжды тотъ податокъ отдаванъ былъ на Новое лѣто, и таковой бы податокъ вряники завжды при цыншахъ отбирали.

VI. — Лѣта Божьего нароженья 1558, мѣсяца Мая 20 дня, господарь король его милость и великій князь розказавши розсылати ревизоровъ и мѣрниковъ, рачилъ поручити то ознаймити и къ той справѣ доложить: ижъ

№ 19. вси тые ревизоры и мѣрники, въ небытности его королевской милости въ тутошнемъ панствѣ, будучи на ревизию и на помѣру, также и зѣхавши зъ sprawy и зъ ревизии своей, маюють съѣзжати ся съ паномъ Петромъ Фалчевскимъ, яко съ тымъ, который около порядку того господарства зъ ними намовляти, и, чего бы которое имѣнье господарское потребовало, такъ въ порядку помѣры, яко тежъ и въ господарствѣ и пожиткахъ его королевской милости, имъ раду и науку давати будетъ; а онъ, въ чомъ потреба, докладатися будетъ пана воеводы Виленского, маршалка земского, канцлера великого князства Литовского, старосты Берестейского, державцы Борисовского и Шовленского его милости пана Миколая Радивила: кгдажъ господарь его милость на пана воеводу Виленского то предложить рачилъ, абы панъ Фалчевскій и вси въ тую службу поставленные способлялися наукою и помощью и обороною, во всѣхъ справахъ, што бы ся належало до пожитковъ и кгрунтовъ господарскихъ.

Къ тому, будучи они на таковыхъ службахъ его королевской милости, маюють съ паны врядники порозумѣваючися, имѣній его милости господарскихъ доглядати: гдѣ ся подданные роздѣлили, а много ихъ въ одномъ селѣ, а на маломъ кгрунтѣ, таковыми абы пустые волоки осаживаны были, оставивши брата одного або двухъ на волоць, або отца зъ сыномъ; а давати имъ вольность, на пустыхъ волокахъ осаживаючи, для вспоможеня, яко вышеи описано.

Тежъ, абы того врядники доглядали: гдѣ подданнымъ къ розробленнымъ волокамъ лѣсы приданы для будованя и дровъ, такъ мѣстскимъ яко и волостнымъ, ижбы только на свою потребу ихъ брали, а не продавали.

Што ся дотычетъ стрѣльцовъ, господарь его милость на томъ застановити рачилъ, за ихъ чоломбитемъ: ачъ на уставѣ описано, не давати имъ цыншовъ зъ двухъ волокъ, але ижъ

теперь большій почотъ ихъ, нижи первый было, и притомъ подвязалися сами платити цынши и осады со всякими повинностями, такъ яко и осадные люди, пѣнязми, кромѣ работы и потяглей; и господарь его милость росказуетъ: каждому зъ нихъ дати по двѣ волоки, и осадити ихъ селы, на добрыхъ кгрунтахъ и поодаль отъ пушы; а они маюють одну волоку мѣти вольную отъ платовъ, а зъ другой платити будутъ цыншъ и весь податокъ, такъ яко иные осадные люди, вѣдьже а ни сѣна, а ни овса, ни жадныхъ отвозовъ, альбо подводъ и потяглей неповинны давати, только голый цыншъ альбо платъ, имъ ознайменый, до вряду, на чей волости съдять, за вѣдомостью служебника пана Довойны. А судитися имъ, стрѣлцу съ стрѣлцомъ, передъ тымъ, кого панъ Довойно уставитъ надъ ними; а коли съ кимъ инымъ судъ, ино пана Довойновъ слуга, за обосланьемъ зъ уряду, маеть его становити на судъ врядничей, и самъ на томъ судѣ маеть быти и посполъ зъ урядникомъ судити. А гдѣ бы ся пригодило съ подданнымъ нашимъ судити стрѣлца, о покажене або переоране межы, потомужъ маеть врядъ нашъ, або войтъ волостный, посполъ съ тымъ служебникомъ пана Довойновымъ, тую рѣчь судовити водлѣ уставы наше заставити. А при роздаванью волокъ стрѣлцомъ маеть тамъ быти тежъ служебникъ пана Довойновъ.

VII. — Лѣта Божьего нароженя 1558, мѣсяца Юня 20 дня, господарь король его милость и великій князь Жикгимонтъ Августъ рачилъ намовляти съ паны радами ихъ милостью, о даване подводъ, и вырокомъ своимъ господарскимъ на томъ застановити, якимъ обычаемъ маеть быти порядокъ sprawy и повинности тоѣ земскоѣ становленъ во всѣхъ мѣстехъ, мѣстечкахъ и волостяхъ Рускихъ его королевской милости, кромѣ мѣстъ упривилежавныхъ вольностью отъ подводъ; а вѣдьже и въ таковыхъ мѣстехъ на предмѣстьехъ

перемѣшкаваючие абы платили по тому, яко нижеи описано, не выймути съ того никого, и чей — кольбекъ чоловѣкъ съдять въ мѣстѣ господарскомъ и на предмѣстьи, одинако платити маеть, яко и мѣщане.

Мѣщане всѣхъ мѣстъ абы давали съ кожного дому по два грошы; а хто волоки держитъ, тогды особно отъ волоки маеть дати три грошы; а отъ морговъ при мѣстѣхъ по чотыри пѣнези, а отъ прута огородного мѣстского одинъ пѣнязь. А гдѣ волоки еще не мѣрены, ино зъ дому два грошы, а съ фолварка мѣстского або съ пашни по шести грошей; а въ которомъ фолварку люди, ино съ службы по шести грошей, а отъ огородника по два грошы.

А Рускіе волости, гдѣ волоки не мѣрены, маюють дати съ дыму такового, въ которомъ земли свое и особного хлѣба уживають, грошы два съ хлѣба, а съ дерева бортного грошы три зъ лезива; а хто того обоого не уживаетъ, только на огородѣ съдять, тотъ отъ огорода грошъ одинъ дати маеть; а хто и огорода не мѣлъ бы, тотъ маеть зъ дыму дати полгроша.

Сии семь статей выписаны изъ Литовской Метрики (Публичн. дѣлъ кн. VI, л. 1 — 27), хранящейся при Правительствующемъ Сенатѣ, въ С. Петербургѣ.

20. — 1558 Марта 28. Жалованная грамота Полоцкому боярину Глѣбу Корсаку, на преемство Полоцкой архіепископии, по кончинѣ тамошняго владыки Германа.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ. Ознаймуемъ симъ листомъ нашимъ, кому будетъ потреба того вѣдати, ижъ есмо маючи ласковый взглядъ на пыльные и вѣрные службы боярына земли Полоцкоѣ пана Глѣба Ивановича Корсака, и за жаданьемъ

воеводы Полоцкокого, державцы Свислѣцкокого, № 20 пана Станислава Станиславовича Довойна и пановъ бояръ земли Полоцкоѣ, дали есмо ему и симъ листомъ нашимъ даемъ архіепископью владычество Полоцкое, по смерти теперешнего архіепископа владыки тамошняго Полоцкокого Германа Хребтовича. Маеть онъ, по животѣ его, вжо за симъ листомъ нашимъ и даниною, въ тую архіепископью Полоцкую вѣхати, и тую архіепископью и монастырь святого Михайла въ Городку, подаваня нашего господарского, въ справу свою взяти, и на тотъ станъ духовный вступивши и водлѣ звычайу закону хрестіанского совершивши, за насъ господаря повиненъ будетъ Бога просити, и тую архіепископью, со всимъ, по тому, яко первые архіепископы владыки Полоцкіе держали, маеть онъ до живота своего держати, и всѣхъ пожитковъ водлѣ давного обычая уживати, и къ тому монастырю святого Михайла въ Городку архимандритовъ на то годныхъ подавати, справуючися во всѣхъ слушнѣ и раднѣ, яко на его станъ святительскій належитъ. И на то есмо ему дали сѣсь нашъ листъ, съ подписаньемъ руки наше господарской, до которого на твердость того и печать нашу приложить казали. Писанъ у Вильни, лѣта Божьего нароженя 1558, мѣсяца Марта 28 дня.

Изъ Литовской Метрики (Запис. кн. XXXVII, л. 139 об.), хранящейся при Правительствующемъ Сенатѣ, въ С. Петербургѣ. Въ заглавіи грамоты отпечено: Привилей Глѣбу Ивановичу Корсаку, на архіепископью Полоцкую.

21. — 1558 Апрель 22. Жалованная грамота епископу Макарію, на преемство Пинской и Туровской епархii, по кончинѣ тамошняго епископа Макарія.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, ознаймуемъ симъ нашимъ листомъ.

№ 22. Билъ намъ чоломъ епископъ Макарій, которо-го зошлый архіепископъ митрополитъ Кіевскій на епископство поставилъ и у себе его мѣлъ, абыхмо его хлѣбомъ духовнымъ пожаловали, и по животъ владыки теперешнего Пиньского и Туровского Макарія тое владычество Пиньское ему дали, якожъ и воевода Виленскій, маршалокъ земскій, канцлеръ великого князства Литовского, староста Берестейскій, державца Борисовскій и Шовленьскій панъ Миколай Радивилъ, а воевода Новгородскій, маршалокъ двориный, подскарбій земскій, писарь нашъ, староста Слонимскій, державца Кревскій панъ Иванъ Горностай за нимъ у причинъ насъ о то жадали. А такъ мы, на причину и жеданье ихъ милости пановъ радъ нашихъ и на чоломбитье епискупа, зъ ласки нашею господарской то вчинили, тую епископію Пиньскую и Туровскую ему дали и симъ листомъ нашимъ даемъ. Маеъ онъ, по животъ того владыки теперешнего Пиньского Макарья, взявши вижа зъ уряду тамошнего жъ Пиньского, въ тую епископію Пиньскую възхати и на себе ее увязати, и держати ее до живота своего, со всимъ, по тому яко и первые владыки тамошніе, предкове его, тую епископію къ рукамъ своимъ держивали; на штожъ даемъ ему сесъ нашъ листъ зъ нашою печатью привѣсистою. Писанъ у Вильни, лѣта Божого нароженія тысяча пятьсотъ пятьдесятъ осмого, мѣсяца Апрѣля двадцать второго дня. — Подпись руки господарской. «Остаеѣй, маршалокъ и писарь.»

Изъ Литовской Метрики (Запис. кн. ХІІ, л. 2 об.), хранящейся при Правительствующемъ Сенатѣ, въ С. Петербургѣ. Въ заглавіи грамоты отмѣчено: Привилей епископу Макарію на владычество Пиньское и Туровское.

22. — 1558 Мая 8. Королевская грамота князю Юрію Слуцкому, о подтвержденіи въ отчинъ своей православному духовенству быть подсудными Кіевскому митропо-

литу Сильвестру и вносить въ казну его соборныя куницы и другія положенныя пошлыны, и о запрещеніи урядникамъ своимъ вмешиваться въ церковныя суды и доходы.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, князю Юрію Юрьевичу Слуцкому. Присылалъ до насъ архіепископъ митрополитъ Кіевскій и Галицкій и всея Руси Селивестръ, обтяжливо жалючи на архимандрита твоей милости Троецкого Слуцкого Никандра, и на игумена Николского Мороцкого, и на поповъ Слуцкихъ, и на иныхъ поповъ по всимъ имѣньямъ твоей милости, о томъ, штожъ дей они въ справъ церковной не водлѣ звычаю и постановленья закону Греческого ся справують, и въ справахъ духовныхъ его яко старшого пастыря своего послушни быти, и на Соборъ для науки духовноѣ до его ѣздити, и куницъ соборныхъ и стацей объѣздныхъ и иныхъ доходовъ, водлѣ стародавнего повиноватства своего, давати и полнити не хочуть; а къ тому дей врядники твоей милости, по всимъ имѣньямъ твоей милости, въ справы ся духовныя вступаютъ, судятъ и справують, и роспусы чинятъ, и вины духовныя на себе берутъ, а протопопомъ и врядникомъ его до имѣній твоей милости въѣзжати и справъ духовныхъ судити и справовати забороняють, и великую переказу и шкodu въ томъ его милости дѣлають: въ чомъ собѣ кривду немалую быти мѣнячи, билъ намъ чоломъ и просилъ насъ, абыхмо до твоей милости листъ нашъ о томъ писати казали. — Про то, если будетъ такъ яко онъ намъ жаловалъ, приказуемъ тобѣ, абы твоя милость тому архимандриту Троецкому Слуцкому Никандру, и игумену Николскому Мороцкому, и попомъ Слуцкимъ, и инымъ попомъ по всимъ имѣньямъ твоей милости, въ справъ церковной закону вашего Греческого водлѣ стародавнего обичаю и постановленья ся справовати, и въ справахъ

духовныхъ его милости яко старшого пастыря своего послушными быти, и на Соборъ для науки духовноѣ до него ѣздити, и куницы соборныя и стацей объѣздныя и иншіе доходы, водлѣ звыклого повиноватства ихъ, ему отдавати и полнити казалъ, ижъбы они во всемъ ся къ его милости заховали водлѣ прислухающеи виности ихъ. А врядникомъ бы своимъ твоя милость съ пилностью розказалъ, ижъбы они, черезъ то, въ справы духовныя ничимъ ся не вступовали, и не судили, и винъ духовныхъ на себе не брали, и такожъ врядникомъ его тамъ въѣзжати и справъ духовныхъ судити не забороняли, и никоторѣ кривды и переказы въ томъ его милости не чинили. Писанъ у Вильни, лѣта Божьего нароженія 1558, мѣсяца Мая 8 дня.

Подлинникъ писанъ на бумажномъ полулистѣ, сплошною скорописью, безъ строчныхъ знаковъ. Королевской подписи нѣтъ. Внизу грамоты скръпъ: Янъ Шимковичъ, маршалокъ и писарь. Печать Литовскаго княжества малая вытиснута на красновосковой массѣ подъ бумажною покрышкою. На оборотѣ современная отмѣтка: Листъ до князя Слуцкого отъ господаря.

Хранится въ архивѣ бывшихъ Греко-Унитскихъ Митрополитовъ, при Святѣйшемъ Синодѣ.

23. — 1558 Юня 9. Грамота королевская Мстиславскому и Радомльскому старостѣ князю Ивану Соломерецкому, о выдачѣ медовой и денежной дани тамошнимъ православнымъ монастырямъ и церквамъ.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, старостѣ Мстиславскому и Радомльскому князю Ивану Васильевичу Соломерецкому, и инымъ старостамъ Мстиславскимъ, хто и напотомъ тотъ замокъ нашъ отъ насъ завѣдати будетъ. Пріѣздили тыхъ часовъ до насъ священники и вси крылошане церкви собор-

ноѣ святоѣ Троицы, со Мстиславля, оповѣ-
№ 23.
даючи, ижъ князь Михайло Ивановичъ Мстиславскій, маючи въ моцы своей замокъ Мстиславскій правомъ дѣдичнымъ, надалъ и записалъ давати съ своего подклѣта, вѣчными часы, на церковь соборную святоѣ Троицы кадъ меду, а на церковь святоѣ Пречистоѣ пять пудовъ меду желѣзного вѣсу, а на монастырь и церковь святоѣ Пречистоѣ жъ въ Пустынцѣ три пуды меду желѣзного вѣсу и сорокъ грошей, а на церковь святого Аѳонасія такожъ три пуды меду, а на церковь тежъ святого Архангела Михаила, въ Радоми, кадъ меду прѣсного и десять копъ съ пашни Радомской отъ всякого збожья; на што они и листы князя Михайла Мстиславского передъ нами оказывали, за которыми дей завжды то имъ было давано ажъ до сего часу: одножъ дей староста бывшій Мстиславскій князь Иванъ Васильевичъ Полубенскій, предокъ твой, не казалъ имъ теперешнего году того меду выдавати, повѣдаючи, яко быхмо того въ скарбъ нашомъ на личьѣ пріймовати не велѣли; гдѣ они били намъ чоломъ, абыхмо кривды имъ въ томъ дѣлати и оныхъ листовъ наданья князя Мстиславского нарушати не казали. — Ино жъ, кгдажъ будетъ передъ тымъ, завжды, водлѣ листовъ князя Мстиславского, тотъ медъ имъ выдаванъ былъ, а князь Полубенскій кромъ слышноѣ причины въ себе то задержати хотѣлъ; приказуемъ тобѣ, абы еси и теперь по томужъ ся къ нимъ заховалъ, и имъ весь медъ прѣсный и все то, што — колъ-векъ на церкви менованые записано, въ кождый годъ выдавалъ, ничимъ не задерживая; а вѣдъ же, естли бы што иного въ томъ дѣлося, ты бы намъ знати о томъ далъ. Писанъ у Шерешовѣ, лѣта Божого нароженія 1558, мѣсяца Юня 9 дня.

Подлинникъ писанъ на бумагѣ, крупною скорописью. Королевской подписи нѣтъ. Внизу грамоты скръпъ: Остаеѣй, маршалокъ и писарь. Пе-

№ 24. чать Литовскаго княжества малал, подъ кустодію, съ оттискомъ едва примѣтнымъ.

Хранится въ Могилевскомъ Архіерейскомъ архивѣ, въ связи подъ № 115. См. Бѣлор. Арх. др. грамотъ, I, 19.

24. — 1559. Уставы данные Литвѣ и областямъ Жмудьской, Полоцкой, Витебской и Мстиславской, на четвертомъ Виленскомъ сеймѣ.

1. — Отказъ отъ господаря короля его милости и великого князя Жикгимонта Августа княжатомъ, панятомъ и всему рыцерству, шляхтѣ, обывателемъ панства его милости великого князства Литовского, на тые рѣчи и прозбы ихъ, которыи они на писмѣ королю его милости дали, на теперешнемъ вальномъ соймѣ Виленскомъ, лѣта Божьего нароженья 1559.

1. Прозьба. Што въ которыхъ рѣчахъ прозбы свои на писмѣ къ его королевской милости приносили и подали есте, ижъ до статуту нового стегаются. *Отказъ.* О томъ статутѣ вже певное постановленіе на листѣ его королевской милости вамъ дано; а такъ вси тые рѣчи, все што въ листѣ описано, до того сойму пришлого его королевская милость откладати рачить.

2. Прозьба. Одно жъ, што въ тыхъ же прозбахъ своихъ доложили есте, абы осямлости иныхъ народовъ людемъ земли Ифлянтской не были даваны, только обывателемъ и прироженцомъ великого князства. *Отказъ.* Его королевская милость розказалъ вамъ повѣдѣти, ижъ то, што въ земли Лифлянтской его королевской милости пришло тогда, не инымъ правомъ, одно заставою: про то, яко заставного, его милости зменьшати не належитъ; вѣдѣже о державы и уряды тыхъ замковъ хочетъ его королевская милость ласкавое баченіе мѣти на обывателей великого князства.

3. Прозьба. Што тежъ пишете о кривды

отъ пановъ Поляковъ границамъ великого князства Литовского, и о таковыи ихъ кройники неслучные, а вамъ нелюбыи. *Отказъ.* Господарь его милость ведѣтъ вамъ повѣдѣти, ижъ кгда его королевская милость въ керунъ Польской будетъ, хочетъ тую справу на ласкавомъ баченіи мѣти; а будутъ ли тежъ послове на съемъ корунный посланы, тогды и черезъ тыхъ пословъ всказаніе будетъ о границы и о направленіе таковыхъ непристойныхъ кройникъ.

4. Прозьба. Ижъ просите при той же справѣ о рѣчь княжати Семена Слудкого и княгини Ильиное Костентиновича съ паномъ воеводою Ленчицкимъ. *Отказъ.* Его королевская милость хочетъ въ той справѣ вчинити то, што слушного и пристойного видѣти ся его милости будетъ.

5. Прозьба. Што тежъ просите, абы мытъ отъ товаровъ вашихъ не брано. *Отказъ.* Его королевская милость зъ ласки своеи господарской рачить вамъ отпушати мыто отъ товаровъ лѣсныхъ, вашеи роботы и зъ вашихъ властныхъ имѣній, хто своимъ накладомъ выребивши пустить; также и отъ збожья, што бы своеи властнѣю пашни, а не купленое за границу пушалъ, и быдло доморослое: вѣдѣже повиненъ будетъ панъ того товару, або служебникъ его на томъ присягнути, на первой коморѣ, ижъ зъ властного имѣнья пана того и его властнымъ накладомъ тотъ лѣсный товаръ робленъ.

6. Прозьба. О мынцу просите, абы опатрована была. *Отказъ.* Его королевская милость хочетъ то осмотрѣти, яко справа мынцы къ пожитку рѣчи посполитой будетъ, а на шкоду николи не прійдетъ битьемъ всякои монеты и пѣвезей дробныхъ.

7. Прозьба. О уближеніи вольностей земскихъ во врьдѣхъ, што есте описали. *Отказъ.* Его королевская милость хочетъ на ласкавомъ баченіи то мѣти, яко впередъ во всемъ водѣ

вольностей земскихъ опатровано и зостановлено будетъ.

8. Прозьба. Што тежъ просите, абы референдары справамъ земли Подляшской, тубыльцы и прироженцы великого князства уставлены были. *Отказъ.* На то его королевская милость призволяти рачить, и съ часомъ, обравши зъ народу обывателей великого князства умѣлыхъ въ томъ правѣ референдаровъ дати его милость хочетъ.

9. Прозьба. О путники што пишете, ижъ могутъ бити къ послужѣ межѣ нихъ обраны. *Отказъ.* Его королевская милость и того не занѣхивати розкажетъ, присмотрѣвшись, хто бы до того былъ годнымъ.

10. Прозьба. О сумму, которая внесена на замки Лифлянтскіи и о платы съ того краю поступленого просите, абы нигдѣ индѣ, одно до скарбу его королевской милости и земского были обернены. *Отказъ.* Господарь его милость на то призволяти рачить.

11. Прозьба. Што есте тежъ оповѣдали его королевской милости, ижъ бачучи потребу рѣчи посполитой, сами есте готовы и охотны ити противко непріятелеви отчизны его королевской милости, и еще причиняючися, зъ маетностей своихъ поступаете на прибылые люди податокъ съ подданныхъ вашихъ, къ тому податку, который на Громницы пришло свята, водѣ первой уставы, по пяти грошей зъ сохи давати маете, а теперъ по другой пяти грошей прикладаете, и то сполна по десяти грошей давати хочете; а на другій годъ и на тоежъ свято Громницы по другой десяти грошей зъ сохъ поступаете: нижли, абы и первыи податки выданы были отъ всихъ становъ, о то просите. *Отказъ.* Его королевская милость тую хуть вашу и чуйность къ потребѣ рѣчи посполитой ласкаво и влячнѣ, яко отъ вѣрныхъ слугъ, пріймовати рачить, и абы тымъ же порядкомъ, яко и на прошломъ соймѣ *ухвало*, тотъ теперъ поступлений податокъ былъ бранъ, мѣти хочетъ, яко ся на

листѣхъ его королевской милости доложитъ *№ 24.* достаточнѣ; а хто того не выдалъ съ первой уставы, ино розкажетъ его королевская милость то отиравати на таковомъ водѣ *ухвало* тогожъ сойму прошлого.

12. Прозьба. О службу земскую, абы панове духовные зъ вами служили, просите. *Отказъ.* Его королевская милость прозбу вашу на томъ застановляти рачить, яко то ся вже на первыхъ соймѣхъ постановлено, и повинны будутъ панове духовные зъ имѣній, которые подъ земскимъ правомъ мають, службу земскую служити.

13. Прозьба. Просите тежъ объ отмѣны за земли ваши черезъ мѣрниковъ побраные у волоки, а гдѣ которымъ дана отмѣна, абы то листы господарскими было подтвержено. *Отказъ.* Его королевская милость розказалъ вамъ повѣдѣти, ижъ его милость не хочетъ, абы шляхтѣ черезъ мѣрникъ утискъ былъ въ неотданую отмѣну за земли ихъ, якожъ зъ листовъ его королевской милости на помѣру данныхъ порозумѣти можете: въ которыхъ доложено, абы зморкговавши таковыи земли шлятетскіи, напередъ отмѣну дано, нижъ што взято будетъ у волоки. И теперъ кому бы не дано отмѣны, за што слушнѣ отмѣну дати належитъ, розкажетъ его королевская милость листы съ канцлерыи давати, абы отмѣны не задерживали и отдавали: нижли, абы есте тежъ сами въ томъ напомнимъ ся и отмѣны водѣ уставы господарской брали, а границъ бы волокамъ господарскимъ не казили; а кгда достаточнѣ отмѣны дойдутъ и успокоются, его королевская милость хочетъ утвержати таковыи отмѣны листы своими господарскими.

14. Прозьба. Што тежъ хоружіи подали на своей цедулѣ, абы шляхта на съемъ при хоружихъ братью свою обирали и слали. *Отказъ.* Его королевская милость въ томъ давній обычай захованъ мѣти хочетъ, и яко отъ господаря его милости на листѣхъ соймовыхъ хору-

№ 24. жимъ ознаймено будетъ, такъ ся нехай захывають, по обычаю давному.

15. *Прозьба.* Просите тежъ о платъ певный зъ шляхты, за чимъ на соймы маєте ѳздити и серебищизну носити. *Отказъ.* Его королевская милость въ томъ новоѣ рѣчи становити не хочетъ, але яко и передъ тымъ бирьчое бывало хоружимъ при податкахъ земскихъ, и теперъ водлѣ постановленья соймового брати будете бирьчое, за працу свою.

16. *Прозьба.* Еще просите, абы зъ людей вашихъ серебищизны не давали, и докладаете, ижъ передъ тымъ хоружые зъ людей своихъ не давали серебищизнѣ. *Отказъ.* Его королевская милость не бачитъ, кимъ бы (*) съ того были вызволены: про то абы есте оказали тотъ давный обычай, яко ся передъ тымъ захывывало.

17. *Прозьба.* Просите тежъ, абы листы въ потребъ земской до шляхты черезъ листовниковъ отношены были въ каждого домъ. *Отказъ.* Тотъ обычай его королевская милость по давному мѣти хочетъ, яко въ которомъ хоружствѣ то бывало, и при поправѣ статуту, на другомъ соймѣ припоминайте.

18. *Прозьба.* Еще въ той же цedula пишите, ижъ хоружии съ повѣты своими у войску на сторожу не ѳздили; а часу рушенья первшого къ границамъ Лифлянтскимъ, за прозьбою пана гетмана и милуючи его королевскую милость пана своего милостивого, сами съ повѣты сторожу заступовали есте, кгдажъ пѣняжнии люди не были, — и просите, абы то въ пошлину не было, и листомъ бы господарскимъ обварованы въ томъ были. *Отказъ.* Его королевская милость хочетъ отъ васъ вѣдати: кгда передъ тымъ, за предковъ его королевской милости, у войскахъ люди служебные не бывали, хто сторожу у войску держалъ? а кгда то окажете на пришломъ соймѣ, его королевская милость осмотрѣти рачитъ, абы каждый своей повинности досыть чинилъ; а

до того часу абы есте терпеливы были, и потомужъ яко и въ томъ рушеньи заховали ся.

19. *Прозьба.* А што просили есте господаря его милости около даванья пересудовъ и увязчого, звлаща, отъ таковыхъ рѣчей, которые еще не переведены, одно до права всказаны. *Отказъ.* То его королевская милость до даванья статуту откладати рачитъ, въ той же моцы заховываючи, яко на прошломъ соймѣ уставлено: нижли отъ таковоѣ рѣчи, которая будетъ сказана до права, не мають на врьдѣхъ брати, одно паметное; а увязываючи до права, не мають брати большъ, одно отъ кождоѣ десяти копѣ дванадцать грошей, або помилное; а кгда въ тойже рѣчи правомъ переконано будетъ, тогды пересудъ водлѣ уставы соймовоѣ, и отправчое, будетъ ли зъ уряду отправовано.

20. При томъ его королевская милость росказалъ вамъ повѣдити: о подводахъ та ухвала сталася на соймѣ валномъ прошломъ: съ таковыхъ людей, которые здавна подводы давали (хотя жъ отъ столу его королевской милости отданы), абы зъ службы по шести грошей платили; и потомъ на прошлыхъ соймѣхъ завжды то припоминано. Якожъ черезъ листы его королевской милости росказано было прошлого року, дати первый по три грошы, до того часу, поки его королевская милость обачитъ, естли тою суммою можетъ ся той потребѣ оподводахъ досыть учинити: ино многіе, а мало не вси, держачи таковыхъ людей здавна выслужонныхъ, того плату на подводы не дають; а которые дали, и тые не по тому яко бы належало: бо гдѣ которые мѣста подводу давали, до часу постановленья его королевской милости, пѣняжнии подводы, съ таковыхъ мѣстъ не яко мѣщане короля его милости платятъ на подводу, але отъ служебъ дають, мѣнячи, ижъ передъ тымъ только служебъ выслужово, которыми мѣсто осажено. — Его королевская милость въ томъ васъ казалъ напомнати, абы есте кождый, вѣдаючи таковыя

(*) Можно читать и «чимъ бы», т. е. какимъ правомъ.

люди въ имѣньяхъ своихъ, которыхъ и передъ тымъ, за предковъ его королевской милости, повинность была подводу носить, по три грошы зъ службы на тотъ часъ выдавали, поколь уважено будетъ, естли той потребѣ досыть тымъ учинитися можетъ. А зъ мѣстъ, гдѣ которые мѣста подводу носили, нехай бы платъ давали, яко и мѣщане господарскіе, альбо подводу по старому носили; а тотъ платъ, и задержанный, абы есте выдавали безъ всякого замѣшканья, стерегучися, абы черезъ отправчихъ господарскихъ не отправовано того всего плату: бо зъ скарбу его королевской милости немалая сума на подводы выдана, ульжение чинячи таковымъ людямъ, абы подводъ не носили. Про то, яко въ рѣчи и потребѣ земской, далѣй въ томъ льгота не будетъ; и хто на святой Мартинъ пришлого свята плату того не отдасть, роскажетъ его королевская милость то зъ дѣцкованьемъ отправовати на таковыхъ людехъ.

II. — Прозьбы земли Жомойтской.

1. *Прозьба.* Што есте его королевской милости просили, абы часу потребы, при шихованью войска, отъ гуфу вального васъ не отлучано, але по звыклому давному обычаю ижбы есте у гуфъ вальномъ стояли. *Отказъ.* Его королевская милость рачилъ росказати на то вамъ повѣдити, ижъ часу потребы, у войску, отъ гуфу вального отлучаны не будете, але подлѣ стародавнего обычаю, у гуфъ вальномъ стояти маєте.

2. *Прозьба.* Къ тому просите господаря его милости, абы есте по давному службу земскую военную служили; а которые братья ваша земли межи собою подѣлили, ижбы съ таковыхъ земель одинъ конь былъ ставленъ. *Отказъ.* Господарь его милость рачилъ росказати на то вамъ повѣдити, ижъ яко первый сего около обороны земскоѣ постановлено и ухвалено, которымъ обычаемъ служба земская служена быти маєтъ, и отъ того часу якій почотъ съ чѣго имѣнья былъ ставленъ:

ино и теперъ съ такового имѣнья потомужъ № 24. служити мають, хотя бы и роздѣлили имѣнья братья межи собою, которые людей не мають.

3. *Прозьба.* А што есте просили его королевской милости, ижбы его милость той земли хоружого дати рачилъ. *Отказъ.* Его королевская милость зъ ласки своеѣ господарской той земли хоружого давати рачитъ, которого панъ староста Жомойтскій, чоловіка годного обравши, господарю его милости маєтъ заѣцты; а кгдагы господарь его милость на тотъ врьдъ его установить и подтвердить, таковой, яко и иншы хоружые у великомъ князствѣ, люди къ попису до пана старосты водити и хоруговъ часу рушенья носить маєтъ; а хоруговъ въ захованьи у пана старосты будетъ, кгдажъ съ паномъ старостою войну служите.

4. *Прозьба.* Къ тому просили есте господаря его милости: ижъ которые станове духовные и свѣтскіе осялости подлѣ земскимъ правомъ въ земли Жомойтской мають, а часу потребы естли бы сами особами своими на службу быти не могли, абы почты свои тамъ ставили. *Отказъ.* Его королевская милость то на томъ zostавляти рачитъ, ижъ съ таковыхъ имѣній всихъ служба земская служена быти маєтъ потомужъ, яко ся то во всемъ великомъ князствѣ заховываетъ.

5. *Прозьба.* Тежъ просили есте господаря его милости, ижбы въ лѣсѣхъ его милости господарскихъ дерева на будованье и на иншыя потребы ваши брати и въ озеряхъ рыбы ловити вамъ не забороняно, и въ томъ ижбы васъ по давному обычаю и водлѣ привилья вашего заховано. *Отказъ.* Господарь его милость казалъ вамъ на то повѣдати, ижъ гдѣ — кольве здавна уступъ въ пуши и въ озера его милости господарскіе мѣвали есте и въ которыхъ мѣстцахъ, то бы есте ознаймили и вывели таковыя лѣсы, гдѣ былиты уступы сперва; и хотя жъ бы теперъ хто и люди свои поселилъ безъ листовъ и даянны господар-

№ 24. скоѣ: ино въ тыхъ лѣсахъ и теперь, водлѣ дав-ного звичаю и подлугъ привилія земского, воль-ность мѣти будете, якожъ его королевская ми-лость росказати рачилъ доведатися о таковыхъ пуцахъ пану старостѣ вашему Жомойтскому.

6. *Прозьба.* Тежъ просили есте его королев-ской милости, ижбы особы духовные и свѣт-скіе, и тежъ кнѣжата и панята, которые имѣнья свои въ земли Жомойтской мають, о кривды шляхтъ въ повѣдѣхъ отказывали. *Отказъ.* Его королевская милость рачилъ ро-сказати вамъ на то повѣдѣти, ижъ его ми-лость рачитъ то откладывати до выданья ста-туту, а до того часу по давному обычаю то его королевская милость составляетъ.

7. *Прозьба.* Еще просили есте господаря его милости, ижбы господарь у Ляховъ, Нѣмцовъ и Угровъ, которымъ въ земли Жомойтской ослѣности подаваны, рачилъ вамъ дозволити ихъ скуповати, кгдажъ ся вамъ отъ нихъ ве-ликое утѣшеніе дветъ. *Отказъ.* Господарь его милость рачилъ росказати на то вамъ по-вѣдѣти, ижъ его милость откладаетъ то до по-становленія: которое кгда во всемъ панствѣ его милости великомъ князствѣ Литовскомъ учинено будетъ, по томужъ и въ земли Жо-мойтской заховати ся мають.

8. *Прозьба.* Оповѣдаете тежъ его королев-ской милости, ижъ отъ жидовъ у мытъ обя-женіе великое вамъ ся дветъ, и просите, што-бы его милость господарь тое мыто на васъ презожити рачилъ, а вы туюжъ сумму до скарбу его королевской милости давати хоче-те, што и жидъ даетъ. *Отказъ.* Его королев-ская милость рачилъ росказати вамъ на то повѣдѣти: кгда рокъ выдержанью аренды выйдеть, на онъ часть его королевская милость съ тымъ вчинити рачитъ то, што ся лѣпшого и пожиточнѣйшого его милости господарю въ томъ видѣти будетъ.

9. *Прозьба.* А што пожитки новые зъ уста-вы, яко мыто, такъ и волоки въ земли Жо-мойтской постановлены, просите, абы листомъ

господарьскимъ было обваровано, ижбы то на-потомъ вольностямъ вашимъ шляхетскимъ не шкодило. *Отказъ.* Господарь его милость ра-чилъ росказати на то вамъ повѣдѣти, ижъ его милость росказалъ на то вамъ листъ свой господарскій дати, штожъ то нынѣ и на по-томные часы вольностямъ и справамъ вашимъ шляхетскимъ шкодити не маеть.

10. *Прозьба.* Просили тежъ еще его коро-левской милости, жебы Ляхове и Русь, кото-рымъ надъ привилія ваши уряды въ земли Жомойтской подаваны, зложоны зъ урядовъ были, и впередъ абы чужоземцомъ уряды не даваны, одно вамъ, обывателемъ земли та-мошней. *Отказъ.* Его королевская милость ра-чилъ росказати вамъ на то повѣдѣти, ижъ яко на прошломъ соймѣ въ року пятьдесятъ пя-томъ около врьдовъ постановлено, потомужъ и васъ его королевская милость въ томъ захо-вати хочеть.

11. *Прозьба.* Тежъ просили есте его коро-левской милости, ижбы панъ староста Жо-мойтскій винъ незвыклыхъ на васъ не бралъ; а отъ челяди, которая отъ васъ утекаетъ, абы во врьдѣхъ господарскихъ поземное не бра-но; а ижъ Прусы и Лифлянты съ збѣгами ва-шими справедливости вамъ не чинятъ, въ томъ есте о науку просили. *Отказъ.* Госпо-дарь его милость рачилъ росказати на то вамъ повѣдѣти, ижъ панъ староста нынѣшній и по-немъ будучіе панове старосты Жомойтскіе въ бранѣхъ винъ мають ся заховати по давному обычаю; а поземное отъ збѣговъ вашихъ въ тивунствахъ отъ того часу брано быти не маеть, але съ права таковыхъ выдавати. А што ся дотычетъ збѣговъ вашихъ за границу, ино за листы его королевской милости, съ ни-ми справедливости собѣ доводити маете, а его королевская милость и черезъ пословъ своихъ тыхъ пановъ сусѣдовъ напомянути рачитъ, абы съ тыми збѣгами справедли-вость вамъ чинили и ихъ черезъ то не приї-мовали.

12. *Прозьба.* Къ тому тежъ просили есте его милости господаря, абы привиліевъ, твер-достей на отчизны свои, передъ ревизоромъ не покладали, а за кгрунты ваши у волоки побранные абы отмѣна дана, и съ тоѣ отмѣны абы вже рушоны не были. *Отказъ.* Его коро-левская милость рачилъ то постановити на томъ, ижъ листовъ и права своего на кгрунты черезъ то передъ ревизоромъ оказывати не маете, але передъ паномъ старостою Жомойт-скимъ привилія и твердости на имѣнья свои покладати маете. А што кому отъ ревизоровъ его королевской милости въ отмѣнѣ дано за ваши властные земли, и за што слушнѣ от-мѣна дана быти мѣла, то всимъ обывателемъ земли тамошнее господарь его милость при-виліемъ своимъ господарьскимъ роскажетъ подтвердити.

13. *Прозьба.* Ознаймуе тежъ его королев-ской милости, ижъ имѣнья шляхетскіе на во-локи помѣрены, а шляхта на платѣ осажена, и просите, абы таковые при первой почтиво-сти были заставлены. *Отказъ.* Его королев-ская милость рачилъ росказати на то вамъ повѣдѣти, абы есте всихъ таковыхъ, братью свою, шляхту, чіи — то имѣнья помѣрены, пану старостѣ Жомойтскому оновѣдали, а панъ староста господарю его милости о томъ маеть знать дати; а его королевская милость вземши въ томъ порозумѣнне, учинитъ съ тымъ, што ся слушного и справедливого его милости видѣти будетъ.

14. *Прозьба.* Далѣй просили есте господаря его милости, ижбы зъ Лифлянты земли Жо-мойтской границы были направлены, и гдѣ бы што шляхетского было кому забрано, абы то томужъ было привернено. *Отказъ.* Госпо-дарь его милость росказалъ вамъ на то повѣ-дѣти, ижъ его милость около того Мистра Лифлянтского напомянути рачитъ, и кгда ся тые границы направлять и постановять, его королевская милость што слушного въ той прозьбѣ вашей обачивши учинити рачитъ.

15. *Прозьба.* А што есте господаря его ми-лости просили, ижбы отъ товаровъ вашихъ, которые за границу проважены будутъ, мыто не брано. *Отказъ.* Господарь его милость ро-сказалъ на то повѣдѣти, ижъ кгда властное збожѣ зъ имѣній вашихъ, або было домо-рослое за границу проважено будетъ, тогды то безмытнѣ пропускано быти маеть, въдыже за присягою васъ самихъ, або слугъ вашихъ, которые съ тымъ пойдутъ, штожъ тое збожѣ есть вжатѣ ваше властное и было доморо-слое, а не купленное; а што товаровъ назадъ повезено будетъ, отъ того вже мыто дати по-винны будете, кромъ зброй и коней, што на свою потребу хто будетъ провадити.

III. — Прозьбы земли Полоцкой.

1. *Прозьба.* Што есте его королевской ми-лости прѣсили, ижбы его милость господарь васъ слугъ и подданныхъ своихъ водлѣ при-виліевъ и вольностей, отъ предковъ его мило-сти господарьскихъ, и отъ отца его милости, и тежъ отъ самого его королевской милости паданныхъ, рачилъ заховати, а въ домъ Божій святой Софьи и въ домъ Божій святого Спаса и въ люди тыхъ церквей не вступоватися каза-ти рачилъ, а ижбы его королевская милость, подлугъ давного обычаю, яко то за предковъ вашихъ бывало, опекуновъ церковныхъ уста-новити рачилъ. *Отказъ.* Его королевская ми-лость казалъ вамъ на то повѣдѣти, ижъ его милость не звыкъ никому привиліевъ и воле-ностей нарушати; такъ тежъ и васъ, яко вѣр-ныхъ слугъ, во всемъ при вольностяхъ ва-шихъ заставляти рачитъ, и опекуновъ, которые въ привилія вашемъ стародавномъ описаны, панъ воевода Полоцкій, восполкъ зъ вами, особъ на то годныхъ двухъ съ пановъ бояръ тамошнихъ Полоцкихъ тымъ обѣма церквамъ Божьимъ, святой Софьи и святого Спаса, опе-кунами обравши установити маеть: которые пригдѣдати будутъ, абы отъ владыки и отъ игуменіи имѣнья церковные знищенія не тер-пѣли; а по смерти тыхъ духовныхъ парсунъ

№ 24. менованных, и жбы тые опекуны, съ вѣдомомъ пана воеводинымъ и съ вижомъ его милости, скарбы церковные и всю маетность въ имѣньяхъ церковныхъ списывали, и списавши, тыежъ опекуны до науки его королевской милости то все завѣдати, и въ цѣлости посланцу господарскому, который владыку, або игуменью Полоцкую увязывати поѣдетъ, здати и личьбу со всего учинити повинны будутъ.

2. *Прозьба.* Што тежъ на прозьбѣ своей его королевской милости докладаете, и жъ его милость всихъ тыхъ, которые повинность замковую полняютъ, отъ плаченъя мыта вызволити рачилъ; а ваши мѣщане на земляхъ вашихъ живучи, восполкъ зъ мѣщане его милости господарскими всимъ повинностямъ замковымъ досыть чинятъ, только и жъ двухъ сотъ копѣ грошей, которые мѣщане королевскіе отъ права своего Майтборского до скарбу его милости даютъ, платити помогати имъ не хочуть, а они, для того, къ той вольности отъ плаченъя мыта имъ даной ихъ не припускаютъ, — и просите, абы къ той вольности и ваши мѣщане были припущены; а отъ товаровъ ихъ, которые коли до Риги спускати будутъ, штобы мыто не было брано. *Отказъ.* Его милость господарь казалъ вамъ повѣдати, и жъ мѣщаномъ Полоцкимъ тую вольность подлѣ привилеѣвъ ихъ учинити рачилъ; а вашъ привилей вольности тоѣ мѣщаномъ вашимъ не обмодяетъ; а тежъ то не есть со шкодою ихъ, кгда вольность мають торгу, и съ того мыто даютъ, чимъ торгуютъ.

3. *Прозьба.* Еще просили есте господаря его милости, и жбы его королевская милость, заховываючи васъ водлѣ привилеѣвъ и вольностей вашихъ, серебщизны съ подданныхъ вашихъ, черезъ то, николи не брати казати рачилъ. *Отказъ.* На то его королевская милость рачилъ розказати вамъ повѣдати, и жъ серебщизну не господарю его милости, але на потребу земскую ухвалете сами и даете: про то податку такового, отъ всихъ становъ ухвале-

ного на потребу рѣчи посполитой, яко его милость до скарбу своего господарского привлашати не звыкъ, такъ и отпускати не можетъ.

4. *Прозьба.* Къ тому повѣдаете, и жъ мытникъ Полоцкій отъ товаровъ вашихъ, которые для набытѣя коней и зброй до Риги спускаете, мыто беретъ, а въ привилѣяхъ и вольностяхъ вашихъ описано, и жъ мыто на Полочанъхъ вѣчнѣ брано быти не маеть, — и просите, штобы его королевская милость, водлѣ тыхъ привилеѣвъ и вольностей вашихъ заховываючи васъ, и мыта отъ товаровъ вашихъ не брати казати рачилъ. *Отказъ.* Господарь его милость розказалъ заховати васъ въ томъ водлѣ привилеѣвъ вашихъ; и не будете повинны давати мыта отъ тыхъ всихъ рѣчей, штокольвекъ въ имѣньяхъ вашихъ сами властнымъ накладомъ своимъ выробивши спускати будете, такъ тежъ отъ збожѣя своего господарства и отъ быдла доморослого; а вѣдже панъ оногo товару, або его слуга маеть на первой коморѣ присягу учинити на томъ, и жъ тотъ товаръ зъ его або пана его имѣнья и властнымъ накладомъ робленъ, также и збожѣе его господарства и быдло доморослое.

5. *Прозьба.* Притомъ просите его королевской милости, и жбы для борзѣйшоѣ справедливости, судей и писаря присяжного, и печать его милости господарскую повѣтовую дати вамъ, и памятное и вижовое и дѣцкованое, водлѣ привилеѣвъ и вольностей вашихъ, брати розказати рачилъ. *Отказъ.* Его королевская милость на тую прозьбу вашу рачилъ казати вамъ повѣдати, и жъ тотъ артыкулъ с судѣяхъ и вижахъ рачитъ его милость откладати до статуту нового, кгдажъ недолгій часъ и рокъ на выданье статуту ознанити вже его милость рачилъ; а до того часу, маете судитися по первому, и дѣцкованое по тому, яко въ привилѣяхъ вашихъ описано, брано быти маеть; а кгда статутъ новый будетъ всимъ землямъ выданъ, на онъ часъ вже будете справоватися по тому яко ся въ статутъ постановитъ.

6. *Прозьба.* Надъ то просите его королевской милости, и жбы его милость роботы замковыхъ, городенъ наметныхъ, то есть, пустовскихъ, которые были роблены передъ тымъ волостями, зрадливо отъ непріятеля его милости посягненными, большъ на васъ наклапати не рачилъ, заховываючи васъ водлѣ привилеѣвъ и вольностей вашихъ: бо естли городни наметные перво сего людьми вашими зароблены были, то есте учинили за жеданьемъ святоѣ памяти Жикгимонта господаря короля его милости, отца его королевской милости, а и жъ уношину то пойти не мѣло, на што и листы его милости вказуете. *Отказъ.* Господарь его милость казалъ вамъ на то повѣдати, и жъ его милость о тую роботу замковую, ни въ чомъ не нарушаючи тыхъ листовъ, васъ заховывати рачитъ, же съ повинности тыхъ наметныхъ городенъ пустовскихъ людьми вашими робити не маете: нижли его милость отъ пана воеводы маеть вѣдомо, што тоѣ роботы есть пыльная потреба на сесъ часъ; про то жадаеть его милость васъ, добрыхъ слугъ своихъ, абы есте теперъ тые городни заробили, розобравши то межѣ себе и розложивши на люди свои; а его королевская милость листъ свой господарскій розказалъ вамъ дати, и жъ то въ пошину вамъ не будетъ; а впередъ хочеть его милость найти тому обычай, кимъ бы таковыя пустые городни заробливаны были.

7. *Прозьба.* Просите тежъ его милости о заспособенъе стрѣльбою и живностью Полоцкого замку. *Отказъ.* То его королевская милость розкажетъ осмотрѣти, и, взявши вѣдомо отъ пана воеводы Полоцкого, всими тыми потребами оный замокъ посилити.

IV. — Прозьбы повѣту Витебского.

1. *Прозьба.* Што есте просили его королевской милости: которые князи и панове и державцы имѣнья свои въ повѣтъ Витебскомъ мають, абы службу, яко военную, такъ и лежанья въ замку, коли потреба будетъ, съ тыхъ имѣній своихъ служили, имѣньями свои-

ми головнѣйшими не вымовляючися. *Отказъ.* № 24. Его королевская милость на то рачилъ розказати вамъ повѣдати, и жъ хто — кольве имѣнье свое въ повѣтъ Витебскомъ маеть, будь зъ особъ духовныхъ или свѣтскихъ, завжды часу потребы, отъ пана воеводы ознаненоѣ, маеть самъ особою своею при замку быти; а кгда самъ отѣдетъ, ино врядника, чоловѣка доброго и годного, zostавляти маеть, который часу потребы, за розказаньемъ пана воеводинымъ, при замку мѣшкати будетъ, и зъ собою такъ много людей мѣти, яко къ войнѣ; а часу войны, подлѣ статуту мають ся заховати.

2. *Прозьба.* Просите тежъ его королевской милости, и жбы въ нижнемъ и въ верхнемъ замку вѣжи оправити, также и замокъ верхній весь абы былъ оправленъ, и стрѣльбою, дѣлами и гаковницами, порохами и пушкарями заспособленъ, и шпихлеры бѣ поробити, и живностью тотъ замокъ заспособити его милость розказалъ. *Отказъ.* Его королевская милость розкажетъ то все водлѣ потребы осмотрѣти, яко панъ воевода справу его милости того дастъ и потребу окажетъ.

3. *Прозьба.* Што тежъ есте его королевской милости просили, и жбы его милость тую серебщизну, которая на два годы по пяти грошей розложена, вамъ отпустити рачилъ, и впередъ николи на васъ, яко на людехъ украинныхъ, серебщизны не брати казати рачилъ. *Отказъ.* На то его королевская милость рачилъ розказати вамъ повѣдати, и жъ серебщизну не господарю его милости, але на потребу земскую даете, и того податку, на потребу рѣчи посполитоѣ ухваленого, яко его милость до скарбу своего господарского привлашати не звыкъ, такъ тежъ и отпускати не можетъ.

4. *Прозьба.* А што билъ есте господарю его милости чоломъ, абы зъ людей вашихъ серебщизну брати потужъ яко и въ Полоцкомъ повѣтъ: который чоловѣкъ одною клячою у сохъ робитъ, абы платилъ яко отъ полсохи,

№ 24. водлѣ давнѣйшѣй звѣдѣности. *Отказъ.* Господарь его милость на то призволяти рачитъ : вѣдѣже который чоловѣкъ двѣма клѣчами у сохѣ робити будетъ, таковой абы серебришину отъ суполнѣ сохи платилъ.

5. *Прозьба.* Докладаете тежѣ то его королевской милости, на прозьбѣ своей, ижѣ кгда панъ воевода Витебскій, за розказаньемъ его милости господарьскимъ, або за потребою своею, съ тамошняго замку зѣдетъ; тогда, хотя потреба не есть и часъ спокойный, вамъ съ почтами своими при замку лежати кажетъ: въ чомъ трудность собѣ немалую быти мѣнующи, просите, абы то впередъ вамъ чинено не было. *Отказъ.* Господарь его милость рачилъ розказати на то вамъ повѣдѣти, ижѣ князю воеводѣ Витебскому вже то отъ его королевской милости розказано: кгда потреба не вказуетъ, ижбы вамъ съ почтами вашими при замку лежати не казалъ; а вы бы тежѣ за писаньемъ пана воеводинымъ, кгда бы его милость потребу разумѣючи, къ замку вхати вамъ казалъ, въ томъ не сплосался.

6. *Прозьба.* Притомъ просите господара его милости, жебы для борзѣйшѣй справедливости, судей и писаря присяжного вамъ дати, и памятное и вижовое и дѣйкованое водлѣ привилеѣвъ и вольностей вашихъ брати розказати рачилъ. *Отказъ.* Его милость господарь на тую прозьбу вашу рачилъ розказати вамъ повѣдѣти, ижѣ тотъ артыкулъ о судьяхъ и вижахъ рачитъ его милость откладати до статуту нового, кгдажѣ недолгій часъ и рокъ на выданье статуту ознанити вже его милость рачилъ; а до того часу маете судитися по первому, и дѣйкованое по тому, яко у привилеѣхъ вашихъ описано, брано быти маеть; а кгда статутъ новый будетъ всимъ землямъ выданъ, на онъ часъ вже будете ся справовати по тому, яко ся въ статутѣ постановитъ.

7. *Прозьба.* Надъ то просили есте господара его милости, ижбы вы службу военную служили и почты зъ имѣній своихъ выправовали

по тому, яко и Полочане выправуютъ, кладучи похожихъ людей двухъ дымовъ за одного отчизного чоловѣка, то есть, съ двадцати чоловѣкъ похожихъ одного коня ставити. *Отказъ.* Господарь его милость рачилъ розказати вамъ на то повѣдѣти, ижѣ его милость водлѣ давнѣйшаго обычая зостановляти рачитъ тую рѣчь на тотъ часъ.

V. — Прозьбы повѣсту Мстиславского.

1. *Прозьба.* Што есте просили короля господара его милости, ижбы его милость князю старостѣ Мстиславскому и городничому тамошнему рачилъ казати, къ робленью городень вашихъ знову въ замку Мстиславскомъ (который, оповѣдаете, ижѣ вельми опалъ и оправленья потребуеть), и тежѣ къ робленью мосту васъ не притягивати, повѣдаючи, ижѣ вы николи съ фундату того замку не робили, одно въ половицы замку городни свои поправляли, и теперъ ихъ водлѣ давнѣйшаго обычая, оповѣдаете, ижѣ поправляти хочете; а мосту николи робити есте повинны не были, але волостями господарьскими и нѣкоторыхъ князей и пановъ людьми мостъ роблявѣ. *Отказъ.* Его королевская милость рачилъ розказати на то вамъ повѣдѣти, ижѣ замокъ и мостъ всимъ при тамошнемъ замку мѣшкающимъ есть потребенъ: про то, яко его королевской милости подданные, такъ и ваши люди будутъ повинны замокъ и мостъ робити; а подданные господарьскіе князьскихъ и паньскихъ замковъ не будутъ.

2. *Прозьба.* Къ тому просили есте о листъ его королевской милости до князя старосты Мстиславского и до ротмистра тамошняго, абы хоромъ будованья вашего въ замку не розбирано; а особливо о листъ до ротмистра тамошняго просите, абы драбовъ въ имѣнья ваши не всылаѣ и шкодъ чинити не допущалъ, яловицъ и барановъ и збожья въ селѣхъ и на торгу уставою брати не казалъ, але ижбы цѣною ихъ куповано; и еще другій листъ заручный, о небезпечность здоровья, до негожѣ

штобы вамъ былъ данъ. *Отказъ.* Господарь его милость рачилъ розказати вамъ на то повѣдѣти, ижѣ листъ до князя старосты Мстиславского и до ротмистра тамошняго будетъ вамъ данъ, штобы будованья вашего въ замку не розбирано. А што ся дотычетъ драбовъ, господарь его милость велѣлъ вамъ повѣдѣти, ижѣ драбовъ при тамошнемъ замку его милости, для потребы того замку и для лѣпшой безпечности вашею ховати рачитъ: про то, естли хочете, жебы драбы въ имѣнья ваши не входили, и вы бы всякую живность до мѣста Мстиславского на торгъ возили; а его королевская милость розказати рачилъ ротмистру тамошнему и драбамъ, живность не уставою, але торгомъ куповати; а листъ свой господарскій велѣлъ его милость дати, грознѣя заказуочи ротмистрови, абы ся спокойнѣ къ вамъ заховалъ. А особливо его милость господарь листомъ своимъ князю старостѣ тамошнему розказати хочеть, ижбы шляхты тамошнее утискати и некоторого безправья и трудности чинити имъ не допускатъ.

3. *Прозьба.* Оповѣдаете тежѣ его королевской милости, ижѣ на тотъ часъ хоружого тамъ во Мстислави нѣтъ, и просите за братомъ вашимъ Богданомъ Селицкимъ, жебы господарь его милость хоружое тамошнее ему дати рачилъ. *Отказъ.* Король его милость на то рачилъ розказати вамъ повѣдѣти, штожѣ хоружое тамошнее тому брату вашему Богдану Селицкому дати рачилъ.

Изъ Литовской Метрики (Публ. дѣлъ, кн. IV, л. 100—116), хранящейся при Правительствующемъ Сенатѣ, въ С. Петербургѣ.

25. — 1559 Ноября 16. Окружная королевская грамота, о подвозѣ кормовъ жолнерамъ, отправленнымъ въ Ливонію.

Жикгимонтъ Августъ, Божьею милостью король Польскій, великій князь Литовскій, Русскій, Прускій, Жомойтскій, Мазовецкій и иныхъ, княземъ, паномъ, воеводамъ, старо-

стамъ, державцамъ, намѣстникомъ, тивуномъ, № 25. земляномъ, бояромъ и дворяномъ нашимъ, и тежѣ войтомъ, бурмистромъ и радцамъ, и всимъ подданнымъ нашимъ, и князьскимъ, и панскимъ и духовнымъ. Отправили есмо на замки наши въ земли Ифлянтской старосту Чечерского и Пропойского пана Юрья Зеновевича, зъ ротою его людьми вѣдными: и вы бы вездѣ по дорожѣ, ажѣ до границъ Ифлянтскихъ, на торги и на станы живности для ихъ самихъ и для коней велѣли везти, и продавати водлѣ уставы нашей нижей описаной, то есть: за вола оремного осмдесять грошей, за корову телную сорокъ грошей, за яловицу двадцать чотыри гроша, за вепра кормного двадцать грошей, а за некормного дванадцать грошей, за свинью десять грошей, за барана шесть грошей, за гусь грошъ, за двое куръ грошъ; за копу жита осмъ грошей, за бочку жита десять грошей, за кулъ овса пять грошей, за бочку овса шесть грошей; и кгда зъ земли Ифлянтской у пипованье онъ пошлетъ, абы есте таковыя живности водлѣ тоѣ уставы нашею продавали. А естли бы подданные наши, або тежѣ ваши, князьскіе, панскіе и духовныхъ, тыхъ живностей на станы ихъ везти або продавати по той уставѣ вашей не хотѣли: тогда они взявши вижа зъ уряду, гдѣ бы который наблизшій былъ, мають сами, за вижомъ, таковыя живности брати и водлѣ уставы нашей верху мѣненой платити, але надъ тую уставу, подданнымъ утиску жадного не мають чинити, подъ строгимъ караньемъ нашимъ. Писанъ у Вильни, мѣста Божьего нароченья 1559, мѣсяца Ноября 16 дня.

Подлинникъ писанъ на полулистѣ. Внизу грамоты скръпа: Остаеѣй, маршалокъ и писарь. Печать Литовская малая, подъ кустодіею. На оборотѣ оттѣпка современная: List. . . do wszystkich stanów, aby po drodze do Inflant . . . żołnierzom żywność podwożywali.

Хранится въ Императорской Публичной Библиотецѣ.

№ 26
— 27.

26. — 1559 Декабря 23. Наказная королевская грамота гетманам Яну Ходкевичу и Юрию Зеновичу, *объ охраненіи Ливонскихъ замковъ и о содѣйствіи Мистру Кетлеру въ войнѣ съ Русскими.*

Жикгимонтъ Августъ, Божьею милостью король Польскій, великій князь Литовскій, Русскій, Прускій, Жомойтскій, Мазовецкій и иныхъ, гетманомъ нашимъ, до земли Ифлянтской отъ насъ посланнымъ, столнику великого князства Литовского, старостъ Люценскому пану Яну Еронимовичу Ходкевичу, и старостъ Чечерскому и Пропойскому пану Юрию Николаевичу Зеновичу. Ознаймуемъ вамъ, ижъ воеводъ Троцкому, гетману навишшему великого князства Литовского, старостъ Мозырскому, державцъ Лидскому и Бѣлицкому пану Николаю Юрьевичу Радивилу, зъ войски нашими вже есмо рушиться казали, якожъ на день Нового лѣта панъ гетманъ маєтъ быти на мѣстцы, къ збиравью всимъ землямъ назначеномъ; особливый тежъ нѣкоторый почотъ людей отправляемъ на помощь войску Ифлянтскому: про то штобы есте поспѣшались, и вси замки, до которыхъ посланы, въ мощъ свою взяли. Бо вже есмо до мистра Ифлянтского писали, ижъ тебе, пане Зеновичу, съ тыми людьми, которые при тобѣ суть и што отсель отправляемъ, на помощь до войска его шлемъ: и яко мистръ Ифлянтскій до тебе напишетъ, взываючи къ собѣ, абы еси со всеми тыми служебными людьми, вземъ Бога на помощь, тягнулъ до него, тыми мѣстцами, гдѣ онъ тобѣ oznаймитъ, а не при границы Московской. А мы до него писали, абы онъ о безпечное преистье тобѣ до войска его отъ Московскихъ людей причинилъ ся. А кого отсель отправимъ, тотъ тамъ же въ земли Ифлянтской съ тобою ся зведетъ, або пакъ у войску тебе найдетъ. А яко зъ замковъ оба-два, такъ и въ томъ тягненьи, и до войска къ мистру притягнувши, того бы есте съ пильностью стерегли, абы въ землю Московскую въѣзду и жадноу шкоды

не чинили: только, если бы битву Москва зъ вами становити хотѣли, альбо загоны въ землю Ифлянтскую пускали; на тотъ часть, вземши Бога на помощь, не допускаючи шкоды чинити, будете то дѣлати што добрымъ и вѣрнымъ слугамъ нашимъ належитъ, застановляючися противъ силамъ того непріятеля. Въдѣже кгда ты, пане Зеновичу, зъ замку зѣдешъ, нехай бы ся панъ Остикъ староста, для большоу безпечности, съ почтомъ своимъ осталъ на замку, але роту суполно, яко пѣнези взялъ, абы послалъ при тобѣ, уставивши поручника, которого человека доброго и годного, о чомъ есмо и до него листъ нашъ писати казали. А поколѣ панъ Зеновичъ отъ мистра зъ войска вернется, ты, пане столнику, въ чуйности и въ великой осторожности былъ бы еси, и старостъ на другихъ замкахъ и роты о то напоминалъ; и што певного поновится зъ стороны непріятельской, намъ бы и пану гетману вѣдати давалъ. Писанъ у Вильни, лѣта Божьего нароченья 1559, мѣсяца Декабря 23 дня.

Подлинникъ писанъ на листъ. Королевской подписи нѣтъ. Внизу грамоты скръпна: Остаеи, маршалокъ и писарь. Бывъ сложенъ и запечатанъ, импѣтъ на пакетъ адресъ, съ титулами обоимъ гетмановъ, какъ означено въ заглавii акта.

Хранится въ Императорской Публичной Библиотекѣ.

27. — 1560 Января 8. Грамота гетманамъ Яну Ходкевичу и Юрию Зеновичу, *съ выговоромъ за промедленіе въ походъ и причиненіе обидъ жителямъ, на пути въ Ливонію.*

Жикгимонтъ Августъ, Божьею милостью король Польскій, великій князь Литовскій, Русскій, Прускій, Жомойтскій, Мазовецкій и иныхъ, гетманомъ нашимъ въ земли Ифлянтской, столнику великого князства Литовского пану Яну Еронимовичу Ходкевичу, а ста-

ростъ Чечерскому и Пропойскому пану Юрию Зеновичу. Што маючи росказанье и листы наши, абы есте на замки наши въ земли Ифлянтской што наборздѣи тягнули, отписуете намъ, ижъ колько недѣль собравшись на пограничью лежите; нижли трудность быти прекладаете тамъ безъ спижы тягнути, не вѣдаючи о шафарахъ и о стацыи, которая на тыхъ замки маєтъ быти зъ вами проважена: о томъ первѣй сего писанья вашего маемъ вѣдомость, ижъ збожья и иныхъ живностей немало до Дунемборку звезено, чого тамъ ся ближей могли есте довѣдати, а такъ долго для того не мѣшкать было на одномъ мѣстцы; бо зъ Дунемборку на иншіе замки мають тые спижы подавати. А тое мѣшканье ваше на одномъ мѣстцы и въ тягненьи въ дорожъ жалобы зъ плачомъ отъ подданныхъ до насъ доносить; ино выписывати того на тотъ часть занѣхиваемъ, ажъ будетъ все списано: бо маемъ вѣдомо, ижъ вы не яко въ панствѣ нашемъ, але яко въ непріятельской земли спижовались, о чомъ особливо дворянинъ нашъ будетъ посланъ и таковыи вси кривды и шкоды спишетъ; за што повиненъ будетъ кождый отповѣдати, на кого въ чомъ вина будетъ дана. Къ тому што есмо писали, абы ты, пане Зеновичу, на листъ мистра Ифлянтского, до войска Нѣмецкого тягнулъ со всеми ротмистры и ротами вѣдными, твоей справѣ поручеными, зоставивши пана Остика на замку Рѣзицы съ пѣшими людьми; а вы отписуете, ижъ есте тотъ листъ и волю нашу ротмистромъ и товаришомъ оповѣдали, и они вси одностайнѣ колько причинъ на то повѣдали: первая, ижъ пѣнзей на то не брали, абы мѣли до войска Нѣмецкого тягнути, але одно за тые пѣнзы на замкахъ нашихъ полрока служити, и иные многіе причины, такую заплату яко у войску Ифлянтскомъ и далекость дороги прекладаючи. Тому всему зрозумѣвши, дивуемся не помалу, и то за новую а небывалую рѣчь отъ васъ пріймуемъ: бо того николи не бывало, ижбы мѣли служебные

люди вѣдные замѣренные тягненья противко № 27. непріятелю мѣти, и, взявши пѣнзы, только на замкахъ лежати, на што бы непотреба вѣдныхъ, только пѣшихъ, абы замковъ оборонити. А што примовляются къ такой заплатѣ, яко у Нѣмецкомъ войску платятъ: ино досыть немалую заплату взяли, а тежъ не водлѣ Нѣмецкого обычаю почты свои оказали, яко есмо зъ реистру попису вырозумѣли, и хочемъ мѣти, абы ништо таковыми причинами вымовы чинити не смѣлъ; але абы еси, пане Зеновичу, водлѣ первшого листу и росказанья нашего, зъ ротмистры вѣдными и съ тыми, которые при пану столнику, — кромѣ тыхъ стакопей, на которые тобѣ, пане столнику, пѣнзы даны, — за писаньемъ отъ мистра Ифлянтского, до войска его тягнулъ, на тые мѣстца, куды онъ oznаймитъ, и вже бы есте съ тому способляли. Нижли, если бы князь Полубенскій, которого съ Татары тамъ же отправляемъ, надтягнулъ, яко бы посполъ съ тобою до войска ихъ притягнулъ: про то отпишешъ до мистра, што вже тягнути хочешъ, але причину каковую задаси, што бы къ спѣшному тягненью переказило, а для того часу притягненья до войска его не oznаймишь. А што ты, пане столнику, за листомъ и росказаньемъ нашимъ, не отмовляешся пильности къ службѣ нашей мѣти, и oznаймуешь, ижъ на Себѣжу козаковъ Московскихъ семь сотъ, а въ Красномъ городку, полтрети мили отъ Люцена, чотыри ста козаковъ: ино, яко есмо перво до тебе писали, такъ и теперъ хочемъ мѣти, абы еси съ пильностью стерегъ, ижбы никоторые уторжки и зацепки въ непріятельскую землю зъ наше стороны не были. А если бы непріятельскіе люди мѣли злый умыслъ въ землю нашу ити, тогды порозумѣватися будешъ въ томъ зъ воеводою Полоцкимъ, державцою Свислоскимъ паномъ Станиславомъ Станиславовичомъ Довоиною; а панъ воевода Полоцкій, маючи науку въ томъ отъ насъ даную, помочь и посидокъ людьми къ

№ 28. отпору тымъ людемъ неприятельскимъ додавати тобѣ будетъ. Писанъ у Вильни, мѣста Божьего нароженя 1560, мѣсяца Генваря 8 дня.

Подлинникъ писанъ на листѣ. Въ концѣ грамоты скрѣпа: Остаеѣй, маршалокъ и писарь. Бывъ сложенъ пакетомъ и запечатанъ, имѣетъ адресъ на имя обоихъ гетмановъ, какъ означено въ заглавіи акта.

Хранится въ Императорской Публичной Библиотеки.

28. — 1561 Февраля 20 Уставная королевская грамота Могилевскимъ мѣщанамъ, съ объясненіемъ данныхъ имъ льготъ, также разныхъ повинностей и податей, подлежащихъ ко взносу въ казну съ земель, товаровъ, ремеслъ и проч.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ. Били намъ чоломъ подданные наши, вси мѣщане мѣста нашего Могилевского о томъ, ижъ што которое постановленіе съ помѣры новоѣ, за росказаньемъ нашимъ госполарскимъ, учинено есть около платовъ и пожитковъ нашихъ, которымъ обычаемъ доходы до скарбу нашего давати и вси ихъ повинности въ каждый годъ они полнити мають, якожъ и устава отъ тыхъ, кого староста посылалъ на свое мѣстцо, дана имъ есть: ино били они намъ чоломъ, абыхмо нашу господарскую уставу имъ на то дали, и то все, на што они повинни быти мають, на уставъ нашой господарской выписали. А про то, хотячи, абы захованы были во всемъ подданные наши водлѣ уставы имъ даноѣ на сесь часъ, казали есмо на семъ листѣ напомъ выписати ее, слово отъ слова. И такъ ся въ собѣ маеть:

На-первѣй: зъ волокъ къ мѣсту вымѣренныхъ, которые суть кгрунту середнего, мають платити, водлѣ уставы нашеѣ, съ каждоѣ во-

линыя повинности старые зъ волюки грошей дванадцать. А зъ домовъ, въ рынку отъ прута пѣнязей по-дол-осма, а въ улицахъ отъ прута пѣнязей по пол-пяти; зъ огородовъ въ мѣстѣ отъ прута пѣнязей по пол-третья; зъ моркговъ полныхъ на предмѣстью, также зъ моркговъ сѣножатныхъ, надъ рѣкою Днѣпромъ помѣренныхъ, грошей по три; зъ сѣножателей на болотахъ помѣренныхъ, отъ моркгу грошъ одинъ и пѣнязей пять. Съ застынковъ мѣстскихъ, хто ихъ принялъ, мають платити до скарбу нашего по тому, яко въ реестру на врьдѣ зоставленомъ есть описано. А тотъ весь податокъ, водлѣ уставы нашеѣ, съ помѣры новоѣ въ року прошломъ шестидесятомъ поставленный, мають почати до скарбу нашего платити въ року теперешнемъ шестидесять первомъ; а почати отдавати имъ тотъ податокъ въ каждый годъ, на рокъ и часъ певный, то есть, отъ дня нароженя святоѣ Пречистоѣ. А при отдаванью тыхъ платовъ и податковъ нашихъ, не маеть урядъ на себе большъ писчого и бирчого зъ нихъ брати, одно зъ волюки пѣнязей дванадцать. А хто волюки не держитъ, тотъ только отъ воротъ пѣнязи два дати повиненъ, а зъ моркгу полного, также и сѣножатного пѣнязей одинъ. А иныхъ некоторыхъ повинностей полнити, податковъ и стадей давати, и зъ листы нашими и врьдничими ѣздити неповинни, окромъ тыхъ платовъ и повинностей ихъ, тутъ вышей и ниже описанныхъ.

Съ корчомъ мѣстскихъ, въ которыхъ медъ и пиво шинкуютъ, и отъ горѣлки, и тежъ съ коморы мытной, и отъ важчого, што держатъ на три годы на арендѣ жидове Берестейскіе, Аврамъ Длукгачъ и Еска Шломичъ, дають до скарбу нашего въ каждый годъ, водлѣ аренды, копъ тысячу и чотыриста; а часъ выдержанья ихъ тоѣ аренды, отъ року теперешнего шестидесять первого, отъ дня Нового лѣта до двухъ годовъ. Окромъ обѣстки отъ людей купецкихъ переѣздчихъ, которая завжды на пожитокъ старостинъ приходитъ, а окромъ скла-

ду замкового, который уряду вольно на пожитокъ свой мѣти одинъ кротъ до году, къ святу святого Іоанна Крестителя (а сытити ему пятьдесятъ пудовъ меду, ваги тамошней Могилевской, а бошто похочетъ), и особливо тежъ окромъ складовъ поповскихъ и мѣщанскихъ, въ которыхъ сытити медъ вольно попомъ семь кротъ на годъ, то есть, къ святу святого Спаса, и на день Вознесенія Христова, и къ святой Троицы, къ Матцѣ Божой, и на день святого Николы, и на день святыхъ Апостоловъ Петра и Павла, и на день святого Ильи; одно жъ за каждымъ разомъ, не большъ, только за два рубли грошей широкихъ меду купивши, розсытити мають, — къ тому, мѣщаномъ мѣста Могилевского вольно есть въ каждый годъ дванадцать складовъ на пожитокъ ихъ мѣти, къ святомъ урочистымъ, коли они сами похочутъ; одно жъ за каждымъ разомъ, не большъ, только за два рубли грошей широкихъ меду купивши, сытити они мають. Надъ то вольно всимъ мѣщаномъ тамошнимъ въ домѣхъ ихъ, на властную ихъ потребу, а не на продажу, медъ и пиво мѣти, то есть: къ веселью, къ выданью дѣвки и къ ожененью сына, и на коляцью, коли ся то кому пригодитъ; а за вѣдомомъ мытниковъ, и горѣлку на тые ихъ потребности въ домѣхъ ихъ палити. Еще въ каждый годъ пять кротъ, къ святомъ урочистымъ, то есть: къ Божьему Нароженью, къ Запустомъ великимъ, на недѣлю Масленую, къ Великодню, къ святой Троицы и къ святому Николѣ осеннему, мають вольность вси мѣщане мѣста Могилевского горѣлку въ домѣхъ ихъ палити; одно жъ за каждымъ таковымъ разомъ, не большъ, только по одной четверти солоду, мѣры тамошней Могилевскоѣ, на горѣлку спалити вольно.

Вольности мѣщанъ нашихъ: на-первѣй, отъ работъ замковъ нашихъ украинскихъ ихъ вызволяемъ; нижли роботу замку тамошнего и паркану мѣстского повинни будутъ оправовати, и переконъ около замку и около паркану мѣстского копати, выправуючи зъ домовъ

своихъ къ той работѣ каждый противъ со- № 28. бѣ чергою: вѣдѣже не будутъ они повинни большъ замку и паркану робити, также ихъ оправовати, и перекопу замкового и парканового копати, одно четвертую часть противъ волости, а волость три части; бо и передъ тымъ завжды такожъ повинни были волошане къ каждой работѣ замковъ нашихъ зъ волости выправовати. Слобожане, кувичники и вси тии мѣщане, которые передъ тымъ званы были сусѣдами и огородниками, мають нести одну повинность зъ мѣщаны, въ работѣ замку и паркану, и въ копанью перекопу, и тежъ въ даванья податковъ, водлѣ теперешней новоѣ помѣры на мѣщанъ уставленоѣ. Вѣдѣже врьдѣ, для вымысловъ своихъ, обтяжати подданныхъ тою работою не маеть, але яко зъ войтомъ мѣстскимъ и съ сотниками чергу работы на мѣщанъ постановитъ, такъ вже не маеть ихъ большъ къ той работѣ притягивати; одно тими людьми съ черги уставленными робити, поколѣ роботу зачатую доконають. А ижъбы тымъ спѣшнѣй тая работа ся поспѣшала, тогда будутъ повинни почати роботу вышей описаную въ томъ року, коли того будетъ потреба указовати, отъ дня Благовѣщеня святоѣ Пречистоѣ: вѣдѣже часъ потребности таковыхъ работъ врьдѣ розузнавати будетъ.

Сторожу тежъ въ мѣстѣ, въ парканѣ и на вѣжахъ паркановыхъ абы мѣщане завжды мѣли; а для того мають брати на пожитокъ свой мѣстскій, до воли и ласки нашеѣ, съ крамницъ мѣстскихъ, и зъ ятокъ мясныхъ, также и зъ лавокъ рыбныхъ и хлѣбныхъ, и съ каждого дробного товару певный платъ: отъ крамницъ и отъ лавокъ, то есть, отъ каждоѣ крамницы, зъ якимъ — кольвекъ товаромъ хто въ ряду сѣдѣти будетъ, маеть дати въ годъ грошей дванадцать, а зъ лавки отъ локтя пѣнези два; и тотъ податокъ войтъ мѣстскій до рукъ своихъ отбирати, и за вѣдомостью сотниковъ и иныхъ мѣщанъ головнѣйшихъ, на

№ 28. пожитокъ и потребу мѣстскую оборочати маеть.

А при замку тамошнемъ млынъ для пожитку замкового и потребъ мѣстскихъ завжды можетъ быти забудованъ на рѣцѣ Дубровенцѣ: ино, естли бы коли весною, альбо въ осень, также лѣтомъ, альбо зимою вода кгвалтовная пришла, которая бы тому млыну шкодити мѣла; тогда абы въ часть навалности, вси мѣшане бѣгли на ратунокъ отъ воды, яко на кгвалтъ, подъ казнью вины дванадцати грошей.

Коморники въ мѣстѣ тамошнемъ, которые избу або комору у подворника наймуютъ, и подъ теперешнимъ часомъ того постановленья въ мѣстѣ мѣшкаютъ, и которые бы потомъ до мѣста приходили, о таковыхъ мають давати вѣдомость войты вряду замковому; а они, водлѣ уставы наше, будутъ повинни платити до скарбу нашего въ каждый годъ по два грошы; и тотъ податокъ также почати отдавати мають въ року теперешнемъ шестьдесятъ первомъ.

Стаций на послы и гонцы некоторыхъ мѣшаномъ не давати: ино то все съ скарбу нашего опатровано быти маеть.

До сторожы замковоѣ, на кликанье и на иншыя потребы, повинни мѣшане зъ волостью шестнадцать сторожовъ нанавши, въ каждый годъ давати, то есть, мѣшане чотырехъ, а волошане дванадцать чоловѣковъ дати мають; а на наймованье тыхъ сторожовъ складатися мѣшаномъ пѣнязми зъ домовъ по только, по кольку прійти зъ нихъ можетъ, чимъ бы одно тыхъ чотырехъ сторожовъ наняти могли.

Тежъ мѣшане мѣста тамошнего повинни вси и каждый зособна, для обороны, въ часть небезпечности земскоѣ отъ непріятеля нашего, стрѣльбу всякую, то есть, гаковницы, ручницы и сагайдаки и иншую оборону, то есть, рогатины и што иного къ той оборонѣ наемжитъ, въ домѣхъ своихъ мѣти; а хто не можетъ большъ, ино хотя одну ручницу и рога-

тину нехай маеть, а безъ обороны таковоѣ въ дому своемъ нехай не мѣшкаеть.

Вольности мѣшаномъ до ловленья рыбъ на рѣцѣ Днѣпрѣ водлѣ обычаю стародавнего, але до озеръ селскихъ некоторого уступу мѣшаномъ не мѣти. Ъзы тежъ на мѣстцахъ звыклыхъ мѣшаномъ забивати вольно, также и перевѣсья на Днѣпрѣ, на старыхъ ловищахъ; а ловячи рыбы, мѣшаномъ межи зереманы бобровыми на берегу не становитися и сътей бобровыхъ не мѣти.

По дерево, на будованье и на дрова и на иншыя потребы свои, мѣшаномъ вездѣ до лѣсовъ и пущъ подданныхъ нашихъ вѣзджати вольно, отъ мѣста за двѣ мили, одно жъ дерева бортного казити не мають.

Тежъ вольно мѣшаномъ, ѣздячи по волости, скуповати всякіе рѣчи торговые и везти на торгъ свой, до Могилева; а гдѣ бы на торгу своемъ чего не продали, ино вольно имъ то на обчихъ торгахъ продавати.

Сѣножатей тежъ мѣстскихъ вряду замковому коньми своими не травити, а ни сѣна мѣстского не брати.

Вины на насъ господаря и на вряду нашъ: вина битая, судомъ осужоная, полтина грошей; а естли только обжаловавши, зѣднאותся, ино дванадцать грошей вины на томъ, хто еднаеть; а иншая всякая вина, отъ рубля десять грошей: таковыхъ винъ до скарбу нашего двѣ части, а на вряду нашъ третья часть. Винъ некоторыхъ вряду нашъ на мѣшанахъ нашихъ слугамъ своимъ выдавати не маеть. Пересуду на вряду отъ рубля пять грошей, то есть, отъ десяти грошей полгроша; а хто отяжется, ино только памятного чотыри грошы дати повиненъ. А дѣцкованья отъ мили грошъ; вижованого, естли зъ мѣста не поѣдетъ, два грошы, а поѣдетъ ли зъ мѣста, ино помилное. Также и отъ пригляданья присѣги вижови платити два грошы; дяку врядуничому отъ суда, записного грошъ одинъ, а кому выпишу надобъ, ино другій грошъ за выписъ. Отъ

выданья святости до присѣги грошъ одинъ; а если не присягнетъ, ино только полгроша виновенъ дати. Куницы свадебные отъ каждоѣ невѣсты, яко и дѣвки одинако мають быти даваны по дванадцатѣ грошей, то есть, на вряду замковый десять грошей, а войту грошы два. Тежъ о межу на волокахъ къ мѣсту помѣренныхъ, и въ застѣнкахъ, и на сѣножатехъ мѣстскихъ, и объ испашѣ и страву войтъ мѣстскій коли осудитъ, ино отъ поправленья межи собѣ чотыри грошы возьметъ, а другую чотыри грошы на вряду отдасть. Мѣшане въ мѣстѣ мають вже отъ того часу перестати розрубовъ и розметовъ класти на мѣшанъ нашихъ: бо вже мѣшане отъ того вызволены и выняты суть.

Люди князьскіе, паньскіе и боярскіе, пріѣзжаючи до мѣста у буденный день, окромъ торгового дня въ недѣлю, товару своего на разнѣ продавати и шинковать имъ не мають, одно уздоймомъ продавати; а купцы пріѣзжіе не мають съ товары своими межи крамы мѣстскими въ рынку стояти, але каждый въ домъ гостинный нехай ѣдетъ и подлѣ давного звычаю товары своими торгуеть. Торговое на вряду маеть быти брано зъ людей пріѣзжихъ на торгъ, то есть: отъ мѣры всякого збожья и отъ солодовъ, отъ бочки ново въ мѣру чотырехъ корцовъ постановленной, пѣнязей по чотыри, а отъ корца по пѣнязю одному, а иншое всякое торговое водлѣ обычаю звыклого на вряду брано быти маеть.

Тежъ жита, овса, сѣна и дровъ на вряду замковый мѣшаномъ не давати, и въ подводѣ въ потребъ врядуовой и тежъ въ ловы не ходити, и коней своихъ подлѣ слуги и посланцы врядуовые не давати.

А къ тому, для лѣпшоѣ вольности мѣшанъ нашихъ, вряду надъ мѣшаны жадныхъ побоевъ не чинити, а вѣдѣже злочинцовъ и лихихъ людей водлѣ заслугъ ихъ карати; а упорныхъ и неповстагливыхъ до везенья сажати, а иншихъ людей, которые одно коли у

вину нашу впадутъ, ино винами небольшими, № 28. только водлѣ уставы наше карати.

А ижъ въ мѣстѣ тамошнемъ войта и лавниковъ и некоторого вряду мѣстского первѣй не было, для того великій непорядокъ въ мѣстѣ, и отъ дворянъ нашихъ и отъ иншихъ становъ въ бранью стапей и иншихъ рѣчахъ обтяжливость немалая дѣялася: ино съ теперешнего нового постановленья, поручено и дано есть войтовство мѣшанину мѣста тамошнего Нефеду Іосифовичу; а особливо, для лѣпшого порядку и справы въ мѣстѣ межи подданными нашими, установлено чотырехъ сотниковъ, поручивши каждому зъ нихъ певную часть людей подлѣ справою своею мѣти: про то войтъ маеть во всемъ порядку мѣстского доглядати, и слушнѣ а ряднѣ справовати во всехъ рѣчахъ, и потребы мѣстскіе къ вряду нашему замковому доносити; а тые сотники, вмѣсто лавниковъ, во всякихъ справахъ войту допомогати и къ нему во всемъ послушенство чинити мають: вѣдѣже войты некоторыхъ справъ мѣстскихъ, безъ сполноѣ намовы съ сотниками и съ иншими мѣшаны головнѣйшими, въ рѣчи посполитой мѣста того становити и отправовати не мають. А за працу войту, водлѣ уставы наше, волока одна и домъ въ мѣстѣ отъ платѣ вольный на дано есть. Особливо тежъ войтъ повиненъ будетъ пожитковъ нашихъ примножати, и того перестерегати, ижбы справедливо а суполно платѣ, и доходы наши, и вины, водлѣ теперешнеѣ уставы наше отдаваны были, и при отбиранию тыхъ платовъ нашихъ, при вряду онъ завжды быти повиненъ. А што ся дотычетъ сотниковъ, ино ижъ они меншую працу нижли войтъ мѣти будутъ, тогда, до воли и ласки наше, маеть мѣти вольность каждый зъ нихъ отъ плаченья съ одноѣ полволоки податку нашего, зъ волокъ мѣстскихъ описаного; одножъ съ другоѣ половины волоки, водлѣ уставы наше, до скарбу нашего тотъ податокъ давати будутъ повинни: и за то мають они тыхъ людей,

№ 29. въ справу имъ порученыхъ, въ дозрѣную своею мѣти, и потреби ихъ вряду доносить, и завжды за росказаньемъ врядовымъ, въ часъ небезпечности отъ непріятеля нашего, и къ каждой потребѣ, такъ ко оборонѣ замковой, яко и къ работѣ, съ тѣми людьми поготову быти.

Повинность того мѣста на подводны: вси мѣщане мѣста Могилевскаго будутъ повинны платити, водлѣ уставы нашею, на подводны съ каждого дому грошы по два; а хто волоку держитъ, тогда особно отъ волоки маеть дати грошы три, а съ моркгу при мѣстѣ пѣязи чотыри, а отъ прута огородного мѣстскаго пѣязь одинъ. А особливо, хто едвѣбными рѣчми торгуеть, тотъ дати повиненъ грошы чотыри; а хто сукины и иными крамными товары торгуеть, ино грошы два; а отъ золотаря также грошы два; а хто шинкѣ, кормчу держитъ, тотъ отъ меду грошъ одинъ, и отъ пива грошъ одинъ дати маеть. Рѣзники, каждый того ремесла уживаючи, повиненъ дати грошъ одинъ; а къ тому крамцы, кушеры, котельники, ковалы, слесары, бондары, колесники, шевцы, рымары, сыромятники, дуботолки, сѣдлары, гончары, пекары, дойлиды, солодовники, и каждого иного ремесла хто-кольвекъ уживати будетъ и обходитися тѣмъ ремесломъ, въ мѣстѣ сѣдлачи: маеть съ ремесла такового дати грошъ одинъ, але отъ товаришомъ неповиненъ платити; а отдаючи тѣ пѣязи, бирчого и нисчого неповиненъ большей дати, только одинъ пѣязь, хотя мало або много дастъ. И вже они тѣ пѣязи подводные отдавши, жадныхъ повинностей подводныхъ полнити неповинны: одо посланцу нашему господарьскому, за наемъ, будутъ повинны дати, коли ся трафитъ, коней съ потребу, за листомъ нашимъ; а имъ будетъ плачено отъ того, кому будутъ подводны давати, водлѣ уставы нашею господарьскою, отъ каждого коня на мило по одному грошу, а отъ возовъ

подводны отъ коня полтора гроша, а отъ двухъ коней съ возомъ по три грошы.

И тую уставу нашу давши есмо подданнымъ нашимъ того мѣста, хочемъ мѣти, абы они въ томъ во всемъ, яко вышей описано есть, захованы были до воли и ласки и иного поставленья нашего; на што дали есмо имъ сию нынѣшнюю уставу нашу, съ нашою печатью. Писано у Вильни, лѣта Божьего нароженья 1561, мѣсяца Февраля 20 дня. — «Остаею, маршалокъ и писарь великаго князства Литовскаго».

Изъ рукописнаго Сборника грамотъ жалованныхъ городу Могилеву (писанъ въ л., въ XVI и XVII в.), хранящагося въ Могилевской Семинарской библиотекѣ. Списокъ сего акта, стариннаго письма, находится и въ тамошнемъ Архьерейскомъ архивѣ, въ связкѣ подъ № 43. См. Бѣлор. Арх. др. грамотъ, 1, 20 — 27.

29. — 1562 Октября 20. Жалованная грамота королевскому дворянину Боркулабу Корсаку, о предоставленіи ему въ пожизненное владѣніе Полоцкаго Предтеченскаго монастыря съ отчинами и пожитками, съ правомъ имѣть въ немъ своего намѣстника.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Лифлянтскій и иныхъ. Ознаймуемъ симъ листомъ нашимъ, што который монастырь въ Полоцку святого Ивана Предтечи, на островѣ, перво сего дали есмо были иноку Арсенію, до живота его; ино, ижъ за писаньемъ и жеданьемъ воеводы Полоцкаго, державцы Свислоскаго, пана Станислава Станиславовича Довойна и за чолумбитьемъ бояръ, шляхты и всея земли Полоцкаго, тому иноку Арсенію, съ ласки нашею господарьскою, дали есмо архіепископство владычество Полоцкое, за чимъ тотъ монастырь, яко подаванье наше господарское, зася въ руки наши пришло: ино

мы оный монастырь на островѣ святого Ивана, за чолумбитьемъ дворянина нашего Боркулаба Корсака, дали есмо и симъ листомъ нашимъ даемъ тому упередъ менованому Боркулабу Корсаку, до его живота. Маеть онъ тотъ монастырь святого Ивана на островѣ, по тому яко и первые (*) держали, со всеми церквями, и съ имѣньями, съ селы и съ людьми здавна къ тому монастырю прислухающими, и со всеми пожитками, якимъ — кольвекъ именемъ могутъ быти названы, держати и спокойнѣ уживати, до живота своего, маючи у справѣ своей поповъ, черницъ и чернцовъ и весь станъ духовный, которые здавна послушенство къ настоятелю того монастыря чинити повинны; и маеть онъ въ томъ монастыри отъ себе мѣти особу духовную, чолумба научнаго, который бы умѣлъ въ справахъ духовныхъ водлѣ закону Греческаго справоватися, и за насъ господаря Бога просити, съ пильностью того досмотряючи и стерегучи, абы хвала Божья въ томъ монастыри, по тому яко и теперь есть, была и ничимъ ся не вменшала. И на то есмо ему Боркулабу дали сесь нашъ листъ съ нашою печатью и подписаньемъ руки нашею. Писанъ у Вильни, лѣта Божьего нароженья 1562, мѣсяца Октября въ 20 день. — Подпись руки господарьскою. — «Остаею Воловичъ».

Изъ Литовской Метрики (Запис. кн. XLIV, л. 65), хранящейся при Правительствующемъ Сенатѣ, въ С. Петербургѣ. Въ заглавіи грамоты отпечено: Листъ данный Боркулабу Корсаку на монастырь въ Полоцку святого Ивана на островѣ, до живота его.

30. — 1562 Октября 22. Жалованная грамота Полоцкаго Предтеченскаго монастыря иноку Арсенію Шишкѣ, на Полоцкую и Витебскую архіепископію.

Жикгимонтъ Августъ, Божьею милостью

король Польскій, великій князь Литовскій, Рускій, Прускій, Жомойтскій, Мазовецкій, Лифлянтскій и иныхъ. Ознаймуемъ симъ листомъ нашимъ всимъ псполито, кому будетъ потреба того вѣдати, што которое архіепископство владычество Полоцкое и Витебское перво сего съ ласки и данины нашею господарьскою держалъ до живота своего панъ Григорей Марковичъ Воловича: ино, ижъ онъ тѣхъ часовъ съ сего свѣта зшолъ, мы, за писаньемъ и жеданьемъ воеводы Полоцкаго и за чолумбитьемъ бояръ, шляхты и мѣщанъ и всего посольства земли Полоцкаго, тое архіепископство владычество Полоцкое и Витебское, съ ласки нашею господарьскою, дали есмо и симъ листомъ нашимъ даемъ иноку Арсенію Шишкѣ, до живота его. Маеть онъ тое архіепископство владычество Полоцкое, со всеми монастырями и церквями, и съ дворами и имѣньями, и съ селы и съ людьми, и со всемъ што къ тому владычеству здавна прислухають, до живота своего держати и уживати, и, на тое владычество совершившися, слушнѣ и раднѣ во всемъ ся справовати и за насъ господаря Бога просити, заховываючися во всемъ колдугъ обычаю закону своего Греческаго, и съ пильностью того стерегучи, абы снѣ въ томъ хвала Божья не вменшала, и маючи въ мощи и владычости своей архимандритомъ, игуменомъ, поповъ, чернцовъ, черницъ и все духовенство, которые здавна до сего часу послушенство къ архіепископу владыкѣ тамошнему Полоцкому чинити повинны, и всихъ платовъ, доходовъ и пожитковъ уживаючи, по тому яко и первые архіепископы владыки тамошніе Полоцкіе уживали. И на то есмо ему дали сесь нашъ листъ съ нашою печатью. Писанъ у Вильни, лѣта Божьего нароженья 1562, мѣсяца Октября 22 дня. — Подпись руки господарьскою. — «Остаею Воловичъ».

Изъ Литовской Метрики (Запис. кн. XLIV,

(*) Въ подл. пробѣлъ: надлежало бы написать «настоятели», какъ ниже, или иначе.

№ 31. л. 64), хранящейся при Правительствующем Сенате, в С. Петербургъ. Въ заглавіи грамоты отмѣчено: Привилей на архіепископство и владычество Полоцкое и Витебское иноку Арсецію Шашцѣ, до живота его.

51. — 1562 Декабря 15. Поученіе Кіевскаго митрополита Сильвестра новопоставленному іерею.

Милостию Божіею и пречистые его Матере, мы смиренный Селивестръ, архіепископъ митрополитъ Кіевскій, Галицкій и всея Руси, по преданію и правиломъ святыхъ Апостолъ и по завѣщанію святыхъ Отець, даю тобѣ іерею херотонію сію, священія свитокъ законный, рукоположенія на тобѣ моего епископства. Слыши, чадо, и внимай и исправляй такъ, якоже рѣхъ и завѣщаю. Се тобѣ, чадо іерею Михайло, Господь поручи священія службу, страшнѣ и тайнѣ, рукоположеніемъ моего смиренія и послушествомъ разумныхъ его Силъ, въ няже желаютъ и сами Ангели приникнути. Дѣло же твое буди учитись закону Господню день и ночь, и заповѣдей прехвальныхъ Апостолъ, и вселенскихъ семи Соборовъ и помѣстныхъ святыхъ Отець правилъ: составленія бо святительства Божія истинная хитрость; не можно бо не почитая часто спасти себе. Святъ Богъ на Святыхъ почиваетъ. Умъ разуменъ въ разумныхъ глубинахъ обрѣтается. Пророкъ рече: «рабъ твой есмь азъ, вразуми мя и увѣмъ правды твоя, возрадуюся о словесѣхъ твоихъ, яко обрѣтая корысть многу, паче тысящъ злата и сребра». Рече пророку Богъ: «дахъ законъ мой во сердце твое и словеса моя во уста твоя, и глаголеши, якоже ти заповѣдахъ». Се избра тя Богъ, іерею Михайло, отъ братіи твоея и постави тя пророка въ людехъ своихъ: не о собѣ бо кто честь пріемлетъ, но нареченный отъ Бога. Ты, чадо, твори волю пославшаго тя, да будеши правя евангелія Божія истинное слово, якоже бысть обѣтъ твой къ Богу передъ нами,

а не превращеніемъ по похотѣнію сердца своего и на плотное пріемля послушествомъ божественныхъ писаній, да не будеши ложный послухъ Богови, чрезъ волю его священная крадя. Се же пріялъ еси отъ вышнего промысла, не токмо себе пользовати, но и ближнихъ, въ показанія духа силы: дѣла бо и вѣру совершаютъ; долженъ убо еси показати добронравіе святительскаго подобія, любовь, кротость, цѣломудріе, пощеніе, трезвеніе, удержаніе всѣхъ сластей; не буди кошунникъ, ни игрецъ, ни срамословникъ, ни буй, ни гордъ, ни напрасень, ни безстудень, ни піяница, ни складовъ ни пировъ творй, но инѣмъ возбраняй, ни рѣзоимецъ, ни накладовъ не еми; да не будеши мятежникъ, ни пировникъ, ни поручаясь по комъ; не бій вѣрна согрѣшающа, ни невѣрна обидяща, а своими руками никогоже не удари; ни лововъ твори, ни закалай животнаго; брашна и питія не воспріемли безъ времени, но въ подобно время, въ законъ и во славу Божію. Аще будутъ на брацѣ или въ пиру позоры, отходи преже видѣнія; а на бракъ не ходи, гдѣ мужъ жону пуститъ, или жона мужа безъ вины и индѣ ся поймаютъ, или во племени поймутся, или въ сватовствѣ, или въ кумовствѣ; незванъ у пиръ не ходи, ни на кормлю. Одежду носи долгу до глезна, одноличну, по священническому подобію, ни отъ пестринъ ни отъ утварей мірскихъ, ни облечися въ порты непричитаемы во крылосѣ. Книгъ возбраненныхъ не почитай; или доселѣ научилъ ся еси несвѣдомая словеса, и ты нынѣ тыхъ престани, чары или кобы, лечбы, дивы творя, или игрызовоми ляки и шахмоты; метей да ся останеши, конного урыстанія не смотри. Нетомительнѣ челядь свою держи. Нищихъ безъ мзды на свою работу не понуди. Чада своя накажи и научи своему пути доброму и самъ буди кромѣ всякого зазора: горе бо тому имже соблазнъ приходитъ. Теци путемъ не заповѣдемъ Божіимъ: не суть бо тяжки заповѣди Божія, но изволенія наша зла. Внимай

ученію, буди терпѣливъ во молитвѣ, пой разумно, отъ сердца, по силѣ. Имѣй усердіе къ олтарю Божію безъ лѣности, въ олтарь входи самъ со опасеніемъ, во чистѣй совѣсти, а простымъ возбраняй: олтарь токмо попомъ и дякономъ, а четцемъ и пѣвцемъ предъолтаріе. Пріимши рукоположеніе отъ епископа верхъ постриженъ носяще, краткій фелонъ, честі чтенія и апостолъ, пѣти прокимны и «Богъ Господь», а простымъ ни пѣти, ни честі. Пономарь избранъ, неповиненъ ни въ коемъ же грѣсѣ, благословеніемъ епископа носящи священное знаменіе; а ко сосудомъ церковнымъ не прикасаются слугы, ни кадятъ во святѣй церкви. Во олтарь не вноси ни куты, ни пива, ни хлѣба, ни иного чого отъ брашенъ, развѣ свѣчи и просфiry. Церковь держи чисто, безъ пороха и паучины, паче жъ олтарь; а книги ветшныя и иконы пооправливай; а на трапезѣ не положи ничего, развѣ евангелія и тайнъ. Въ койждо день служити тобѣ литургію, тогда ни съ кимъ молвы не твори, ни препирайся съ кимъ, чистъ буди, ни вражду имѣя на кого, да не проженеши Утѣшителя. Во страхъ и трепетъ предстой олтарю Господню, не мысля земныхъ, ни озирайся камо, но очи возведъ ко единому подлежащему Царю и стоящимъ окрестъ его Силамъ: отъ вѣзора бо помыслъ приходитъ во сердце. Да не угодія ради человекъ, тѣхся кратити молитвы: коли будешъ человекомъ угожая спѣшно служити Божію службу, не со вниманіемъ, мыслію сердца, таковымъ рассыпаются кости, по пророку. Со отлученными не служи. Не устыдись, ни убойся никаковаже человека, на грѣхъ собѣ. Имже правила не повелѣваютъ, не давай причастія, ни по дару, ни по страсти, ни по любви; помни заповѣдь Владычню и святыхъ Апостолъ: «не дайте, рече, псомъ святыхъ, ни бисеръ мещите свиніямъ». Блюди псовъ и яже по сихъ, да не съ ними осудишися. Да твоего ради небреженія, мышь или иное что прикоснется божественнымъ тайнамъ, да не

сплѣсневѣтъ, или одымѣтъ, или пріято будетъ отъ несвященныхъ рукъ, того всего брезги и съ пильностью храни. Во церкви не давай повѣстовати, ни смѣятись никому; а не послушаетъ тя, такового изъ церкви вышли. И не пріемли приноса у Божій жертвеникъ отъ невѣрныхъ, ни отъ еретикъ, ни отъ блудникъ, ни отъ прелюбодѣй, ни отъ татей, ни отъ розбойникъ, ни отъ властей немилосердыхъ, ни отъ корчомниковъ, ни отъ рѣзоимецъ, ни отъ ротника, ни отъ поклевника, ни отъ клеветника, ни отъ клятвенника, ни отъ лживаго послуха, ни отъ волхва, ни отъ потворника, ни отъ игрьца, ни отъ злобника, или томящего челядь свою голодомъ и ранами: кто будетъ таковыхъ, а не покается, не еми отъ нихъ приноса. Просфiry приноси отъ своихъ дѣтей духовныхъ, вѣдаючи житія ихъ. А духовныя дѣти учи и исправливай, по мѣрѣ грѣховъ запрещай, епитимью давай, непокорника во грѣхи впадающа отъ церкви отлучи и отъ себе отжени, дондеже обратится къ тобѣ; а отъ иного попа отгоненаго и ты не пріимай; пріиметъ ли кто такового, мнѣ возвѣсти. А убогихъ сиротъ, аще хто болятъ, или родитъ, или умретъ, и незванъ поиди, Сошедша насъ ради съ небеси; будучи стражъ день и ночь, съ покаяніемъ и со причастіемъ, и твори достойное правило съ любовію, тихо, не борзая: младенецъ не разумѣтъ, а мертвецъ не чувствуетъ, то живымъ наказаніе; младенца крести, и всякому человеку причастіе дай, а мертвому не мози дати причастія: аще кого изгубиши лѣностію и нерадѣніемъ, мука ихъ на тобѣ възыскана будетъ. А къ нейже церкви поставленъ еси, не остави тобѣ ея во вся дни живота своего, развѣ великія нужда, и то по совѣту своего епископа, гдѣ ты благословитъ; а въ чужій предѣлъ не отходи, не вземъ грамоты отпустноу у своего епископа. А въ чужій предѣлъ пришедши не служи, не вземъ грамоты и благословенія у тамошняго епископа, или у его намѣстника, и безъ воли

№ 31.

№ 32. его не твори ничтоже. А имѣй собѣ епископа своего главу во всемъ, и бойся яко Бога, любовь и боязнь имѣй къ нему, яко Апостоли ко Христу; а на соборъ приходи, на исправление церковныхъ вещей и на пріятіе истиннаго разума. А на соборъ идучи, приноси съ собою всегда ко святителю листъ свой ставленный и сію херотонію, даную тобѣ, и исповѣдь ему, по чему и како исправляеши рядъ и исправленіе церковное, да можеша дати благодать, на созданіе послушающимъ тебе и явитись всимъ во всемъ по имени своему. Имена бо твоя многа и велика, по Господню словеси и святыхъ его: ты еси іерей, служитель престола Господня, свѣтъ міру, соль земли, врачъ больныхъ, вожь слѣпыхъ, наставникъ блудящимъ и учитель, свѣтильникъ, око тѣлу церковному, путь, дверникъ, ключарь, дѣлатель, строитель, гостинникъ, купецъ, стражъ, пастухъ, воевода, судія, властель, чиститель, жрецъ, холмъ высокъ, тайнъ домъ, столпъ премудрости, уста Божія, даи миръ мірови, ангелъ Господень, труба Божія, отецъ братіи своей, къ Богу нудитель, міру молитвенникъ, подражатель Господень, апостольскій подобникъ, источникъ водъ не сушей во источницѣ. Не словомъ бо, но дѣломъ мзды даются; вѣсть бо Богъ, колико болѣи можемъ, а лѣнящися не дѣлаемъ. Отроковица бо, не соблюди дѣвства, оскверни тѣло; а душа, не сохрани завета, оскверни духъ, и вослѣдуетъ пенявь, и укоръ, и раны, и отлученіе. Се тобѣ, сыну и брате, написахъ отъ святыхъ писаній и правилъ святыхъ Апостолъ и богоносныхъ Отецъ, изложшихъ саны церковныя по горнему образу. Аще сія сохраниши и исправиши, блаженъ будеши; аще ли преступиши и не исправиши, или во обиду даси, азъ о семъ дѣла не имамъ, самъ узриши въ день судный испытаніе, и за то отвѣтъ даси, и мѣсть достойную приимеши. Доселъ мое ко тобѣ слово, еже ти буди сохранити. Се есть херотонія сія, даема тобѣ: тако убо ти подобаетъ принять ю отъ

моего смиренія руки и должну соблюдать ея. Писанъ въ Новѣгородку, лѣта Божія народженья 1562, мѣсяца Декабря въ 15 день.

Подлинникъ писанъ въ тетради, въ четвертку, на четырехъ листкахъ, полууставнымъ почеркомъ переходящимъ въ скоропись. Въ концѣ грамоты своеручная митрополитѣя подпись, уставомъ и съ вѣзью: Волею. Божьею. Селивестръ. архіепископъ. митрополитъ Кіевски. Галицки. и всея Руси. На бумагѣ остался знакъ красновосковой печати. Вѣха.

Хранится въ архивѣ бывшихъ Греко-Униѣтскихъ Митрополитовъ, при Святѣйшемъ Синодѣ.

32. — 1563 Іюня 7. Жалованная грамота Литовскому и Русскому дворянству и рыцарству православной вѣры, о сравненіи сего сословія въ правахъ съ дворянами Польскаго королевства, исповѣдающими вѣру Римско-католическую.

Во имя Божье станься, къ вѣчной памяти тоѣ-то рѣчи! Кгдажъ вси sprawy съ часомъ съ памяти людскоѣ сплываютъ и въ забытѣ приходятъ; а для того есть вынайдено, абы письмомъ объяснены были, къ вѣдомости потомъ будущимъ. А про то, мы Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Ифлянтскій и иныхъ панъ и дѣдичъ, чинимъ вѣдомо симъ листомъ нашимъ нынѣшнимъ и напотомъ будущимъ, кому будетъ потреба того вѣдати, ижъ кгда есмы черезъ листы наши созвали на съѣмъ вальный, въ столечномъ мѣстѣ нашемъ у Вильни зложеный, пановъ радъ нашихъ духовныхъ и свѣтскихъ, кнежатъ, панятъ, врядниковъ всихъ земль того панства нашего отчизного великого князьства Литовского, а за прозбами пановъ радъ нашихъ ихъ милости и всихъ становъ помѣненныхъ, дозволили есмы и дозволяемъ привиліи правъ и вольностей земскихъ въ статутъ повописанный вложить и вписати, по тому же обычаю, яко и въ корунѣ

Польской привиліи и вольности шляхетскіе въ статутъ вписаны суть. За што вси станы чинячи даяки, съ чоломбѣемъ намъ господарю и пану своему прироженому донесли въ томъ прозбу свою, ижъ въ тыхъ же привиліяхъ земскихъ нѣкоторые артыкулы потребуютъ ширшого объясненія, къ латвѣйшому вырозумѣнью, а то въ томъ напервѣй: Яко ся стало обдарованье и наданье отъ прадѣда нашего, славнаго памяти Якейла короля Польского и навишшого великого князя Литовского, также и отъ брата его милости Александра Витолта, великого князя Литовского, въ которыхъ то есть описано: «за злученіемъ панствъ подъ онымъ часомъ, коруны Польскоѣ зъ великимъ князьствомъ Литовскимъ и за выданіемъ того привиліи тамъ же въ корунѣ Польской, въ Городлѣ, ижъ панове, шляхта, бояре земль нашихъ Литовскихъ, дарованіемъ, привиліями и наданіемъ имъ даякими, узычонными и подаными, только повшехноѣ, то есть, соборноѣ вѣры хрестіанскоѣ и Римскому костелу подданные, и которымъ клейноты, то есть, гербы шляхетскіе суть наданы, мають ся съ тыхъ вольностей веселити, участниками быти и ихъ уживати, яко панове и шляхта коруны Польскоѣ свои вольности держать и ихъ уживаютъ». А другій артыкулъ, ижъ «на достоинства и преложенства не мають быти обираны, одно, если бы были повшехноѣ вѣры хрестіанскоѣ и подданы Римскому костелу; а ни тежъ уряды которые земскіе вѣчные, яко суть достоинства и каштелянства, не мають быти даваны, одно людемъ вѣры хрестіанскоѣ, и до радъ нашихъ не мають быти допущены, а ни въ нихъ бывать». Якожъ послѣ того, тотъ привиліи на вольности даный въ подтверженіе дѣда нашего Казимера, и стрія Александра, и отца нашего Жикгимонта первшого, славнаго памяти королей и великихъ князей Литовскихъ, и потомъ въ наше подтверженіе тымъ же словы вписанъ. О томъ вси одностайнѣ были намъ чоломъ, абыхмо то въ

порознанье слушное приведши, нашимъ листомъ и привиліемъ достаточнѣ то объяснили. Мы съ паны радами нашими обачивши, ижъ передъ тымъ, ижъ тотъ привиліи у Городлѣ выданъ, станы и народы шляхетскіе знакомитыми службами рѣчи посполитой и предкомъ нашимъ заслугуючися, зацно вывышоны и учестены были (яко тое въ самомъ томъ привиліи на початку его меновитъ описано, каковы станы и на тотъ съѣмъ до Городла пріѣхали); а къ тому, ижъ тежъ бываючи не только Римского костела послушныи, але и Грециного, въ лавины рады предковъ нашихъ и наше, также и иные вси станы, на разныхъ службахъ нашихъ бываючи, вѣрность и сталость свою къ службамъ предковъ нашихъ и нашимъ охотнѣ, яко добрыми и вѣрными подданными належитъ, зажды со всякою сталостью оказывали. А такъ, уважаючи тые вси зацныи заслуги, и бачучи, штожъ въ томъ привиліи, къ нѣкоторому униженію и възгарженію тыхъ, хто гербовъ не брааъ, также и тыхъ, хто вѣру Грецкую держачи, противко предкомъ нашимъ и намъ господарю вѣрность свою сталѣ показываютъ, одно, ижъ не вси на томъ соймѣ были, а зваща, станы Русскихъ земль: про то, не уймаючи и ни въ чомъ не нарушаючи оныхъ первшихъ привиліевъ, отъ предковъ нашихъ и отъ насъ господаря на данныхъ, але во всемъ при моцы ихъ оставляючи и заховываючи, а только тые два члонки и артыкулы вышей описанные объясняячи и ровняячи, — съ порадою и съ призволеніемъ пановъ радъ нашихъ духовныхъ и свѣтскихъ, ухваляемъ и хотимъ мѣти, ижъ отъ того часу, не только тые панове, шляхта и бояре, або потомкове ихъ, всихъ земль нашихъ того всего панства нашего, дарованья привиліевъ и наданья всихъ вольностей и правъ земскихъ уживати и съ нихъ ся веселити мають, которые суть поддани костелу Римскому и которыхъ тежъ предкове клейноты и гербы въ корунѣ Польской пріимовали, але

№ 32. тежъ и вси иные стану рыцарского и шляхетского, яко Литовского такъ и Руского народу, одно бы были вѣры хрестіанскоѣ, и тежъ которыхъ предковѣ клейнотовъ альбо гербовъ съ коруны Польскоѣ не брали, одинако и заровно того всего вѣчными часы уживати и съ тыхъ вольностей веселитися мають, яко передъ тымъ, здавна и до того часу, тыхъ всихъ вольностей станъ рыцарскій шляхетскій обоого народу, такъ Литовского яко и Руского, уживали и съ того ся веселили. Такъ тежъ на достоинства и преложеньства всякіе, и до рады наше, и на уряды дворные и земскіе, не только подданные костелу Римскому отъ того часу обираны и прекладаны быти мають, але одинако и заровно вси рыцарского стану зъ народу шляхетского люди вѣры хрестіанскоѣ, яко Литва такъ и Русь, каждый водѣ заслугъ и годности свое, отъ насъ господара на мѣста зацные и преложеньства зъ ласки наше браны быти мають; а жаденъ зъ стану рыцарского и шляхетского, зъ стороны закону своего будучи вѣры хрестіанскоѣ чловѣкъ, не маєть быти отъ того отдаленъ и отлученъ, для тыхъ двухъ артыкуловъ и члунковъ въ тыхъ первыхъ привилеяхъ описаныхъ. Вѣдѣже, ижъ тое наданье вольностей и правъ земскихъ, въ привилею короля Якейла и великого князя Витолта спольномъ описаное, постановлено и справлено есть въ корунъ Польской, такъ, яко тотъ помѣненный привилей свѣтчитъ: про то, на первомъ близко пришлому вальномъ соймѣ, который отъ насъ зложенъ есть обоимъ тымъ панствамъ, корунъ Польской и великому князству Литовскому, тое поровнанье, будетъ ли потреба, еще съ большимъ примноженьемъ вольностей, иншимъ листомъ нашимъ възновити, за спольнымъ зволеньемъ обоого панства нашего, коруны Польскоѣ и великого князства Литовского пановъ радъ и всихъ становъ, хочемъ и общаемъ, але не зменшаючи вже, а ни уймуючи ни въ чомъ сего листу нашего, и во всемъ при моцы непорушной

зоставуючи его на вѣчные часы. Якожъ на утверженьє тоѣ рѣчи, печать нашу маестатную казали есмы привѣсити къ сему нашему листу, подписавши рукою нашою господарскою. При томъ были панове рады наши ихъ милость: князь Валеріанъ, бискупъ Виленскій; князь Янушъ Андрушевичъ, бискупъ Луцкій и Берестейскій; князь Миколай, бискупъ Кіевскій; панъ Миколай Радивилъ, на Олицѣ и Несвижу княже, воевода Виленскій, маршалокъ земскій, канцлеръ нашъ навыйшый великого князства Литовского, староста Берестейскій, Ковеньскій и Борисовскій; панъ Миколай Радивилъ, княже на Дубинкахъ и Биржахъ, воевода Троцкій, гетманъ нашъ навыйшый великого князства Литовского, староста Лидскій, Мозырскій и Бѣлицкій; панъ Троцкій, гетманъ нашъ дворный великого князства Литовского, справца староства Жомойтского, державца Кормяловскій панъ Григорей Ходкевичъ; воевода Кіевскій, маршалокъ земли Волынскоѣ, староста Володимирскій князь Костянтинъ Костянтиновичъ Острозскій; воевода Новгородскій панъ Павелъ Ивановичъ Сопега; воевода Витебскій князь Стефанъ Андреевичъ Збаражскій; воевода Подляшскій, староста Менскій, державца Лысковскій, Межирѣчскій и Аинскій панъ Василей Тишкевичъ; маршалокъ дворный, подскарбій земскій великого князства Литовского и писарь нашъ, староста Могилевскій, панъ Остаеѣй Воловичъ; подчасій нашъ великого князства Литовского, староста Дорогичкій панъ Миколай Кипка съ Техоновца; крайчій нашъ великого князства Литовского, староста Бѣльскій панъ Юри Александровичъ Ходкевичъ; стольникъ нашъ великого князства Литовского, староста Плотельскій, державца Тельшовскій, панъ Янъ Ходкевичъ; староста Житомирскій князь Романъ Оedorовичъ Санкгушковича; конюшій нашъ дворный великого князства Литовского, староста Мельницкій, державца Кєрановскій панъ Ярошъ Корыцкій; подскарбій

нашъ дворный великого князства Литовского, державца Пуньскій и Жижморскій панъ Станиславъ Захаревичъ Влопекъ; мечникъ нашъ великого князства Литовского панъ Щастный Сирутовичъ; хоружій земскій, державца Радуньскій панъ Щастный Герцыкъ; маршалокъ и писарь нашъ, староста Тыкотинскій, панъ Янъ Шимковичъ; писарь нашъ, конюшій Городеньскій, державца Ошменьскій, Вилькейскій и Красносельскій панъ Янъ Миколаевичъ Гайко; писарь нашъ, державца Марковскій и Мядельскій панъ Миколай Нарушевичъ, и иные панове маршалки, старосты, и державцы, и вриадники наши земскіе и дворные. Писанъ у Вильни, подъ лѣты Божьего нароженья 1563, мѣсяца Іюня 7 дня.

Изъ Литовской Метрики (Запис. кн. XXXVIII, л. 420 об. и сл.), хранящейся при Правительствующемъ Сенатѣ, въ С. Петербургѣ. Въ заглавіи грамоты отмічено ея содержаніе: Привилей короля с. м. Жикгимонта Августа всимъ обывателямъ великого князства Литовского даный, объясняючи нѣкоторые артыкулы въ привилеяхъ королей Якейла и Витолта, зъ стороны правъ и вольностей, заровно, яко тыхъ, которые гербы отъ пановъ Поляковъ брали, такъ и тыхъ, которые не брали, и о прекладанью на достоинства людей вѣры повсехноѣ, Римскому костелу подданныхъ (не дописано). См. рукоп. Бѣлор. Арх. др. грамотъ, Ч. II, стр. 153—160, гдѣ сія привилегія помѣщена въ старинномъ переводѣ на Польскій языкъ.

33. — 1563 Іюня 19. Уставъ данный на Виленскомъ сеймѣ Литовскому дворянству, шляхтѣ и рыцарству, о военной повинности и сборѣ «серебизны», по случаю предстоящей войны съ Русскими и проч.

1. О оборонѣ земской. Господарь король его милость рачилъ казати вамъ повѣдати: Што есте подали его королевской милости на писмѣ, напервѣй ко оборонѣ земской, абы на тотъ часъ къ той квалтовной потребѣ рѣчи

Акт. Зап. Росс. Томъ III.

посполитоѣ панове рада зъ имѣній своихъ отчизныхъ, выслужоныхъ и купленыхъ къ службѣ военной почты свои сполна ставили, подлугъ ухвалы Берестейскоѣ, съ десяти служобъ людей десятого: хто десять служобъ людей маєть, одного пахолка и конь одинъ, а збройно, съ тарчами и съ древы; шляхта абы тежъ тымъ же способомъ войну служили, и жебы каждый шляхтичъ ослѣый, естли не маєть брата недѣленого, въ почтѣхъ панскихъ не были, але опустивши пановъ своихъ и почты при нихъ zostавивши, ставили бы ся на мѣстахъ своихъ, яко то статутомъ старымъ обваровано. *Отказъ.* На тотъ первый артыкулъ господарь король его милость, панъ нашъ милостивый, рачилъ казати вамъ повѣдати: такъ яко сами есте его милости то подали, абы съ десяти служобъ людей одного пахолка конно и збройно на службу земскую выправовали, яко ихъ милость панове рада, такъ тежъ и вси станы до того належачіе, зъ имѣній своихъ отчизныхъ, выслужоныхъ и купленыхъ, на то его королевская милость призволяти рачить. А которая шляхта на имѣньяхъ ослѣые паномъ служатъ и пѣвязи датокъ на кони у нихъ берутъ, таковой шляхтичъ самъ особю своею при панѣ своемъ zostати маєть, а подъ хоругвою съ имѣнья своего, подлѣ повинности своей, мѣсто свое уставити такъ добрымъ шляхтичомъ яко самъ, на добромъ конѣ, водѣ уставы, съ почтомъ слугъ своихъ, и службу земскую военную заступовати маєть; который шляхтичъ отъ него уставленный на его мѣсто, съ почтомъ его въ войску обещъ съ хоружимъ на службѣ господарской маєть быти, никуды свовольнъ отъ него не отѣзжаючи: вѣдѣже тая устава далъ сойму другого пришлому трвати и статуту въ той мѣрѣ ничего шкодовати не маєть.

2. Што ся дотычетъ тѣго, яко на писмѣ есте господарю королю его милости дали, ижбы, первѣй нижили вси повѣты на войну выгдуть, каждый староста або державца въ

№ 33. повѣтъхъ своихъ, посполъ съ хоружимъ, передъ рушеньемъ день и мѣсто назначили, гдѣ бы ся мѣли до нихъ звѣзжати; и тамъ сполнѣ всю шляхту и почты ихъ пописавши, абы вси зъ суполными почты ѣхали до войска на мѣсто назначное, до пана гетмана, при старостѣ и державцы и при хоружомъ своемъ; а староста и державца и хоружій жебы того доглаждали, абы въ тягненью никому никотороѣ шкоды не дѣяли, але водлѣ уставы живность куповали. Тотъ же староста, або державца и хоружіе всю шляхту, дѣльныхъ и недѣльныхъ братью, и тыхъ которые паномъ служатъ, и которые въ домѣхъ ся zostали, а къ службѣ военной суть годны, списавши на реистръ, о томъ абы справу давали господарю королю его милости и пану гетману. *Отказъ.* На тотъ второй артикулъ его королевская милость казалъ вамъ повѣдѣти, ижъ его милость, для нѣкоторыхъ слушныхъ причинъ, старостѣ и державцовъ въ то не вкладючи, рачитъ на хоружихъ то прекладати, ижъ каждый хоружій маеть, передъ рушеньемъ на войну, шляхтѣ всей хоругви своею въ часть дати вѣдати, заховачи ся въ томъ по старому обычаю; а они на одно мѣсто со всеми почты своими до него собравшися, ѣхати мають, сполномъ зъ собою, на часть и мѣсто зложонное къ збиранью войскъ его королевской милости, до пана гетмана. А вѣдучи въ дорожѣ, хоружій маеть того пильно стеречи, ижбы шляхтичъ никому никотороѣ шкоды не дѣлалъ. А живность абы куповали не водлѣ уставы, але торгомъ, до того часу, поки до пана гетмана на мѣсто назначное въ войско прїѣдутъ и уставу отъ его милости на скупованье живности собѣ возмутъ: гдыжъ ее жаденъ собѣ уставляти не можетъ, ино зъ установленья и обволанья гетманского у войску. Живности тежъ не маеть жаденъ у войску брати и за пѣязи куповати надъ потребу свою, а поготову въ возы пиповати и до домовъ отсылати; а естли бы хто надъ потребу

живности беручи и въ возы пицуючи до дому своего отсылалъ, таковой маеть быти каранъ злодѣйскою виною: бо войска уголоживати не пристойтъ. Тежъ, гдѣ бы и колько хоругвей въ малыхъ почтѣхъ было, ино за росказаньемъ его королевской милости, панъ гетманъ великій, водлѣ баченья своего, по кольку хоругвей до одного хоружства маеть зложити. А што ся дотычетъ шляхты, дѣльной и недѣльной братьи, которые бы дома zostали, а на войну не ѣхали, такихъ каждый хоружій въ хоружствѣ своемъ повиненъ будетъ имени на реистръ списати справедливъ, подъ присягою своею, и, прїѣхавши до войска, господарю королю его милости и тежъ пану гетману оповѣдѣти и справу въ томъ дати. Тежъ его королевская милость, намовившися о томъ зъ ихъ милостью паны радами своими, хочеть мѣти, абы вже отъ-сего часу, вси каждого стану, съ суполнымъ почтомъ слугъ своихъ, къ збиранью и звѣзжанью до войска, до пана гетмана великого, на день и мѣсто зложонное и назначное, ошѣшкивати не смѣли, подъ таковымъ караньемъ, яко то есть въ статутѣ земскомъ описано. Къ тому, абы шляхта на пописъ у войску, также яко и жолнеры, одинъ у другого жадноѣ рѣчи, т. е. коней и зброи не позычалъ, але каждый, водлѣ повинности своею, яко коня, такъ и зброю свои нехай бы мѣлъ; а тотъ, который зброи або коня другому дома на войну вѣдучи позычитъ, албо на войнѣ будучи, тогды не маеть того, на войнѣ будучи, у него отыймовати, олижъ онъ зъ войны до дому своего прїѣхавши, маеть ему, што позычилъ, зброю або коня огдати. А естли бы два шляхтича на одномъ кони и съ одною зброєю, позычаючи, у войску мѣли ся показывати и передъ паномъ гетманомъ пописывати, а то было бѣ на нихъ доведено; тогды таковыя оба — два, яко бы тежъ на войнѣ не служили, мають за то караны быти тою виною, яко въ статутѣ земскомъ описано.

3. Тежъ то припоминаете, абы каждый

къ службѣ военной мѣлъ коня, который бы стоѣлъ надъ шесть копѣ грошей, и зброю, тарчъ, древо; а хто бы могучи мѣти зброю и такъ доброго коня, а не мѣлъ бы, тогды половицу имѣнья и всею маетности своею абы тратилъ на рѣчь посполитую. *Отказъ.* На тотъ артикулъ вышней помененый, въ той мѣрѣ, подъ тыми вышней меновитъ описанными обвязки и тежъ виною, яко сами есте то на писмѣ дали, его королевская милость рачитъ призволяти, и въ томъ ся его милости пану гетману великому противку васъ подлѣ того заховати, господарь король его милость казати рачилъ.

4. А за тымъ, што ся дотычетъ шляхты, о которыхъ вѣдѣли есте замену, ижъ ся поддали паномъ зъ имѣньями своими для обороны, абы тыхъ всехъ каждый хоружій въ повѣтъ своемъ пописавши справедливъ, подъ присягою своею, его королевской милости и тежъ рѣчи посполитой оповѣдали. *Отказъ.* На то его королевская милость позволяти рачитъ и казалъ вамъ повѣдѣти, ижъ не одно тыхъ шляхтичовъ, которые зъ имѣньи своими паномъ, але тежъ хто будетъ зъ нихъ и земляномъ шляхтѣ зъ имѣньи своими поддалися, абы хоружіе, каждый въ хоружствѣ своемъ, таковыхъ зособна меновитъ списавши, подъ присягою своею, справедливъ, никого не укрываючи, господарю королю его милости оповѣдали и неомѣшканую справу и вѣдомость о томъ дали; а его милость таковыхъ всехъ шляхтичовъ зъ ихъ имѣньями до повѣтовъ, гдѣ они первѣй были, казати привернути рачитъ.

5. Докладаете того, абы панове и шляхта зъ имѣній купленыхъ, зъ малыхъ и великихъ, съ чого первѣй бывала служба рѣчи посполитой, и теперъ ставили почты особливые; а съ заставныхъ имѣній, гды бы листомъ не было обваровано, также абы были почты ставлены; а естли бѣ листомъ обваровано, тогды тотъ, который заставилъ, повиненъ былъ съ того

№ 33. имѣнья заставного почотъ ставити; а естли бы тотъ, хто заставилъ, водлѣ обвязку своего службы земской съ того заставного имѣнья для недостатку заступити не могъ: тогды тотъ, хто закупилъ, маеть съ того заставного имѣнья почотъ поцинный сполна ставити. *Отказъ.* На тотъ артикулъ господарь король его милость казалъ вамъ повѣдѣти: за слушное ся то его милости видѣти, абы панове и шляхта зъ имѣній купленыхъ, также и съ заставныхъ имѣній, на службу господарскую и земскую, на войну, почты свои ставили такъ, яко и передъ тымъ служба земская зъ нихъ бывала: нижли, естли бѣ тотъ, хто имѣнье заставилъ, для недостатку своего, съ того имѣнья своего заставного службы заступити не могъ, а тотъ, хто закупилъ, самъ у войску съ того имѣнья за него служити будетъ повиненъ; тогды онъ съ тымъ, хто имѣнье ему заставилъ, мовити и росправу въ томъ приняти маеть. Тежъ его королевская милость намовившися о томъ зъ ихъ милостью паны радами, а бачачи того быти пильную потребу, хочеть то мѣти такъ: у войску, при панѣ гетманѣ, въ писанью почтовъ каждого стану, естли бы одинъ за другого почотъ съ имѣнья заставного, або якимъ-колькекъ способомъ ставити и заступити мѣлъ, ино тотъ тогожъ дня при почтѣ своемъ будетъ повиненъ пану гетману особливе ся показати и у книги его ввести, также кромѣ всякихъ позычокъ слугъ и коней и зброи, особнымъ почтомъ.

6. Жаденъ каждого стану шляхетского не маеть коня, на которомъ самъ, або слуга его въ попису и въ тягненью або въ потребѣ сѣдѣти, до воза впрягати, а ни зъ воза подлѣ себе: бо то есть немалое замѣшанье и забавка войску. А хто бы былъ такъ убогій, ижбы одного коня и до воза и подлѣ себе мѣлъ, тогды бы нехай колько ихъ на одного коня у возъ подлѣ живность собѣ ся зложили, сѣдѣчи сами на тыхъ конѣхъ, на которыхъ писаться ѣхали, и такъ чинити мають зъ непрїателемъ.

№ 33. 7. А жаденъ, подъ горломъ и почтивостью, абы слати на мѣсто свое до войска слуги и наймита не важилъ ся, опрочъ хоробы тяжкоу (и тое подлѣ статуту доводити будетъ повиненъ урядомъ и присѣгоу), и тежъ окромъ иной послуги его милости господарской, або потребы рѣчи посполитой земской.

8. Што тежъ просили есте господаря короля его милость, ижбы розказати его милость рачилъ на теперешнемъ соймѣ то постановите, абы вси пріймичи тые, которые до вдовъ и дѣвокъ въ дома ихъ на имѣнья вступаютъ, сами на войну ѣздили, а не слугами и ни наймитами послугу господарскую и земскую отпращивали, повѣдаючи, ижъ таковыя люди съ послуги земской тымъ ся вымовляютъ, же не наши имѣнья, але женнины, або тешины. *Отказъ.* Его королевская милость на то казалъ вамъ повѣдѣти, же его милость намовившися о томъ съ паны радами своими, рачилъ водлѣ прозьбы вашея на то позволить, докладаючи еще того: который бы съ таковыхъ пріймичовъ самъ на войну не ѣхалъ, але слугу, альбо наймита на свое мѣсто на войну послалъ; таковой кождый маеть быти карацъ тымъ же обычаемъ, яко иная шляхта осылая, яко о томъ вышей въ теперешней ухвалѣ соймовой есть описано. А особливе которые — кольвекъ Поляцы, которого жъ кольвекъ стану, тутъ въ панствѣ его милости великомъ князствѣ Литовскомъ имѣнья осылости свои по жонахъ своихъ, або якимъ — кольвекъ обычаемъ набытые мають, съ которыхъ передъ тымъ служба земская военная бывала: тогда таковой самъ, особливо своею, съ тыхъ имѣній службу земскую военную служити будетъ повиненъ, такъ яко и Литва.

9. Зъ войска, передъ шихомъ и по шиху, олижъ до роспущенъ, жаденъ особою своею не маеть нигдѣ отъѣзжати, а ни ся назадъ до дому ворочати, а поготову слугъ, коней и воевъ отсылати безъ вѣдомости и дозволенъ пана гетманова; а естли бы безъ вѣдомости и

дозволенъ гетманского отъѣхалъ хто самъ, або слугъ послалъ, таковой, будетъ ли тамъ за розказаньемъ пана гетмановымъ погоненъ и пойманъ, горломъ маеть быти каранъ. А естли бы до дому отъѣхалъ, а тамъ не былъ пойманъ, тогда и потомъ предъся горломъ за то каранъ быти маеть. А на роспущенъ войска абы жаденъ своевольнъ не смѣлъ отъѣзжати, олижъ первѣй передъ паномъ гетманомъ оказавши ся, яко войну съ почтомъ своимъ служилъ и яко въ реистрѣ гетманскомъ будетъ описалъ, окромъ, естли бы кому слуги померли, альбо кони поздыхали, а то бы оказалось слушнѣ; тогда на тое мѣсто иныхъ слугъ и коней ставити на онъ часъ не будетъ повиненъ, и, съ вѣдомомъ его милости, до дому своего отъѣхати маеть.

10. Гды бы отецъ старѣй, або вельми хворѣй былъ, тогда сына своего дорослого къ службѣ земской на мѣсто свое выправити маеть; а гды бы сына не мѣлъ, тогда неосылого шляхтича доброго за себя послати маеть, тубыла, або и Поляка.

11. А што есте господаря его милости просили, абы теперѣ послалъ до коруны Польской, до пановъ Поляковъ о помочъ, жадаючи ихъ напротивку тому неприятели, князю Московскому: ино его королевская милость казалъ вамъ на то повѣдѣти, ижъ тому теперѣ часу нѣтъ, гдыжъ всимъ землямъ панства его милости господарского, великого князства Литовского, на войну противъ тому неприятели ѣхати и на конѣ вже всѣдати казано; а тежъ, безъ сойму вального Поляки въ одно мѣсто зъѣзжати не звыкли, а сойму не могутъ складати, ажъ зъ волею его королевской милости; якожъ вже и зложенъ съемъ на свѣтый Мартинъ теперѣ прійдучого свѣта, тамъ же въ онъ часъ то зъ ними черезъ послы свои становити будете.

12. Нихто отъ пана гетмана особою, а ни почтомъ вызволенъ отъ послуги военновъ быти не маеть; также на посылки всякіе и потребы

военные ни хто слугъ своихъ вымовляти и отпращивати не маеть у пана гетмана, а ни самъ съ того вымовляти, тамъ, гдѣ панъ гетманъ на службу земскую кому съ почту его послати кажетъ, такъ съ пановъ радъ ихъ милости, яко съ княжаты и панята и вриадниковъ.

13. Што было подано отъ господаря короля его милости княжатоу, панятоу и всему рыцерству, ижъ кого бы панъ гетманъ знаючи быти годнымъ надъ людьми гдѣ послалъ, абы подъ тую справу, безъ всякоу вымовы, панове рада дворы свои посылали, также преднѣйшіе княжата, панята, вриадники, а нѣкоторые сами особами своими примемъ ѣхали; тогда о то все рыцерство просили его королевской милости, абы станове преднѣйшіе подъ справу равнѣйшихъ особъ, нижли сами, и подъ справу слугъ пана гетмановыхъ не были подаваны: ино его милость казалъ вамъ повѣдѣти на то, ижъ панъ гетманъ водлѣ стародавнаго обычая и баченъя своего въ томъ ся заховати маеть.

14. А што есте мовили его королевской милости о сторожу въ войску, ижъ серебшизну даете на жолнеры, и сами на войну ѣдете, и для того ся зъ нее вымовляете, не хотючи ее держати; и повѣдаете, же передъ тымъ шляхта сторожи у войску не стерегли, одно дворяне господарскіе и Татарове тутъ въ Литвѣ осылые сторожу держивали. *Отказъ.* На то его королевская милость рачилъ казати вамъ повѣдѣти: кдыжъ серебшизну на жолнеры даете, жолнеры сторожу у войску держати будутъ; а кды бы жолнеровъ не доставало, тогда сами сторожу, почонши отъ пановъ радъ ихъ милости, и княжата и панята и вси станы, колею, водлѣ потребы, у войску держати будете.

15. Кождаго стану, такъ панове рады ихъ милость, яко княжата, панята и шляхта, мають до службы земской почты зъ имѣній своихъ ставити, водлѣ ухвалы соймовой, спра-

ведливо и сполна, не утаиваючи ничего; а № 33. естли бы хто што утаилъ и сполна почту зъ имѣнья не поставилъ, а то бы зася на него хто господарю королю его милости, або пану гетману оповѣдалъ и довелъ: тогда у того, хто почту сполна не поставилъ, на господаря короля двѣ части того имѣнья взято быти маеть, а третяя часть тому, хто то на него объявить и доведетъ, маеть дана быти.

16. О выправу почтовъ на войну зъ имѣній костелныхъ пановъ духовныхъ, бискуповъ и канониковъ, плебановъ, оларистовъ, митрополита, владыкъ, архимандритовъ, игуменовъ, чернцовъ, поповъ, яко есте то на писмѣ его королевской милости достаточнѣ списавши дали. *Отказъ.* Его королевская милость на тотъ артикулъ повѣдѣти вамъ казалъ, ижъ князи бискупове и иное духовенство Римского и Греческого закону, на выправу къ оборонѣ земской зъ людей своихъ податокъ серебшизну дадутъ, и зъ имѣній своихъ свѣтскихъ почотъ водлѣ обычая выправятъ; а предъся, на мѣсто выправы на войну пѣшихъ драбовъ зъ маестностей своихъ, собравши межи собою сынодъ, водлѣ возможности своея господарю его милости особливый податокъ дадутъ, прикладомъ иныхъ пановъ духовныхъ братья своея, яко и въ корунѣ Польской.

17. Тежъ его королевской милости подали есте, абы панове рада и вси вриадники земскіе, которые воеводства со всеми доходы и иншіе врияды доживотнымъ правомъ мають, а до скарбу господарского платовъ не дають, — къ той потребѣ земской навалной съ десяти волокъ одного коня ставили, а особливе панъ маршалокъ земскій, и канцлеръ, и панъ маршалокъ дворный, и подскарбій земскій, старостове и иншіе вриадники и писарове. *Отказъ.* А такъ господарь его милость король казалъ вамъ на то повѣдѣти, ижъ его милость тотъ артикулъ отъ васъ поданный на сторону откладати рачитъ, съ той причины: кдыжъ его милость добръ то вѣдаеть, ижъ вси панове

№ 33. рада и вриадники земскіе, и тежъ вриадники дворные, сами съ хоти своее въ службахъ господарскихъ и земскихъ во всемъ досыть зъ себе чинять, и не одно обещными службами своими, при его королевской милости мѣшкаючи, але тежъ нѣкоторые зъ нихъ пановъ радъ въ службахъ господарскихъ и рѣчи посполитой зъ немалымъ накладомъ своимъ и съ пильностью ся заховывають, якожъ и теперъ, на тую потребу кѣвалтовную рѣчи посполитой, хочутъ ихъ милость въ становень почту надъ повинность земскую приложитися зособна, каждый съ доброу воли своее.

18. А за тымъ, што есте доложили о старосты, тивуны, державцы, войскіе, городничіе, ключники, мытники, поборцы, лѣсничіе и которая шляхта пильнують роботу Татаровъ лѣсныхъ, тежъ войтове тые што староства держатъ и ревизорове, абы они вси на войну съ почты своими ѣхали и на звыклыхъ мѣстцахъ своихъ ся становили. *Отказъ.* Ино его королевская милость велѣлъ вамъ на то повѣдити, ижъ господарь его милость рачитъ то бачити, штожъ то властная рѣчь господарская есть, и самъ его милость водлѣ воли своее постановити то казати рачилъ: вѣдѣже, которые зъ нихъ службу военную зъ имѣній своихъ служити повинны, таковые на войну съ почты своими ѣхати мають.

19. Дворяне господарскіе, и тежъ Татарове подѣ его королевскою милостью ослѣые, въ почтѣхъ пановъ радъ и пановъ маршалковъ земского и дворного и писаровъ и иныхъ вриадниковъ дворныхъ быти не мають.

20. Листы господарскіе, отъ войны на вызволенъе первѣй выданные и теперъ которые мѣли бы даные, мають пожжены быти, кромѣ людей уломныхъ и лѣты старыми зошлыхъ и на войну негодныхъ, тежъ вдовъ съ дѣтми лѣтъ недорослыми, сиротъ, и тыхъ жонъ, которыхъ мужове въ поиманьи и въ рукахъ неприятельскихъ суть съ Полоцка.

21. О опеки. Которые опеки держатъ пано-

ве и шляхта, абы съ тыхъ имѣній земская служба и платъ водлѣ уставы соймовой были полнены. *Отказъ.* Его королевская милость на тотъ артыкулъ рачилъ казати вамъ повѣдити, ижъ то есть рѣчь слушная и повиноватая, абы каждый съ таковыхъ имѣній, што въ опецъ своей яко панове такъ и шляхта держать, службу земскую военную служили, и платъ водлѣ уставы соймовой полнили, и досыть тому дѣлали.

22. Што тежъ есте его королевской милости, пану нашему милостивому, на писмѣ подали, о ѣханье Татаръ господарскихъ, што ихъ тутъ въ Литвѣ есть, на службу господарскую и земскую военную. *Отказъ.* Его королевская милость казалъ вамъ на то повѣдити, ижъ первѣй нижли есте то на писмѣ принесли, господарь о вси Татарѣ, въ панствѣ его милости великомъ князствѣ Литовскомъ, которымъ обычаемъ они на службу господарскую и земскую военную мають выправованы и посланы быти, рачилъ вже науку свою господарскую достаточную дати пану гетману великому.

23. О мѣщанѣхъ всехъ мѣстъ господарскихъ, абы людъ пѣшій и которымъ обычаемъ выправовали, то его королевской милости на писмѣ есте ознакомили. *Отказъ.* Натотъ артыкулъ господарь король его милость казалъ вамъ повѣдити, ижъ што ся дотычетъ господарскихъ мѣстъ въ таковой справѣ, то властная рѣчь есть его милости, и въ томъ господарь король подлѣ воли своее заховати ся рачитъ.

24. Тежъ припоминаете его королевской милости: мѣщане князей бискуповъ и пановъ воеводъ, и тежъ поповскіе и шляхетскіе, которые дома свои мають въ мѣстѣ Виленскомъ и иныхъ мѣстѣхъ, а наймовали бы въ домѣхъ своихъ коморы и мѣли шинкѣ або якій пожитокъ мѣстскій, абы они ровно повинны были тоежъ бремя носити, яко и мѣщане королевскіе, окромѣ самыхъ дворовъ або домовъ шляхетскихъ, съ которыхъ пла-

товъ и повинностей некоторыхъ зъ мѣстомъ полнити неповинны. *Отказъ.* На тотъ артыкулъ господарь король его милость рачилъ казати вамъ повѣдити, ижъ мѣщане князей бискуповъ, и пановъ воеводъ, и тежъ поповскіе и шляхетскіе, которые въ мѣстѣ Виленскомъ и въ иныхъ мѣстѣхъ господарскихъ мѣшкають, тыежъ бремена и повинности будутъ на собѣ поносити, што и мѣщаномъ господарскимъ отъ его королевской милости будетъ розказано: одножъ съ дворовъ або домовъ князскихъ и панскихъ и землянскихъ надворники жадного податку съ мѣстомъ давати не мають, окромѣ обороны мѣстскоу часу potrzeby; которая жъ оборона ижъ веимъ есть одинако потребна, тогда заровно зъ мѣстомъ и мають ее полнити.

25. Припоминаете его королевской милости, абы зъ мѣстскихъ фольварковъ задныхъ на войну выправовано: ино господарь король казалъ вамъ на то повѣдити, ижъ самъ его милость водлѣ воли своее то постановити рачитъ.

26. Его королевской милости припоминаете о гости, которые тутъ у Литвѣ запоможенъе великое маетностей своихъ по мѣстѣхъ взяли, а звлаща тутъ въ Вильни, Ормяне, Нѣмцы, Волохи и иныхъ народовъ люди, абы они повинности якую къ службѣ земской съ товаровъ своихъ вдѣлали, и того меновитъ докладаете, абы на маетность ихъ такса была положена. *Отказъ.* А такъ его королевская милость казалъ вамъ на то повѣдити, ижъ таковые гости прѣвзжіе туюжъ повинность съ товаровъ, маетностей своихъ, будутъ на собѣ поносити, въ той мѣрѣ, яко и подданные мѣщане господарскіе, обыватели тутошнего панства его милости великого князства Литовского.

27. А которые съ таковыхъ гостей прѣвзжихъ умрутъ, абы маетностей ихъ третья часть на близкихъ, а двѣ на оборону рѣчи посполитой земской приходило. *Отказъ.* Ино то

его королевская милость при волѣ и ласцѣ № 33. своей господарской заховати рачитъ.

28. О спадки по смерти людей безпотомныхъ, и тежъ купцовъ тубыльцовъ и чужоземскихъ, припоминаете его королевской милости, ижъ не мѣли бы ни на кого приходить, одно на господаря короля и на рѣчь посполитую. *Отказъ.* А такъ его милость казалъ вамъ на то повѣдити, ижъ то давно вже статутомъ земскимъ обваровано. А што дѣлаете взмянку о смерти купца Александра, Орменина, который на тыхъ часѣхъ въ Вильни умеръ и немалую маетность, яко менуете, по собѣ оставилъ; такъ тежъ о другомъ купцѣ Нѣмцѣ, который въ Бѣльску умеръ, написали есте, што маетность его безъ вѣдомости вриаду замку господарского есть побрана: ино господарь король казалъ вамъ на то повѣдити, ижъ его милость велѣлъ пану подскарбію земскому о томъ достаточное вывѣданье удѣлати.

29. Подали есте его королевской милости о жидѣхъ: што-кольвекъ есть ихъ въ Литвѣ, въ мѣстѣхъ господарскихъ и князскихъ и панскихъ и землянскихъ, абы они людей пѣшихъ двѣ тысячи на войну выправовали, а стрѣльцовъ еще большъ причиняли, и, которымъ обычаемъ заплата отъ нихъ стрѣльцу, по чому на чверть року давано мѣло быти, то есте тежъ на писмѣ ознакомили. *Отказъ.* А такъ его милость намовившись о томъ съ паны радми своими, казалъ вамъ на то повѣдити, ижъ для potrzeby рѣчи посполитой земской, певный платъ пѣнежный съ одного на всехъ жидовъ въ панствѣ его милости великомъ князствѣ Литовскомъ положить казати рачитъ.

30. Его королевской милости подали есте о скарбы костеловъ Римскихъ и церквей Рускихъ, што панове и шляхта побрали, абы вси тые скарбы на потребу рѣчи посполитой въ цѣлости отданы были, а звоны на дѣлы. *Отказъ.* Господарь король, панъ нашъ милостивый, на тотъ артыкулъ казалъ вамъ повѣ-

№ 33. дити, ижь его милость о томъ достаточнъ ся вывѣдати казати рачить.

31. При томъ што есте мовили господарю его милости о присягу, ижьбы вже отъ сего часу присяга шляхтича и посполитого чело-вѣка не на образъ малеваный, а на рытый, яко первѣй, была, але на имя Бога въ Троицы единого кождый подлугъ вѣры своею закону хрестыанского присѣгалъ. *Отказъ.* Его королевская милость казалъ вамъ повѣдѣти, ижь то есть рѣчь статутная и до теперешнихъ справъ соймовыхъ ничего не маеть.

32. Тежъ подали есте его королевской милости о скарбы костелные, ижьбы господарь король рачилъ къ той военной потребѣ казати взяти половину скарбовъ костелныхъ. *Отказъ.* А такъ его милость рачить еще съ паны радами о той рѣчи намовитися.

33. Просите господара короля, абы его милость, зъ ласки своею, вамъ подданнымъ своимъ обоимъ становъ, духовнымъ и свѣтскимъ, рачилъ то дати и привилеемъ своимъ господарскимъ потвердити, абы на портѣхъ водныхъ збожѣ съ гуменъ вашихъ властныхъ, и тежъ товары лѣсные съ вашихъ властныхъ лѣсовъ, властной работы вашею, вольно и безмытно пропущаны, и яко мыта господарского, такъ гребелного, и тежъ войского и поквитного не брати казати рачилъ. *Отказъ.* Господарь король, намовившись о томъ съ паны радами, казалъ вамъ повѣдѣти, ижь за прозьбами вашими, отъ властного збожѣ съ гуменъ вашихъ и отъ товаровъ лѣсныхъ зъ вашихъ же властныхъ лѣсовъ, вашею работы, а не купленыхъ, водою спущоныхъ, мыта и гребелного казалъ не брати, и отъ того мыта вольными васъ дѣлаеть: одножъ, на мытѣхъ, самъ тотъ панъ, альбо слуга, который то провадити будетъ, присягу вѣдати мають на томъ, ижь то збожѣ властное, а не купленое, и тежъ товары лѣсные его властного лѣсу и властнымъ накладомъ, а не чужими пѣнязми выробленны. Такъ же бѣ князи и паны и земяне, стану

духовного и свѣтского, по имѣньяхъ своихъ, на мостѣхъ, млынахъ и гребляхъ, съ тыхъ, которые съ збожѣмъ и работами лѣсными властными водою плыть будутъ, мыта на себе не брали, кгдажъ его милость свое мыто отпущати рачить: нижи, што ся дотычетъ мыта войского, ино которые войскіе мыта съ васъ брати будутъ, его милость въ томъ вамъ право и вольное мовенье съ ними захвати рачить; и такіе войскіе не за позвы врьдовыми, але за мандаты господарскими привиліи свои оказывати мають. Тежъ, што берутъ поквитное по копѣ грошей, ино отъ сего часу не мають болѣшъ поквитного брати, одно по 4 грошы Польскихъ отъ каждого судна съ товаромъ.

34. А што есте доложили то въ прозьбахъ своихъ, абы въ Каменцы Мазовецкомъ не было вытягано того мыта што въ Дорогичинѣ и въ Тыкотинѣ берутъ; а вѣдѣже хто бы ся не оповѣдавши на мытѣхъ господарскихъ, въ Дорогичинѣ и Тыкотинѣ мыто проминулъ, тотъ не только тое съ чимъ ѣдетъ, але и горло тратитъ маеть. *Отказъ.* На то его королевская милость призволяти рачить.

35. Просите, абы его милость, съ паны радами своими намовившись на теперешнемъ соймѣ, вамъ рыцерству своему, и купцомъ всимъ на сукна и всякіе рѣчи крамные, и тежъ ремесленникомъ на каждую рѣчь уставу учинити, и тую уставу вамъ и тежъ мѣщаномъ, купцомъ и ремесленникомъ на писмѣ подъ печатью королевскою казати дати рачилъ. *Отказъ.* На тотъ артикулъ прозьбы вашею господарь король казалъ вамъ повѣдѣти, ижь его милость рачилъ казати паномъ воеводамъ, абы въ воеводствахъ своихъ, напервѣй въ мѣстѣ Виленскомъ и въ иныхъ краѣхъ, купцомъ и мѣщаномъ, на продажъ сукна и всихъ иныхъ крамныхъ рѣчей, и тежъ ремесленникомъ уставу, вже отъ сего часу, передъ войною, маючи при собѣ по колько особъ стану рыцерского, которыхъ вы теперъ съ того сойму вального на то оберете, вѣдали.

36. Еще тежъ просите господара короля, абы мѣра на продаванье збожѣ тутъ въ мѣстѣ Виленскомъ и во всихъ иныхъ мѣстахъ подѣстрихъ была уставлена. *Отказъ.* Его королевская милость казалъ вамъ повѣдѣти, ижь по всимъ мѣстамъ мѣру у стрихъ черезъ листы господарскіе рачилъ казати постановити.

37. Просите его королевской милости, пана нашего милостивого, о люди властные отчичи свои, которые отъ васъ пошедши прочъ, осли и мѣшкають на грунтѣхъ въ волостяхъ господарскихъ и тежъ князскихъ, панскихъ и земянскихъ, тутъ въ Литвѣ и на Волини, а вамъ ихъ оттоль выдати не хочуть, и для того просите, абы съ сойму теперешнего вального таковая устава была ухвалена: хто бы за листы господарскими, не хотѣлъ чѣхъ отчичовъ выдати и справедливости слушной водлѣ права и статуту учинити; тогда, коли таковой позванъ або къ праву о то притягненъ будетъ, а окажется съ права, ижь онъ упорнъ и безправнъ ихъ держитъ, а по сей ухвалѣ соймовой листы господара короля або врьдовыми обосланъ будетъ, и отъ того часу, по обосланью, справедливости не учинитъ, — абы таковой навязывалъ, подлѣ статуту, каждой службѣ людей задержанныхъ на недѣлю по 6 грошей; а люди съ права, если найдутъ ся отчичами, выдаваны быти мають. *Отказъ.* Его королевская милость прозбу вашу, вѣрныхъ слугъ и подданныхъ своихъ, милостиво пріймовати рачить, и намовившись о томъ съ паны радами своими, то ухвалити: хто бы не хотѣлъ чѣхъ отчичовъ выдавати и справедливости слушной въ томъ учинити; тогда, кгда таковой позванъ або къ праву притягненъ будетъ, а окажется съ права, за слушнымъ доводомъ, ижь онъ упорнъ и безправнъ тыхъ отчичовъ держитъ, а вже отъ того часу, по сей ухвалѣ соймовой, яко листы господара короля, або листы врьдовыми обосланъ будетъ, и по обосланью, справедливости не учинитъ, — таковой абы навязывалъ, подлѣ ста-

туту, каждой оной службѣ людей задержанныхъ по шести грошей на недѣлю; а если съ права люди найдены и доведены будутъ отчичами, тогда выдаваны быти мають; и то маеть быти вписано въ статутъ земскій, теперъ нововыданный. А тые люди, которые осли на воляхъ въ имѣньяхъ господарскихъ, князскихъ, панскихъ и земянскихъ, повинны будутъ давати платъ серебшизну на оборону земскую.

38. О серебшизну. Подали есте его королевской милости то на писмѣ, ижь поступаете, на оборону границъ Литовскихъ отъ Москвы и на отысканье, дасть Богъ. Полоцка (если будетъ певная война съ Московскимъ, съ стороны князства Литовского, а не отъ Лифлянтъ), серебшизну на сѣсь годъ 63-й, зъ сохи по 30 грошей, а отъ земли, хто сохи своею не маеть, по 15 грошей, а отъ огородника по 5 грошей. А напередъ, если бѣ война певная была съ Московскимъ съ стороны князства Литовского, тогда и на другій и на третій годъ таковой же податокъ съ подданныхъ вашихъ, съ сохи по полконы грошей, ухвалили и поступили есте, одножъ подлѣ тымъ обычаемъ: если бѣ въ которомъ року, съ тыхъ трехъ лѣтъ, войны съ Московскимъ не было, тогда тотъ податокъ не маеть бранъ быти. *Отказъ.* А такъ его милость казалъ вамъ повѣдѣти, ижь есте то добръ вѣдали, же тотъ платъ серебшизный на оборону рѣчи посполитой панства его милости великого князства Литовского постановили и ухвалили. А што ся дотычетъ того, што хочете межи собою обрати трехъ людей зацныхъ, на выбиранье тоѣ серебшизны, на то его милость рачить призволяти. А за тымъ што есте доложили на писмѣ, ижь тыми пѣнязми не маете платити старыхъ долговъ жолнеромъ, которые служили въ Лифлянтѣхъ, одно тымъ, которые теперъ служити будутъ, боронячи границъ князства Литовского, а не Лифлянтъ; на то господарь король казалъ вамъ повѣдѣти, ижь въ томъ панствѣ его ми-

№ 33. лости отчизномъ, великомъ князствѣ Литовскомъ, такіи ся обычаи заховываетъ, штожъ серебризна складана и давана бываетъ на потребу и оборону земскую; потомужъ и теперь его милость въ томъ ся заховати рачитъ, ижъ тые пѣнязи серебризные мають даваны быти на потребу, для обороны и доброго рѣчи посполитой противъ всимъ непріятелемъ, которые бы съ которой-коллежъ стороны мѣли злый умыслъ тягнути зъ войски на панство его милости великое князство Литовское. Якожъ велѣлъ господарь его милость вамъ повѣдѣти, ижъ для обороны границъ великого князства, потреба есть ховати людей пѣнежныхъ, бѣдныхъ и пѣшихъ почотъ немалый, и тежъ немалый часть тые люди служебные держаны быти мають на границахъ, для лѣпшой безпечности отъ непріятеля; и хотя жъ бы его милость войско земское пану гетману роспустити казалъ часу своего до ихъ домовъ, ино они предѣся на границахъ зостануть. А што есте доложили, ижъ кгда бы въ тыхъ трехъ лѣтахъ, на которые серебризну есте ухвалили, война скучечная съ Московскимъ не была, и тая серебризна брана быти не мѣла: на то король его милость рачитъ призывати; нижи, што ся дотычетъ первой серебризны, на сѣсь годъ 63-й ухваленой, его милость рокъ отданью ее до шафаровъ и дѣяка вашего складати рачитъ на день свята Нароженья Панны Маріи близко пришлого въ року теперешнемъ.

39. Тежъ доложили есте о шляхтѣ убогой, которые людей своихъ не мають и дворными сохами своими пашутъ, ижбы тые неповинны были давати серебризну отъ сохъ дворныхъ, а никоторого плату отъ коней, кгдажъ вси дѣльные братья и себры, колько ихъ будетъ, каждый на одномъ кони, на тую квалтовную потребу ѣхати повинны: вѣдѣже, которые бы съ тыхъ шляхтичовъ, што людей не мають, сохъ дворныхъ чотыри або большъ мѣли, на таковыхъ постановили есте, абы каждый далъ

отъ коня копу грошей, а хто бы мѣлъ сохъ меньше чотырехъ, ино неповиненъ будетъ ничего давати. *Отказъ.* Его королевская милость на то рачитъ призывати.

40. Статутъ правъ земскихъ новоучиненный подлугъ ухвалы сойму прошлого, который господарь король рачилъ вамъ, всему рыцерству, обывателямъ великого князства Литовского, зъ ласки свое выдати, напервѣй къ поправленью заровно отъ всехъ становъ правъ новоучиненныхъ, прегляденъ быти не можетъ на тотъ часть небезпечный отъ непріятеля, за рушеньемъ военнымъ всехъ земель панства тутошнего: про то его королевская милость вамъ, всимъ станомъ великого князства, на поправление и ухваленіе того статуту часть и рокъ певный складати рачитъ, по роспущенью войскъ у дванадцати недѣляхъ.

41. Которые дворяне его королевской милости, въ великомъ князствѣ Литовскомъ ослѣные, зъ ласки его милости, на Дворѣ господарскомъ съ почты своими службу мають и пѣнязи съ скарбу господарского на кони берутъ, таковые дворяне почты съ имѣній своихъ, подлѣ давного обычая, къ службѣ господарской и земской на мѣстцахъ звыклыхъ становити будутъ повинны, сами заставаючи на Дворѣ, при службѣ господарской; а на своемъ мѣстцѣ такъ доброго шляхтича, яко самъ, съ почтомъ слугъ своихъ къ службѣ земской выправовати будутъ повинны.

42. Тежъ его королевской милости припоминаете, ижъ подлѣ заволаеньемъ войны и подлѣ часомъ собранья на съемъ всехъ становъ, для обмысленья около обороны отъ непріятеля и успокоенья панства и всехъ обывателей великого князства, на разныхъ мѣстцахъ дѣють ся многіе наѣзды домовые, бои, квалты, забійства и мордерства явные, а то умыслѣнъ чинятъ, въ надѣи долгой войны, ижъ то пойдетъ на зволю и на продолженіе, къ латвѣйшому ~~выпущенью отъ таковыхъ злыхъ чинковъ;~~ и для того просите покорнѣ его милости, абы

на таковыхъ явныхъ квалтовниковъ и злочинцовъ листы мандаты зъ канцеляріи отъ господаря его милости даваны были, а война ижбы не загоржала дороги до росправы съ злочинцами. *Отказъ.* Его милость зъ маестату своего королевского, и самъ того постерегати и о томъ завжды обмысливати рачитъ, абы права подданнымъ своимъ примножати, справедливости Божье постерегаючи; якожъ и овшемъ на тую прозбу вашу, бачучи ее быти слушную, призывати рачитъ, и хто бы подлѣ войною и подлѣ часомъ собранья на съемъ, наѣзды домовые або якіи квалтъ вѣлѣалъ, на таковыхъ листы мандаты зъ канцеляріи господарской даваны будутъ. Писанъ у Вильни.

Изъ Литовской Метрики (Шубл. дѣлъ кн. V, л. 107 — 117), хранящейся въ С. Петербургѣ, при Правительствующемъ Сенатѣ. Въ заглавіи акта отмѣчено: Отказъ отъ господаря короля е. м. всимъ князатомъ, панятомъ и всему рыцерству на тые рѣчи, которые они на писмѣ дали на соймъ великомъ вальномъ у Вильни, лѣта Божьего нароженья 1563, мѣс. Іюня 19 дня. *На переплетѣ, по прежней нумераціи вытиснутъ № 56.*

34. — 1563 Іюня 19. Грамота Литовскому дворянству, шляхтѣ и рыцарству, о чрезвычайномъ сборѣ коннаго и пѣшаго войска, для отобранія у Русскихъ Полоцка.

Жикгимонтъ Августъ, Божьею милостью король Польскій, великій князь Литовскій, Русскій, Прускій, Жомойтскій, Мазовецкій, Ифлянтскій и иныхъ. Ознаймуемъ симъ нашимъ листомъ всимъ въ посполитости, нынѣшнимъ и напотомъ будущимъ, штожъ на соймъ великомъ вальномъ теперешнемъ, который къ обмысленью и становенью, для квалтовныхъ и великихъ потребъ и наглого отъ Московского непріятеля звѣчного нашего и того — то панства нашего великого князства, есть зложенъ отъ насъ господаря и по-

чался мѣсяца Мая дванадцатого дня въ року нынѣшнемъ тысяча пятьсотъ шестьдесятъ третьемъ, становячи таковую оборону, якая бы налѣпшая и напозиточнѣйшая, зъ славою нашою господарскою и зъ славою и пожиткомъ рѣчи посполитой быти могла, — вси станы, до сойму належачіе, такъ панове рада наши, яко тежъ панове вриадники наши столовые и земскіе, кнежата, панята, хоружіе, шляхта, все собранье того сойму, обачиваючи, яко тотъ непріятель нашъ, убезпечивши листомъ своимъ кглѣйтовнымъ на послы насъ и панства наши, подтягнувши подлѣ замкѣ нашъ отчизный Полоцкѣ, квалтовнымъ налогомъ, за допущеньемъ Божьимъ тотъ замкѣ взялъ и опановалъ; а хотячи за Божьею помощью и стараньемъ нашимъ господарскимъ, тому непріятелю мощно отперети и замкѣ Полоцкій и то, што непріятель отъ сего панства нашего взялъ, выратовати, а, гды тотъ же всемогучій Сотворитель похочетъ и поможеть, сказы и шкодъ панствамъ нашимъ отъ того непріятеля починенныхъ надъ его землею помстою поветовати; надъ то вѣдаючи и зъ устъ нашихъ господарскихъ услышавши, ижъ мы сами, головою и парсоною маестату нашего, на того непріятеля умыслили есьмо тягнути, обваровываючи небезпечность здоровья нашего, — надъ вси обычаи звыклые и повинности свои въ статутъ описанные около службы военныхъ, зъ милости и вѣры свое к намъ пану и господарю своему прироженному и рѣчи посполитой тоѣ отчизны наше и свое, не одно, звычаемъ предковъ своихъ и своимъ властнымъ, выносячи къ таковой послугѣ нашей и потребѣ рѣчи посполитой горла и животы и прикладаючи до того маестностью своею: але обычаемъ новымъ, по доброй воли своей (яко ся вышей помѣнило), для насъ господаря, къ таковой потребѣ рѣчи посполитой позволили и поступили на одну сюю войну, на теперешнее тягненье наше и войскъ нашихъ противъ тому непріятелю (чому и часть певный зло-

№ 34. женъ есть, отъ дня завтрешнего недѣльного за шесть недѣль), становити межи двумя ѣздными, которые ѣздные подлѣ давной и теперешней ухвалы зъ двадцати службъ мають быти ставлены, одного пѣшого зъ ручницею и съкирою, а могутъ тежъ быти межи стрѣльцами зъ рогатинами и зъ съкирами; а гды бы у кого только десять або менше службъ было, тогда пѣшого ставити неповиненъ: вѣдѣже надъ десять службъ хотя бы одну або двѣ службъ мѣлъ, и такъ звыше ажъ до двадцати таковой межи двумя ѣздными третьего пѣшого (а то тымъ обычаемъ, яко хто повиненъ почты ѣздные ставити), на тотъ часъ и на тую только одну теперешнюю потребу поставити маеть. Къ тому призволили тежъ, также по доброй воли своей, на сесь часъ и на одну туюжъ войну и тягненье (яко вышей о пѣшихъ описано), абы вси братья и сынове зъ отцы недѣльные, шляхта, лѣтъ дорослые, дома не оставаючися, тягнули на тую-то потребу военную, лечъ такимъ обычаемъ, ижъ мають братья и сынове отъ отца недѣльные выправивши одного старшого або годнѣйшого брата къ службѣ земской на войну, такъ яко въ статутъ описано, ѣздо и пѣшо, хто яко всхочеть и возможетъ, сами пѣнязи наши брати, або тежъ паномъ кому хотя служити въ той потребѣ военной; а однакъ же, для пригладанья дому, одинъ братъ недѣльный, або сынъ при отцу вельми зхвораломъ и лѣты зошлому дома зостатися можетъ. А хто бы пѣшого межи двумя ѣздными не поставилъ, альбо который съ братьи и тежъ съ сыновъ зъ отцы недѣльных, лѣтъ дорослыхъ (окромъ тыхъ што дома по одному зостанутъ), на тую теперешнюю потребу военную въ жолнерской и пѣшой службѣ, або при панѣхъ своихъ не вытягнули и не были: тогда (яко сами жъ вси станове предречоны постановили и вину на таковыхъ възложили) тые мають быти караны съденемъ у вѣжи на долѣ дваццать недѣль, такъ тяжкимъ съденемъ, яко за голо-

ву карають, то только выймучи, ижъ гды бы которому шляхтичу, брату альбо сыну отъ отца недѣльному, пѣнзей на службу жолнерскую и пѣшую за его стараньемъ не дано, альбо панове ѣдучи на войну прїимовати ихъ не хотѣли: тогда таковой оповѣдавши то на вѣрьдѣ и у хоружихъ, будетъ отъ таковой вины съденья у вѣжи воленъ. А пѣшихъ тыхъ позволили и поступили мѣти на войнѣ при собѣ и при почтѣхъ своихъ ѣздныхъ; а пану гетьманови великому давати тыхъ пѣшихъ до шиху и по битвѣ. — Про то, гдыжъ вси станове до сойму належачіе, не съ жадноу повинности и принуженья, а ни обычаемъ давнымъ, одно росторопнымъ баченьемъ и добрымъ умысломъ, по доброй воли своей, къ такъ квалтовной и горячей потребѣ рѣчи посполитоу, для насъ пана своего то вчинили, постановили, позволили и поступили на одну тую только теперешнюю потребу военную и тягненье пѣшихъ людей и тежъ братью и сыновъ недѣльных: мы господарь, съ зволенемъ пановъ радъ нашихъ, уцвняемъ и обварываемъ, — не одно тымъ станомъ, которые до сойму належатъ и на теперешнемъ соймѣ суть, и тое въ тыхъ двухъ артыкулѣхъ дочасное постановление вчинили, але всимъ обывателемъ всехъ земель великого князства Литовского, шляхетского и рыцарского народу, штожъ тая помѣненная ихъ самыхъ дочасная и замѣренная устава, и выполнение еѣ однимъ тымъ разомъ, въ пошлину имъ николи впередъ ити и быти не маеть, и ни въ чомъ вольностямъ ихъ стародавнымъ и новѣ отъ насъ наданымъ, а ни статуту шкодити и на переказъ быти, всимъ въ посполитости и каждому зособна не будетъ; а ни они сами впередъ и ихъ потомкове, вѣчными часы, жаднымъ примушеньемъ и впоминаньемъ того, што теперъ по доброй воли своей для насъ пана своего и рѣчи посполитоу на одинъ кротъ и на одно тое рушенье военное вчинять, до того николи не будутъ повинны, и яко отъ насъ самыхъ,

такъ и отъ потомковъ нашихъ великихъ князей Литовскихъ и ни отъ кого иного тымъ и ничимъ инымъ до таковой повинности большъ притисканы не будутъ и не мають быти. Што мы имъ сами за себе и за потомковъ нашихъ господарскихъ великихъ князей Литовскихъ, повторнѣ, вѣчнѣ упевняючи, обѣщаемъ и прирекаемъ словомъ нашимъ королевскимъ. И на то дали есмы всимъ вышеймъненымъ станомъ и всему рыцарству нашему всехъ земель великого князства Литовского сесь нашъ листъ, зъ нашою печатью А при томъ были панове рады наши ихъ милость (сльдуютъ имена Литовскихъ радныхъ пановъ, въ томъ самомъ порядкѣ, какъ они означены выше, на стр. 120-121, въ грамотѣ подъ № 32). Писанъ у Вильни, лѣта Божьего нарѣженья 1563, мѣсяца Юнія 19 дня. — Подпись руки господарскоу.

Изъ Литовской Метрики (Запис. кн. XXXVIII, л. 423 об. и слѣд.), хранящейся при Правительствующемъ Сенатѣ, въ С. Петербургѣ. Въ заглавіи акта отмѣчено: Варунокъ, всимъ обывателемъ великого князства Литовского, ижъ позволение добровольнѣ учиненое, зъ стороны ставленья къ потребѣ военной межи двумя ѣздными одного пѣшого, также о ѣханье на войну братьи недѣльной, альбо сыномъ отъ отца недѣльнымъ, за пѣнзы жолнерскіе альбо при панѣхъ, только на одинъ тотъ разъ и потребу военную трвати маеть.

35. — 1564 Февраля 11. Вѣстовая отписка неизвѣстнаго Литвина, о поражении Московскаго войска подъ Улоу и Дубровною.

Вельможный милостивый пане! Ачъ мамъ за то, ижъ ваша милость о той ласцѣ Божей и фортуной новинѣ, которая ся стала войску его королевской милости, вѣдомость до сего часу мѣти рачишь: вѣдѣже мнѣ, повольному служебнику вашей милости, не годилось того учинити, абыхъ вашей милости о томъ ознай-

мѣти не мѣлъ. А то такъ ваша милость вѣдати рачъ, ижъ въ среду, мѣсяца Генваря двадцать шостого дня, поражено есть войско не-пріятельское Московское черезъ пановъ гетьмановъ ихъ милость Литовскихъ, навышшого и дворного, тымъ обычаемъ: ижъ маючи ихъ милость вѣдомость о войску не-пріятельскомъ, которое съ княземъ Петромъ Шуйскимъ съ Полоцка мѣло ити до Друцкихъ подъ черезъ панство его королевской милости, чинячи плѣнъ и шкоду, и заниматися съ другимъ войскомъ, которое мѣло ити зъ Смоленска подъ Оршу; а ижъ певная и частая вѣдомость о тыхъ людехъ не-пріятельскихъ до ихъ милости доходяща, и слышечи о томъ войску отъ себе въ колько миляхъ, того дня, въ среду, рушилися ихъ милость зъ обозу своего противку имъ, и, доѣхавши мѣстечка пани Кишчиноу Чашникъ, прибѣгли сторожы повѣдаючи, ижъ зъ сторожою Московскою видѣлися. Потомъ отправлено ротъ двѣ, пана Боркулаба и пана Баки, а зъ ними иишіе люди, и панъ гетманъ дворный зъ людьми передовыми, такъ тежъ и панъ гетманъ навышшій зъ войскомъ великимъ. Заразъ отъ Чашникъ тые двѣ роты пана Боркулабова и пана Бакина зъ людьми Московскими поткалися, и тамъ колько вязней людей передовыхъ Московскихъ доставши, противку пановъ гетьмановъ послали просячи о посилокъ. Якожъ для посланку отправлено имъ князя Соломерецкого и пана Миколая Соибгу, воеводича Новгородского, и панъ гетманъ дворный зъ иишими гуфами за ними пошелъ, и его милость панъ гетманъ навышшій, также зъ иишими гуфами и съ дѣлы и съ драбы, а притягнувши на поле немалое подъ село при рѣцѣ Улѣ, тамъ обачивши Московскіе гуфы застановилися, и, сождавшися, вси сполечнѣ гуфы росправили. А еще нимъ ихъ милость на тое мѣсто притягнули, черезъ тыхъ людей передовыхъ колько-десять Москвичъ убито и вязней колько — наццать поймано. А кды гуфы росправили, не чинили

№ 35. ихъ милость некоторые переказы, але въ справъ будучи на мѣстцу стояли, и, зготовившись, зъ рѣсказанья пана гетмана наивѣщного, панъ гетманъ дворный подступилъ къ нимъ зъ людомъ и рѣсказалъ учинити потканье пану старостѣ Чечерскому, пану воеводу Новгородскому, и князю Соломерецкому, и тежъ своему почту: которые яко ся зъ ними поткали, заразомъ ихъ сперли, ажъ потомъ почали тымъ додавати, и такъ тежъ гонячи за ними били ихъ, ижъ за ласкою Божьею тое войско на голову поразили, бьючи ихъ и гонячи ажъ черезъ пять миль. Того войска было тысячей двадцать чотыри. А такъ побивши и кошъ увесъ войско господарское взяло, которыхъ воевъ было большъ трехъ тысячъ, и здобычу немалую войско его королевское милости взяло: зброй большъ двухъ тысячъ и иншихъ многихъ рѣчей. А надъ тымъ войскомъ были воеводы: въ первомъ полку передовомъ Захарья Плещевъ, въ большомъ полку князь Петръ Шуйскій, а въ сторожовомъ полку Иванъ Васильевичъ Шереметевъ, въ четвертомъ панъ Семенъ Васильевичъ Яковлевъ, въ пятомъ полку князь Ѳеодоръ Ивановичъ Татевъ, въ шестомъ князь Иванъ Петровичъ Охлябинъ, въ семомъ Иванъ Очинъ — Плещевъ, у восьмомъ Яковъ Ѳеодоровичъ Болтинъ. Въ той битвѣ немало воеводъ и иншихъ людей запныхъ поймано, то есть: Захарья Ивановича Плещева, воеводу передового полку; князя Ивана Петровича Охлябина, воеводу полкового Ивана Пороватого, сына боярского зъ Новагорода Великого; дворянъ князя великого: Воина Стомина Рутовского зъ Дорогобужья, Олиѣра Васильевича Ѳедьцова съ Козельска, Богдана Кутузова зъ Ржова, Оеонася Васильевича Чихачова и Ивана Оеонасовича Арцыбашева зъ Пскова, Дмитрея Кошкарева, Костянтина Ѳеодорова Филиповича, Василья Олексѣевича зъ Пскова, Бошмана Якушкина зъ Вязмы, Солмана Ивановича Дементьева зъ Новагорода, Семена

Ѳеодоровича съ Переславля, тысячника стрѣleckого Семейка Ѳеодоровича Хохолкина съ Колодна, тые вси дѣти боярскіе; а слугъ ихъ колько — десять, кромъ иныхъ вязней, которыхъ много по войску. А скоро по той битвѣ, ихъ милость панове гетманове зо всимъ войскомъ рунилися ближе къ Орши и мѣли положить кошъ въ Соколинъ, а напередъ отправлено до Орши передовыхъ людей сколько тысячей съ паномъ Филономъ Кмитю, и тамъ же вжо за Оршою, подъ Дубровною, сторожу Московскую, Москву и Тотаръ громили, и двухъ мурзъ а десять Москвитиновъ поймали: бо войско Московское великое кошомъ положилося за Дубровною у мели. Войско тежъ наше Польское съ дѣлы вжо тыми часы рушилося съ Борисова до великого войска Литовского, оставивши обозъ у Борисовъ, и вжо до сего часу будутъ стягнутися зъ великимъ войскомъ. Пана Боже, дай, абы то было fortunъ, и есть надѣя въ ласцѣ Божей, штожъ ся тотъ непріятель не будетъ тѣшити, а вборзѣ дастъ Богъ, и другая новина щастливая насъ всѣхъ увеселить.

Што тежъ зъ сойму Варшавского до его милости пана моего писано, то вашей милости ознаймую: ижъ панове Ляхове дивными а разными претекстами хотѣли, жебы Литву у кабалу записали и у вѣчную неволю собъ насъ взяли; напервѣй, одноъ ляски, одноъ печати, одного скарбу, одноъ канцеляреи допиралися; потомъ, кгда того довести не могли, тогды предся, жебы вси тые станове и врядники Литовскіе писалися «маршалокъ земскій коруны Польской у великомъ князствѣ Литовскомъ», потомужъ и иные вси врядники Литовскіе, а король жебы ся писалъ «король Польскій и земль князства Литовского»: чого кгда тежъ довести не могли, тогды предся то намъ отнимають, чого имъ Боже не поможи, абы заразъ въ Польщи на великое князство подношенье было, а въ Литвѣ жебы николи на князство подношенье не было. По

тому жъ и о соймы, абы соймы вальные черезъ то въ Литвѣ не были, только спельные зъ ними на границахъ; чого панове послове наши, дай пана Боже, абы боронили, якожъ есть и надѣя въ Бозѣ, штожъ и оборонять.

Кгда—мъ того листу до вашей милости дописывалъ, принесена новина до его милости пана моего, ижъ тое войско Московское, которое за Дубровною кошомъ было положилося, послышавши о нашемъ войску до себе тягнучи, повтекали, возы и сани порубали, и тегино покинувши и сами на вьюки складшися въ скокъ побѣгли до свое земли; а ихъ милость панове гетманы, великій и дворный, со всимъ войскомъ Литовскимъ пустилися за ними въ погоню. Пана Боже дай, абы fortunъ звѣтство было и надъ тымъ войскомъ того нежданного пана. А Польское войско еще въ Борисовъ обовомъ лежитъ: бо панъ гетманъ нашъ задержалъ ихъ своимъ листомъ у Борисовъ, абы далѣй не тягнули, ижъ теперь не есть потреба, але ожидали бъ иншого листу, гдѣ ся зъ войскомъ Литовскимъ здѣймовати мають. Ваша милость вѣдаючи о томъ, не рачьте опускати молитвами своими волать до пана Бога, абы рачилъ зъ милосердыя своего, того непріятеля покорити подъ ноги господаря нашего милостивого.

Иншого ничого на сѣхъ часъ писати къ вашей милости не маю, одно, вѣрнѣ зычачи вашей милости, пану и добродѣю своему, при добромъ здоровьи всихъ fortunъ, себе и покорные службы свои звыклой ласцѣ вашей милости поручаю. Писанъ у Вильни, року 64, мѣсяца Февраля 11 дня.

Еще, по написанью тобъ педулы моее, другая потѣшная новина пришла до пана моего, ижъ въ той битвѣ самого Шуйского забито и тѣло его въ рѣцѣ знайдено; а то повѣдиль подскарбій его, которого поймано отъ нашихъ людей, ищучи тѣла пана своего. А Шереметевъ также въ битвѣ будучи древомъ шкодливъ пребылъ, и скоро прѣхавши до Полоцка умеръ.

А тое войско непріятельское, што подъ Дубровною было, уже ся были перепровадилъ на свою сторону Орши и Днѣпра; а скоро о войску господаря нашего и тежъ о пораженіи Шуйского зъ войскомъ увѣдали, взявши на себе страхъ и покинувши увесъ кошъ побѣгли, и яко за три дни у Смоленска стали; а бѣгучи, добра и маетности свои кдали, и тамъ, Оршанцы повѣдають, ижъ такожъ великоъ добычи и при великой битвѣ Оршанской не взято. А теперь князь великій послалъ былъ дворянина своего Петра Ивановича Сотницына — Клобукова зъ сорокма коней, съ тымъ до того войска, даючи вѣдати о той битвѣ, которого козаки Дубровенскіе побили и двухъ живыхъ поймали, съ чого со всего нехай будетъ хвала пану Богу!

Изъ Литовской Метрики (Запис. кн. XLV, л. 59 об.), хранящейся при Правительствующемъ Сенатѣ, въ С. Петербургѣ. Въ заглавіи акта отмѣчено: Листъ о новинахъ писанный.

36. — 1564 Августа 15. Дарственная запись княжны Анастасіи Михайловны Мстиславской супругу своему князю Стефану Збаражскому, на Тетеринскую и Пацковскую отчину.

Я Стефановъ Андреевичъ Збаражскій, вдовинъ Витебскій, Анастасія Михайловна княжна Мстиславская, чиню явно и визнаваю симъ моимъ листомъ, всимъ посполитъ и кому будетъ потреба того вѣдати, нынѣшнимъ и напотомъ будучимъ: ижъ што въ которыхъ имѣньяхъ, Тетеринъ и Пацковъ, досталася часть мнѣ правомъ прироченымъ дѣдичнымъ, по смерти отца моего небожчика князя Михайла Ивановича Мстиславского и по смерти матки моее княгини Михайловой Ульяны Ивановны, часть четвертая отъ сестръ моихъ рожонныхъ, старостиное Луцкой княгини Андреевой Сангушковой Коширской княгини Богданы, отъ подчашиное господарской, старостиное Дорогичской пани Миколаевой Петровича

№ 36. Кишиной пани Марины, а отъ пани Яновой Яновича Забрезиньской пани Барбары Михайловенъ, княжонъ Мстиславскихъ : ино я узнавши къ собѣ великую ласку, и во всемъ добротливое захованье, и статечную а правдивую милость малжонка моего, его милости князя Стефана Андреевича Збаражского, воеводы Витебского, и хотѣчи вѣдчность мою за тую ласку его милости отъ себе показати, вынявши есми отъ третее части имѣнья замку моего отчизного и вымѣненного Молодечна двѣ части, тую часть мою имѣнья замку Тетериньского и часть имѣнья Пацковского, съ будованьемъ замковымъ и дворнымъ, и съ костелы Римскими и Рускими, и со всимъ наданьемъ и подаваньемъ ихъ костелнымъ и церковнымъ, и зъ мѣсты и зъ мѣщаны, и съ торгомъ и съ торговымъ и зъ мытомъ, и съ корчмами, и съ челядью невольною, и съ статки домовыми, и съ гумны и съ землями пашень дворныхъ, и съ бояры и съ слугами путными, и съ людьми волостными и данными и тяглыми, и со всеми кгрунты и землями, властностью и пожитками тыхъ частей моихъ, части имѣнья замку Тетериньского и части имѣнья Пацковского, якими — кольвекъ имени названные и помѣненные (такъ, ижъ менованое неменованому, а неменованое менованому ничего шкودити не маеть), записую его милости малжонку моему въ певной суммѣ пѣнезей, въ дву тысячахъ копахъ грошей монеты и личбы великого князства Литовского; и вже отъ сихъ мѣстъ, заразомъ, въ моцъ и въ держанье его милости то поступаю и пушаю таковымъ обычаемъ, ижъ маеть его милость князь, малжонокъ мой, теперь, заразомъ, при животъ моемъ, тую часть мою имѣній вышей-помѣненныхъ въ моцъ свою взяти, и ихъ держати и уживати, со всеми доходы и пожитки зъ нихъ приходячими, и со всякою владностью справованья и росказыванья въ нихъ, подлѣ воли своее, такъ яко и я сама. И вольно будетъ его милости отъ сего часу тую часть

онихъ имѣній въ той суммѣ, у двухъ тысячахъ копахъ грошей, такъ при животъ своемъ, яко и по смерти своей, кому воля его милости будетъ, завести и записати, а я его милости того боронити и въ то ся ничимъ вступовати не маю и не буду мочи; а по смерти моей, дѣти мои (если бы ихъ мѣла), або сестры мои, и ниhto съ близкихъ моихъ, не отдавши тоѣ суммы его милости князю малжонку моему, або тому, кому то его милость запишетъ, не маеть ся ничимъ въ тую часть онихъ имѣній вступовати и зъ моцы держачого выимовати: але похочутъ ли тые двѣ части, часть имѣнья моего Тетериньского и часть имѣнья Пацковского, вынати отъ третее части имѣнья замку Молодечаньского, яко ся въ собѣ маеть, первѣй будутъ повинны его милости князю малжонку моему, або кому то его милость подлѣ воли своее и сего моего листу запишетъ, тые двѣ тысячи копъ грошей личбы Литовскоѣ заплатити и сполна отложить, а то вже къ рукамъ своимъ взяти. И на то есми его милости князю малжонку моему дала сесь мой листъ записный даровный, зъ моею печатью. А при томъ были и того добръ свѣдомы: его милость панъ Остаеѣй Воловичъ, маршалокъ дворный, подскарбій земскій, писарь его королевской милости, староста Могилевскій, державца Озерицскій и Усвятскій, а панъ Янъ Шимковичъ, маршалокъ и писарь его королевской милости, староста Тыкотиньскій, а панъ Янъ Юрьевичъ Волочковича, конюшій Виленскій, державца Василишскій, якожъ ихъ милость панове будучи того запису моего добръ свѣдомы, за прозбою моею и печати свои рачили приложити до сего моего листу. А къ тому еще, заховываючися водлѣ права, обычаю и ухвалы земскоѣ, пришедши есмо передъ господаря короля его милость и постановившия обличнѣ, тую рѣчь и сесь записъ мой его королевской милости оповѣдила и визнала, и просила господаря его милость, абы его королевская милость рачилъ росказати,

то до книгъ его милости господарскихъ канцлерейскихъ записати. Писанъ въ Межирѣчи, лѣта Божьего нароженья 1564, мѣсяца Августа 15 дня.

Выписана изъ подтвердительной грамоты короля Сигизмунда Августа, данной въ томъ же 1564 г., которая внесена въ Литовскую Метрику, Запис. кн. XXXVIII, л. 519.

37. — 1565 Юня 12. Окружное послание Львовскаго епископа Арсенія Литовско-Русскому православному духовенству и мирянамъ, о вспоможеніи Дорогошевскому поселанину Симеону, обрекшему себя, за грѣхи, на странствование и собираніе подаяній на церковь.

Милостію Божією, молитвами пречистыя его Богоматере и честнаго ея Успенія. Преосвященнымъ и христоролюбивымъ архіепископомъ и епископомъ, и достойно-почетнымъ архимандритомъ и игуменомъ, о Христѣ почтеннымъ протопопомъ и попомъ, и о святомъ Дусѣ возлюбленнымъ архидіакономъ и діаконъ и всему причту святыхъ Божіихъ церквей, и яснѣ а висоцѣ-вельможнымъ панѣмъ воеводамъ, паномъ каштеляномъ, старостамъ и подстаростемъ, урожонымъ паномъ земляномъ, и ихъ милостей паніямъ, благороднымъ и благочестивымъ княземъ и княгинямъ, бояромъ и дворяномъ господарскимъ, славетнымъ паномъ мѣщаномъ, и опатрнымъ паномъ бурмистромъ и паномъ радцамъ, и шляхетнымъ паномъ войтомъ и лентвойтомъ, тивуномъ и ватаманомъ, и всѣмъ повсюду православнымъ христіаномъ во православіи живущимъ, обывателемъ землѣ господаря его милости и такожъ великаго князства Литовскаго и Волынскаго. Мы смиренный Арсеній, епископъ митрополіи Галицкой, владыка Львовскій и Каменца Подолскаго, со благословеніемъ Божіимъ просимъ вашу милость, посподити всѣхъ православныхъ христіанъ, и даемъ вамъ знати о семъ младенци, на имя

Семвонъ, ижъ пошелъ промежку васъ прашающихъ христіанъ, гдыжъ онъ обрѣкся естъ милостивому Богу послужити, и пречистой его Матерѣ, и Угодникомъ его святымъ, яко въ нѣкоторомъ его согрѣшеніи Богъ святая милость рачилъ скарати его; и якожъ онъ тое на собѣ побачилъ, штожъ на немъ карность тая естъ водлѣ воли и ласки и милосердія Божія, и билъ намъ чоломъ, и епископъ нашей громада зъ Дорогошева Малого, абыхъ мы ему листъ нашъ на то дали, подлѣ печатію нашею, къ вамъ православнымъ христіаномъ, абы есте его спомогали на посвященіе церкви святой святыхъ Мученикъ Фрола и Лавра, до села Дорогошева, до имѣнія его милости пана барзого пана старосты Львовскаго Петра, а онъ абы тое выполнялъ, яко ся обѣщалъ, и на всѣ потребности церкви святой, чимъ кого Богъ святой научитъ и вразумитъ, по силѣ вашей, про ваше душевное спасеніе и тѣлесное здравіе. А тое ваше споможеніе и наданье Богъ премилостивый и пречистая его Богомати стократцею да отдастъ и оплатитъ радостію вѣчною во царствіи его святомъ небесномъ, и отъ мукъ васъ всѣхъ вѣчныхъ да избавитъ православныхъ христіанъ, творящихъ споможеніе и милостыню святымъ Божіимъ церквамъ. Споманѣте, ваша милость, слово Христово, якожъ самъ его святая божественная милость повѣдѣти рачилъ: «блажени милостивіи, яко тіи сами помиловани будутъ.» И Вселенскій учитель, великій во Апостолѣхъ Павелъ пишетъ намъ у епископѣхъ: «строющимъ Богу храмы земныя уготоваетъ имъ Богъ жилища небесная,» то естъ, справленіемъ Божіихъ церквей мужемъ и женамъ зглажаются грѣси и имена ихъ суть написаны на небесѣхъ. И еще быхмо вашу милость наупоминали отъ святыхъ писаній: ино, яко ваша милость требуетъ милости отъ Вседержителя Бога, и вы по силѣ вашей давайте милостыню. Ино мы пакъ вашего благочестія покорнѣ просимъ и жадаемъ, рачьте

№ 38. того обреченного младенца вышей писаного и съ его товаришемъ, куды — колвекъ на которую страну пойдутъ, въруйте имъ, и пропущайте ихъ добровольнъ, и путь правъ показуйте имъ, и честуйте ихъ, яко — то слугъ Божіихъ церквей, на мытѣхъ и на перевозѣхъ будьте имъ милостиви и на нихъ ласкави, и почитуйте ихъ яко-то страннопришелцовъ. При томъ благодать и милость Божія со всеми вами, и нашего смиренія благословеніе, купно жъ и молитва наша уставичная ко Господу Богу о всѣхъ васъ. Данъ въ Стратинѣ, лѣта Божія нароженія 1565, мѣсяца Іюня 12 дня, на преподобного Отца нашего Онофрія.

Подлинникъ, хранящійся въ Львовскомъ Ставропигіальномъ архивѣ, писанъ современною скорописью, безъ строчныхъ знаковъ, съ титлами. Внизу грамоты приложена митрополичья печать, подъ кустодією.

Доставлена въ Археографическую Коммиссію, въ списокъ, корреспондентомъ Г. Зубрицкимъ.

38. — 1565 Декабря 30. Жалованная грамота всемъ обывателямъ Литвы, о дозволеніи имъ въ судныхъ дѣлахъ пользоваться новоизданнымъ Статутомъ, съ предоставленіемъ права имѣть по упѣдамъ «сеймики», по примѣру Поляковъ.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Ифлянтскій и иныхъ. Чинимъ явно симъ листомъ нашимъ нынѣшнимъ и напотомъ будущимъ, кому будетъ потреба того вѣдати, абычучи его слышати, ижъ будучи намъ господарю на великомъ соймѣ вальномъ въ мѣстѣ нашемъ столечномъ Виленскомъ, съ паны радами нашими духовными и свѣтскими, и съ князи и паны вриадники земскими и дворными и со всемъ рыцерствомъ всѣхъ земль панства нашего великого князства Литовского, гдѣ

панства нашего, донесли прозбы свои, межинными рѣчьми, съ покорнымъ чоломбитиемъ къ намъ господарю вси станы сполнѣ и одностайнѣ, ижъ быхмо для способу лѣпшого и отправки посипѣшнѣйшоу въ сираведливости людской, статутъ новыи, отъ насъ господаря на соймѣ вальномъ у Бѣльску року прошлаго выданныи и привилеємъ нашимъ утвержонныи, въ skutечное уживанье привели, и тымъ статутомъ суды отправовати назали; а приводячи къ большому порядку рѣчь посполитую, што быхмо на выбиратье пословъ къ соймѣ вальнымъ и инымъ потребамъ земскимъ належачихъ, дозволили и допустили въ повѣтѣхъ (то есть, гдѣ — колвекъ врияды судовые засажены, и гдѣ потомъ черезъ насъ господаря засаженье вриядовъ судовыхъ зъ ихъ прозбы и зволенія дойдеть) соймы малые къ збиранью всѣхъ обывателей въ каждомъ повѣтѣ мѣти, и на тые соймы повѣтвые всимъ паномъ радамъ нашимъ, княземъ, паномъ вриадникомъ земскимъ и дворнымъ, и всимъ станомъ народу шляхетского и стану рыцерекого, гдѣ хто въ которомъ повѣтѣ осялость маєтъ, на часы черезъ листы наши назначоныи зъѣзжати, тымъ же прикладомъ и порядкомъ, яко на такихъ соймѣхъ повѣтвыхъ справа, поступокъ и обычай заховывается въ панствѣ нашемъ корунъ Польской. Ино мы господарь, дознавши не одно черезъ весь часъ панованья нашего, але къ памяти и воспоминаню годному приводячи, ажъ съ давныхъ вѣковъ, за щастливого панованья славноу памяти предковъ нашихъ, королей ихъ милости и великихъ князей Литовскихъ, яко предковъ велебныхъ въ Бозѣ и вельможныхъ пановъ радъ ихъ милости духовныхъ и свѣтскихъ, князей, пановъ вриадниковъ земскихъ и дворныхъ, и всего рыцерства, родичовъ и обывателей всѣхъ земль великого князства Литовского, цнотливые и вѣрные и пожиточные заслуги къ рѣчи посполитой, также и всѣхъ на тотъ часъ будучихъ къ намъ господарю, пану своему при-

реженому, и къ кождымъ потребамъ земскимъ (которыми не только зъ утраченіемъ маенностей, але зъ нечитованіемъ здоровья и горлз своихъ, мужнѣ и сталъ zostавуючися, такъ радами мудрыми, яко и ростропностью своею и моцию усиленною, противку каждому неприятели нашему намъ господарю и рѣчи посполитой добръ заслугуючи подобали и подобатися не переставаютъ): а для таковыхъ вѣрныхъ, цнотливыхъ и намъ милѣ-вдичныхъ заслугъ, умыслили есмо, не только таковыхъ потребъ рѣчи посполитой належачихъ не отмовляти, але еще завжды щедробливо (яко есмо звыкли) причиняти и примножати хочемъ, и дозволяемъ, абы вже тымъ статутомъ новымъ судилися и сиравовалися вси станы, однакимъ порядкомъ, въ повѣтѣхъ и на мѣстцахъ судомъ засажонныхъ, передъ вриадники на суды отъ насъ высажонными, водлугъ привилія и наданья нашего на соймѣ Бѣльскомъ на то отъ насъ обдарованого. А въ тыхъ же повѣтѣхъ на мѣстцахъ головнѣйшихъ зъѣзжати и збирати княземъ, паномъ радамъ нашимъ, вриадникомъ земскимъ и дворнымъ, и всему рыцерству, хто въ которомъ повѣтѣ осялость маєтъ, дозволяемъ, и, за обосланіемъ и листы нашими господарскими зъѣхавшися, о потребахъ рѣчи посполитой радити и намовляти и обмышляти, о чомъ имъ отъ насъ господаря ознаймено будетъ; и съ тогожъ собранья и намовъ спольныхъ, пословъ обирати и на съемъ великій вальный звыклый въ томъ панствѣ нашемъ (кдѣ листы нашими господарскими мѣстцо таковому сойму ознаймено и зложено будетъ) выправляти, и черезъ тыхъ пословъ потребы рѣчи посполитой и кождого зособна повѣту до насъ господаря приносить, во всемъ справуючися по тому, яко въ панствѣ нашемъ корунъ Польской обычай, около таковыхъ съѣздовъ повѣтвыхъ, отправованья пословъ и доношенья потребъ рѣчи посполитой на съемѣ вальномъ передъ насъ господаря, заховывается. А то все, яко справы судовые у повѣ-

тѣхъ, такъ тежъ и соймы въ тыхъ же повѣтѣхъ, яко вышей описано, маєтъ отъ насъ господаря и отъ потомковъ нашихъ великихъ князей Литовскихъ вѣчнѣ и непорушнѣ держано быти; а съ того права и порядку не маемъ ничего вызволяти и ничимъ отмѣняти, якожъ на утверженье и моцность того нашего привилія, подписавши его властною рукою нашего господарскою, печать нашу къ нему привѣсити есмо казали. Дано и дѣялося на вальномъ соймѣ, у Вильни, при бытности пановъ радъ нашихъ духовныхъ и свѣтскихъ, и тежъ князей и пановъ вриадниковъ земскихъ и дворныхъ, лѣта Божьего нароженья 1565, мѣсяца Декабря 30 дня.

Изъ Литовской Метрики (Запис. кн. XXXVIII, л. 570), хранящейся при Правительствующемъ Сенатѣ, въ С. Петербургѣ. Въ заглавіи грамоты отмычено: Привилей всимъ обывателямъ великого князства Литовского, о позволеніи имъ статутомъ ново въ Бѣльску выданнымъ и привилеємъ потвержоннымъ отправовати всякіе справы въ повѣтѣхъ, и о зъѣзжанью на соймики передъ соймѣмъ вальнымъ.

39. — 1567 Аврѣля 14. Наказная королевская грамота Кіевскому каштеляну Павлу Сопѣзъ, о пригоговленіи къ предстоящей войнѣ съ Русскими.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Ифлянтскій и иныхъ, каштеляну Кіевскому, державцѣ Любечскому пану Павлу Ивановичу Сопѣзъ. Вѣдомо есть, не одно вашей милости радамъ нашимъ, але и всему рыцерству, вѣрнымъ подданнымъ нашимъ, ижъ мы отъ щастливого панованья, съдши на столѣцы панствѣ нашихъ, николи на кровопролитье не стояли, але по приказанью Божьему, со всеми господары хрестіянскими, также и зъ великимъ княземъ Московскимъ въ братской пріязни быти хотѣчи, ко всему доброму

№ 40. умыслъ нашъ склоняли, всихъ тыхъ рѣчей, которыми онъ къ неприязни зъ стороны своею причину давалъ, въ терпливости будучи и ожидаючи въ томъ узнанья его; а за писаньемъ и присыланьемъ отъ него кглейтовъ (яко бы беручися зъ нами къ покою и постановенью хрестыанскому), пословъ нашихъ не однокроть къ нему посылали; съ которыми онъ постановенья некоторого не вчинилъ упкомъ давно—звыклоу хитрости своею, болшъ неприязни причиняючи, на панство наше посягаетъ, и, предсявзятыя своего не снижаючи, не только къ покою и зверненью несправедливо забраноу отчизны нашею не беретъ ся, и шкоду панству и подданнымъ нашимъ починеныхъ не нагорождаетъ, але еще и далѣй на панство наше злый умыслъ свой подноситъ. Про то, хотѣчи съ помощью Божьею за кривду нашу и шкоду панства нашего стояти, на валномъ великомъ соймѣ Городеньскомъ недавно минуломъ, со всеми станы сойму належачими, за сполнымъ всихъ обмысленьемъ и зволеньемъ (до чого и наша воля господарская приступила), вынайденъ и постановленъ есть способъ обороны и валки потужноу противку того неприятеля, што все меновитъ и достаточнъ на ухвалъ соймовой описано. А мы вборзъ отправивши потребы здѣшнего панства на соймѣ теперешнемъ, до того тамъ панства великого князства поспѣшимъ ся: бо ачъ — колвекъ тотъ неприятель и пословъ своихъ до насъ шлетъ, але замковъ на кгрунтъ нашомъ отъ него побудованныхъ не отступилъ, и еще къ посягненью отъ панства нашего таковыхъ же замковъ люди немалые отправилъ. Чого вже болшъ терпѣти не хотѣчи, складаемъ збиранию войска мѣстцо певное у Молодечнѣ, и приказуемъ тобѣ, ажбы твоя милость самъ, особю своею, конно и збройно, съ почтомъ своимъ ѣзднымъ и пѣшимъ, ничимъ не отступаючи отъ постановленья и ухвалы соймовоу и во всемъ водлугъ того заховываючи, у войско на тое мѣстцо назна-

ченное тягнулъ, и на часъ певный, то есть, на день семоу суботы теперешнего пришлого свята тамъ становилъ ся, ничимъ часу назначеного не омѣшкиваючи, але еще и инымъ поспѣшностью своею, яко рада наша, прикладъ даючи, чинячи то для ласки нашею господарской и вѣдаючи о постановеньи соймовомъ, къ службѣ нашей и земской на неопѣшныхъ ухваленомъ. Писанъ у Петриковѣ, лѣта Божьего нароженья 1567, мѣсяца Априля 14 дня.

Подлинникъ писанъ на бумажномъ листѣ, современною скорописью, безъ строчныхъ знаковъ. Королевской подписи у грамоты нѣтъ. Скрѣпа: Михайло Гарабурда, писарь. Внизу приложена малая печать, подъ кустодіею, на которой отпискъ не виденъ. Ветха.

Изъ коллекціи актовъ, приобрѣтенныхъ для Археографической Коммисіи въ Швеціи корреспондентомъ г. Соловьевымъ.

40. — 1567 прежде Августа. Наказная королевская грамота старостамъ и державцамъ Ливонскихъ замковъ, также жолнерскимъ ротмистрамъ, о подчиненности гетману Яну Ходквичу, по предоставленной ему власти въ управленіи Ливонскою землею.

Старостъ Волмерскому князю Александру Ивановичу Полубенскому, и всемъ старостамъ и державцамъ замковъ архыбискупства Рижского и всихъ иныхъ замковъ и державъ нашихъ въ земли Лифлянтской, и тежъ всемъ ротмистромъ и ихъ товаришомъ ротъ ѣздныхъ и пѣшихъ, которые служатъ въ земли Лифлянтской. Даемъ вамъ вѣдати, ижъ отправили есмо старосту Жомойтского, маршалка земского великого князства Литовского, державцу Плотельского и Тельшовского, пана Яна Ходквича до земли Лифлянтской, и зѣтили есмо его милости всю справу, моцъ и владность архыбискупства Рижского, и иные вси замки наши, и гетманство земли Лифлянтской,

давши ему суполную моцъ архыбискупствомъ Рижскимъ и всеми замки нашими въ оной земли Лифлянтской, также и вами людьми служебными рядити и справовати, и неприятелемъ границъ того панства съ добрымъ и пожиточнымъ нашимъ отпоръ чинити, и укривжонымъ подданнымъ справедливость дѣлати, и служебныхъ пріймивати въ службу и имъ приповѣдати, и всякіе рѣчи водлугъ зданья его милости справовати. И вы бы о томъ вѣдали, и пана старосту Жомойтского, яко високого раду нашего, и справцу той земли Лифлянтской головного, и гетмана нашего, въ великой учтивости и повагѣ мѣли, и всякое послушенство къ его милости чинили. А гдѣ бы его милость около старостъ и державъ нашихъ тамошнихъ какое постановление зѣлѣпшимъ и пожиточнымъ нашимъ господарскимъ чинилъ, хотимъ мѣти, ижбы есте и вы вси, старостове и державцы, водлугъ постановленія его милости заховали ся. Такъ тежъ, если бы хто съ подданныхъ нашихъ, такъ отъ васъ старостъ и державецъ, яко и отъ васъ ротмистровъ и товаришвъ вашихъ какое укривженіе и шкоды быти собѣ мѣновалъ, а до пана старосты Жомойтского съ жалобою ся утекъ: тогды, приказуемъ вамъ, ажбы есте во всемъ передъ его милостью усправедливали ся, а права и розсудку его милости послушны будучи, во всемъ, што бы ся на которомъ изъ васъ зѣ розсудку его милости указало, досытъ чинили. А заплаты бы за служеного своего на тые почты, съ которыми теперь при пану старостѣ служити будете, ни отъ кого иного, одно отъ его милости смотрѣли: бо вже онъ отъ насъ науку достаточную маеть, откуль заплату теперешнего за служеного вашего чинити будетъ.

Изъ Догелева манускрипта: Codex diplomaticus regni Poloniæ (Т. VI, стр. 1821—1823), въ которомъ актъ сей вписанъ Польскими буквами. Въ заглавіи такими же буквами и отмытка: Листъ до старостъ и державцовъ архыбискупства

Рижского и въ земли Лифлянтской, также до ротмистровъ и товаришвъ ротъ ѣздныхъ и пѣшихъ, зѣдаючи старостѣ Жомойтскому, маршалку земскому, пану Яну Ходквичу всю моцъ, справу и владность архыбискупства Рижского, замковъ и гетманства Лифлянтского. *Datum ne означено.*

Хранится въ Императорской Публичной Библиотеке.

41. — 1568 Марта 4. Отписка Литовскаго гетмана Яна Ходквича королю Сигизмунду Августу, о безуспѣшной осадѣ крѣпости Улы, по причинѣ трусости и неповиновеніи войска.

Наяснѣйшій, милостивый господарю королю, пане а пане мой милостивый! Притягнувши мнѣ се-здѣ, подъ сесь замокъ неприятеля вашей королевской милости Московского Улу, зѣ войскомъ и зѣ дѣлы, мѣшкаль есми недѣль три, и за порадою ихъ милости пановъ воеводъ и пановъ ротмистровъ, которые се-здѣ со мною были, хотѣчи вашей королевской милости, моему милостивому пану, послугу якую вырядити, уживалъ есми надъ тымъ замкомъ вшелякихъ фортелевъ, яко-мъ на тотъ часъ могъ. Въ томъ часѣ непогодномъ зимномъ, напервъ стрѣляно до одноу бакшты, которая есть надъ Улою; тую-мъ бакшту и полѣстны, которая отъ нее ажъ до середнѣй бакшты походитъ, такожъ збилъ и здиравилъ, ижъ яко щотка, бервенье зѣ стѣны и зѣ обломковъ выпадало, але про мощное збудованье и нафасованье землею, жадною мѣрою стѣна, а ни въжа обвалитися не могла. А видѣчи то, же-мъ стрѣлою не могъ ничего учинити, уживаючи того, якобы могло бытъ безъ шкоды людей, ночи прошлоу, съ понедѣлку на второкъ, мѣсяца Марца второго дня, пуц.... до стѣны зѣ огнемъ: ино, ачъ панове ротмистрове досытъ были неповольны до того, мѣнуючи, же имъ потреба дыру въ стѣнѣ такую, якобы можно въ ней прапорцомъ обернуть, выбити. Теперь они до штурму ити позволя...., але а

№ 41. ни драбинами, а ни паленьемъ того замку брать не хотѣли: ино, ижъ ся вжо обламки были на стѣнѣ абили, а часть немалая стѣны вывадила, а имъ казалъ, абы заразъ... блещими тарасы, оныя передъ собою катячи, перекопъ деревомъ наполнили, а потомъ, гдѣ есть дыра такая, якая на тотъ часъ быти могла, абы ся кусили о нее, будь штурмомъ, любъ драбинами, любъ тежъ запаленьемъ; а иже-мъ видѣлъ людъ посволитый драбскій, такъ тежъ и десятники ихъ барзо не смѣли и боялися смерти, припустиломъ ихъ подъ стѣну, чотыри години предо днемъ, абы такъ въ необаченю одного смерти другому сердца не псовали: але и то ничего не помогло. Ачъ другіе ротмистрове шли хотя досыть неспѣшнѣ, вѣдьже однакъ волоклися, колько могучи, але драбы ихъ вси по лѣсъ, по ровахъ и по подрѣчю похоронилися; также за великимъ волашемъ, напминашемъ, пригоняшемъ (же ми алижъ до того пришло, иже-мъ руки мои окровавилъ, принужаючи ихъ до штурму), вшакожъ жеданого поступку по собѣ и справы рыцерекоу оказать не хотѣли, але чимъ ихъ болшъ до того гвано, тымъ ся болшъ крыли и утекали: зачимъ тая ночь и заранѣ безъ пожитку отправить ся мусило. Тымъ же обычаемъ и козаки, которыхъ я былъ за пѣзези свои нанялъ, ледво до перекопу дошедши поутирали. А такъ, ижъ тая ночь несчастливъ ся отправила, хотѣлъ поправить того въ день, и за радою ихъ милости всихъ, которые со мною были, умыслилъ . . . , до самого полудня . . . розмовами ротмистры . . . указуячи то и даючи причину, же ихъ десятники и драбы до штурму безъ великоу дыри ити не хотѣли. Я и прозьбою и добротою, а потомъ тежъ зъ уряду моего, который все на тотъ часъ на собѣ носилъ, упоминаломъ, просиломъ и рассказываломъ, прекладаючи повинность, не только драбскую, але всихъ людей пѣшихъ постороннихъ, жебы только перекопъ наметали, а самъ ся вжо былъ способилъ на нѣкото-

рые Нѣмцы, яко пушкари, такъ тежъ и иншіе слуги мои (мѣжи которыми и Орелъ Москвитинъ былъ, который ся зъ замку до мене не передалъ); тые вжо подметъ стѣнѣ вчинити мѣли, якожъ и вчинили досыть: абовѣмъ тотъ Орелъ напродъ, а за нимъ Нѣмцовъ колько, замокъ запалили были, але панове драбы ихъ не ратовали и не посиляли, а на остатокъ стрѣлбою тымъ, которые огонь гасили, ихъ предъсвязать не боронили; якожъ и потомъ, въ ночи, пушкари огнистыми кулями по кольку—кротъ запаливали, а Москва выпадаючи за перекопъ . . . кули загашали, а ни одинъ человекъ съ пѣшихъ людей не обралъ ся, абы по нихъ стрѣлить, або якожъ — человекъ ратовать мѣлъ, окромъ одного гайдука. Я могу то смѣлъ вашей королевской милости, моему милостивому пану, писать, же вси драбы двадцати разовъ не стрѣляли, и то за горою стоячи, черезъ тые приметы. Якоу працы, горлованья, зъ великою перевагою, его милость панъ Дялыньскій, съ хути къ службамъ вашей королевской милости въ тыхъ потребкахъ обу-двухъ чинилъ, трудно быхъ то вашей королевской милости выписать мѣлъ, яко то въ самой рѣчи се — здѣ было: абовѣмъ не только же всего порядку доглядѣлъ, бы панове ротмистры водлугъ пристойности свое починали, але самъ приметь носилъ на небезпечнѣйшіи мѣсты, выносячи горло свое и подаючи другимъ доброе серцо, — што все паномъ драбомъ не помогло (якожъ зычилъ быхъ вашей королевской милости, моему милостивому пану, того, ижъбы ваша королевская милость до вшелякихъ службъ вашей королевской милости вѣлъ такихъ хутливыхъ, зычливыхъ и того серца слугъ мѣти рачилъ, злща до потребы военной). А видѣчи я, наяснѣйшій милостивый королю, непослушенство и нехуть пѣшихъ, зсѣлъ есми съ коня и самъ шолъ на тое мѣсто, откуда имъ къ приметомъ ити казалъ, хотѣчи имъ тымъ лѣпшое серцо утѣлѣти, якожъ панъ Богъ лѣпшій вѣдаетъ, же-мъ

того умыслнѣ искалъ, або службу вашей королевской милости вырядити, або тежъ тамъ горло отдать: до чого обоого ижъ не пришло, ничому, только нещастью своему те причитати мушу. Абовѣмъ, по долгомъ напминанью, прозьбою, грозьбою, везаньемъ . . . и забиваньемъ, што все не помогло, казалъ есми на конецъ, Татарскимъ обычаемъ, приметъ, купу за купу, дерева кидать, а такъ бысымы ся могли до перекопу, а потомъ ажъ и подъ обламки подметать; што ачъ ся было зачало и за помощью Божьею могло бы было къ лѣпшому концу прійти, але за перевагою Московскою, а не смѣлостью нашихъ до skutku не пришло: абовѣмъ выпадши колько Москвитиновъ, на встыдъ всимъ драбомъ, кгда вжо добръ дѣло, зажгли приметъ; еще зъ лука стрѣлено отъ замку, а драбы не только абы оноу ратовать, але и разу стрѣлити не смѣли, а потомъ утекли отъ шанцовъ; заледво панъ Дмитровскій зъ нѣкоторыми вѣдными дѣлки поратовалъ, которые въ переднихъ шанцахъ стояли для збѣганья побочноу стрѣлбы; а кгда-мъ прибылъ до дѣлъ, не только въ переднихъ шанцахъ, але и въ другихъ и въ третьихъ драбскоу пѣхоты не намоу, окромъ колько ротмистровъ, вже-мъ мусилъ чотыри роты вѣдныхъ съ коней зсадить и дѣлъ стеречь, бачачи, же вжо въ пѣхотѣ ани мужства, ани бою, ани жадноу надѣи не было. А видѣчи я, наяснѣйшій милостивый королю, же тыхъ пѣшихъ людей, черезъ которыхъ, а не вѣдныхъ, замковъ добывать потреба, и же-мъ ихъ до жадного фортелю ужить не могъ яко стрѣлбою такъ и до штурмовоу справы, на конецъ и до . . . шанцовъ, которые надъ всю потребу лѣниво волокли; видѣчи тежъ то, же у штурму болшъ людей гинетъ, чимъ смѣлѣйшихъ . . . на цѣлую засажоную стрѣлбу, . . . приметомъ замокъ запалень быти можетъ: не хотѣлъ есмь болшъ непотребнѣ часу тратить и шкодоу въ людехъ и конехъ подыймовать, которые се-здѣ про голодъ вѣлыми здыхаютъ.

Боячися тежъ того, абы отъ мене, про тотъ № 42. голодъ, люди, которые ся про голодъ вѣлыми розбѣгать почали, до конца не повтекали, а про малость пѣшихъ людей абы въ небезпеченство дѣла вашей королевской милости не пришли, а на конецъ смотрѣчи на то очима, же ачбы была дыра въ томъ замку, яко съ Кракова до Вильни, предъся бы до нее драбы ити не хотѣли и не смѣли; притомъ зъ намовою всихъ ихъ милости пановъ радъ и всихъ ротмистровъ, дѣлы ночи нынѣшнее, мѣсяца Марца четвертого дня, оттягнути есми умыслилъ, вѣдаючи достаточнѣ о великомъ въ замку достатку такъ стрѣлбы яко живности и людей, которыхъ ани въ порохъ, ани въ живность долгимъ часомъ выморить не могъ, а маючи тежъ передъ очима, же ся въ Марцы дорога . . . псуетъ. О чомъ достаточнѣй, прѣхавши, самъ справу вашей королевской милости моему милостивому пану дамъ, а покорнѣ прошу, абы тое невзятѣ замку, не моею небалости, але тымъ причинамъ помѣненнымъ причитано быти могло. Съ тымъ нанижшіе службы мои зъ вѣчною подданностью до милостивоу ласки вашей королевской милости пана моего милостивого офярую. Писанъ подъ Улоу, мѣсяца Марца 4 дня, року 1568.

Подлинникъ писанъ на трехъ полулистахъ, рукою самого гетмана. Въ концѣ его же подпись: Вашей королевской милости, моего милостивого пана, нанижшій слуга и вѣрный подданный Янъ Ходкевичъ, староста Жомойтскій, маршалокъ земскій великого князства Литовского. На полѣ первой страницы, позднѣйшимъ почеркомъ отмѣчено: List od kogoś(?) do króla zpod Uły, o powodzeniu woiennym. Ветхъ.

Изъ коллекции актовъ, приобретенныхъ для Археографической Коммиссии въ Швеции корреспондентомъ г. Соловьевымъ.

42. — 1568 Юня 17. Наказная королевская грамота Полоцкому каштеля-

№ 43. ну Юрію Зеновичу, о поспышнѣишемъ построении Лепельскаго замка.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Лифлянтскій и иныхъ, каштеляну Полоцкому, старостѣ Лепельскому, державцѣ Чечерскому и Пропойскому пану Юрію Миколаевичу Зеновичу. Ижъ замокъ нашъ Лепельскій еще не добудованъ, про то, постерегаючи, абы (чого Боже вховай!) для того отъ непріятеля въ якую небезпечность оный замокъ не пришолъ, рассказали есмо съ нѣкоторыхъ волостей нашихъ люди на роботу до того замку послати; а ижбы для лѣпшой безпечности обывателей земли Полоцкой, людей и имѣній ихъ, до того замку прилеглихъ, тымъ спышнѣи оный замокъ забудованъ былъ, рассказали есмо до князей, пановъ воеводъ, каштеляновъ, старостъ и всихъ тыхъ, которые имѣнья и люди свои неподалеку того замку мають, листъ нашъ писати, желаючи и приказуючи, шобы они по доброй воли своей, въ потребъ рѣчи посполитовъ досыть чинечи, велѣли людемъ своимъ къ работѣ того замку помочнымъ быти. А тобѣ приказуемъ, ижбы твоя милость и тымъ людемъ нашимъ, которые къ замку Лепельскому твоей милости держати поданы, тотъ замокъ съ подданными волостей нашихъ робити и будовати казалъ, иначе того вчинити и сего розказанья нашего ослушаться не смѣючи, конечно. Писанъ у Городнѣ, лѣта Божьего нароженья 1568, мѣсяца Юня 17 дня.

Подлинникъ писанъ на полулистъ, скорописью, безъ строчныхъ знаковъ. Королевской подписи нѣтъ. Въ концѣ грамоты скръпъ: Михайло Гарабурда, писарь. На пакетъ адресъ Лепельскаго старосты такой же, какъ въ заглавіи.

Хранится въ Императорской Публичной Библиотецѣ.

43. — 1568 Юня 25. Просительныя статьи Кіевскаго митрополита Іоны, поданныя королю Сигизмунду Августу на Городенскомъ сеймѣ, о нуждахъ Православной церкви въ Литвѣ и Рускихъ областяхъ, и королевскій отвѣтъ.

1. *Прозба.* Што просишь господаря его милости, абы въ панствѣ его милости господарскомъ, такъ въ князствѣ великомъ Литовскомъ, яко и въ тыхъ князствахъ Рускихъ, которые къ корунѣ належатъ, достоинства духовные людемъ свѣтскимъ не были даваны; а кому бы свѣтскому врьдѣ духовный дано, а онъ далѣй въ трехъ мѣсяцхъ стану и врьду духовного на себе приняти не хотѣлъ, у таковыхъ абы епископы въ своихъ епископіяхъ, а архіепископъ въ своей архіепископії оные достоинства и хлѣбы духовные отбирали и людемъ духовнымъ подавали. *Отказъ.* Господарь его милость, видѣчи въ томъ прозбу твоей милости слушную, призовети на то рачить: вѣдѣже у тыхъ, хто бы стану духовного на себе приняти не хотѣлъ, не митрополитъ, а ни владыки мають врьды або достоинства духовные отбирати и подавати, але они, съ повинности врьду своего, о таковыхъ безъ омѣшканья мають знати давати королю его милости; а его королевская милость отбираючи ихъ отъ таковыхъ, отдавати будетъ инымъ, подлугъ воли своее господарской, кому ся будетъ годити.

2. *Прозба.* Къ тому бьешъ чоломъ господарю королю его милости, абы тыи наданья церковные стародавние, которые безиравнѣ, моцью, черезъ многихъ становъ отъ церквей Божьихъ забраны, зася, зъ ласки и моцью зверхности его королевской милости были къ нимъ привернуты, и въ держанье кому што належитъ подано. *Отказъ.* Его королевская милость позволяти на то рачить; а митрополитъ и владыки мають такихъ особъ ознати его королевской милости, и часть, коли и што взято.

3. *Прозба.* При томъ просишь короля его милости о листы до всихъ обывателей въ панствѣ его королевской милости, абы свѣтскіе особы во владность справъ и судовъ, духовнымъ особамъ здавна належачихъ, ничимъ не вступовалися. *Отказъ.* О томъ листы съ канцелярии его милости господарской выданы будутъ.

4. *Прозба.* За тымъ бьешъ чоломъ господарю его милости, абы тымъ же прикладомъ и обычаемъ, яко и Римского послушенства духовные ихъ милость князи бискупове мѣстцо и вотумъ (*) въ лавицы рады его королевской милости мають, и тыи также владыки епископы закону Греческого мѣстцо и вотумъ въ радѣ его милости господарской, зъ милости-воѣ ласки его королевской милости, и водлѣ обычаю звыклого, яко то предки твои архіепископы мѣвали, одержати могли. *Отказъ.* То его королевская милость на иншій часть откладати рачить.

5. *Прозба.* Што тежъ доносишь вѣдомость его милости господарской, ижъ передъ тымъ въ Новѣгородку наданья и фундованья стародавнего было церквей десять, нижили, повѣдаешъ, при постановленью помѣры волочноѣ, вси люди и земли и пожитки отъ тыхъ церквей отобранны, а за то нѣкотороѣ отмѣны не дано, за чимъ нѣкоторые съ оныхъ церквей спустили; а ижъ, повѣдаешъ, тыхъ земель у волоки забранныхъ вывести нѣкому, бьешъ чоломъ господарю его милости, абы на тые церкви зъ кгрунту его милости господарского тамошняго Новогородскаго рачилъ надати волокъ двадцать, а къ каждой волоцѣ по два морги сѣножати, а по два морги на гай кгрунту, а въ мѣстѣ огороды и дома вольные, ижбы еси тымъ наданьемъ поповъ и слугъ церковныхъ опатривши, постановити и задержати могъ. *Отказъ.* Господарь его милость хо-

четъ то мѣти, абы достаточно было оказано: № 43. гдѣ и што взято, и хто а коли вѣдѣлъ а маючи о томъ певную вѣдомость, потомъ учинити съ тымъ рачить што ся его королевской милости видѣти будетъ.

6. *Прозба.* А што ускаржаешся королю его милости на мѣщанъ Виленскихъ о забранѣ привилеевъ, на архіепископью и на наданья и уфундованье съ належачихъ, и бьешъ чоломъ, абы тобѣ тыи привилеи зъ розказанья его королевской милости были отъ нихъ вернуты. *Отказъ.* Король его милость отсылати съ тымъ рачить до права, абы твоя милость мѣщанъ о то правомъ уживалъ.

7. *Прозба.* Еще тежъ бьешъ чоломъ господарю его милости, абы тебе и владыкѣ, и тежъ иншого духовенства, зъ имѣній церковныхъ до врьду замкового и земского не позывано: одно, ижбы самъ его королевская милость, которого опецъ и оборонъ наданья церковные належатъ, справедливость съ вами, кому бы о то до васъ дѣло было, чинити рачилъ. *Отказъ.* Господарь его милость рачилъ розказати на то повѣдати: гдѣ идетъ подаванье властное его королевской милости, о то до господаря его милости самого маеть быти позыванье, а о иные рѣчи до права, водлѣ Статуту належачого, вольно будетъ васъ позывати.

8. *Прозба.* Просишь короля его милости, абы архіепископство Галицкое, по старовѣчному обычаю, въ руки и справу твою было подано, а имѣнья вси, архіепископьи и епископьи и иныхъ всихъ духовныхъ, за листы его королевской милости, черезъ певныхъ особъ списаны, ограничены и успокоены были. *Отказъ.* То его королевская милость откладати рачить до сполного сойму, который маеть быти обывателемъ тутошнимъ великого князства съ обыватели панства его королев-

(*) Это Латинское слово и въ подл. написано Русскими буквами.

№ 44. ской милости коруны Польской: тамъ же, на тотъ съездъ твоя милость послати о то маешь.

Подлинникъ писанъ на двухъ листахъ, вмѣстѣ сшитыхъ шелковыми малиновыми нитями, которыхъ оба конца соединены подъ печатью Литовскаго княжества, вытиснутою на красновосковой массѣ, покрытой лоскуткомъ бумаги. Королевской подписи нѣтъ. Внизу скръпи: Янъ Шимковичъ, маршалокъ господарскій. Въ началѣ акта отмѣчено: Отказъ отъ господара короля е. м. и великого князя Жигимонта Августа, на вѣзбы отъ е. м. отца архіепископа митрополита Кіевского и Галицкаго и всея Руси, которые е. м. въ потребѣхъ церковныхъ, передъ его королевскую милость, принесть на теперешнемъ валномъ соймѣ, у Городнѣ, лѣта Бож. нарож. 1568, мѣс. Іюня 25 д.; за которыми жъ прозбами его, господарь е. м. рачилъ его въ томъ захвати, въ тѣхъ потребѣхъ, мощью того сойму, по тому яко то на семъ отказѣ есть описано. Вѣтъ.

Храпится въ архивѣ бывшихъ Греко-Униатскихъ Митрополитовъ, при Святѣйшемъ Синодѣ, въ двухъ одинахъ экземплярахъ.

44. — 1568 Іюля 5. Жалованная подтвердительная королевская грамота Кіевскому Выдубицкому монастырю, на владѣніе землею Звѣринцемъ, съ описью границъ ея и угодьевъ.

Жигимонтъ Августъ, Божіею милостию король Польскій, великій князь Литовскій, Русскій, Прускій, Жомойтскій, Мазовецкій, Лифлянтскій и иныхъ. Билъ намъ чолемъ игуменъ монастыря святаго Архангела Михаила Выдубицкаго Григорій Шваба, и повѣдѣлъ передъ нами, што дей. великіе князи Рускіе къ тому монастырю Выдубицкому зъ вѣковъ придали землю прозываемую Звѣринецъ, надъ рѣкою Днѣпромъ лежащую, которую панъ воевода Кіевскій Константинъ княжа Острозское, за листомъ нашимъ, якоже тая земля отъ князей Рускихъ надана, ограничилъ; и тотъ листъ граничный пана воево-

ды Кіевского передъ нами покладалъ, просячи, абыхмо тое ограниченіе велики въ книги вписати и привилеємъ нашимъ подтвердили, яко панъ воевода ограничилъ и таковою граничною описалъ: почавши отъ рѣки Днѣпра вверхъ озера Затона, а зъ того озера въ долину Глубокую, ровчакомъ и поточкомъ Наводницкимъ простуючи до колодезей у вербъ граничныхъ, въ якихъ колодезяхъ были и знаки граничные положены, два сошники у жорна; отъ вербъ граничныхъ и колодезей, тоуюжъ долиною Наводницкою, ровчакомъ и поточкомъ на озеро, которое въ долині межъ лѣсомъ стоять, а съ того озера на борокъ, отъ борочка на Перепеличъ долину и чрезъ гостинецъ Триполскій, тою долиною простуючи въ Лыбедь (а тамъ въ Лыбеди млынъ Выдубицкій вмѣстный, пополамъ съ Печерскими, а они тотъ млынъ зъ Выдубицкими за чотыри дворища на Звѣринцѣ вымѣнили); оттолъ Лыбедью нанизъ, на — задки, до млына другого Выдубицкаго зычистаго на Лыбедь же, тою Лыбедью снова въ Днѣпръ. Которого жъ такового листу граничного, черезъ пана воеводу Кіевского Константина князя Острозскаго зпориженного, и иныхъ листовъ великихъ князей Рускихъ на тую землю Звѣринецъ къ тому монастырю Выдубицкому наданныхъ, и отъ предковъ нашихъ королей Польскихъ подтвержденіе тыхъ листовъ оглядаючи, зъ ласки нашею на чоломбитѣ помянутого игумена Григорія Швабы то учинили и таковое ограниченіе въ книги вписати велики. Маеъ тотъ игуменъ и по немъ наступующіе, со всемъ штожъ — колвекъ въ томъ имѣнью есть, яко въ листу пана воеводы описано и ограничено есть, со всякими пожитками, въ томъ имѣнью находячимися, къ той церкви Божой держати, и подтверждаемъ симъ листомъ нашимъ на вѣчность; до которого жъ листу нашего подписуючи ся, на твердость, и печать казали есмо приложити. Писанъ въ Городнѣ, подъ лѣто Божого нароженія тысяча пятьсотъ

шестдесятъ осмага, мѣсяца Іюля пятого дня, индикта одинадцатаго. — Подпись руки господарской: «Sigismundus Rex.»

Списокъ сей привилегіи изъ книгъ Литовской Метрики выданъ, по королевскому повелѣнію, въ официальной выписи 1752 г. Сентября 6. Выпись эта писана на двухъ, вмѣстѣ сшитыхъ листахъ, Польскими буквами, и скръплена Литовскимъ подканцлеромъ княземъ М. Черторижскимъ. Печать большая, подъ кустодіею.

Изъ библіотеки Кіевской Духовной Академіи.

45. — 1568 Декабря 11. Письмо Литовскаго гетмана Григорія Ходкевича Кіевскому каштеляну Падлу Сопѣгъ, о прекращеніи набѣговъ въ Московскія границы, съ извѣщеніемъ о взятіи у Русскихъ крѣпости Улы.

Вельможный пане каштеляне, пане, а зятю мой милый! . . . (*) особливъ за тые новины, о которыхъ ми ваша милость писаньемъ своимъ озапнуешь, ижъ ваша милость до земли непріятельской ходилъ, и тамъ послугу дѣлалъ, и земли непріятельской немалую часть зовоевалъ, — на знакъ того послалъ ми ваша милость двухъ Москвитиновъ, вязневъ, которые ми черезъ служебника ваше милости отданы суть, — за то, за все дякую. . . . Вшакожъ ражу и прошу, абысь ваша милость вже, черезъ тое, за рубежъ въ землю непріятельскую яко самъ не ходилъ, такъ и людей не посылалъ, и заховалъ бы ся ваша милость спокойнѣ, а зачѣпокъ некоторыхъ чинити не велѣлъ: бо того есть пыльная потреба и розказанье господарское. . . . О то тежъ рачъ ваша милость вѣдать, ижъ гонецъ господарскій зъ Москвы сими часы пришоу, и листы опасные отъ князя великого принесть; а вѣдъ же, што тотъ гонецъ вырозумѣлъ отъ того непріятеля, радить и напоминаеть, абысь

мы ни на што ся не обезпечивали, але въ чуждѣмъ М 45. лости и въ готовности и въ осторожности были: бо то Богъ вѣсть, къ чому на концѣ прійдетъ. Вшакожъ, гдѣ бы ся люди непріятеля господарского въ панство его королевской милости вторгнутъ хотѣли, таковымъ за Божіею помощью слухный отпоръ ваша милость чинить можете, але до земли непріятельской повторнѣ ваша милость не порывайся, зваща съ такъ малыми людьми; а теперъ, пакъ, и овшемъ не годится, кгдажъ отъ господара его милости заказъ на то есть. . . . Самому на то вытѣгаться непотреба, чого на сѣсѣ частъ не потребуютъ. . . . А што вашей милости вѣдомость дошла, недавного часу, о взятіи Улы зъ рукъ непріятельскихъ, чрезъ его милость князя воеводу Браславского, тогды то вже отъ немалого часу, зъ ласки Божьей и за помощью его святою, дошло, и, пане Боже дай, жебы вѣчнѣ трвало: одножъ, тою Улою, зъ Божьего допущенія, на многихъ мѣстахъ, отъ повѣтрѣ въ людехъ великій упадъ сталъ, яко въ Витебску, въ Чашникахъ, въ Могилевъ, на Вороничу и на иныхъ мѣстахъ; а вѣдъ же милосердіемъ Божьимъ, на сѣсѣ частъ то вже утихло, пане Боже дай, надрато! Притомъ полежаю ея ласки и милости вашей, блага моего милого, и прошу, абыхъ зъ ней не были опущены. Писанъ въ Минска, мѣсяца Декабря 11 дня, року 1568.

Подлинникъ писанъ на двухъ полулистахъ, скорописью, безъ строчныхъ знаковъ. Въ концѣ акта тѣмъ же почеркомъ подпись въ сокращеніяхъ: В. м. зычливый пріятель, Григорей Алексавровичъ Ходкевичъ, панъ Виленскій, гетманъ великаго князства Литовскаго, староста Городенскій, державца Могилевскій. Бывъ сложенъ и запечатанъ перстневою печатью, подъ кустодіею, на пакетъ имѣетъ надпись: Вельможному пану, а зятю моему милому, особливѣ до мене ласкавому,

(*) Здѣсь исключены тѣ мѣста, въ которыхъ говорится о частныхъ, фамильныхъ дѣлахъ, неинтересныхъ для историка, на пр. о неплатѣ долговой суммы и т. п.

№ 46. е. м. пану Павлу Ивановичу Сопезъ, каштеляну Кіевскому, старостъ Любецкому. *Ветхъ.*

Изъ коллекціи актовъ, приобритенныхъ въ Швеціи корреспондентомъ Археографической Комиссіи г. Соловьевымъ.

46. — 1568 Декабря 23. Наказная королевская грамота Луцкому и Бра-славскому старостъ князю Богушу Корецкому, о неприкосновенности свѣдѣтельскаго и духовнаго суда, о подтвержденіи Подольскому православному духовенству быть послушными Кіевскому митрополиту Іоанъ и установленнымъ отъ него намѣстникамъ и прочимъ властямъ, и о содѣйствіи имъ противъ ослушниковъ.

Жикгимонтъ Августъ, Божію милостью король Польскій, великій князь Литовскій, Русскій, Прускій, Жомойтскій, Мазовецкій, Лифлянтскій и иныхъ, старостъ Луцкому, Бра-славскому и Вѣницкому князю Богушу Оедоровичу Корецкому, а въ небытности его милости самого въ Браславѣ и въ Вѣниці, ино подстаростимъ тамошнимъ. Яко первый того, будучи намъ на вальномъ соймѣ, у Городнѣ, недавно прошломъ, такъ и тыхъ часовъ, писалъ и присылалъ до насъ архіепископъ митрополитъ Кіевскій, Галицкій и всея Руси кѣрѣ Іона, о томъ, ижъ ачъ — кольвекъ того пильная потреба, абы онъ самъ зъ мѣстца и уряду своего пастырского, вси монастыри и церкви соборные вездѣ у архіепископствъ своемъ объѣхалъ, и во всихъ справахъ церковныхъ подлугъ звывлого обычаю и закону ихъ Греческого порядокъ и постановленіе учинилъ, и всихъ слугъ церковныхъ дозрѣлъ, жебы каждый зъ нихъ водлугъ повинности своею, на што взять есть, досыть чинилъ; а къ тому ижъ тежъ великая а пильная того есть потреба, абы въ справахъ и судѣхъ, которые вряду и пастырству его належатъ, постановленіе было учинено, и певные а годные особы для лѣпшой и прудшой справедливости на нѣкоторыхъ мѣстцахъ водлѣ потре-

бы установлены были: вѣдь же, ижъ на тотъ часъ онъ есть забавленъ таковымижъ пильными справами церковными, а ижъ тежъ онъ самъ . . . вездѣ быти не можетъ: про то, хотѣчи на свое мѣстце для такихъ . . . справъ духовныхъ и церковныхъ, посланцовъ своихъ отправить, просилъ насъ, абыхмо листъ нашъ до тебе . . . ти казали. А такъ, хотяжъ подлугъ обычаю звывлого, и окромъ нашихъ листовъ, онъ черезъ свои листы то отправить бы могъ, кгдажъ и при выданьи отъ насъ Статуту земского, на привиліи нашоу тые sprawy и суды, уряду ихъ духовному належачіе, ничимъ непорунитъ, але въ-цѣлѣ имъ оставлены и захованы: вѣдьже, ижъ то онъ вѣдомости нашої донестъ, мы съзверхности нашею господарскою постерегаючи, абы зъ мѣстца и уряду его пастырского всякіе sprawy церковные, повинности и суду ихъ духовному належачіе, водлѣ закону ихъ Греческого слушитъ и порадитъ были справованы, а слуги церковные абы тому всему досыть чинили на што суть взяты; — хочемъ мѣти и приказуемъ, абы твоя милость, княже старосто, (а въ небытности его самого, ино вамъ подстаростимъ его тамошнимъ Браславскому и Вѣницкому приказуемъ), въ мѣстѣ и на волости нашої, во всемъ повѣтъ Браславскому и Вѣницкому, въ sprawy церковные и суду ихъ духовному належачіе ничимъ ся черезъ то не вступовалъ и никому ся въ то вступовати не казалъ и не допускалъ, але всимъ архимандритомъ, игуменомъ, протопопамъ, десятинникомъ, и попомъ, дякономъ и всимъ инымъ слугамъ церковнымъ, яко бѣльцомъ, такъ тежъ и всимъ станомъ въ законъ будучимъ, потомужъ всимъ людемъ того закону и послушенства церкви ихъ Греческоу, въ справахъ церковныхъ и суду ихъ духовному належачихъ, нетолько къ тымъ посланцомъ его милости на то посланнымъ, але тежъ и къ намѣстникомъ и протопопамъ и каждымъ осо-

бамъ, которые бы на то отъ него самого, або и черезъ посланцовъ его гдѣ жъ — кольвекъ постановлены и высажены были, абы еси всякое послушенство чинити розказалъ; а хто бы ихъ водлѣ звывлости и повинности своею послушонъ быти не хотѣлъ, на таковыхъ непослушныхъ абы еси зъ уряду своего помочь всякую, водлѣ того яко они отъ тебе потребовати будутъ, чинилъ, и за то ихъ, яко противныхъ, зъ уряду своего каралъ, ижъбы ниhto у звывлой и пристойной повинности своей укрытися, и фолькги жадноу ни отъ кого противъ имъ, посланцомъ его и противъ намѣстникомъ и протопопамъ и особамъ на то отъ него поставленнымъ и высаженнымъ, мѣти не могъ, конечно. Писанъ въ Люблинѣ, лѣта Божьего нароженія 1568, мѣсяца Декабря 23 дня.

Подлинникъ писанъ на бумажномъ листѣ, сплошною скорописью, безъ знаковъ препинанія. Лѣтосчисленіе церковными буквами. Королевской подписи нѣтъ. Внизу грамоты приложена печать Литовскаго княжества, подъ кустодіею. Тутъ же скрипка: Лавринъ Война, подскарбій дворный и писарь. Ветхъ.

Хранится въ архивѣ бывшихъ Греко-Унитскихъ Митрополитовъ, при Святѣйшемъ Синодѣ.

47. — 1569 Декабря 26. Жалованная грамота Луцкому и Острожскому епископу Іоанну, на Жидичинскую архимандрію въ пожизненное управленіе.

Жикгимонтъ Августъ, Божьей милостью король Польскій, великій князь Литовскій, Русскій, Прускій, Жомойтскій, Ифлянтскій панъ и дѣличъ, ознаймуемъ симъ нашимъ листомъ, кому будетъ потреба того вѣдати, нынѣшнимъ и напотомъ будучимъ. Билъ намъ чоломъ велебный Іоаннъ Красенскій, владыка Луцкій и Острожскій, абыхмо ему архимандритство Жидичинское, которое теперь по зовѣстѣ сего свѣта небожчика Іоны, бывшего архимандрита Жидичинского, ва-

куетъ, дали и тымъ его пожаловали. А такъ № 47. мы зъ ласки нашею господарскою, и маючи бачность на залецонные намъ отъ певныхъ радъ нашихъ службы его, которые онъ служилъ намъ господарю и рѣчи посполитой зъ молодости лѣтъ своихъ и до сего часу, коли отъ насъ вызванъ былъ, и повинности своей завжды досыть чинилъ, и тежъ на чоломбитѣ его то есмо учинили, оную архимандритю и монастырь Жидичинскій помѣненому Іоанну Красенскому, владыцѣ Луцкому и Острожскому дали есмо, и симъ листомъ нашимъ даемъ, до его живота. Маеетъ онъ тое архимандритство Жидичинское держачи, въ церкви головной Жидичинской надъ червцами, попами и надъ всимъ духовенствомъ къ той — то архимандрити прислухающимъ, всякую владу пастырства своего ростегати, по обычаю звывлому закону ихъ Греческого, уживаючи тежъ съ дворовъ, съ имѣній и съ фольварковъ, съ селъ и съ гуменъ и што — кольвекъ къ той архимандрити Жидичинской здавна належитъ, всихъ пожитковъ, якимъ — кольвекъ именемъ названы суть, по тому яко и первые архимандриты Жидичинскіе на себе держали, а розмножаючи межѣ хрестіаны хвалу Божую, за насъ господаря Бога просити будетъ повиненъ; и на то дали есмо Іоанну Красенскому сесь нашъ листъ, съ подписаньемъ руки нашею господарскою и зъ нашою печатью. Писанъ у Варшавѣ, дня 26 мѣсяца Декабря, лѣта Божьего нароженія 1569, панованія нашего 40. — Подпись руки его королевскою милости: «Sigismundus Augustus Rex.»

Изъ Коронной Русской Метрики (Acta Metryki Ruskiej, s. Privilegia palatinatum Kijoviae, Woly-niae etc., рукоп. in fol. второй пол. XVI вѣка, Запис. кв. СССIV, л. 2 — 3.), хранящейся въ С. Петербургѣ, при Правительствующемъ Сенатѣ. Въ заглавіи грамоты отпѣчено: Данина Ивану Борзобогатому, владыцѣ Луцкому, на архимандритство Жидичинское. Такая же отпѣтка и по Польски.

№ 48. 48. — 1570 Февраля 5. Вѣстовый списокъ Московскаго посланца Вислаго Булгакова, о Литовскихъ дѣлахъ, и три королевскія грамоты: Кіевскому митрополиту Іонѣ, Полоцкому воеводѣ Станиславу Довойнѣ и Минскому каштеляну Николаю Тальвошу, о обмѣнѣ тѣла царскаго воеводы князя Петра Шуйскаго, убитаго подъ Чашниками, на тѣло Довойновой жены, скончавшейся въ Московскомъ плъну.

І. — Лѣта 7078 Февраля въ 5 день, прѣѣхалъ изъ Литвы въ Смоленскъ князь Петровъ человекъ Ивановича Шуйскаго Вислой Булгаковъ; а ѣздилъ для князя Петрова тѣла Шуйскаго, на обмѣну за Довойновы жены тѣло. И Довойна, сказалъ, его отпустилъ съ послы, съ королевскаго вѣдома; а о тѣлѣ князь Петровъ у короля рада была, и король и всѣ паны Литовскіе и Лядцкіе приговорили князь Петрово тѣло отдать, и грамоту были о томъ къ бискупу написали: и одинъ Виленскій воевода да староста Жомойтскій о томъ не прирадили, потому, что Виленскому воеводѣ съ Довойномъ недружба о имѣньяхъ, а Жомойтской староста ему другъ, и за то тѣла не отдали.

А вѣстей, сказалъ Вислой, слышелъ, что король нынѣ въ Варшавѣ, а быти ему въ Люблинѣ. И какъ пословъ отпустили, и паны разѣѣхались по домоу; а идутъ дей послы къ царю и великому князю о миру, чтобъ миръ взяти по своей волѣ, и чертежъ, сказалъ, съ собою везутъ, какъ границъ и Полотцкому повѣсту съ Велижскимъ повѣтомъ быти; а послы люди середніе. А собранья, сказалъ, Литовскимъ людямъ нѣтъ нигдѣ, oprичъ тѣхъ людей, которые съ рохмистры лежатъ по украиннымъ городомъ. А въ единачество король Ляховъ съ Литовскими паны привелъ, и присяга межъ ими была, одинъ не присягалъ Виленской воевода; а еднанье ихъ на томъ, что имъ стояти ото всѣхъ украинъ за-одинъ: Ляхомъ Литвѣ пособляти, а Литвѣ Ляхомъ

пособляти, безъ пѣнезей; а вотчинамъ и уряду быти въ Литовской землѣ по старому, какъ было напередъ того.

А на Москвѣ бояре Вислого спрашивали: какъ нынѣ Литовскій король съ Турскимъ солтаномъ, и съ Крымскимъ царемъ, и съ цесаремъ и съ иными съ пограничными его сусѣды? и что слухъ въ Литвѣ про приходъ къ Асторохани Турского людей? и про иные про тамошніе вѣсти, и въ Крыму про Оеонасыя Нагово съ товарищи что ему вѣдомо? и про государскихъ измѣнниковъ, про Курбского и про Володимера Заболотцкаго и про Тетерина съ товарищи, въ которомъ они обычеъ при королѣ, и къ которымъ раднымъ паномъ которой прихожъ, и что ихъ служба королю, и нѣтъ ли отъ нихъ котораго лихого умышленія про государевы украинны?

И Вислой сказывалъ про Турскихъ пословъ, что, слышелъ, лѣтось съ весны былъ въ Люблинѣ у короля Турского солтана посолъ, Стражемъ зовутъ; а бывалъ Ляхъ и отѣѣхалъ отъ короля, потурчился и служить солтану; а сколько съ нимъ людей приходило, и того ему не лучилося слышети; а присылалъ его Турской салтанъ, чтобъ король Турского людямъ далъ дорогу на царевы и великого князя украинны, черезъ Подольскую землю и на Волынъ, мимо Кіева, а тамъ невѣдомо на кои мѣста. И рада королю про то отговорили, что ему дорога дати черезъ свою землю Турскимъ людямъ на Московскіе украинны непригоже: только дей Турской Московской извоуетъ, а намъ дей отъ Турского и самимъ какъ впередъ пробывать? и дороги Турскому черезъ свою землю король не далъ. А какъ Турского рать шла къ Асторохани, и они Днѣпръ, немного ниже Каневскихъ Черкасъ. А сказывалъ ему, сказывалъ, Довойно: слышелъ ли дей еси новины, что Турской завоевался съ Московскимъ, послалъ дей къ Асторохани двѣсти тысячъ конныхъ людей, а сто тысячъ пѣшихъ

людей? И Вислой, сказываетъ, ему молвилъ: дай Богъ, здоровъ былъ государь на многія лѣта, можетъ государь противъ его стояти. И послѣ того на осени слухъ прошелъ, что Турскіе люди, Астороханъ взявъ, идутъ къ Казани. И тамошніе люди говорили: коли дей Турской Московской государя извоуетъ, и намъ дей какъ пробывать отъ Турского? А послѣ, вѣсти были на сей зимѣ, что царя и великого князя люди Турскихъ людей побили многихъ, а Асторохани и Казанскимъ мѣстомъ Турскіе люди никаковы шкоты не учинили.

А Крымского царя послы у короля были жъ сего лѣта въ Люблинѣ, послѣ Турского солтана пословъ, а иманъ имъ не вѣдаетъ, потому что былъ онъ у Довойна въ селѣ. А слышелъ, что приходили о томъ, чтобъ король со царемъ и великимъ княземъ не мирился, а съ Турскимъ и съ нимъ былъ за-одинъ; и сеѣ осени Крымскіе царевичи (а иманъ имъ не вѣдаетъ же) приходили къ Литовской украинѣ, на Подолье, и къ королю гонцовъ присылали, чтобъ король ко царю и къ нимъ дань прислалъ по прежнему, а не пришлетъ имъ, и его воевати. И король имъ о дани отказалъ, и номинковъ никакихъ къ нимъ и гонца своего не послалъ, для того, что дей король хочетъ со царемъ и великимъ княземъ помириться. А сколько со царевичи было людей, и про то ему слышети не лучилося; а пошли прочъ, не воевавъ.

Да сего жъ лѣта въ Люблинѣ дей у короля были цесаревы послы; а иманъ посломъ, и сколько съ ними было людей, того не вѣдаетъ; а приходили послы къ королю о томъ, чтобы король отдалъ ему его города, которые взялъ за сестрою его въ приданые, или бы другую его сестру король взялъ за себя; и король хотѣлъ былъ по договору съ цесаревыми послы на сѣздъ ѣхати, на границу, сеѣ осени о Семени днѣ Лѣтопроводца, и съ цесаремъ договоръ учинити о всемъ межъ себя самимъ,

и другую сестру его взяти за себя; и паны № 48. радные съ королемъ о томъ думали, и тотъ сѣздъ отложили до весны, до Мая мѣсяца.

Да Вислой же сказывалъ, что слышелъ въ Оршѣ у полоняника, у сына боярскаго у Богдана Глѣбова, Бѣжитцкіе пятины, а везетъ его къ Москвѣ Варколабовъ человекъ Сидоръ; слышелъ онъ, сказываетъ, у Сидора, что Сидоръ везетъ съ собою чертежъ Полотцкому повѣсту, и Полотцкимъ пригородомъ и иными пограничнымъ городомъ, на чемъ межъ государя и короля миру быти; а про урочища сказалъ: по которые мѣста и чему въ королевую сторону быти, и про то ему слышети не лучилося; а слышелъ, сказалъ, тотъ полоняникъ Богданъ у Сидора въ разговорѣ, чтобъ дорога дати, а волости бѣ посторонъ дороги за короля написати.

А про государевыхъ измѣнниковъ сказалъ, про Курбскаго и про Володимера Заболотскаго и про Тимоху Тетерина: слышелъ, что всѣ при королѣ, въ Варшавѣ, а что къ нимъ королевое жалованье, или какое прихождение, и про то, сказалъ, слышети ему не лучилося. А про Курбского жъ, сказалъ, слышелъ у Довойна, что за Курбскимъ были два города, Крѣвъ да Ковель, и король Крѣвъ у него взялъ и отдалъ Болку князю, что вотчина ихъ изстари; а прозвища Болку князю, и чей сынъ, и чего для взялъ у Курбского, и про то у Довойна и отъ иныхъ ни у кого слышети ему не лучилося; а бережетъ дей Курбского воевода Виленской панъ Миколай Юрьевичъ Радивилъ.

А про государевыхъ пословъ, про Оеонасыя Нагово съ товарищи слышелъ: въ Крыму держать ихъ за сторожи, а Литовского посла изъ Крыма не выпускать же, а имани Литовскому послу не вѣдаетъ. А Крымской посолъ прежней въ Литвѣ есть, а имани, сказалъ, ему не вѣдаетъ же. А про Ибраима князя съ товарищи, сказываетъ, слышелъ, на дорогѣ ѣлучи къ Оршѣ, что прѣѣхалъ къ королю, а съ нимъ Татаръ триста человекъ; а былъ ли у короля,

№ 48. и что его приезд к королю, и про то еще ведомости нетъ.

А про уряды сказалъ Вислой, что Григорей Ходкѣвичъ гетманство великое хочетъ отставить, а вмѣщаетъ, чтобъ дали то мѣсто сыну его Ондрѣю; а на Юрьево мѣсто Ходкѣвича нынѣ панъ Троцкой Остаеи Воловичъ, и прежніе уряды, которые за нимъ преждь того были, и нынѣ за нимъ же; а Яна Еронимова, сказываетъ, не любятъ всею землею, что ходилъ къ Улѣ и многихъ людей истерялъ, до пяти тысячъ человекъ, и нарядъ большой и малъ изъ Борисова у Григорья Ходкѣвича сильно и пушку большую Витовтову.

А про Изборское взятѣе, сказалъ, слышалъ Вислой, что князь Александръ Полубенской къ Изборску ходилъ безъ королева вѣдома, со государскими измѣнники съ Сарыхозиными.

А Ливонскую землю, сказываетъ, не вѣдаетъ, какъ ее королю оберегати.

А про свой отпускъ сказалъ Вислой, что его Довойно отпустилъ отъ себя Декабря 3 дня, а велѣлъ его везти своимъ людямъ по своимъ имѣньемъ, для прокормленія. А съѣхалъ по слову въ Оршѣ, и грамоту королеву къ пану къ Николаю Талвошу Довойновы люди привезли и его отдали; а какову грамоту далъ король къ митрополиту о княжѣ Петровѣ тѣлѣ Шуйского, и какову грамоту далъ Довойну, и какову грамоту послалъ король къ Талвошу, и съ тѣхъ грамотъ Вислой далъ списки, а списалъ, сказалъ, тѣ списки съ грамотъ у Довойна.

II. — Списки съ грамотъ королевскихъ, каковы даваны о княжѣ Петровѣ тѣлѣ Шуйского:

Списокъ съ королевскаго листа. — Жигимонтъ Августъ, Божьею милостию король Польскій и великій князь Литовскій, Рускій, Прускій, Жемоискій, Мазовецкій, Лифлянтскій и иныхъ, архіепископу митрополиту Кіевскому, Галицкому и всея Русіи куръ

Юнѣ. Писалъ до насъ великій князь Московскій о томъ, ижъ воевода Полоцкій Станиславъ Станиславовичъ Довойна, кгда до панства нашего великого княжства Литовского отъ него зъ Москвы выходилъ, смову и поставленіе съ нимъ и съ бояры его подѣлымъ обычаемъ былъ удѣлялъ, ижъ тѣло небожчика князя Петра Ивановича Шуйского, гетмана его великого, на Улѣ убитого, за тѣло малжонки своей съ сего свѣта зошлые, пани Петрунелли Радивиловы, у насъ господаря упросити и на границы въ отмѣнъ дати, а жены своей тѣло противъ того за то взяти мѣлъ: ино, кгдажъ мы господарь не только умерлыхъ, але и живыхъ людей хрестіанскихъ въ неволѣ мѣти не хотимъ, и на отмѣну за вѣрныхъ подданныхъ нашихъ даемъ; а такъ, за писаньемъ князя великого, яко тежъ за жаданьемъ пана воеводы Полоцкого, оное тѣло княжѣ Петрову Шуйского, зъ ласки нашего господарской, въ обмѣну за тѣло небожницы малжонки его пани Петрунелли ему дали. — И твоя бы милость, отче митрополите, а въ небытности его самого въ Вилнѣ, протопопу, который на тотъ часъ отъ него въ Вилнѣ, о томъ приказуемъ, ижъбы еси, за симъ листомъ нашимъ, служебнику пана воеводы Полоцкого, тому, которого его милость съ тымъ нашимъ листомъ и съ Шуйского служебникомъ, которого зъ Москвы при собѣ маеть, на имя Вислаго Булгакова, до тебе пришегъ, тое тѣло князя Петра Шуйского изъ церкви святыя Пречистыя вынати розсказалъ и до рукъ посланца Московского, на имя Вислаго отдалъ, а иначе того учинити не смѣлъ, конечно. Писанъ въ Кнышинѣ, року 69, мѣсяца Сентября 11 дня. — «Лавринъ Война, подскарбій дворный и писарь.»

III. — Списокъ съ королевскаго листа. — Жигимонтъ Августъ, Божьею милостию король Польскій и великій князь Литовскій, Рускій, Прускій, Жемойтскій, Мазовецкій, Лифлянтскій и иныхъ, воеводѣ Полоцкому пану

Станиславу Станиславовичу. Писалъ твоя милость до насъ, просячи тѣла князя Петра Ивановича Шуйского, на отмѣну за тѣло малжонки своей: ино есмы листъ на то до митрополита Кіевского и Галицкого и всея Русіи писать розсказали, и тое тѣло выдать изъ церкви святыя Пречистыя велѣли. А ижъ послы наши тыхъ часовъ, постомъ, по святомъ Михайлѣ, до Менска съѣхатись мають, и тамъ оттолѣ за границу до князя великого пойдутъ; и твоя бы милость тое тѣло и служебника князя Шуйского, которого при собѣ зъ Москвы маешь, на имя Вислаго Булгакова, при послѣхъ нашихъ отпустилъ. Писанъ въ Кнышинѣ, лѣта Божья роженія 1569, мѣсяца Сентября 11 дня. — «Лавринъ Война, подскарбій дворный и писарь.»

IV. Списокъ съ королевскаго листа: — Жигимонтъ Августъ, Божьею милостию король Польскій и великій князь Литовскій, Рускій, Прускій, Жемойтскій, Мазовецкій, Лифлянтскій и иныхъ, каштеляну Менскому, старостѣ Дынеборскому пану Талвошу, а подкоморому земли Новгородской, секретарю нашему пану Андрею Ивановичу. Кгда до васъ воевода Полоцкій панъ Станиславъ Станиславовичъ Довойно служебника небожчика князя Петра Ивановича Шуйского, которого зъ Москвы, для тѣла пана его, на имя Вислаго Булгакова, при собѣ маеть, пришегъ, приказуемъ вамъ, ижъбы есте въ вѣдомости своей ажъ до Москвы его у себя мѣли, и, приѣхавъ до князя великого Московского, бояромъ его оповѣдали и того Вислаго отдали, а иначе бы того не учинили. Писанъ въ Кнышинѣ, року 1569, мѣсяца Ноября 18 дня. — Подпись у листа: «Лавринъ Война, подскарбій дворный, писарь господарскій.»

Подлинникъ писанъ современною скорописью, столбцемъ на 16 листкахъ, которые расклеены, перенумерованы и сшиты въ особой оберткѣ.

Хранится въ Главномъ Московскомъ Архивѣ № 49. Министерства Иностранныхъ дѣлъ.

49. — 1570 Мая 30. Жалованная подтвердительная грамота Кіевскому Пустынскому Николаевскому монастырю, на селища, земли и угоды, по купчимъ и отказнымъ записямъ разныхъ лицъ.

Жигимонтъ Августъ, Божьею милостию король Польскій, великій князь Литовскій, Рускій, Прускій, Мазовецкій, Жемойтскій, Лифлянтскій, панъ и дѣдичъ, озаимуюемъ симъ нашимъ листомъ всемъ и каждому зособна, кому будетъ потреба того вѣдѣти, або чтучи его слышати, нынѣшнимъ и напотомъ будущимъ. Покладали передъ нами велебный отецъ Касьянъ, игуменъ монастыря святого Миколы Пустыньского, съ Кіева, и зъ братьею своею чернцы оного монастыря Пустыньского, листовъ семь, одинъ славной памяти короля его милости Жигимонта, пана отца нашего, на паркламентъ писанный, подѣ датою року Божого тысяча пятьсотъ четвертого (*), мѣсяца Іюля 29 дня, индикта 2, справы писаря Михайла Васковича, которымъ листомъ своимъ король его милость, отецъ нашъ, селищу пустое, въ Кіевѣ, за Дибпромѣ, на имя Княжичи, и озеро, которое на тотъ монастырь Пустыньскій еще продокъ нашъ, король его милость Казимерь, и тежъ король его милость Александръ, стрый нашъ, надати рачили, на вѣчность подтвержать тому же монастырю Пустынскому рачить, а шесть листовъ пановъ и землянь Кіевскихъ, которые для усноможенья того монастыря попридавали и записали люди и земли свои на тотъ монастырь Пустыньскій, то есть: листъ Булгака Лисичина сына и Михайла Волчковича, подѣ датою въ лѣто 7007 року, мѣсяца Августа 4 дня, индикта 2, которымъ листомъ своимъ онъ отдаляючи жону, дѣти, братью и всихъ повинныхъ своихъ, двѣ

(*) Надобно прибавить «надесять», сообразно съ индиктомъ. См. Акт. Зап. Росс. II, 116.

№ 49. дѣлницы свои селища Ивонинцовъ, лежачого при рѣчцѣ Красной, пашни и сѣножатей и млына на тотъ монастырь Пустыньскій вѣчно записуютъ; третій листъ Семена Романовича и жены его Татьяны, подъ датою въ лѣто 7015 року, мѣсяца Сентября 1 дня, индикта 10, которымъ листомъ онъ отдаляючи братью и всехъ повинныхъ своихъ, половицу имѣнья своего, Шепеличъ часть, на Припяти, и къ тому озеро Веропуть и Долгую тоню на вѣчность томужъ монастырю Пустыньскому въ Кіевъ записуетъ; четвертый листъ Солтана Албевича, толмача, и жены его Куньки и сыновъ Ивашка и Васка, подъ датою въ лѣто 7016 року, мѣсяца Августа 13 дня, индикта 11, которымъ листомъ они взявши отъ игумена и чернцовъ Пустыньскаго монастыря чотыриста копѣ грошей, и отдавши то отъ всехъ повинныхъ и сыновъ своихъ, продали и записали вѣчно землю свою бортную, съ селища, дубровы, боры, лежащую за Дитпротъ, на имя Полукнязевскую, на тотъ же монастырь Пустыньскій; пятый листъ Сенька Романовича, намѣстника Житомирскаго, которымъ онъ листомъ своимъ озеро на имя Веропуть на тотъ же монастырь Пустыньскій далъ; шестой листъ Ивана Михайловича Волчковича, подъ датою мѣсяца Марца дня 15, индикта 6, которымъ листомъ своимъ онъ половицу ѣзу, имѣнья своего Шепеличъ, на рѣцѣ Припяти и къ тому землю бортную тогожъ имѣнья Шепеличъ, на имя Пенячевскую, со всеми пожитки до той земли здавна прислухающими, вѣчно на вѣки на тотъ же монастырь Пустыньскій въ Кіевъ святого Николы записалъ; седьмой листъ Рака Полозовича, подъ датою мѣсяца Августа 1 дня, индикта 11, которымъ листомъ своимъ онъ землю свою отчизную, на имя Копьевскую, отдаляючи жону и всехъ повинныхъ своихъ, на тотъ же монастырь Пустыньскій вѣчно записалъ. И просили насъ, абыхмо то къ вѣдомости нашей господарской принустивши,

мощью зверхности наше королевское, тые селища, люди и земли къ той церкви Божой монастырю Пустыньскому святого Николы у Кіевъ подтвердили и умоцнили то имъ во всемъ, на вѣчность, листомъ привилеємъ нашимъ. Ино мы оглядавши тыхъ листовъ записовъ ихъ, и видячи ихъ быть цѣлыхъ и ни въ чомъ не нарушоновъ, на прозбу ихъ то вчинили, подтвердили есмо и симъ листомъ привилеємъ нашимъ подтверждаемъ. Мають они сами, и по нихъ игуменъ и черицы въ томъ монастырю Пустыньскомъ Кіевскомъ будучые, тые вси дворища, люди и земли вышеймѣненые, зъ землями пашными и бортными, и зъ сѣножатями, и зъ службами тыхъ людей, и зъ даными грошовыми, медовыми, бобровыми и куничными, и съ озеры и зъ рѣками и зъ ѣзы, и зъ бобровыми гоны, и съ ставы и зъ млыны, и со всимъ съ тымъ яко ся тые люди, селища и земли здавна въ собѣ и теперь мають во всемъ, водлугъ листу и подтверженья славной памяти короля его милости Жикгимонта, пана отца нашего, и тежъ водлугъ данины и записовъ тыхъ пановъ и землянъ Кіевскихъ вышейписанныхъ, до той церкви Божой монастыря святого Николы Пустыньскаго въ Кіевъ, держати и уживати, вѣчно и на вѣки непорушно. И на то есмо игумену и всей братьи его чернцомъ монастыря Пустыньскаго дали сесъ нашъ листъ, подписавши его рукою нашею господарскою, до которого на умоцнение и печать нашу привѣсити есмо казали. Писанъ у Варшавѣ, на соймѣ вальномъ корунномъ, дня 30 мѣсяца Мая, лѣта Божьего нароченья 1570, панованья нашего року 41-го. «Sigismundus Augustus Rex m. p.»

Изъ Коронной Русской Метрики (Acta Metryki Ruskiej, seu privilegia palatinatum Kijoviae, Volyniae, Podoliae et caet., современная рукоп. in fol. Запис. кн. СССІV, л. 18—21), хранящейся въ С. Петербургѣ, въ Сенатскомъ Архивѣ. — Характерный подлинникъ сей привилегии находится въ архивѣ Кіевской Казенной Палаты.

№ 50. — 1570 Июня 5. Жалованная грамота жителямъ города Суража, о сравненіи ихъ въ правахъ съ Витебскими мѣщанами.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Ифлянтскій и иныхъ, ознаймуемъ симъ листомъ нашимъ нынѣшнимъ и напотомъ будучимъ. Билъ намъ чоломъ подданный нашъ, войтъ мѣста Суражскаго Иванъ Тарасовичъ Хима, самъ отъ себе и ото всехъ подданныхъ нашихъ мѣщанъ Суражскихъ, и повѣдиль перелъ нами, ижъ они въ томъ мѣстѣ Суражскомъ, правѣ, на границы отъ земли непріятеля нашего великаго князя Московскаго, до одного мѣста Суражскаго збираются, и, надѣючися ласки наше господарской около наданья вольностей тому мѣсту Суражскому, тамъ фундоватися хочутъ; а ижбы тымъ лѣтѣмъ и безпечнѣмъ въ ономъ мѣстѣ Суражскомъ люди осѣдали и кгрунтовалися, жебыхмо прикладомъ мѣста нашего Витебскаго, таковыя права и вольности имъ надали и узычили, якие права и вольности мають подданные наши мѣщане мѣста Витебскаго и ихъ уживають. А такъ, ижъ тое мѣсто наше Суражское на мѣстцу потребномъ, при границахъ земли великаго князя Московскаго заложено есть; тогда мы, для того, жебы ся подданные наши въ томъ мѣстѣ Суражскомъ, на границахъ Московскихъ, охотнѣмъ осѣдали, фундовали и будовали, зъ ласки наше господарской, за чоломбитѣмъ войта вышейписаного и всехъ мѣщанъ Суражскихъ, прикладомъ мѣста нашего Витебскаго, права и вольности имъ надаемъ и узычаемъ, такъ, яко въ артыкулѣхъ въ семъ листѣ нашемъ ниже описанныхъ доложено есть. Напервѣй, ижъ ни то иный, одно мы господарь войта въ томъ мѣстѣ, человека осѣлого, кого мѣщане Суражскіе обравши намъ ознаймать, тому мѣсту давати и установляти маемъ. А судити мѣ-

щанъ Суражскихъ о каждую рѣчь воеводове № 50. Витебскіе и намѣстники ихъ Суражскіе одмы сами не мають, одножъ маючи при собѣ войта мѣстскаго и колько особъ старшихъ мѣщанъ Суражскихъ. А если кто зъ мѣщанъ въ якую вину впадетъ, тогда воеводове и намѣстники ихъ вины большъ брати не мають, только отъ копы по шести грошей пересуду отъ вшелякихъ рѣчей сужоновъ воеводове и намѣстники ихъ беручи, на-полы зъ войтомъ и зъ мѣщанами старшими, которые на судѣхъ съдѣти будутъ, дѣлити мають. Дѣцкованье и отправление отъ каждой рѣчи сужоновъ, никотороу не выймуочи, водлѣ Статуту теперешнего нового на мѣщанахъ Суражскихъ брано и отправано быти маеть, черезъ поруку, о вшелякую рѣчь. А если кто зъ мѣщанъ Суражскихъ въ чомъ обвиненъ будетъ, а по собѣ слушное рукоемство людей добрыхъ, вѣры годныхъ и тамъ осѣлыхъ дастъ, таковой до вязенья замковаго и мѣстскаго сажонъ быти не маеть. Дозволяемъ тежъ имъ для людей мѣстскихъ должныхъ (окромъ злочинцовъ, то есть, злодѣевъ, зрадець и розбойниковъ) тюрьму особную въ мѣстѣ збудовати и подѣ сравою и владностью войта тамошнего мѣстскаго мѣти. А если у кого зъ мѣщанъ Суражскихъ якое покраденье рѣчей и маетности его ся станетъ, а доишутъ ли ся злодѣйства у кого лицомъ; тогда все то што ся найдетъ, цѣло и добровольнѣ тому, у кого будетъ покрадено, маеть быти вернено, а чого не достанетъ, то зъ дому и маетности злодѣйскоу маеть быти плачено; а самъ тотъ, хто въ томъ дознанъ будетъ, водлѣ выступу своего и права посполитого каранъ быти маеть. Къ тому тежъ, для лѣпшого и латвѣйшого выхованья и запоможенья ихъ, придаемъ имъ кгрунту оромого, лѣсу и сѣножатей около замку и мѣста Суражскаго на вси стороны на мило; которую землю они держачи, службу конную возную напротивку непріятелю нашему заступовати мають, по тому, яко ся мѣщане мѣста нашего Витебскаго зъ

№ 50. кгрунтовъ своихъ мѣстскихъ въ той службѣ военной заховываютъ, а особливо, на осады около замку, водѣ обычаю мѣсть и замковъ Рускихъ, пляцы, каждому мѣщанину по одному пляцу на одинъ домъ, розданы и заведены быти мають черезъ ревизоровъ нашихъ и черезъ врьдъ воеводы Витебского. А што ся дотычетъ пригоновъ и лововъ всякихъ, отъ того мѣщанъ Суражскихъ и сусѣдовъ ихъ выймуемъ и вольными дѣлаемъ. Торги тежъ вольные, безъ даванья и безъ плаченья мыта, подужного и никоторого плату иншого на насъ господаря и на врьдъ нашъ замковый, тому мѣсту Суражскому въ панствѣ нашомъ даемъ и уставляемъ: одножъ, естли бы мѣщане Суражскіе соль зъ Риги водою до Суража для продаванья провадили, тогда отъ берковеска соли по чотыри грошы давати, а гды бы воскъ зъ Суража до Риги або до Вильни и до иншихъ мѣстъ нашихъ водою спускали, або сухимъ путемъ везли, отъ камня воску до скарбу нашего платити повинны будутъ, черезъ руки мытниковъ нашихъ на коморахъ мытныхъ уставленныхъ, по тому яко и въ иншихъ мѣстѣхъ установлено будетъ. Даемъ тежъ и позволяемъ мѣщаномъ Суражскимъ въ мѣстѣ Суражскомъ въ году два ярмарки мѣти, вольныхъ и безмытныхъ, одинъ, почавши отъ дня святого Петра, черезъ три недѣли, а другій, почавши отъ дня Божого Нароженья, также черезъ три недѣли цѣлыхъ, безъ плаченья торгового, и ихъ на каждый годъ по два разы (яко въ семъ листѣ нашомъ описано) уживати вѣчными часы. А коли хто зъ мѣщанъ Суражскихъ сами межи собою побьются, а за дѣлкимъ погодятся: отъ того куницы заплатити на врьдъ тамошній замковый шесть грошей мають; а гды ся безъ дѣцкого поеднають, ино ничого врьду нашему замковому платити неповинны; а у посварцѣ межи собою естли бы ся одинъ выдалъ въ винъ, а другій бы ся не выдалъ: тогда тотъ вины на обоихъ врьдъ нашъ Суражскій брати и правити не

маетъ. А о всякую рѣчь, такъ малую, яко и великую, хотя бы о горло шло, мѣщанъ Суражскихъ, самыхъ и съ кимъ ся постороннымъ чловекомъ трафитъ, нигдѣ индѣ, только у Суражу, воеводове и намѣстники ихъ зъ войтомъ и мѣщаны старшими судити мають; а отъыватися до насъ господаря ни хто не маетъ, ажъ по судѣ. А кгда бы тежъ, за причиною воеводы тамошнего, што за службу которому зъ мѣщанъ Суражскихъ зъ ласки наше господарской было дано, того отъ нихъ не отдаляти, але при нихъ вѣчно оставляти маемъ. А во всякіе спадки по умерлой руцѣ, кому бы хто сходячи зъ сего свѣта што отказалъ, або кровному або обчому чловеку, въ тое мы господарь и урядъ нашъ Суражскій ничимъ ся вступовати не маетъ. Естли бы тежъ мѣщанинъ который Суражскій тамъ въ мѣстѣ Суражскомъ мѣшкати не хотѣлъ, а до иншого мѣста въ панствѣ нашомъ пойти волю мѣлъ: тогда таковому продавши домъ и пашню свою, со всемъ статкомъ и маенностью его до иншого мѣста въ панствѣ нашомъ, оказавшися уряду тамошнему, пойти вольно будетъ; а урядъ нашъ замковый никоторѣ трудности въ томъ ему задавати и его ничимъ гамовати не маетъ. Воскобойное, которое въ томъ мѣстѣ Суражскомъ приходити будетъ, на урядъ замковый Суражскій давано быти маетъ; а на опатренье потребъ мѣстскихъ важное и пострыгалное на мѣстскіе потребы, а дрягольное войту тамошнему къ его пожитку надаемъ и вѣчно оставуемъ. А около даванья подводъ, по тому, яко ся заховываютъ мѣщане въ мѣстѣ нашомъ Витебскомъ, заховати ся и мѣщане Суражскіе мають. Въ которыхъ всихъ рѣчахъ и артыкулахъ, въ семъ листѣ нашомъ описанныхъ, мы господарь и потомки наши тыхъ подданныхъ нашихъ мѣщанъ Суражскихъ, которые — кольвекъ въ томъ мѣстѣ осыли и напотомъ осыдати будутъ, заховывати вѣчными часы маемъ, и большихъ вольностей (о што бы насъ слушнѣ просили) водѣ

ласки наше господарской узычати имъ будемъ. Якожъ воеводѣ Витебскому, державцу Суражскому пану Станиславу Пацу, и напотомъ будущимъ воеводамъ Витебскимъ приказуемъ, ижбы они тыхъ мѣщанъ Суражскихъ при тыхъ вольностяхъ и артыкулахъ, въ семъ листѣ нашомъ описанныхъ, на вси потомные вѣчные часы заховали, и никоторыхъ трудностей надѣ то ни въ чомъ имъ не задавали. А на твердость того, дали есмо всемъ обывателямъ мѣста Суражского сесь нашъ листъ, до которого и печать нашу привѣсити есмо розказали. Писанъ у Варшавѣ, лѣта Божьего нароженья 1570, мѣсяца Іюня 5 дня. — «Sigismundus Augustus Rex.» «Лаврынъ Война, подскарбій дворный и писарь.»

Выписана изъ жалованной подтвердительноной грамоты короля Стефана, данной Суражскимъ мѣщанамъ 1576 г., Декабря 14, въ Городнѣ. Объ сии привилегіи внесены въ Литовскую Метрику (Запис. кн. LXII, л. 33 и слѣд.), хранящуюся въ Сенатскомъ архивѣ, въ С. Петербургѣ.

51. — 1571 Апрѣля 11. Грамота Ульскому державцу князю Константину Лукомскому, о развѣданіи въ порубежныхъ мѣстахъ о дѣйствіяхъ Московскаго Государя и ратныхъ его людей.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Лифлянтскій и иныхъ, державцу Ульскому князю Костюши Лукомскому, а въ небытности его самого на тотъ часъ на Уль, ино врьднику его тамошнему Ульскому. Розказали есмо воеводѣ Виленскому, канцлеру великого князства Литовского, старостѣ Лидскому и Мозырскому, державцу Борисовскому пану Миколою Юрѣвичу Радивилу, черезъ подданныхъ нашихъ того замку Ульского, або черезъ которыхъ иншихъ людей, вывѣданье въ земли непріятеля нашего великого князя Москов-

ского чинити, о справѣ того непріятеля нашего и войскъ его, гдѣ ихъ оборочаетъ. И ты бы, княже Лукомскій, а въ небытности его самого на тотъ часъ на Уль, тобѣ врьднику его тамошнему приказуемъ, ижбы еси всякимъ обычаемъ до того ся причинилъ, и, за писаньемъ пана воеводы Виленского, таковыхъ людей умѣтныхъ въ томъ дознавалъ, и къ тому самъ съ стороны своее причинялъ, и тыхъ, которыхъ его милость пошлетъ, за границу пропущалъ, всякую опатрность въ томъ и послушенство на листы его милости чинячи, конечно, абы то иначе не было. Писанъ у Варшавѣ, лѣта Божьего нароженья 1500-семдесятъ первого, мѣсяца Апрѣля 11 дня.

Подлинникъ писанъ на полулистѣ. Въ концѣ грамоты своеручная королевская подпись: Sigismundus Augustus Rex.» Ниже скрипа: Михайло Гарабурда, писарь. Былъ сложенъ пакетомъ и запечатанъ, имѣетъ на оборотѣ надпись: Державцу Ульскому князю Костюши Лукомскому, а въ небытности его самого на тотъ часъ на Уль, ино врьднику его тамошнему Ульскому.

Хранится въ Императорской Публичной Библіотекѣ.

52. — 1571 Іюля 5. Жалованная подтвердительноная грамота Кіевскому Печерскому монастырю, на право посылать старцевъ своихъ и слугъ въ Московскіе Свѣрскіе города, для сбора дани.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій, Инфлянтскій, панъ и дѣдичъ. Ознаймуемъ симъ нашимъ листомъ всемъ, кому — кольвекъ одно то вѣдати належитъ, ижъ што которые дани, перво сего, зъ стародавна, за предковъ нашихъ королей ихъ милости и великихъ князей Литовскихъ, и за короля его милость Жикгимонта, славной памяти пана отца нашего, архимандритомъ Печерскимъ пречистѣ Богоматере въ Кіевѣ, зъ земли непріа-

№ 53. тельской Московской, съ городовъ Сѣверскихъ, съ Стародуба и съ Новгорода, на монастырь Печерскій приходятъ, о чомъ же первѣй сего, за чоломбитѣмъ велебного отца Иларіона Песочинского, архимандрита Печерского, и всеѣ братьи чернцовъ того монастыря, и за оказанѣмъ передъ нами листовъ короля его милости Жикгимонта, пана отца нашего, которыми его милость имъ по тую дань до земли Московской, за вѣдомостью воеводъ Кіевскихъ, чернцовъ братью ихъ, людей добрыхъ и вѣры годныхъ, посылати дозволить рачилъ, — мы, вырозумѣвши съ тыхъ листовъ короля его милости пана отца нашего, и тежъ бачучи на то, ижъ тотъ доходъ оному монастырю Печерскому зъ наданья предковъ нашихъ приходитъ, а не хотѣчи тежъ пожитковъ церковныхъ уменьшати, зъ ласки нашею такимъ же обычаемъ, оному архимандриту Песочинскому, за границу до земли Московской, до помѣненныхъ городовъ Сѣверскихъ, по тую дань, за вѣдомостью воеводъ и всихъ пановъ Кіевскихъ, братью чернцовъ и слугъ монастырскихъ, людей добрыхъ и вѣры годныхъ посылати дозволили, и на то имъ листъ нашъ, съ подписанѣмъ руки нашею и за печатью великаго князства Литовскаго дали. А такъ били намъ чоломъ велебный отецъ, тотъ же Иларіонъ Песочинскій архимандритъ Печерскій и вся братья черниці того монастыря Печерского, и оный листъ нашъ передъ нами покладали, просячи, абыхмо ихъ во всемъ подлѣ того заховаючи, и теперь по оную дань до земли Московской вѣдати допустивши, знову имъ тую вольность листовъ зъ канцелярей нашею коруны Польскоѣ (кгдажъ вѣе на сесъ часть земля Кіевская съ певныхъ причинъ до коруны прилучена есть) подтвердили. Ино мы видячи въ томъ быти прозбу ихъ слышную, zostавили есмо ихъ при стародавномъ обычаю; и постерегаячи тежъ, ижбы ся перкви Божьей ничого не уменьшило, зъ ласки нашею господарской, за границу до тыхъ городовъ

украинныхъ Сѣверскихъ, до Стародуба и до Новгорода, симъ листовъ нашимъ, по тую дань, коли того часть воля стародавнаго обычаю прійдетъ, посылати имъ дозволяемъ. Маеть архимандритъ межи чернцовъ и слугъ монастырскихъ людей добрыхъ и вѣры годныхъ обравши, перво то объявити и оповѣдити воеводѣ Кіевскому, а въ небытности воеводиной справцъ нашему воеводства Кіевского и всимъ паномъ Кіевскимъ, и тогда вѣе, за такою вѣдомостью, по тую дань послати до земли Московской мають. А кгда они зася съ тою данью назадъ прійдутъ, ино также воеводѣ Кіевскому, альбо справцъ нашему оповѣдити мають, съ чимъ оттоль пріѣхали: вѣдѣже воеводы Кіевскіе, альбо справцы наши того будутъ съ пильностью постерегати, абы черезъ тые посланцы ихъ панствы наши якошкгоды и трудности не приняли. И на то дали есмо архимандриту и всимъ чернцомъ братьи монастыря Печерского сесъ нашъ листъ, зъ нашею корунною печатью. Писанъ у Варшавѣ, лѣта Божьего нароженія тысяча пятьсотъ семдесятъ перваго, мѣсяца Іюля пятого дня, панованья нашего року сорокъ второго. — «Подпись руки князя подканцлерого. Справа его жъ».

Изъ Коронной Русской Метрики (Acta Metryki Ruskiej, s. privilegia palatinatum Kijoviae, Wolyniae, et c., современн. рукоп. in fol. Запис. кн. СССР, л. 199 — 202), хранящейся въ С. Петербургѣ, при Правительствующемъ Сенатѣ. Въ заглавіи грамоты отмѣчено: Вольность архимандриту Печерскому по дань до Москвы посылати.

53. — 1571 Сентября 1. Жалованная грамота королевскому писарю Евтиху Высоцкому, о предоставленіи ему, въ награду за службу, въ пожизненное держанье Кіевского Межигорскаго монастыря и Вышегородскаго городища, со всеми угодьями и доходами.

Жикгимонтъ Августъ, Божьею милостью

король Польскій, великій князь Литовскій, Рускій, Прускій, Мазовецкій, Жомойтскій, Кіевскій, Волынскій, Подляскій, Ифлянтскій, панъ и дѣдичъ. Ознаймуемъ тымъ листовъ нашимъ всимъ воебѣ и каждому зособна, кому то вѣдати належитъ, ижъ мы маючи ласкавый взглядъ на вѣрные и пильные службы дѣяка канцлерыи нашею корунноѣ Евтиха Васильевича Высоцкого, которыми онъ будучи при насъ господари, въ канцлерыи нашей корунной большой черезъ часть немалый, въ справахъ нашихъ и рѣчи посполитой вѣрнъ и пильнъ ласку нашу господарскую заслужовалъ и на тотъ часть еѣ заслужуетъ, и хотѣчи его и впередъ охотнѣйшимъ къ службамъ нашимъ и рѣчи посполитой учинити, за причиною певныхъ особъ, пановъ радъ нашихъ на тотъ часть при насъ будучихъ, которые ся за нимъ о то до насъ причинили, зъ ласки нашею господарскоѣ дали есмо ему, якожъ и тымъ листовъ нашимъ даемъ, до его живота, монастырь названный Межигорье, церковь Рускую вѣры и закону Греческаго, при замку нашемъ Кіевскомъ, который лежитъ надъ рѣкою Днѣпромъ, отъ Кіева въ дву миляхъ; а къ тому землю пустую, людьми неоселую, подъ тымъ же монастыромъ лежащую, названую Вышегородскую, у Вышегорода, со всимъ яко ся тотъ монастырь Межигорье и тая земля Вышегородская зъ давныхъ часовъ, сама въ собѣ, въ пожиткахъ и обыходѣхъ своихъ маеть, съ землями пашными и зъ млыномъ, который подъ тымъ же монастыромъ есть, зъ лѣсами и пасеками и зъ данью медовою, съ озерами, и съ бобровыми гонями, и зъ ловы рыбными и звѣринными и пташиными, зъ ѣзами, зъ виноградомъ, который на той земли Вышегородской есть, зъ сады, и зъ мыгомъ тымъ, которое тамъ у Вышегорода здавна на насъ идетъ, и зъ иными всякими пожитки и доходы, которые къ тому монастырю Межигорскому и къ той земли Вышегородской здавна належать и якіе бы се кольвекъ тамъ выналезть

и прибавити могли. Маеть онъ самъ, до своего № 54. живота, тотъ монастырь Межигорье, и землю Вышегородскую, со всимъ тымъ яко есть вышей въ томъ листѣ описано, держати и всякихъ пожитковъ отъ того приходящихъ уживати, и тое мыто Вышегородское, по тому яко здавна было бирано, выбирати и всякіе пожитки тамъ собѣ, яко налѣтнѣ розумѣючи, розмножати и прибавляти и къ пожитку своему оборочати. А на свѣдетство того всего, и печать нашу королевскую до того листу нашего притиснути есмо велѣли. Данъ въ Варшавѣ, дня 1-го Сентября мѣсяца, року отъ нароженія Сына Божьего 1571, а панованья нашего 42-го.

Изъ Коронной Русской Метрики (Acta Metryki Ruskiej, s. privilegia palatinatum Kijoviae, Wolyniae etc., современн. рукоп. in fol. Запис. кн. СССР, л. 93 — 94), хранящейся при Правительствующемъ Сенатѣ, въ С. Петербургѣ. Въ заглавіи грамоты отмѣчено: Доживотье на Межигорскій монастырь въ Кіевѣ и на землю, альбо городище Вышегородское, тежъ въ Кіевѣ, отъ замку Кіевского въ дву миляхъ, Евтихови Васильевичу Высоцкому, писарю канцлерыи корунноѣ Рускихъ справъ.

54. — 1572 прежде Іюля. Жалованная подтвердительная грамота Владимирскому владычному боярину Тимоѣею, на вѣдѣніе церковнымъ сельцомъ, съ обязанностью къ службѣ, по данной записи тамошняго епископа Феодосія.

Жикгимонтъ Августъ, Божьею милостью король Польскій, великій князь Литовскій, Рускій, Прускій, Жомойтскій, Мазовецкій и иныхъ, ознаймуемъ симъ листовъ нашимъ нынѣшнимъ и напотомъ будучимъ. Повѣдилъ передъ нами шляхетный Тимоѣей Васильевичъ, бояринъ владычества Володимирскаго, ижъ велебный епископъ Феодосей, владыка Володимирскій и Берестейскій, далъ ему на вѣчность село церковное владычества Воло-

№ 54. димерского, названное Оедоровецъ, въ которомъ людей остьлыхъ пять, а пустовщинъ три; на штожъ владыка листъ свой подъ печатью и съ подписью руки своею ему далъ и передъ нами его вказывалъ, просячи насъ, абыхмо зъ ласки нашею королевскою, тое село ему на вѣчность подтвердили. Ино, хотяжъ владыка не мѣлъ и не маєтъ моцы, кромъ воли и вѣдомости нашею, никому имѣній костелныхъ подаванья нашего на вѣчность роздавати: але мы зъ ласки нашею королевскою, на чоломбигѣ того Тимофея то вчинили, на тую прозбу его ласкаво есмо позволили и позволяемъ, и тое село Оедоровецъ ему подтверждаемъ и вѣчными часы умоцняемъ. Маеъ онъ самъ, и его жона, и дѣти и потомки ихъ, водѣ листу владычина на то ему даного, оное село Оедоровецъ, со всеми людьми тамъ остьлыми, и съ пустовщинами и со всеми кгрунтами пашными и непашными, проробками и зарослями и сѣножатями, и съ платы и доходы и со всемъ, яко ся тое село Оедоровецъ само въ собѣ, въ широкости кгрунтовъ, въ пожиткахъ, границахъ и обыходѣхъ своихъ здавна и нынѣ маеъ, держати и уживати вѣчно и на вѣки непорушно, будучи воленъ тамъ собѣ дворецъ збудовати и людьми осадити, прибавити и роз-

ширити, и всякіе пожитки якіе сѣми похочутъ причинити и примножити; а съ тогожъ теперешнему владыцѣ и по немъ будучимъ владыкамъ Володимерскимъ, ничимъ инымъ, одною службою боярскою шляхетскою, конемъ служить, а иныхъ некоторыхъ службъ владыкамъ служить, и жадныхъ работъ робити, и платовъ платити и давати не маеъ; также владыкове Володимерскіе у него и въ его потомковъ оного села Оедоровца, яко его вѣстного, вѣчистого, некоторыми причинами вжо отнимати и собѣ его привлашати не могутъ и не мають вѣчнѣ. И на то дали есмо ему сѣсь нашъ листъ зъ нашою печатью. Писанъ въ Варшавѣ, на соймѣ вальномъ коронномъ; . . . (*) дня, року отъ нароженья Сына Божьего 1572, а панованья нашего сорокъ третьего. — «Реляцыя вельможного Валентія Дебнського.»

Изъ Коронной Русской Метрики (Записки СССР, л. 137). хранящейся при Правительствующемъ Сенатѣ, въ С. Петербургѣ. Въ главѣ грамоты отмѣчено: Подтверженіе Тимофею Васильевичу, боярину владычества Володимерского, на село названное Оедоровецъ, ему отъ владыки Володимерского и Берестейского Оеодосея данное.

(*) Въ подл. здѣсь пробѣлъ.

VIII. МЕЖДУЦАРСТВІЕ.

55. — 1572 послѣ Іюля. Грамота Московскаго царя Іоанна Васильевича Литовскимъ раднымъ панамъ, въ отвѣтъ на предложеніе ихъ Литовско-Польскаго престола сыну его, царевичу Оеодору.

Милосердія ради милости Бога нашего, въ нихъ же посѣти насъ Востокъ свѣше, во еже направити ноги наша на путь миренъ, и со смиреніемъ, благочестивнѣ, его милосердіемъ, осмотрѣніе сотворити къ покою хрестіянскому. Сего убо Бога нашего въ Троицѣ славимаго милостию, мы великій государь, царь и великій князь Иванъ Васильевичъ всея Русіи и самодержецъ, Влодимерскій, Московскій, Новгородскій, царь Казанскій, царь Астороханскій, государь Псковскій, и великій князь Смоленскій, Тѣерскій, Югорскій, Пермскій, Вятцкій, Болгарскій и иныхъ, государь и великій князь Новгорода Низовскіе земли, Черниговскій, Резанскій, Полоцкій, Ростовскій, Ярославскій, Бѣлоозерскій, Удорскій, Обдорскій, Кондинскій и всея Сибирскіе земли и Стѣверные страны повелитель, и государь отчинный земли Лифлянтскіе и иныхъ, нашего государского повелѣнія слово великаго княжества Литовскаго паномъ радъ: Миколаю Пацу, бискупу Кіевскому; Миколаю Радивилу, княжѣ на Дубинкахъ и Биржахъ, воеводѣ Виленскому, канцлѣру великаго княжества Литовскаго, старостѣ Лидскому и Мозырскому, державцу Борисовскому; Стефану Ондри-

вичу Збаражскому, воеводѣ Троцкому; Яну № 55. Яронимовичу Ходкевичу, кграбѣ на Шкловѣ и Мыши, старостѣ Жемойцкому, моршалу земскому великаго княжества Литовскаго, старостѣ Ковенскому, державцу Плотелскому и Телшовскому; Юрью Юрьевичу Остику, воеводѣ Мстиславскому, старостѣ Бряславскому; Яну Петровичу Кискѣ, крайчему великаго княжества Литовскаго. Что есте присылали до насъ гонца своего Стефана Матвѣева съ грамотою, и въ той грамотѣ своею къ намъ писали есте: вѣдомо уже нашей милости естъ, что великаго государя Жигимонта Августа, короля и великаго князя, брата нашего, а вашего государя въ животѣ не стало, Богъ душу его милости съ сего свѣта взялъ; а вы, рада, и такожъ княжата и панята и все рыцерство того славнаго панства великаго княжества Литовскаго, яко люди вольные, по отходѣ его королевской милости съ сего свѣта, намовляючи и обмышляючи, кого бы вы собѣ за государя и великаго князя на тое славное панство великое княжество Литовское взяти мѣли, яко сами съ иными паны радами того панства есте до того охотливы, такъ и вси станы и рыцерство того панства такожъ суть прихилны, и вѣрно вси зычите, чтобы потомство нашея милости великаго и хрестіянскаго государя надъ вами пановало; якожъ за певнымъ постановленіемъ, сына нашего молодшего его милость царевича князя Оеодора хо-